


Diidz ne rdeed
guielmban



New Testament in Zapotec, Mixtepec (MX:zpm:Zapotec,
Mixtepec)

Diidz ne rdeed guielmban

New Testament in Zapotec, Mixtepec (MX:zpm:Zapotec, Mixtepec)

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2018-11-16

PDF generated using Haiola and XeLaTeX on 4 Mar 2019 from source files dated 1 Mar 2019
5317ca58-7555-5e4c-a420-e1e9210e2df2

Contents

MATEO	1
MARCOS	50
LUCAS	81
JUAN	133
HECHOS	171
ROMANOS	215
1 CORINTIOS	235
2 CORINTIOS	254
GALATAS	267
EFESIOS	275
FILIPENSES	282
COLOSENSES	287
1 TESALONICENSES	292
2 TESALONICENSES	296
1 TIMOTEO	299
2 TIMOTEO	306
TITO	311
FILEMON	314
HEBREOS	316
SANTIAGO	330
1 PEDRO	335
2 PEDRO	341
1 JUAN	345
2 JUAN	350
3 JUAN	351
JUDAS	352
APOCALIPSIS	354

XTIIDZ NDZON DIOS MI_{NE} PQUIAA MATEW

¹ Jesús men ne pxeel Dios ga, lo xtii Abraham, lo xtii David, ga brieequia me. Lëë grë xmengoldoo me nu:

² Abraham goc pxoz Isaac,
Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsieel Judá),
Far goc pxoz Srom,
Srom goc pxoz Aram.

⁴ Aram goc pxoz Minadab,
Minadab goc pxoz Naasón,
Naasón goc pxoz Salmon.

⁵ Salmóngoc pxoz Booz (Rahab brieelë tsieel Salmon),
Booz goc pxoz Obed (Rut brieelë tsieel Booz),
Obed goc pxoz Isaí.

⁶ Isaí goc pxoz rey David,
David goc pxoz Salomón (lëë Salomón ga gop tsieel Urí wnaa ne bionie David).

⁷ Salomón goc pxoz Roboam,
Roboam goc pxoz Abí,
Abí goc pxoz Asá,

⁸ Asá goc pxoz Josafat,
Josafat goc pxoz Joram,
Joram goc pxoz Uzí.

⁹ Uzí goc pxoz Jotam,
Jotam goc pxoz Acáz,
Acáz goc pxoz Ezequí.

¹⁰ Ezequí goc pxoz Manasés,
Manasés goc pxoz Amón,
Amón goc pxoz Josí,

¹¹ Josí goc pxoz Jeconí (bio zla xpëed Josí).

Len dze ne nac Jeconí mëed, len dze co güeybee zhoo zha Babiloin grë zha Israel, beynie zho zho Babiloin.

¹² Babiloin, ga gol tib xpëed Jeconí brieelë Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,
Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,
Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,
Matán goc pxoz Jacob.

¹⁶ Jacob co nagon goc pxoz José, men ne ptsieelnia Marí.

Marí goc xníaa Jesús, Men ne nacle diidz ga cxeel Dios guiaad lo guidzliu.

¹⁷ Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta len dze ne bey zho Babiloin; stsiida zho wban desde len dze co haxta bdziñ dze ne goc me mëed.

Gol Jesús
(Lc. 2:1-7)

¹⁸ Znu bzhaac Marí grop José len dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mēēd zdo me. ¹⁹ Zeene bien Joséw, mine been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhliaanse nzozit me, sacne racladz me nriee xquielto Marí. ²⁰ Zhgab co no me, tibaque blulo tib xanj Dios lo me lo mcaal.

—José (xiag David) —rēb anjl co—, peet tsienied guic luu, pcaania Marí gac me tsieel luu; sac gon mēdyeen ne zoney me ga, Espíritu Sant bnabey pquialo win zdo me. ²¹ Zeene gal dze ne laa win gal, JESUS cueelē luu win, sca grieelē win sac win csilaa grē menladz win lo dol.

²² Ga briequia mine bnee Dios padzeela, zeene bzeet zha ne biadnee xtiidz mew, rēb zho:

²³ Bii zan to ganle zeene laa tib mēēdbgui yquiaalo zdo tib wnaayeen ne gard gnee mgui lo.

Zeene laa win gal, Emanuel grieelē win.

(Emanuel nac zig nacne rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí.

²⁵ Laa me wban tipse grop me per ib bgaald me Marí, haxta bded dze ne laa mēdyeen co gol. Bdzin dzew, laa win gol, dzigo bleelē José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lē Belén, ga gol Jesús. Lēetse len dze co zob men ne lē Herod nac me rey ne rnabey dan co.

Goc palal dzew, laa bla zha ne runbey lo mel ziaad nēz ne rlan ngbidz bdzin Jerusalén, ² bnabdiidz zho rēb zho:

—¿Pa lo dien no mēēd ne gac men ne gnabey ladz to nu, mēēd ne griin gol ga? Bdzion no tib mel nēz ne no no, mel co blu lo no laa win gol-le, min co ne ziaad no nu ziaaddzian no win.

³⁻⁴ Grē menguiedz Jerusalén, zeene bin zhow bzee zdo zho. Laa Herod, rienndraa me zha gun me, bnabey me pcaalsa grē zha ne nac pxoz non, grē zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga. ⁵ Dzigo rēbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén,

niicle ne winraaw lo grē guiedz ne ngab Judé, per nroob nona;

sac gon ga griequia tib men ne gnabey,

men ne so yquiaanap grē men Israel, ne nac zho zha ne ngab lo naa.

⁷ Nacne zhliaanse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rēb me lo zho:

—Ga gołtsie gołtsieguib mēēd co. Zigne gdziel to win, gołtēniegash diidz lo naa nu, zeena ye naa ga gagan naa win.

⁹ Blozhse sca pso me diidz lo zho, laa zho bio nēz stib laa zho zie. Laa mel ne gon zho briequia nēz ne ziaad zho ga, laa ma neraque lo zho; haxta bdzin ma ngali guic yu ne no mēdyeen co, gataa laa ma blēz.

¹⁰⁻¹¹ Zeene gon zho laa mel co blēz ga, per nli rley zho. Bzēēb zho len yu co, gon zho laa mēdyeen co no ga grop xniala win, dzigo pquitsgzhil zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeene laa gza zha rac co wbi Belén, laa ne nieted zho Jerusalén, stible nêz bzhên zho zey zho; sac bnee Dios lo zho lo mcaal, rêb me tsienied zho diidz lo Herod.

¹³ Laa gza zha rac co zey, zeene güeylulo tib xanjl Dios lo José lëetse nixgues me, rêb anjl co lo me:

—José, na zeena guche i pcaanie mëdyeen qui nêz grop xniaa win, golsê nêz Egipt, sac laa Herod yquiaguib win gut me win. Egipt, ga cuêznie to win, na naaque guialnie diidz lo to zeene laa to gbi ga.

¹⁴ Guieel cogazh guche José, pcaanie me mëdyeen co nêz grop xniaa win, laa zho ziese nêz Egipt; ¹⁵ ga blêz me haxta bdziñ dze ne laa Herod gut. Ga briequia mine bnee zha ne biadteed xtiidz Dios padzeela, zeene znu bnee zho: “Nêz Egipt no xpëed naa, zeene bredz naa me.”

Bnabey Herod gut grê mëddlas

¹⁶ Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëëdbgui yeen ne no grê guiedz co, desde win ne golnêz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. ¹⁷ Guielñedox ne bio grê miech co, ga briequia mine bzeet Jeremí men ne biadteed xtiidz Dios padzeela, zeene znu rêb me:

¹⁸ Tib redz nroob ne zëëb leñ guiedz Ramá.

Grê wnaa Judá, zha ne ziaad lo xtii Raquel,
mbanse rac zho, roon zho no zho xquielñe xpëed zho;
zha rna zha ne cchoobladz zdo zho, sac laa xpëed zho gut.

¹⁹ Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nêz Egipt, rêb me lo José:

²⁰ —José, guche i, pcaanie mëdyeen qui nêz grop xniaa win, golbire nêz Israel stib; laa zha ne quianañ win ga gutle.

²¹ Dzigo brieenie José mëdyeen co ga grop xniaa win, bio me nêz laa me wbire zeynie win nêz Israel. ²² Per zeene bin José lëëque tib xpëed Herod men ne lë Arquelá, men co biaan xlugar Herod zobnabey xtan Judé, bdzieb José ndziñnie me mëdyeen co nêz co. Dzigo bneeque Dios lo me lo mcaal tsie me nêz Galilé.

²³ Gol zho Galilé, bdziñaque zho guiedz Nazaret, ga wbannie zho mëdyeen co. Ga briequia mine bzeet grê zha ne biadteed xtiidz Dios padzeela, zeene rêb zho: men Nazaret guiab miech nac Jesús.

3

Psilo Juan Bautist noseed me miech (Mr. 1:1-8; Lc. 3:1-9, 15-17; Jn. 1:19-28)

¹ Leñ dze ne psilo Juan Bautist noseed Juan miech xtan zha Judé, dan zit ne no me ga; ² rnee me lo zho:

—¡Golsaan xquielntseeb to, golnab lo Dios gun me to perdon grëtaa dol ne ziyun to; sac gon laa dze bdziñle laa me csilo gnabey!

³ Lëë Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëëb tib dan zit, rnee me:

“Golzhixcuaa nêz ne ted men ne rnabey,
golsaan grê guielntseeb ne run to.”

⁴ Niapse guits lad camell niaa xab Juan, guid nac ncuane ndxie leñ me, ni niapse nguzhanch ni dzin dan row me.

⁵ Nzian grê menguedz Jerusalén, grê men Judé, grê men ne no gax ro guiubee Jordán, rrie zho rieuiaadiag zho zhiwseed me. ⁶ Grê zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grê zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—¡Miech ngoopdo!, masaque nac to zig nac meel! Nan to na lëë, loxaque chobnis to laa to laale lo grë guielnëdox ne ziaadyob. ⁸ Led scada gon, none zaacse gban to zeena glu nli dib zdoo to psaan to grë xquielntseeb to. ⁹ Ni gacniatsde to guiab to loxaque por nace to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham. ¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquiibyag me cchug me yag ne sca nac.

¹¹ Nli tib wrobnisse nu rnedz naa lo to, nacsew zig tib señ, sac lëë gdib rluw laa to psaan xquielntseeb to, laa to bzëëb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguald naa gac naa. ¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëëg grë paj ne guiadbee me ga, gdzind dze guiuuw.

Brobnis Jesús

(Mr. 1:9-11; Lc. 3:21-22)

¹³ Len dze co brieë Jesús nëz Galilé zie me nëz ro guiubee Jordán, laa me zie par cchoobnis Juan me. Bdziñ me ¹⁴ nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

¹⁵ Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne mine rnabey Dios.

Dzigoraa pchoobnis Juan me. ¹⁶ Laa me zieriee lo nis zeene laa zhan gbaa bzhial, gonpaa me zig rlu tib palom rlu Espiritu Sant laa me ziad-zëëb bdziñ me guic me, ¹⁷ ni blu zëëb tib tsi men co nëz gbaa rnee me:

—Xpëëd naa gon nac men qui, rleynie naa me, men nziuu nac me lo naa.

4

Gocladz mendox niungüet ma Jesús

(Mr. 1:12-13; Lc. 4:1-13)

¹ Zeene blozh brobnis Jesús, dzigo güeynie Espiritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

² Zeene goc choo ngbidz choo guieel no me dan co ni tib lë peet rowd me, laa me pcaabedz ³ hor co bdziñ mendox zaatne no me ga, rëb ma:

—Telne nli Xpëëd Dios nac luu, bnabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co, ⁶ rëb ma lo me:

—Telne nli Xpëëd Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuaane nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co, ⁹ rëb ma lo me:

—Bui ganle, grëse ncuaan qui gon gnedz naa lo luu telne squitsgzhil luu lo naa niina, gunnon luu naa.

¹⁰ Horco pquiab me rëb me lo ma:

—¡Biche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguiual yquitsgzhil luu; ni mine rnabey me min co none gun luu.”

¹¹ Dzigoraa biche ma lo me, dzigo bdzin bla anjl bdeed zho ncuane dow me.

Psilo Jesús pseed me miech nēz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brie me ga güey me nēz Galilé, guiedz ne lē Nazaret.

¹³ Zhisaque goca, brieque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí. ¹⁴ Ga briequia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rēb Isá:

¹⁵ Grēse menzit ne ndxie xtan Galilé,

nēz dan ro guiubee Jordán, gax ro Nisdoo Galilé, zaatne goccheñ Zabulón ni Neftalí;

¹⁶ miech ne no lo ncow nac zho,

per niina tib biini nroob biab lo zho.

Ladzniale guielgut no zho,

per laa biini co biab lo zho par grie zho ga.

¹⁷ Ga psilo Jesús pseed me miech, rnee me lo zho csaan zho xquieñtseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozmeñ

(Mr. 1:16-20; Lc. 5:1-11)

¹⁸ Len dze co, tib dze zieded Jesús gax ro Nisdoo Galilé gon me chop ngoozmeñ, tib zho lē Simón Pedr, stib zho lē Ndrés; grop bets zho lēetse laa zho noron guix ne rgaa meñ lo nis. ¹⁹ Dzigo bredz me zho, rēb me lo zho:

—¡Goltē goltēnañ zhits naa! ¡Laa naa cxeñ to tsie to stib gooz, tsietop to grē miech ne sēeb xnēz Dios!

²⁰ Horcogazh psan zho guix ne rgaa meñ ga, laa zho zienañ zhits me.

²¹ Zhisaque bzē me ro nis co, gon me laa Jacob ni Juan (lēē grop xingan men ne lē Zebedé ga) no tib len barcw gza pxoz zho, noquiaabdie zho guix ne rgaa meñ; dzigo bredz me zho. ²² Zigne bredz me zho biaanñieque pxoz zho barcw ga, laa zho zienañ zhits me.

Zēeb diidz grētaa milagr ne run Jesús

²³ Dipse xtan zha Galilé, guiedz ne rdziñtaa Jesús rie me grē yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grē men rzacne, tel pe guielguiidztaa rzac zho.

²⁴ Tel pa lotaaw zēeb diidz scataa run me grē milagr, haxta nēz Siria bin miecha. Nzian grē men co brie ga bdziñnie zho grē zhimguidz zho lo me: no grē men rzacne co noguitnie mendox, no zho rlan guielguidz gutye, no zho gutoo dipse xcuerp, no zho rlan grē pe stib guielguidz, nogaa zho rlan grē pe yoob; grēse zho beñguiac me zho.

²⁵ Zaatne zieetaa me, miech guizhiu ne nañ zhits me, grē zha Galilé, grē zha Decápolis, grē zha Jerusalén, grē zha Judé, haxta grē zha ne no stib nēz ro guiubee Jordán.

5

Cho nac zha ne wen zie

(Lc. 6:20-23)

¹ Tib dzew, gon Jesús laa grē miech guizhiu co bdzin lo me, dzigo bzoquia me glaa tib guic gui win. Ga zob me, bdzin grē xpēdscuel me lo me, ² dzigo psilo me pseed me zho, rēb me:

³ —¡Wen zie zha ne rien ib none gbig zho lo Dios, sac ib dzin zho zaatne rnabey me!

⁴ ¡Wen zie zha ne mban rac roon niina, sac schoobladz Dios zdoo zho!

⁵ ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

⁶ ¡Wen zie zha ne racladz guñ grë miñe rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zacnie Dios zho parne grieelo guñ zhow!

⁷ ¡Wen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

⁸ ¡Wen zie zha ne mbele zdoo, zha ne biaanmbele lo xtol, sac zanlo zho Dios!

⁹ ¡Wen zie zha ne noxco zaacse gban miech, tilð zho, sac masaque mëëd gac zho lo Dios!

¹⁰ ¡Wen zie zha ne loxaque porne quiayun zho miñe rnabey Dios, rquianañ miech zho, sac ible zdziñ zho zaatne rnabey me!

¹¹ 'Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne rliladz to naa, ¡wen zie to ga! ¹² ¡Nley golco zdoo to, nguieel golgac, sac gon tib guieñzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

¹³ 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, ¿pa dien rquiina? ¡Lëë gdib rliaala lo guizh, zaatne rded rzë miech rzëëni zhow!

¹⁴ 'Nac to zig tib biini ne noziini lo guidzliu. Griee lod tsongueets to, sac tib guiedz ne ndxie glaa tib guic gui, griee lod tsongueetsa. ¹⁵ Golguien ganle nacd biini parne tsolana, sinque parne gziiniw lo grë miech ne no len yu. ¹⁶ Zaacse sca golgac, miñe rquiin min co golgun, masaque lëëw gac zig tib biini; zeena zeene gan miech biini co zien zho ganle pa lotaa men nroob nac PxoZ to men ne no gbaa.

¹⁷ 'Guiabde to togo bod laa naa zial zialtichee naa ley ne psan Moisés, o grëgaa miñe bnee zha ne biadteed xtiidz Dios padzeela; sac led mincod zial naa, sinque laa naa zial guñ naaw zigne no gaca. ¹⁸ Gneli naa lo to ganle: Laga niaa guidzliu rii, laga niaa gbaa, ib none gac miñe zhobnee lo ley, miñe bneegaa zha ne biadteed xtiidz Dios, ni tib lë paat gdzëëda. ¹⁹ Gacxe waa zha ne quiits tib ley niicle miñe mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

²⁰ 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, griee lod gdziñ to zaatne rnabey me.

Nodne gut miech

(Lc. 12:57-59)

²¹ 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co.

²² Sca rnee ley co, per zig nac zha ne gon në rac zdoo ran samiech, rriequia beetle zho ga, ye zho rieguial quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³ 'Gacxe waa tel ziesan to tib gon, per lo pcoogle zo to rsoladz to rdilnie to tib samiech to, ²⁴ gase golsan gon co, goltsie goltsienabgazh perdon lo zha ne rlëë to lo ga, gbireraa to dzigo gdeed to gon co. ²⁵ Zha ne sca rlëënie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib. ²⁶ Gneli naa lo to ganle griee de to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷ 'Nanlaque to ganle zha rnee stib ley ne biaan lo xmengol to, rneew: "Zha ne nole tsiel, zigtaa mguiw zigtaa wnaaw, nodne tsonie zho zha ne led tsiel zho." ²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib leque xcuerp to, ledle dib nacsew tsietsobe gabil. ³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, ledle nitlo to len gabil dib nacse xcuerp to.

Nodne csëbtsieel miech
(Mt. 19:9; Mr. 10:11-12; Lc. 16:18)

³¹ 'No stib ley znu rnee: "Mgui ne racladz csaan tsiel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." ³² Per gni naa lo to ganle: telne quiangobd tsiel zho stib mgui, ni rsëbtsieel zho, lëëque zha rguib ga yquianie tsiel zho stib mgui. Mgui ne ctsieelnia wnaa co, dol ga gun zho, sac gon nole tsiel wnaa co.

Nodne yquidie miech

³³ 'Ziyon to ganle zha nac stib ley ne biaan lo xmengol to rneew: "Zha ne gzeet le Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow." ³⁴ Per gni naa lo to ganle: nodne sca gzeet to le Dios, per ni gbaa nodne ne sca gzeet to, sac gon ga nac zaatne zob Dios; ³⁵ per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; ³⁶ guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow. ³⁷ Gacxe waa ncuane rgobey to zrieelo gun to, golguiab: "zun naaw", togo riengaa to grieloda, golguiab: "grieloda"; tsoode to dieen cho gzeet to, sac gon led Diosdraa rnabey min co.

Nodne ctsire miech guielne
(Lc. 6:27-36)

³⁸ 'No stib ley znu rnee: "Tel cuee zho tib bziaalo luu, guiaand luu scase bleque stib bziaalo zho, tel cueegaa zho tib lay luu, scaque been blee stib lay zho." ³⁹ Sangua naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. ⁴¹ Zeene griequia zha ne gnabey to güey to xyo zho tib grol hor, golgüeya, haxta tib hor goltsie güey tow. ⁴² Zha ne gnabtaa pe cos lo to, goldeeda; zig nac zha ne ziadtiin, goldeed ncuane ziadtiin zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdziel xtiidz luu bleynie zho, scagaa zha ne rlëe lo luu, blëenie zho." ⁴⁴ Per led scada gon, jnone zaacse gac to lo zha ne rlëe lo to! jZha ne rgodee to, golnab lo Dios gunlay me zho! ⁴⁵ Zeena sca glu nli xpëed men ne zob gbaa nac to. Golgan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaba rquiin zho grëse zho, rbed me dien cho ngable lo me, chogaa ngabd lo me. ⁴⁶ jGase nasca golwi! Tel loxaque zha ne ndzieeldiidz to zha cose rleyne to, jniacxe zгаа to guielnzaac ne gdeed Dios? Haxta zha ne mazdraa ntseeb run min co. ⁴⁷ Tel loxaque zha ne nacse menlidz to, lo zha cose zaacse rnee to, jpe lëe guielwen ga na rlu to? Haxta zha ne runbeyd Dios run min co. ⁴⁸ Goltsoxco sca ndzinli golgac, zigne rleyne Pxoz to (men ne zob gbaa) grëse miech, scaque none gun to.

6

Zha ne run xyudar samiech

¹ 'Zeene gun to xyudar samiech to, ib gunde to zaatne ndxiepa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed Pxoz to men ne zob gbaa. ² Gacxe waa, zeene gun to xyudar zha ne guien pe

yquiiin, gooldide tow zigne run grë zha ne rquiaalo rquia zdoosamiech; sac zha co tel pe ncuuane rgad zho, rzo zho len yadoo, rzo zho ro nëz rlozhd yquiaabdzie zhow par gacnanpaa miecha, zeena zha ne gona guiab zho: ¡Zha wentaa zha qui! ¡Gneli naa lo to ganle ne sca rianzuiuu zho lo miech, lëele gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacnana. ⁴ Dzigo scagaa Pxoos to nroob guielnzaac ne gneedz me lo to, sac tel me gresew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëele guielnzaac ne yгаа zho ga. ⁶ Golguien zeene gzodiidznie to me, golsëeb len lidz to dziits golsioog ro yu, ga golzodiidznie me. Ible tedsod nroob guielnzaac gneedz me lo to, sac niicle ncuuane mazdraa ngueets zhliana, ran mew.

⁷ Ni zeene nozodiidznie to me, gunde to ncuuane nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. ⁸ Gunscade to, sac me ne nac me Pxoos to gardle gnee to xliaadz to lo me laa me nanle pe nac ncuuane rquiiin to. ⁹ Gacxe waa zeene gzodiidznie to me, znu golnee:

Dios, luu ne nac luu Pxoos no, zob luu gbaa;
luuse nac men ne mazdraa ndzon.

¹⁰ Luu nac men ne gnabey no,
mine gnabeytaa luu zigne raca gbaa,
scaque none gaca lo guidzliu nu.

¹¹ Been guielnzaac bneedz ncuuane dioow no nadze.

¹² Bzhiguiel been no perdon grese dol ne ziodziuuu no lo luu,
zigne rdziuuu no samiech no perdon grë falt ne run zho lo no.

¹³ Gdeete luu diidz yquiiil mendox no,
been guielnzaac bla no lo ma.

Luu nac men ne rnabey, men ne rap poder, men ne mazdraa nroob. Mine rnab no nu,
ndionpaa no zun luuw.

¹⁴ Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque Pxoos to men ne zob gbaa, zun me zho perdon.

¹⁵ Zha ne gund samiech zho perdon, niicle megaa gund me perdon xtol zho.

¹⁶ Striba, zeene nocuan to nozodiidznie to me, gunmbande to lo to. Sac grë zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëele guielnzaac ne yгаа zho ga. ¹⁷⁻¹⁸ Gunscade to, nguieel golgac ine golzëë biegw guic to, golquiib lo to, zeena ni tib choot guiend laa to nocuan, loxaque Pxoos to gacnana, sac grese ncuuane rac ngueets ran mew. Grese ncuuane rac, me rana, me nac men ne gneedz tib guielnzaac nroob lo to.

¹⁹ Tsienalde to loxaque dien zha gapchen to lo guidzliu rii, sac nac ncuuan lo guidzliu rii rban ngbaana, rnitlo mxila, haxta noxtseeb guioochena. ²⁰ Mazd goltsoxco yгаа to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil. ²¹ Golgona ganle, guielnzaac ne gon gunlo to, ga glu pa gdziin xalm to, sac zaatne gunlo to guielnzaac co ga nac zaatne gdziin xalm to.

²² Rrieequia nac bziaalo to zig nac tib biini. Telne niapse lo grë ncuuane ndzinli rwi to, dzigo gdipse xcuerp to no lo guielbiini. ²³ Laa telne loxaque lo grë ncuuane nonguiel rwi to, dzigo gdipse xcuerp to no lo guielcow ga. ¡Zha rnazhe lo guielcow co, tel lëeque biini noyac guielcow!

²⁴ 'Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

²⁵ 'Gacxe waa, gni naa lo to ganle: Tsode to zhgab dien zha gban to lo guidzliu rii, pa griee pe gow to, pe guie to, pe gacwxabгаа to. Stiba, ¿niacxe mazdraa non guielwagw lo xquielmban to? Xabгаа tow, ¿niacxe mazdraa nona lo xcuerp to? ²⁶ Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoз to men ne zob gbaa, men co rdeed ncuaane row ma. ¿Tel to gon, mazdraa non to lo grë mguin co! ²⁷ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

²⁸ 'Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee ne ganle zëeb dan, zha rrooba, led yeda rio zhgab dien zha gacwxaba, per niow rnaw; ²⁹ gni naa lo to ganle, per ni rey Salomón con grë xab niazh me, blud me scataa niow.

³⁰ 'Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, ¿pe lel to dzigo ygacwxabd me, niicle ne squi gard guien to dib zdoo to gnalo to me?

³¹ 'Tsode to zhgab sca guiab to: "¿Bay pa griee pe dioow ne, pa griee pe dio ne, pa griee pe dziaacwxab ne?" ³² Grë miech ne runbeyd Dios, tibaque zhgab co rio zho. Sanguie to golsoladz ganle, Pxoз to men ne zob gbaa, nanle me pe nac grë xliaadz to, ³³ me nac men ne gneedz ncuaane yquiin to, per ib none glo tsoxco to gban to zigne rnabey me. ³⁴ Golguien sca tsode to zhgab dien zha ted to gzhe widz, sac gzhe widz co zhaalaeque xco ne ziaad. Tib tib dze zhaase zhaase zhgab ne ziaadniew.

7

*Nodne gzee zdoo ne cho zha rac**(Lc. 6:37-38, 41-42)*

¹ Blozh ga rëbchaa me lo zho:

—Golguien, ib gunde to në gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to. ² Sac gon tel zha rzac to samiech to, scasaque sac Dios to.

³ ¿Lëda ga gon tso to lozhd gzee zdoo to dien cho pe run, ni nenda mazdraa mine run to! ⁴ ¿Pe ro to glisqui to mine run stib zho, ni tel mazdraa nac mine run to? ⁵ ¿Golguien sca glude to ncuaane nacde to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zactseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzëeni maw.

*Ncuaane gnabtaa ne zгаа new**(Mr. 1:22; Lc. 6:31, 43-44, 47-49; 11:9-13; 13:24-27)*

⁷ 'Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ⁸ Sac grëse zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzlë me, rcaania me zho.

⁹ 'Golwi ganle, zig nac to zeene rnab xpëed to quiet gow win, ¿niacxe ziazh to co to tib quie nia win? ¹⁰ Zeene rnabгаа win mel, ¿niacxe zdeed to tib meel lo win? ¹¹ Led rioxco to lëe niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelej Pxoз to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëëb nëz co, per nëz co zгаа miech guielmban ndzon ne rdeed Dios. Sac gon zha ne mban zigne notaa guic zho, rrieequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiil yeen, per zha ntseeba, masaque nac zho zig grë coyot blë. ¹⁶ Zigne runbey miech tib yag por nex ne rquia low, scaque wen wen golwi zha nac ncuane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets. ¹⁷ Tib tib yag nex rdeedsew xnexa. Tib yag wen, nex wen rquia low; scagaa yag ncuana, nex ncuana rquia low. ¹⁸ Grieelod yquia nex ncuana tib lo yag ne rquia nex wen, ni grieelodgaa yquia nex wen tib lo yag ncuana. ¹⁹ Gacxe waa grë yag ne rquia nex ncuana, paat rquiinda, lëë gdib rruga, rlozh ga rzëëg zhow. ²⁰ Min co nagon rne naa lo to, zha ne sca guiaad, por ncuane run zho ga gunbey to cho nac zho.

²¹ 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdzind zho zaatne rnabey Pxoza naa. Sac zha ne nlipaa run mine rnabey me, zha cose gdzin ga. ²² Gal dze co, nzian zha ne grieequia gnë lo naa: "Conque rdziunbey no luu, blactaa name bio no bionee no Xtiidz luu lo miech, nzian milagr ne bdziun no, haxta mendox bdziuncxoon no zeene bzeet no lë luu." ²³ Niicle sca gnë zho, ib ycaaniad naa zho, sonëz naa zho; sac ni lalnu beend zho ncuane ndzinli.

²⁴ 'Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. ²⁵ Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

²⁶ 'Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. ²⁷ Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me, ²⁹ sac rlu men rnabey nac me, led yed me rseed miech zig rseed grë maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zëëb cho gui win co, miech guizhiu ne nal zhits me, ² tibaque brieëquia tib mgui ne rlan guiedzdox ne lë lepr, wbig me pquiitsgzhib me lo Jesús, rëb me:

—Tebaa siguieel luu gunguiac luu naa.

³ Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbel!

Horcogazha laa grë guiedz co bnitlo. ⁴ Dzigo rëbchaa Jesús lo me:

—Bina ganle, choot lo gzodiidz luu gon zha biac luu; sinque güey lo pxoz güeyson gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

Biac tib zha ne rquia dziin tib lo menguiib

(Lc. 7:1-10)

⁵ Loxaque bdzin Jesús guiedz Capernaum, laa tib men ne rnabey lo xmenguiib zha Roma bdzinle lo me, rnab men co gunguiac Jesús tib zha ne quia xtsiin me, rëb me:

⁶ —Been tib guielnzaac beenguiac tib zha ne rquia xtsin naa, laa zho nix lidz naa ib gacd grial zho, mban rac zho yoobdox ne rquia zho.

⁷ Dzigo rëbchaa Jesús:

—Peet nacda, na sē naa guio ne gunguiac naa zho.

⁸—Coo —rēb menguiib co—, rieguaīd csodziin naa luu sēē luu haxta lidz naa. Nanpaa naa zrieelo luu nugazh gnabey luu guiac zho. ⁹ Sac zig nac naa no zha ne rnabey lo naa, ni ron naa miñe rnabey zho; scagaa tel̄ guiep naa tib lo zhaguiib ne rnabey naa: “Güey nu”, rie zho; rnegaa naa: “Dē nu”, riaad zho; zha ne runгаа dziin lo naaw, miñe rnabeytaa naa zho, run̄ zhow. Scaque luu nagon̄ nanpaa naa zrieelo sca gnabey luu guiac xmoz naa.

¹⁰ Zeene gon̄ Jesús sca rnee men̄ co, rley me, rēb me lo grē zha ne zienal̄ zhits me ga:

—Lo grē zha Israel, gard gon̄ gan̄ naa tib zha ne squitaa dib zdoo rnalo Dios. ¹¹ Ni gol̄quiaadiaga gan̄le, zdziñ dze grēle zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. ¹² Laa grē zha Israel, niicle nac zho zha ne nac diidz gdziñ ga, lel̄ lo ncow nēz ley guiaan̄ zho, ga tso zho goonnē zho, haxta gow lay zho lo guiel̄nēdox co.

¹³ Blozh ga rēbchaa me lo menguiib co:

—Bzē nasca, gocnan̄ gan̄le zigne bliladzse luu guiac xmoz luu, sca gaca. Horcogazha laa moz co biac.

Biac xniadzoop Pedr

(Mr. 1:29-34; Lc. 4:38-41)

¹⁴ Laa zeene bdziñ Jesús lidz Pedr, gon̄ me laa xniadzoop Pedr nix rlan xlēē. ¹⁵ Dzigo bded me zaatne nix zhuz co, zigne bzhen̄ me nia zhuz laa xlēē co blēz. Horcogazh guche zhuz been̄lo zhuz ncuaane dow zho.

¹⁶ Ziedzele dzew, laa ngbidz rzēēblew, zeene bdziñ grē miech co, nzian grē zha ne nosacsi mendox bdziñnie zho lo me. Grēse zho been̄guiac me, goctox me lo grē mendox ne nosacsi zho ga, ben̄cxoon̄ me ma; ni zha ne rlangaa pe stib guiel̄guidz, grēse zho been̄guiac me. ¹⁷ Ga brieequia miñe bzeet Isá, men̄ ne biadteed xtiidz Dios lo miech padzeela, zeene rēb me: “Grēse xquiel̄nē ne, grēse guiel̄guidz ne rziaac ne, me biw.”

Zha ne racladz sēēb xnēz Jesús

(Mr. 4:35-41; Lc. 8:22-25; 9:57-62)

¹⁸ Zeene gon̄ Jesús scataa ndal miech ne goclo lo me ga, dzigo bnabey me xpēēdscuel me gzhixcuaa zho, sac laa zho no tedquia stib nēz ro nisdoo co. ¹⁹ Dzigo wbig tib men̄ ne nac maistr ley lo me, rēb maistr co:

—Zaatne tsietaa luu gon̄, sēnal̄ naa zhits luu.

²⁰ Dzigo rēbchaa me:

—Gocnanā gan̄le, naa ne nac naa Mgui ne pxeel̄ Dios, peet rapd naa nu, mazd zig nac grē mēz, grē mguin̄, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzēnal̄le zhits me, rēb zho:

—Ye naa gon̄ sēnal̄ naa zhits luu, per bzhiguiel̄ bneedz diidzbey cuēz naa gangazh naa tsoliu pxoz naa.

²² Pquiab me rēb me:

—Dēnal̄ zhits naa. Psaan, nzian grē zha gut no, tsow tsiequeets zho samengut zho.

²³ Dzigo laa me bzēēbnie xpēēdscuel me tib len̄ barcw, laa zho zie. ²⁴⁻²⁵ Laa zho zie lo nis co, tibaque zeene psilo brieē tib medox, masaque rlis me lo nis co, laaw psilo rzēēb len̄ barcw. Dzigo lēēlēd güey zho güeycuaan zho me, sac lēētaque nixguies me.

—Ligier gan̄le —rēb zho—, blee mcaal̄ lo luu. ¡Bui gan̄le laa ne nitlo lo nis rii, csaand luu guet ne nu!

²⁶ Dzigo rēbchaa me lo zho:

—¡Pe nacne squitaa rdzieb to? ¡Gardaque dzigo lēē gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blēz me co, niicle nis cow laaw bredze. ²⁷ Zeene gon̄ zhow, bzee zdoo zho.

—Bay chozhe waa nac men̄ rii —rnee zho—. ¡Zha nac ne haxta me, haxta nis ron xtiidz me?

Men Gadar ne nosacsi mendox

(Mr. 5:1-20; Lc. 8:26-39)

²⁸ Laa zho bdzindze stib nêz ro nisdoo co, zaatne nac xtan zha Gadar, zeene briequia chop mgui ne nosacsi mendox, bdzin lo Jesús ga. Zha ntseeba, rdzieb miech zho, choot rdete nêz co. Len baa brieë grop mgui co bdzin zho ga, ²⁹ nguiedz roptsie zho rnee zho:

—jPeet gund luu no Jesús, psaan no! Rdziuunbey no luu, Xpëéd Dios nac luu. Ne nligaa been guielnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bñab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziin no.

³² —Niinaga sca goltsie —rëb me.

Zigne psaan mendox co grop mgui co, güey ma bdzin ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

³³ Zha ne quianap grë nguts co, gzase zho bzhooñ. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga.

³⁴ Grëse miech co, brieë zho zieso zho. Zeene bdzin zho gon zho laa Jesús zo ga, dzigo bñab zho lo me siguiel me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzëëb zho len barcw, bdzin zho guiedz Capernaum stib, sac ga nac zaatne rbëz Jesús len dze co. ² Zhisaque goc bdzin me, laa zho bdzinniele tib men rzacnë lo me, dipse men co gutoo, ib gacd së me. Lo yag zhoob me bdzinnie zho me ga.

Zeene gon Jesús dib zdoo grë zha co rnalo zho ne me gunguiac men rzacnë co, rëbchaa me lo men rzacnë co:

—jNley bloo zdoo luu xin! jLaa naa benle perdon grëse xtol luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “jQuiaguitnie men qui Dios gon squi rzë xtiidz me!” ⁴ Bienga Jesús sca rza zdoo zho, dzigo rëbchaa me:

—Lëda i gon squi rza zdoo to. ⁵ Nli nganda guiab ne lo miech: “Laa naa benle perdon grëse xtol luu”; per grieelod lega guiab ne laa ne gunguiac zho. ⁶ Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacnë co:

—jNiinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey. ⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieë ga. Ro nêz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

¹⁰ Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdsuel me.

¹¹ Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdsuel me:

—jMod scataa na rownie xmaistr to grë zha ngoopdol, grë zha beed ne nac recaudador!

¹² Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacnë ga rquiin zho, jniacxe squiin zho zaatne no zha ne ndip ndaan? ¹³ Golşoladz ganle znu rnee Dios: “Laa naa racladz

gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca nee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëédscuel Jesús?

(Mr. 2:18-22; Lc. 5:33-39)

¹⁴ Bdzinaque xpëédscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëédscuel luu? Ni no grë no zha farisé, zhiga zhiga laa no rcuanle.

¹⁵ Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per zdziñ dze zeene laa mgui co gbiche, ni zeene laa dze co gdziñ, dzigosi nagon rieguial tso zho guielnë, rieguial ycuan zho.

¹⁶ Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox. ¹⁷ Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

Brieaban tib mëdwnaa yeen

(Mr. 5:21-43; Lc. 8:40-56)

¹⁸ Lëëtaaque sca quianee Jesús lo xpëédscuel Juan Bautist, zeene bdziñ tib mgui ne nac zha non yadoo. Zigne bdziñ me pquiitsgzhib me lo Jesús, rëb me:

—Been tib guielnzaac së luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

¹⁹ Dzigo bio Jesús nëz zienal me zhits men co, gza xpëédscuel me. ²⁰ Lad grë miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús, ²¹ sac tibaque güeynie guic me, ziac me totsaque yгаа xab Jesús nia me. ²² Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³ Laa zeene bdziñ Jesús lidz men rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëëb tsi zho roon zho, tib ruid ne rac. ²⁴ Dzigo rëbchaa me lo zho:

—Golree nëz ley, sac gon gute mëëd qui, nixguesse win.

Zha ne rlëë, zha ne rzhidzniegaa me, laa zho brieë ley. ²⁵ Dzigo laa me bzëëb len yu zaatne nix mëëd co, bzhen me nia win. ¡Horcogazha laa win guche!

²⁶ Grëse guiedz ne ndxie dib gax ga, gocnan miech scataa milagr nroob ne been me, bleeban me mëëd co.

Biac chop zha ne rold lo ni tib zha ngop

²⁷ Zeene laa Jesús wbi ga, nëz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdziñ Jesús yu ne rbëz me, laa zho wbig lo me. Dzigo rëbchaa me lo zho:

—¿Dib zdoo to dzigo lëë rliladz to zrieelo gunguiac naa to?

—Dib zdoo now —rëb zho.

²⁹ Dzigo pquiaania me zhits bziaalo zho, ni rëb me:

—Mïne bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, ³¹ ni zigne brie zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

³² Loxaque wbi grop zha ne biac lo ga, laa bla zho bdziñlaque, bdziñnie zho tib men ne nosacsi mendox, psanngop ma men co. ³³ Dzigo beñcxoon Jesús mendox co, zeene laa ma bzhoon laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—jWaltaa gard dzian ne tib men ne squitaa gun grë milagr qui!

³⁴ Laa grë zha farisé rnee:

—Ma ne rnabey lo mendox nacie men qui, gane rrieelo runcxoon me mendox.

³⁵ Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

³⁶ Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guien cho tib zha ne gacnie zho, rac zho zig grë mëcwxiiil yeen ne guien xbaxtor.

³⁷⁻³⁸ Tib vuelt haxta rëb me lo xpëedscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne golle gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëedscuel me ga, bzo me zho tsienee zho Xtiidz Dios lo miech, bdeed me poder lo zho guncxoon zho mendox zaatne nosacsi ma miech, ni gunguiac zho grë men rzacñë.

²⁻⁴ Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz griee zha Roma Israel),

ni Judas Iscariot (zha ne güeyto Jesús).

Pxel Jesús zha ne tsienee xtiidz me

(Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. ⁶ Zaatne no grë zha Israel, gase goltsie; lëë grë mëcwxiiil ne nonziaab ga.

⁷ Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

⁸ Grëse zha ne rzacñë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

⁹⁻¹⁰ 'Peet güeyde to, xab tow, lab tow, mine nacwse to, mine quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuane gow to.

¹¹ 'Guiedz ne gdziinta to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. ¹² Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, ¹³ golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. ¹⁴ Zha ne sca siguield ycaania to, golriiegazh lidz zho; guiedz ne siguield zho yquiaadiag zho mine nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo. ¹⁵ Gnelli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

¹⁶ 'Nsin golso, golguien ganle rriequia tib mëcwxiiil yeense nac to, ni laa naa rxel to zaatne no grë coyot dox. Ndooldadz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel. ¹⁷ Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, ¹⁸ haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtudz naa lo grë zha co, ni lo grëragaa miech ne nacd zha Israel.

¹⁹ 'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to. ²⁰ Led tod gnee, sinque, jzhiEspiritu PxoZ to men ne zob gbaa, men co gnee ga!

²¹ 'Zlëenedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil zho, tsielo zho zho lадznia zha ne gut zho. ²² Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdziindraa dze lozh. ²³ Guiedz ne no to, zeene laa miech csilo yquiaana to, golriee ga, goltsie stib guiedz. Gnelli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

²⁴ 'Golwi ganle zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho. ²⁵ Tel zha gun miech maistr, scaque gun zho mëëdscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuane gnee miech to, sac gon niicxe naa name ne nac naa Dad, mendox rnee zho nac naa.

²⁶ 'Gdziebde to, zdziin dze ne glu ganle cho zienal mine nac diidzli, chogaa zienal guielntseeb, gal dze co grësew xoobnen.

²⁷ 'Grëse mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew. ²⁸ Gdziebde to miech, golguien ganle no tib men nroobraa, lëë men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ 'Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladzd me ma, ni tib ma guete telne gdeete me diidz. ³⁰ Pelel to dzigo csaan me, haxta guits guic tow, grësew ngaba lo me. ³¹ Gdziebde to sca, golguien ganle nonraa to lo tib dzoon mguin.

³² 'Gnelli naa lo to ganle, zha ne glu lo miech nacie zho naa, scaque naa zeen gal dze co zlu naa lo PxoZ naa men ne zob gbaa, nacie naa zho. ³³ Sangue zha ne ctoladznie naa lo miech, scaque naa ziep naa lo me runbeyd naa zho.

³⁴ 'jGuiabde to togo laa naa zial loxaque par cuin wense miech! Lëda gon, ye zial naa zialgunctil naa zho. ³⁵ Sac zha ne sëëb xnëz naa, zlëënie xpëed zho zho, tel mëëdgaaw, zlëënie pxoz zho zho; scaque men wnaaw, zlëënie xinzhizh zho zho, zha ne nacgaa nguzhizha, zlëënie xnïaa tsieel zho zho. ³⁶ jLëëque menlidz miech gac zha ne glëë gan zho!

³⁷ 'Zha ne mazdraa rquia zdoos glëenie pxoz zho zho, glëenie xniaa zho zho, glëeniegaa xpëed zho zho, porne gun zho mine rnabey naa, peet xtsiind zha co par ygab zho xnëz naa. ³⁸ Scaque zha ne yquia zdoos cueeladz zho zho guiaadnal zho zhits naa, grieelod ygab zho lo naa. ³⁹ Sac grëse zha ne rquia zdoos guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnëz naa, ib zгаа zho guielmban ndzon co.

⁴⁰ 'Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho. ⁴¹ Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho yгаа. ⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëedscuel naa, ib tedsod zdeed Dios guielnzaac ne tsieguial zho.

11

Zha ne pxeel Juan Bautist

(Lc. 7:18-35)

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieaque, güey me grë guiedz ne ndxie gax ga, güeyseed me grë miech co.

²⁻³ Len dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëedscuel Juan güeynabdiidz zho lo me, dien pe lëele Men ne zëëble diidz cxeel Dios lo guidzliu ga nac me, te dzigoraа gdziñ men co ye. ⁴ Dzigo rëbchaa me lo zho:

—Grë ncuane bin to rne naa, grëgaa ncuane gon to run naa, goltsie golzodiidza lo Juan. ⁵ Ran to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieegan. Xtiidz Diosa, laaw quiagaaz lo grëse zha ne rquiina. Grësew, golzodiidza. ⁶ Ni golguiab lo me, dichos zha ne racchopd guic, sinque tiblrique rac zho rililadz zho cho nac naa.

⁷⁻⁸ Zeene laa xpëedscuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riod zho dan.

⁹ Nligaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ¹⁰ Me ga raquiet lo Xtiidz Dios zaatne znu rnee:

Sxel naa tib zha ne tednerga lo luu,

zha co gzhixcuaa nëz ne ted luu.

¹¹ Ne nligaa lo grëse mgui ne zieded lo guidzliu gard grieequia tib zha ne mazdraa non lo Juan Bautist; per zha ne gon winraа zaatne rnabey Dios, nonraа zha co lo me.

¹² 'Desde psilo Juan noseed me miech zhapaа racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëëb zho xnëz me. ¹³ Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso. ¹⁴ Juan gon biaad niina zig no diidz guiaad Lí; golgacnan sca ganle cho nac me. ¹⁵ Zha ne racladz guien zho zha nac grë mine none naa nu, ¡yquiaadiag zhow!

¹⁶⁻¹⁷ 'Nac grë miech rii, riend zho pe racladz zho. ¿Cho ganle run zig run zho? Lëe zho run mine run mëedlas ne rio wguir ro nëz, niicle rool xcompañer win di nguieel rried win, niicle roolгаа zho di ngan, roond win. ¹⁸ Sac gon biaad Juan, ran zho rowd me tel pe ncuane row zho, ried me ncuane rie zho, dzigo laa zho rnee mendox nacie me. ¹⁹ Blozh ga ziaad Mgui ne pxeel Dios, ran zho row me, rie me, laa zho rneeque, lega

rowcho me, lega riecho me, ib rienḁ me cho rtsieelsa me, haxta grē zha ngoopdoḁ, haxta grē zha yozh ne rtop dimi ne razh lo zha Roma rzēnie me. Sca rnee zho, sangue zha ne rgaa guielḁiini ne rdeed Dios, rien zho cho nac zha ne ziaadgun xtsiin me.

*Miech ne bzhiguielḁ ncaania xtiidz Jesús
(Lc. 10:13-15, 21-22)*

²⁰ Blozhse ga, dzigo psilo Jesús bzeet me miḁe yгаа grē zha ne pcaaniad xtiidz me; sac nzian guiedz ne güey me niicle gon zho grētaa milagr ne been me, per ib psaand zho xquielḁntseeb zho, rēb me:

²¹ —¡Probsaxe grē menḁ guiedz Corazín, grē menḁ guiedz Betsaid! Sac gon gonḁaa zho grē poder ne rap Dios, per ib psaand zho xquielḁntseeb zho. Telḁ niaca miḁe nianḁ grē menḁ guiedz Tiro, grē menḁ guiedz Sidón, grē milagr ne gon zho benḁ naa, ib ndedsod mban niac grē zha co nio zho guielḁnē, zēēb nsaan zho xquielḁntseeb zho, mbig zho lo Dios. ²² Gacnanḁ zha Corazín, gacnanḁ zha Betsaid sca ganle, galḁ dze ne gon Dios guielḁwxtis, lēētaa caxtigw ne yгаа zha Tiro ni zha Sidón, mazdraa miḁe yгаа zho. ²³ Scaque zha Capernaum, masaque rzac zho niina zha nziuuraa lo Dios, per gacnanḁ zho ganle haxta guiet lo ncowdoo ne guey menḁdox ga guey zho; sac gon telḁ niaca miḁe nianḁ zha Sodom grē milagr ne ranḁ zho noyunḁ naa, ible nsaan zha co xquielḁntseeb zho, nitlod zho. ²⁴ ¡Gacnanḁ zha Capernaum ganle galḁ dze ne gon Dios guielḁwxtis, lēētaa caxtigw ne yгаа zha Sodom, mazdraa miḁe yгаа zho!

²⁵ Dzigo bzodiidznie Jesús Dios, rēb me:

—Dios luu ne nac luu Pxoḁ naa, luu rnabey gbaa luu rnabey guidzliu, rnedz naa xquizh lo luu sac grē miḁe noyunḁ luu nu niina bdeete luu diidz niacnanḁ grē zha raca, sinque laaw blu luu lo grē zha ne nac zig grē mēēdlas. ²⁶ Sca quiayunḁ luu, sac ib scale racladz luu gaca.

²⁷ Blozh ga rēb me lo grē miech ne ndxie ga:

—Grēse ncuaaḁe ranḁ to quiayunḁ naa, Dios menḁ ne nac Pxoḁ naa, me bneedz poder rii lo naa; sac ib laa me bzo naa, naa gūna. Xpēēd me nac naa, wen wen runḁbey me naa, scagaa naa wen wen runḁbey naa me. Choot runḁbeyd me zigne runḁbey naa me, per zha ne gacladz naa gunḁbey me, zunḁbey zho me.

²⁸ 'Grēse to ne nac to zha ne nē noded, rdib rdzag to quiaguib to dienḁ zha guiaanwen zdoo to, goḁtē lo naa, naa gneedz tib wdziiladz ndzon lo to. ²⁹ Nligaa goḁbig lo naa, goḁtēnaḁ zhiwseed naa, goḁgac tib miech tiblibladz, tib miech ndooladz zigne nac naa; zeenaḁ gap to descans co. ³⁰ Nacda ncuaaḁe nganḁ, nacda ncuaaḁe guiab to glēbde to gunḁ tow.

12

*Dze ne rdziiladz zha Israel lo dziin
(Mr. 2:23-28; Lc. 6:1-5)*

¹ Lenḁ dze coquew, tib dze lēētaque dze ne rdziiladz zha Israel lo dziina, bded Jesús zaatne zēēb zhobxtil grē xpēēdscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. ² Gonḁ bla zha farisew, dzigo rēb zho:

—¡Lēda i gonḁ noyunḁ to, noguiits to ley i! Golguienḁ ganle dze nda nac dze rii.

³ Pquiabchaa me rēb me lo zho:

—¡Pe gard glab to zaatne ziaad ganle zha beenḁ rey David, tib dze zeene pcaabedz me grē me zha ne ziegza me, ni zienied zho pe gow zho? ⁴ Rneew, bzēēb me lenḁ yadoo güeynab me guietxtil ne nac gon, downie me grē zha ne ziegza me ga, ni loxaque zha ne nace pxoz row guietxtil co, ¿pe led bdiitsd me ley ga? ⁵ Lo xley Moisés name zhobnee ganle zha haxta dze ne rdziiladz to lo dziin runḁ grē pxoz dziin lenḁ yadoo, ni rneeda doḁ ga sca runḁ zho. ⁶ Goḁwi ganle zha rats ley par gac dziin lenḁ yadoo, ni yadoose ga, gacnanḁ to ganle lo to nu zo menḁ ne mazdraa non lo yadoo.

⁷ 'Rnee Dios lo Xtiidz me, quiambēzd me dienḁ peraa gonḁ miech, dienḁ peraa cogon zho lo me, sinque miḁe racladz me guienḁ zho yquia zdoo zho samiech zho. Telḁ niaca miḁe nli

rien to min co, zien to gdziibdolde to zha ne rapd dol. ⁸ Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹ Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. ¹⁰ Lad grë miech ne ndxie len yadoo co, no tib mgui ne mband tib nia; porque laa zha farisé bñabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bñabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹ Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiiil to tib len blë nroob, ¿led zëëb lëë rie to riebee to ma? ¹² Tel sca rquia zdo to mëcwxiiil, ¿golguien ganle mazdraa gon non miech lo tib mëcwxiiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—¿Bzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne brieë zho ga laa zho psilo bñediidz dien zha gdeeda diidz gut zho Jesús. ¹⁵ Bien Jesús sca no guic zho, dzigo mazd brieë me ga. Miech guizhiu ne zienal zhits me, grëse men rzacne ne zienal ga, beenguiac me zho; ¹⁶ per pso me diidz lo zho, choot lo gzodiidz zhow.

¹⁷ Ga brieëquia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëë men rii bzooblo naa gun xtsin naa, rleynie naa me, rzac zdo naa grë ncuane run me. Zded naa zhiEspíritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yan me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele, csaand me zdo zho; zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

²¹ Haxta zeene gan me ye grë zha ne nacdraa zha Israel, laa zho gnalo me.

Rëb zho mendox nacie Jesús

(Mr. 3:20-30; Lc. 6:43-45; 11:14-23; 12:10)

²² Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui. ²³ Grë miech ne ndxie lo me ga, per nli bzee zdo zho, rnee zho:

—¿Bay pe lëë men qui naye nac Men ne zëëble diidz ga cxeel Dios!

²⁴ Zeene gon zha farisé sca rnee grë miech co, rzachaa zdo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrieelo runcxoon me mendox.”

²⁵ Bien Jesús sca rza guic zho, dzigo rëbchaa me lo zho:

—¿Ncuane gacd gon rnee to! Tel tib wxtis nadien lëëque zha ne nacie zho csilo tilnie zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co? ²⁶ Scaque mendox nagon, telne lëëque lëë ma guncxoon samendox ma, ¿pe nale na bñitlo ma! ²⁷ Nana ne squi rnee to Beelzebú nacie naa gane rrieelo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase

naganle rlu doḷdox i quiayun to, squi rnee to. ²⁸ Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

²⁹ ;Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho! ³⁰ Tel mendoxa rlëenie ma naa, ni nanle to ganle zha ne rlëe lo ne, gacnied zho ne.

³¹⁻³² 'Gacnan to ganle, grëse doḷ ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

³³ 'Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuangaaw, nex ncuanaque rquia low. ³⁴ ;Scaque to nagon zhin mendox! ;Zha nan to nadien gac to miech wen, tel desde zdo to ntseeb? Miech ntseeb to gane squi rzë xtiidz to, sac gon, jgrëse diidz ne rree ro miech, zdo zho rzaw! ³⁵ Gacxe waa, zha ne mbe zdo, niapse diidz wen, diidz ndooladz nac xtiidz zho. Sangue zha ne ntseeb zdo, niapse diidz ntseeb, niapse diidznë rreeche ro zho. ³⁶ Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rree ro zho. ³⁷ Sac gon zigne rzë xtiidz zho niina, min co cueequia zho gal dze co, o mincogaa ctedquie zho.

Racladz zha farisé gan zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdo to nëz lo Dios, ;zha nacraa milagr ne racladz to gan to? ⁴⁰ Stibaque milagr gon gan to, lëe min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. ⁴¹ Ni gal dze ne gon gun Dios xquielwxtis me, ib stedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás. ⁴² Scaque rein ne bzob nëz Sabá, stedquie me to gal dze co, sac tel rein co golwi ganle pa lo guidzliu ne brie me baaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ 'Telne csaande to xquielntseeb to i gon, low lozh to. Sac to zig bzhaac tib zha ne psacsi mendox. Zeene brie ma zdo zho, güey ma güeyquianzë ma grë dan zit güeyguib ma dien pa cuëz ma. Gonse ma rdziel zaatne cuëz ma, ⁴⁴ rëb ma: "Mazd laa naa gbireque guia naa zaatne brie naa ga." Zeene biire ma bdzin ma zdo zha co, gon ma nroob lugar no, pale tib yu dets, ⁴⁵ nacie güeyaque ma güeyxi ma zgadz samendox ma, ma ne mazdraa ntseeb blëznie ma zdo zha co. ;Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdzin, racladz zho gzodiidznie zho me. Per brieelod nzëeb zho haxta len yu, sac scataa miech guizhiu ne ndxie lo me ga. ⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

⁴⁸ Pquiab me rëb me:

—;Xnia naa ye, bets naa ye?

⁴⁹ Blis nia me, blu me grë xpëedscuel me, dzigo rëbchaa me:

—Zha ne gon nac zig zha rii, lëe xnia naa ga, lëe bets naa ga. ⁵⁰ ;Sac grëse zha ne run mine rnabey Pxo naa men ne zob gbaa, grëse zha co nac bets naa, nac bzian naa, nac xnia naa!

13

*Nac Xtiidz Dios zig zhobxtil**(Mr. 4:1-20; Lc. 8:4-15)*

¹ Blozh ga brieë Jesús güey me ro nisdoo. Ga zob me, ² zeene gon me nzian miech ne nocaalsa lo me ga, nacne biepe me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw. ⁵ Mine bliaal zaatne nac lad quie, znuse znuse blana, ⁶ per zeene laa lo ngbidz brieë, znusaque bgoolä, bidzgow; sac guiend nroob low. ⁷ Mine bliaal zaatne nac len yag guiets co, zeene laa yag guiets pxii, bnitlogaw. ⁸ Sangue mine bliaal zaatne nac lo liu naal, blana, brooba ni goca; lo tib tib zhob co no zhimziona brieë galptsii zhob, now brieë tsongalä, nogaaw brieë haxta tib gayoow.

⁹ Blozh ga, rëbcha me:

—Zha ne racladz guien mine rne naa nu, yquiaadiag zhow.

¹⁰ Zeene laa grë miech co zey, dzigo wbig xpëedscuel me bnabdiidz zho lo me dien pe nac ne sca niapse con cuent rseed me grë miech. ¹¹ Pquiab me rëb me:

—Tel to, Dioszhal rlu lo to zha rnabey me, niicle ncuane mazdraa ngeetsa; laa grëraa miech ne gard gbig lo me, grieelod guien zhow. ¹² Sac zha ne noxcole dien zha rnabey me, zdedraa me guielbiini lo zho guien zhow, laa zha ne noxcoda, mine riense zho, stiche mew. ¹³ Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet riend zho. ¹⁴ Lëë mine nac zho i bzeet Isá, zeene znu rëb me: Nac miech qui, niicle peraa ron zho, per peet riend zho; niicle rwiraa zho, per peet rand zho.

¹⁵ Ne nlipaa miech nad, miech ndip zdoo nac zho, rrieequia ntse zho diag zho, ntse zho lo zho; parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

¹⁶ 'Sangue to —rëb Jesús lo zho—. ¡Dichos to porne rien to pe ran to, ni riengaa to mine ron to! ¹⁷ Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuane ran to niina, per bgaad zho nian zhow; bzoobladz zho nquiaadiag zho grë ncuane noquiaadiag to, per bgaad zho nion zhow.

¹⁸ 'Golquiaadiag sca ganle zha nac xcuent zha ne güey gon ga. ¹⁹ Ro nëz ne sca bliaal zhob co, sca nac palal miech ne riepaa zha ne rienee Xtiidz Dios lo zho, per rioguicd zhow, rlozh ga rdzinaque mendox, rietiche ma tel palalse mine rien zho. ²⁰ Lad quie ne bliaal spalal zhob co, sca nac grë zha ne rley rcaania Xtiidz Dios; ²¹ per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne riladz zhow, rsaanga zhow. ²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuane no lo guidzliu rii mazdraa rionie guic zho, rquidie grë dimi zho. Grë ncuane co rioxcora zho, laa ne tsonie Xtiidz Dios guic zho, min co rquiaqui ib rund zho mine rnabey me. ²³ Laa liu naal ne bliaal mine scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuane run zho, no zho nac zig mzion ne brieë galptsii zhob ga, no zho nac zig mine brieë tsongalä, nogaa zho nac zig mine brieë tib gayoow ga.

*Zha nac xquie]rnabey Dios**(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, ²⁵ per no tib zha ne rlëe lo me, gol tib pcow liu, horne grëse miech nixguies, güey zho güeylaal zho xmidz guizh ncuaan zaatne gon me.

²⁶ Zeene laa zhobxtil co psilo blan mzion, hor coraa blu laa guizh ncuaan co no lada. ²⁷ Grë zha ne quia xtsiin me, zeene gon zhow güey zho rëb zho lo me: “Tebaa gan luu ganle, dipse lad xoob luu zëeb guizh ncuaan, ¿dieen pa brieew gocbniw ga?” ²⁸ Dzigo rëb me: “Rien naa no cho tib zha ne rlëe lo naa, zha co been dziin co.”

’Gocladz zho, hor cogazh nielaadz zhow per bzhiguield me, ²⁹ rëb me lo zho: “Tsielaadzde tow, sac tel glaadz tow niina ye zhobxtil gliaadzniew. ³⁰ Golsaan sca zëeba ga, na zeene laa wlaap gac, hor co gnabey naa zha ne quiits zhob, ctopgazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, ³² ni tel gacbniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuaa ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riasa quietxtil. Niipaque ncobi riots tson lmud rin, ni dib nase ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho. ³⁵ Ga brieequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaane gard gacnan miech wlal ne bre guidzliu.”

Zha nac xcuent guizh ncuaan co

³⁶ Blozhse bnee Jesús lo grë miech co guey zho, yeque me laa me zey gza xpëedscuel me. Bdzin zho ro yu, ga bnaab zho lo me siguiel me gnee me lo zho dien zha nac xcuent guizh ncuaan ne bzeet me ga. ³⁷ Dzigo rëbcha me lo zho:

—Golgonaa sca, znu gon nac cuent co. Rrieequia gon naa ga nac men ne gon zhob co. ³⁸ Liu ne bniaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaan co nac grë zha ne no ladznia mendox. ³⁹ Zha ne güeygan guizh ncuaan co, lëe mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëe anjl ga. ⁴⁰ Ni zigne sca cuee zho guizh ncuaan co lad zhobxtil, gzëeg zhow, scapaa nagon gal dze ne gac xquielwxtis Dios, ⁴¹ sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. ⁴² ¿Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdox co. ⁴³ Laa grë zha ne güeynal mine nac diidzli, zha co gdzin zaatne rnabey Pxoza naa, masaque zig xbiini ngbidz glu zho ga. ¿Zha ne racladz guiëna yquiaadiag zhow!

⁴⁴ Ziaad gac xquielrnabey Dios zig tib ncuaan non ne noliu tib lo xcuaa miech. Zha ne gdziel tib ncuaane sca non, ib tedsod zie zho sto zho grëse ncuaane rap zho grieedimi si zho liu co, parne gunchen zho ncuaan non co.

⁴⁵ Zha ne rzëeb lo xquielrnabey Dios ziaad gac zho zig tib zha ne rzi quie perl mine mazdraa niazh. ⁴⁶ Zeene ron zho pa no tib perl co, rto zho grëse ncuaane rap zho, rie zho rzi zhow.

⁴⁷ Nacaque xquielrnabey Dios, zig tib guiex nroob ne rgaa mel niina, zeene rsëeb ngooz mela lo nis grë lose mel rtopa. ⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëeb zho. ⁴⁹ Scapaa nagon gac miech gal dze ne gun Dios xquielwxtis me, ziaad grë xanj me cuee zho grë zha ntseeb lo zha ne no xnëz me, ⁵⁰ tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdox co.

⁵¹ Blozhse ga, rëb me lo zho:

—¿Pe bien to na zha nac grë mine blozh bne naa lo to nu?

Grëse zho pquiab rëb zho:

—Bien now.

⁵² Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios mine zialnie naa niina, masaque nac zho zig tib zha gol ne quanie chop lo ncuuan non lidz zho, quanie zho grë min gol-le ni quaniequegaa zho min cub.

Güey Jesús ladz me

(Mr. 6:1-6; Lc. 4:16-30)

⁵³ Blozhse sca bzodiidz me grë cuent co lo zho, laa me brieeg zie me nëz ladz me.

⁵⁴ Bdziñ me ga güey me yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? ⁵⁵ Tib zhinse ngurëyag name nac me. Led lëë xingan Marí i, bets me name nac Jacob, nac José, nac Simón ni Judas; ⁵⁶ grë bzian mew, nu no zho grë zho. ¿Pa dzigo güey me wseed qui?

⁵⁷ Ib beencasd zho me, haxta rlëë zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

⁵⁸ Beend me nzian milagr ga, sac sca ndip zdoo grë miech co ib nëd zho nliladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len dze co bin rey Herod (men ne rnabey Galilé) grë ncuane run Jesús, sac tel pa lotaaw zëëb xtiidz me; ² dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieegan me.

³ Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, ⁴ loxaque ne rnee Juan lo me nonguielda ga lëëque Herodí ptsieelnia me, sac tsieelpaa bets me Lip nac Herodí. ⁵ Gocladz Herod niut me Juan, per bdzieb me menguiedz, sac rleyne zho Juan, rien zho xtiidz Dios ziadteed Juan lo miech.

⁶ Laa tibtaa dzew, lëëtaque noyac zhilni Herod dze ne blozh me stib iz, bded tib xindzoo Herodí squi ndxie grë zha ne zobnie me psilo ndzoo biee ndzoo. Bdziladz me gon me zha biee ndzoo, ⁷ haxta brieeg ro me rëb me: “Ncuane gacladztaa luu gnab luu, znedz naaw.” ⁸ Per glole pquiil Herodí ndzoo, nagne rëb ndzoo lo me: “Mine racladz naa, xoob guic Juan tib len bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzoo, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuane gnabtaa ndzoo. Dzigo racse me pxeel me zha ne güeychug guic Juan len ladzguiib. ¹¹ Zeene wbire zho, zhoobse guic Juan tib len bandej bdeed zhow lo ndzoo, dzigo güey ndzoo güeydeed ndzooa lo xniaa ndzoo.

¹² Zeene gocnan xpëedscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieeg me ga bzëëb me barcw zie me tib zaatne guien miech. Per znuse bien diidza, nzian grë guiedz co zha ne gocnana, tib ro nis güey zho, glole zho bdziñ zaatne no gdziñ me ga.

¹⁴ Laa me noyet len barcw, zeene blis lo me gon me laa grë miech guizhiu co ndxiele ga; pquia zdoo me zho, beenguic me grë mguidz ne zienie zho.

¹⁵ Laa dze ziedzelew, wbig xpëedscuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaane gow zho; sac gon laa dze bdzele.

¹⁶ Pquiab me rëb me lo zho:

—¿Pe nacne guey zho squise? To none gdeed ncuaane gow zho.

¹⁷ Rëbchaa zho:

—¿Per pe dieñ yguiaañ no zho? Pe rnase gaay guietxtil ni chop meļ ne ziaadnie no nu, lo grëtaa miech qui.

¹⁸ Dzigo bnabey me zho güeynie zho guietxtil co, güeynie zho meļ co lo me, ¹⁹ ni bnabey me grë miech co bzob zho lo grë guizh nguia ne zëëb ga. Horco bzhen me gza guietxtil co ni grop meļ co, blis lo me nëz gbaa, bdeed me xquizh lo Dios. Blozhse bdeed me xquizh, beengroļ me gza guietxtil co, meļ co ne, zigse rdeed mew lo xpëedscuel me scase scase bdiiz zhow lo grë miech co. ²⁰⁻²¹ Grëse zho dow zho haxta zaatne bieltaa zdo zho. Miech tafa, zha bguise rgaa zig gaay mil, nandragaa grë men wnaa, grë mëëdla; ni zeene blozh dow zho, scase ncuaane nroob biaan, biodzë tsiipchop chicuid bio grë guietxtil co, bio grë meļ co.

Rzë Jesús lo nisdoo

(Mr. 6:45-56; Jn. 6:16-21)

²² Zeene blozh ga, bnabey Jesús xpëedscuel me bzëëb zho len barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co. ²³ Blozhse bzonëz me zho, dzigo güey me tib guic gui zob gax ga, güeyzodiidnie me Dios, tipse me zo ga laa liu pcow.

²⁴ Horco laa barcw ne zie xpëedscuel me ga no lo nis co, ib gacd csëëniob zhow, sac rrie me rtsire mew, nëzrii nëzrec raca lo nis. ²⁵ Merle guini liuw, tibaque zeene laa me bdziñ zaatne zie zho ga, tib lo nis co ziezë me.

²⁶ Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¿Tib ndziin i gon ziaad i!

²⁷ Dzigo bnee me lo zho rëb me:

—¿Gdziebde to, naa zial nu!

²⁸⁻²⁹ Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—¿Dë sca! —rëb me.

Lëëläd biet Pedr len barcw, laa Pedr ziezële lo nis co ³⁰ zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

³¹ Dzigo wbig me bzhen me nia Pedr, bzoli me Pedr lo nis co.

—¿Aque luu gon Pedr! —rëb me—. ¿Pe nacne gocchop guic luu? ¿Gard gon gliladz wen luu cho nac naa?

³² Zeene laa me biepnie Pedr len barcw, laa me co blëz. ³³ Grëraa zha ne no len barcw ga, rleynie zho me, rzee zdo zho rnee zho:

—¿Nasi nagon ndion no nli Xpëed Dios nac luu!

³⁴ Zeene bdziñ zho stib nëz ro nis co, zaatne rnee zho Genesaret, ga biet zho barcw.

³⁵ Grë miech co zeene gocnañ zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brie grë miech co, güeynie zho grë men rzacne lo me,

³⁶ rnab zho lo me siguiel me maase ni xabse me xen grë men rzacne co. Grëse zha ne bzhen ni xab me, biac zho.

15

Ncuaane runctal xtol miech

(Mr. 7:1-23)

¹ Tib dze, bdziñ bla zha farisé ni zla maistr ley ne ziaad nëz Jerusalén, lo Jesús; rëb zho lo me:

² —¿Pe nacne dien zienaḽd xpëēdscuel luu miṇe blu xmengol ne, pe nacne zeene laa zho row, ib rguibd zho nia zho zigne nopaa tsara?

³ Pquiab me rëb me lo zho:

—¿To waa, pe nacne quiaguiits to xley Dios? Golguien ganle laa ne gun to miṇe rnabey Dios zigne naca, leḽ ncuaaṇe blu xmengol to, miṇ co zienaḽ to. ⁴ Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” ⁵ Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.” ⁶ Tib lad rsaṇ to xley Dios, miṇe blu xmengol to miṇ co noxcoraa to. ⁷ ¿Loxaque guieḽwquidie qui no to! Rquiaaalo to miech wen nac to, per lëēpaa miṇe ruṇ to i ga bzeet Isá zeene rëb me:

⁸ Grë miech rii, rquiaalose zho ruṇnon zho naa, rond zho diidz gun zho miṇe rnabey naa.

⁹ Zhlëse nac grë ncuaaṇe ruṇ zho, rnee zho laa zho riaadgan naa; sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Golquiaadiag miṇe gni naa lo to nu, ni goltsoxco guieṇ to zha naca. ¹¹ Golgacnan ganle, grë ncuaaṇe rdziṇ zdo miech, led miṇcod runctal xtoḽ zho; sinque grë ncuaaṇ ntseeb ne rza guic zho, diidz ntseeb ne rrie ro zho, miṇ co runctal xtoḽ zho.

¹² Horco wbig xpëēdscuel me, rëb zho:

—¿Pe bien luu ganle blëē zha farisé gon zho sca rëb luu lo zho?

¹³ Pquiab me rëb me:

—Grëse yag ne squi beenbnid Pxoz naa meṇ ne zob gbaa, ib none laaw gliadz zolo zolow. ¹⁴ Golsaan zho, nli zha noseed miech per nac zho zig nac zha ne roḽd lo. Ni nanle to ganle, teḽ tib zha ne sca roḽdle lo ni xenaque zho nia stib zha ne ranḽ, zaatne nac tib len blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel bnë lo no dien zha nac diidz ne në luu ga, ne rnee luu led ncuaaṇe rowd miech runctal xtoḽ zho.

¹⁶ Pquiab me rëb me:

—¿Pe niicle to riendaquew dzigo lëē? ¹⁷ ¿Pe riende to grë ncuaaṇe row miech, led miṇcod runctal xtoḽ zho? Sac grë ncuaaṇe row zho rdziṇda len zdoomban zho, zhaa zaatne rdziṇa; tib rietedsew xcuerp zho, rlozh ga rrieegaw. ¹⁸ Sangue grë diidznë ne rrie ro zho, zdoomban zho ga rzaw, ni lëē miṇ co nac miṇe runctal xtoḽ zho. ¹⁹ Zdoomban zho nac zaatne rza grë ncuaaṇ ntseeb ne ruṇ zho, zig nac:

zeene rio zho grë zhgab yozh,
zeene rut zho samiech zho,
zeene rionie zho zha ne nole tsieel,
zeene rionie zho zha ne nacd tsieel zho,
zeene ruṇ zho guieḽgban,
zeene lega rnexuu zho samiech zho,
zeene rneenë zho samiech zho.

²⁰ Grë ncuaaṇ ntseeb co nagon nac miṇe runctal xtoḽ miech, gunctald zho xtoḽ zho niicle tsard nia zho zigne nacpaa grë zhiwseed mengol.

Biac xpëēd tib wnaa zit

(Mr. 7:24-30)

²¹ Ga brie Jesús, güey me haxta nëz Tiro ni nëz Sidón.

²² Nëz co no me güey tib wnaa ne ziaad lo xtii zha Canaán lo me, nguiedz zëeb tsi wnaa co rnab me lo Jesús siguiel Jesús tsiegunguiac tib xpëdwanaa me nosacsi menḽdox. ²³ Per ib pquiabd Jesús lo xtiidz wnaa co, dzigo wbig xpëēdscuel me, rëb zho:

—Mazd bzhiguiel pquiaadiag miṇe rnee wnaa qui, bui ganle zha ncuētaa zëeb tsi me naḽ me zhits ne.

²⁴ Pquiab Jesús rëb me:

—Ziald naa par gun naa xyudar zha zit, sinque laa Pxoꝝ naa pxeel naa par gun naa xyudar grë zha Israel ne rzac zig grë mëcwxiiil ne zonziaab lo xbaxtor.

²⁵ Scaque nonee me laa wnaa co wbig pquitsgzhil lo me.

—Bzhiguiel —rëb me—, been tib guielnzaac been xyudar naa.

²⁶ Rëbchaa Jesús lo me:

—Nonguiel da gon, cob ne quiet ne no nia mëed gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma mine rrieengaa nia mëed.

²⁸ Horco pquiab Jesús rëb me:

—¡Squiw nagon! ¡Rlu nli dib zdoꝝ luu rnalo luu naa! Gacxe waa mine rnab luu i gun naa, niinagazh laaw gac.

Horcogazh biac xpëed wnaa co.

Nzian miech ne beenguiac Jesús

(Mr. 8:1-10)

²⁹ Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga. ³⁰ Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiac me. ³¹ ¡Ncuaane gzee zdoꝝ ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoꝝ zho grë ncuane ran zho. Grëse miech ne ndxie ga, rzee zdoꝝ zho, rley zho roolnie zho Dios.

³² Dzigo bredz me xpëedscuel me rëb me lo zho:

—Rquia zdoꝝ naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guiend miech?

³⁴ Dzigo bnabdiidz me lo zho, rëb me:

—¿Bla quietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz quietxtil co, ni gza mel co, bdeed me xquizh lo Dios; blozhse bdeed me xquizh, zigse rungrol me quietxtil co scase scase rdeed mew lo xpëedscuel me rguiz zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdoꝝ zho. Miech guizhiuw, zha bguise rgaa zho maase tap mil, nandragaa grë men wnaa, grë mëedlas; ni zeene blozh ga bii biodzë gadz chicuid bio grë mine biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëeb len barcw zie ne nëz xtan zha Magdal.

16

Gocladz zha farisé niungüet zho Jesús

(Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuane nonguiel dga niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—¡Pe nli^uaa rnee to riende to zha nac grē ncu^aane noyac leⁿ dze rii! Zha zēēb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co. ⁴ Nazdpaa ntseeb to, squitaa gocndip zdoo to nēz lo Dios, ¿zha rnaraa milagr ne racladz to gan to? Stibaque milagr gon gan to, tib miⁿe gac zigne bzhaac Jonás.

Blozhse sca rēb me lo zho, zoque zho ga, ziega me.

⁵ Zeene brie^e zho ga, zoladzd xpēēdscuel me ney zho guietxtil ne niow zho. ⁶ Lega nacle psilo me nonee me lo zho, rēb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rēb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rēb me lo zho:

—¡Garda^uque lēē guien to cho nac naa! ¿Pe nacne tso to zhizhgab guietxtil? ⁹ ¡Ni lalnu lēē peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan? ¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to? ¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rēb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdzin Jesús nēz xtan zha Cesarea de Filipo grē xpēēdscuel me, nēz co no me bnabdiidz me lo zho rēb me:

—¿Cho dien ron to rnee miech nac naa?

¹⁴ Pquiab zho rēb zho:

—No zho rnee Juan Bautista, no zho rnee Lív, no zho rnee Jeremív, men ne biadteed xtiidz Dios padzeela; nogaa zho rnee no cho stib men ne ziadteed xtiidz Dios a zig biaad zha ne biaad padzeela.

¹⁵ Dzigo rēb me lo zho:

—¿To waa? ¿Cho rzac to nac naa?

¹⁶ Pquiab Pedr, rēb Pedr:

—¡Luu nac Men ne zēēble diidz ga cxeel Dios! ¡Xpēēd Dios nac luu!

¹⁷ Dzigo rēbchaa me:

—Dichos luu Simón (xingan Jonás) brie^e diidz qui ro luu, sac gon Pxoz naa men ne no gbaa, men co bneedz guielbiini qui lo luu, nacda ncu^aane cho miech nēw lo luu. ¹⁸ Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda.

¹⁹ Laa naa rzo luu, luu gnee Xtidz naa lo miech zeena gacnaⁿ zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

²⁰ Dzigo pso me diidz lo zho choot lo gneed zho, me nac Men ne zēēble diidz ga cxeel Dios.

Bzeet Jesús zha gon miech me

(Mr. 8:31-9:1; Lc. 9:22-27)

²¹ Len dze co psilo Jesús bzeet me lo xpēēdscuel me zha csacsi miech me. Rēb me nroob ncu^aane cteed zho me, zeene laa me tsie Jerusalén; grē zha non lo menguiedz, grē pxoz ne rnabey, grē maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

²² Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. ²³ Zeene bin mew, zoque Pedr ga, biecw me rēb me:

—¡Biche lo naa nu mendox! ¡Loxaque no luu par gungüet luu naa! Zienied guic luu mine rnabey Dios, sinque mine rleynie miech, min co zienie guic luu.

²⁴ Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoos zho xquielmban zho, ²⁵ sac zha ne yquia zdoos xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zгаа zho tib guielmban ndzon ne gdziind dze lozh. ²⁶ Zha ne zienie guic loxaque gapchen, ¿pa dien yquiina lo zho, tel lëëw yquiaaqui guey zho gabil? ¿Niacxe zrieelo gdziib zho dimi, laa zho len gabil? ²⁷ Naa ne nac naa Mgui ne pxeel Dios, zdziin dze ne gbiire guial naa stib, guialnie naa grë xanj naa, glu naa ganle pa lotaa men nroob nac Pxoz naa; dze co gded naa mine tsieguial tib tib miech, tel zha wban zho. ²⁸ Ib tedsod lo grë zha ne ndxie nu niina, bii no zha ne ganle, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene gon zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona. ³ Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me. ⁴ Rdzieb zho, lo dzeb co brieer ro Pedr rëb Pedr:

—Maestro, ¡tebaa zha grieeelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëë xpëëd naa i gon, rleynie naa me, rzac zdoos naa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëlëd pquitsgzhib zho haxta bdziin lo zho lo liu. ⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gondraa zho schop men co.

⁹ Blozhse ga, laa zho wbi ga. Cho gui co ziad-zëëbnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieeban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëëble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guiadseed miech gon zho xtiidz Dios. ¹² Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

Biac tib mëëd ne nosacsi mendox

(Mr. 9:14-29; Lc. 9:37-43)

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquitsgzhib me lo Jesús, rëb me:

¹⁵ —Laa naa rnab lo luu, bzhiguiel beenguiac xpëëd naa, nrooble nosacsi guidz gutye win. Blactaa ziyobe win lo gui, ziyobe win lo nis ne. ¹⁶ Blansonie naa win lo xpëëdsuel luu nu, per rrieelod zho gunguiac zho win.

¹⁷ Dzigo rëbchaa Jesús lo xpëëdsuel me:

—¡Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaane cxecwdraa naa lo to squi nac to! ¡Goltënie mëed qui nu!

¹⁸ Dzigo goctox Jesús lo men̄dox ne nosacsi mëed co, ben̄cxoon me ma, hor cogazh laa mëed co biac.

¹⁹ Haxta wbiraa zho ga, wbig zho lo me bnabdiidz zho dien pe nacne brieelod zho niun̄cxoon zho men̄dox ne nosacsi mëed co. ²⁰⁻²¹ Dzigo rëbchaa me:

—Brieelode to niun̄cxoon to ma, sacne rnalode to Dios. Tel̄ niaca miñe rnalole to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngan̄ gnab to lo me, zun̄ mew; tsod ncuaane grieelod gun̄ to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel̄ Dios, ib znaaz miech naa, ²³ haxta zut zho naa; per zeene gac tson̄ ngbidz gut naa, zriebaan naa.

Zeene bin zho sca rnee me, bio zho guiel̄në, mbanse rac zho.

²⁴ Bdziñ me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdziñ zho len̄ yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo men̄ ne nac rey dien, ¿pe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, ²⁷ per par guiabd zho rdziond ne diidz, güey güeyron̄ xanzuel luu lo nis. Mel̄ ne gloopaa yгаа low, bzhen̄ ma pxal ro ma, ga gdzien̄ luu dimi; dimi co güeynie bdiizh miñe no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len̄ dze co bnabdiidz xpëedscuel Jesús lo me, dien̄ cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëedbgui win, bzo me win glowtaa lo zho, ³ rëb me:

—Gneli naa lo to gan̄le, tel̄ne csaande to xquiel̄ntseeb to, tel̄ne gacnguudzladzde to, gac to zig mëedwin rii, per ni xnëz Dios grieelod sëeb to. ⁴ Zha ne racladz gac zho zha non, none gac zho tib miech ndooladz, none gac zho zig tib mëedlas. ⁵ Miech ne gacnie zha ne sca nac, zha ne rleyne naa, rrieequia naale ga racnie zho.

⁶ Per miech ne yquuil zho gun̄ctal zho xtol̄ zho, ¡probsaxe zha co! Mazd zhi guiel̄nëw lo zho ygadoo tib quie molin zhubxtil yan̄ zho tsieron̄ zho zho nisdoo. ⁷ ¡Nac lo guidzliu rii, run̄falte guiel̄ntseeb low! Run̄falte ncuaane gun̄ctal xtol̄ miech, ¡per probsaxe zha ne yquuil zha ne nole xnëz naa, gun̄ctal zho xtol̄ zho!

⁸ Gol̄guien̄ tel̄ne tib nia to, tib nigaa to rquiaqui run̄ctal to xtol̄ to, goltichegazha. Peet nacda maase tibaque ni to, tibaque nia to zob totsaque yгаа to guiel̄mban ndzon ne gdziñd dze lozh, lëdle zob gropa ni laa to guey gabil̄, lo beldox ne gdziñd dze guiuu. ⁹ Scaque bziaalo to, miñe rquiaqui run̄ctal to xtol̄ to, goltichegazha, peet nacd maase tibaque lo to zob totsaque yгаа to guiel̄mban ndzon ne gdziñd dze lozh, lëdle zob gropa ni laa to guey lo beldox ne nac gabil̄.

¹⁰ 'Ib gunde to csañwin to grëraa zha ne no xnëz naa, zha ne nac zha mban, sac gon̄ non zho lo Dios, anjl̄ ne quianap zho, tibaque zo me lo Pxoz naa men̄ ne zob gbaa.

¹¹ 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

¹² 'Rzac Dios miech zig tib men ne rquianë zdo xpëcwxiil. Telne quianie zho tib gayoo ma, ni gziaab tib ma, led zëëb lëë rsan zho stapgal tsiimtap ma ne zo lo zho, rbire zho rieguib zho ma ne bziaab ga. ¹³ Zeene rdziel ma lo zho, rlozhd gleynie zho ma, lëë ma rac guielbley que grëraa xcompañer ma. ¹⁴ Scadaa nagon rzac Pxo naa miech, grë zha ne nole xnëz me, ib racladzd me gziaab zho.

¹⁵ 'Golguien sca, tib tib to zeene cho tib zha ne nacgrë to gun pe tib falt lo to, goltsie goltsienee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib. ¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho. ¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuae zho lad to, golsac zho zig rzac miech grë zha ne zienal guielntseeb.

¹⁸ 'Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuaane gnabtaa zho lo Pxo naa men ne zob gbaa, zdeed mew. ²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vuelt no gun naa zho perdon? ¿Gadztaaw lëë?

²² Pquiab me rëb me:

—Lëda gon Pedr, led loxaque gadzdse vuelta. Tel blataa vuelt gun zho falt lo luu, none gun luu zho perdon.

Zha ne beend perdon

²³ 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiaayun zho dziin. ²⁴ Loxaque psilo me, zeene laa xcuent tib zha co blozh brie, nroob briequia zho lo me; ²⁵ par quizh zhow, peet nzheud zho. Dzigo bnabey me to zho grop tsiel zho, xpëed zho ne, ni grëse ncuaane rap zho, parne grieelo gazh xquielqui zho. ²⁶ Zeene gon zho sca rëb me, pquiitsgzhib zho lo me, rëb zho: "¿Been guielnzaac, gop tib paciens, na dien zha gun naa quizh naa xquielqui naa lo luu!" ²⁷ Gon me zha rac zho, pquia zdo me zho, psilaa me zho, beenquizhdaque me zho xquielqui zho.

²⁸ 'Loxaque brie zho ga, bdzieel zho tib zha ne nzëëb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho. ²⁹ Dzigo pquiitsgzhib zha co lo zho, rnab zho siguiel zho gap zho paciens, dien zha gaclo dimi co quizh zhow. ³⁰ Pe nquiaadiag zho ga, bnab zho bio zha co ladzguiib, haxta bdiizh zho dimi ne zëëb zho ga. ³¹ Grëraa zha ne rquia dziin lo rey co, zeen gocnan zhow, bdeednë zho, güey zho güeyzodiidz zhow lo me. ³² Zeene bin mew, bnabey me gocredz zho, goctox me lo zho rëb me: "¿Pe clas miech nac luu! Pe rsoladzd luu zha rac luu bnab luu pquia zdo naa luu, haxta beenquizhd naa luu guielquidox ne zëëb luu ga. ³³ ¿Pe nacle pquiad zdo luu zha co, zigne pquia zdo naa luu?" ³⁴ Blëë me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ 'Scadaa nagon gun Pxo naa to, telne gunde to samiech to perdon, tel pe nac falt ne gun zho lo to.

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë minë riaan nêz dan ro guiubee Jordán, nêz ne rlan ngbidz. ² Miech guizhiu ne rriee grë guiedz co, rdziñ lo me; grë men rzacné ne rdzinnie zho, beenguiaic me zho.

³ Ga no me, bdziñ bla zha farisé gocladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaa csëbtsieel?

⁴ Pquiab me rëb me:

—¿Mod rande to zha zhobnee lo Xtiidz Dios? Lo co zhobnee ganle zeene psañ me miech, tib nêz zho psañ me, tib mgui ni tib wnaa. ⁵ Ni rneew, ib none grieezhaa mgui lo pxoz zho, lo xniala zho par gbannie zho wnaa ne nac tsieel zho, gac zho tibaque miech grop zho. ⁶ Nligaa nacdreaa zho chop miech, sinque laa zho rac tibaque. Dios nac men ne psañ ycatsieel miech, cho dzigo nac miech par quiits zho minë rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sangue Dios psañd me diidz csëbtsieel miech. ⁹ Gacnañ to ganle, zha ne csëëb wnaa ne nac tsieel zho, ni tel peet guielyozh beend wnaa co, dol ga gun zho csëëb zho tsieel zho ycaa zho stib wnaa. Scaquegaa mgui ne ycaa wnaa ne psëëb zho ga, dol ga gun zho sac gon no tsieel wnaa co.

¹⁰ Dzigo rëbchaa xpëëdsuel me:

—Tel scataa nac xcuent guieltsieel, mazd lëëquew dzigo ctsieelniad ne.

¹¹ Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho. ¹² No zho desde rac zho mëëd, nacd zho zha ne grieelo tsonie wnaa; no zho ib miech sca rsañ zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

Beenlay Jesús mëëdlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ bdzinnie zho xpëëdlas zho lo me, parne cxobnia me guic win gunlay me win. Grë zha ne nac xpëëdsuel me, lel psilo zho rtsidil zho pe nacne nodzinnie zho grë mëëdlas co lo me.

¹⁴ Zeene gon me sca quiayun zho, rëbchaa me lo zho:

—Ctsirede to grë mëëdlas yeen qui, goisaan guiaad win lo naa. Sac gon grë mëëdlas yeen, ni zha ne nac zig nac win, zha co nac zha ne sëëb ygab lo Dios.

¹⁵ Dzigo psilo me pxobnia me guic grë mëëdlas yeen co, beenlay me win. Blozhse ga, laa me brieë ga.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zierieë ga, zeene bdziñ tib mgui nguieg, tib zha ricwa, rëb zho lo me:

—Nañ naa luu nac tib men ne noseed miech, ni tib men wen nac luu. Bnë dien, ¿pe nac minë gun naa parne grieelo ygaa naa guielmban ndzon ne gdziñd dze lozh?

¹⁷ Pquiab Jesús rëb me:

—Rnee luu lëë tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu minë rnabey Dios.

¹⁸ Pquiab zho rëb zho lo me:

—¿Pa min waa?

Rëbchaa me:

—Minë rnee:

Gute luu samiech luu,
 telne nole tsieel luu, tsonied luu zha ne led tsieeld luu,
 cuand luu samiech luu,
 yquiadiidzguizhd luu samiech luu,

¹⁹ gon pxoz luu, gon xniaa luu, cued luu xquielto me.

Bleynie samiech luu, zigne rleyne luu luu.

²⁰ Dzigo rëbchaa zho:

—Ni tib mine rnee luu i gard quits naa, grësew zana naaw zigne naca. Racladz naa gacna naa, dien peraa no gun naa.

²¹ Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuane rap luu, dzigo güeytiiz dimi co lo grë zha ne guiend pe yquiin. Lozh ga, dë dënal zhits naa. Min co nagon gun luu, dzigo zgaa luu guielmban ndzon co; ni scagaa nroob guielnzaac ne ygaa luu nëz lo Dios.

²² Zeene bin zho sca rëb me, mbanse rac zho laa zho zey, sac nroob ncuane quianie zho.

²³ Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho. ²⁴ ;Ne nligaa nagan rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

²⁵ Zeene bin zho sca rëb me, rzee zdoo zho, rnee zho:

—Bay, ;chomezhe dzigo waa nac zha ne zrieelo sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac tel me, tsod ncuane grieelod gun me.

²⁷ Horco pquiab Pedr rëb Pedr lo me:

—No dzigo waa, ;pe nac mine ygaa no? Nanle luu ganle, tel no grëse ncuane rdziaap no, laa no psana, ziaadnal no zhits luu.

²⁸ Pquiab me rëb me:

—Golgonaa ganle, dze ne gacncub grëse ncuane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel. ²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³⁰ 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ Grë zha ne no xnëz Dios, zac zho lo me zig bzhaac grë zha ne güey xtsiin tib men co. 'Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. ² Bziel me palal zho, biaan zho diidz palal quizh me zho dze, laa zho bzëeb lo dziin. ³ Glaale ngbidza brie me güeyted me len guiedz, lëetse güeytsib me lo bla zha ne zob ga racladz dziin. ⁴ Dzigo bree me zho, rëb me: “Goltsie xtsin naa, na quizh naa to mine non xtse to.”

⁵ 'Rwe ngbidza, biire me güey me güeyguib me spalal zho. Maase las treza güeyaque me stib.

⁶ Zhile sëeb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “;Pe nacne squise noded dze to?” ⁷ Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

⁸ 'Zeene laa dze blozh bdze, bnee me lo zha ne zo lo xtsiin me, rëb me: "Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb." ⁹ Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. ¹⁰ Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

¹¹ 'Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: ¹² "Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?" ¹³ Pquiab me rëb me: "Bets, nosacsid naa to, biaanle ne diidz name palal quizh naa xtse to. ¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to. ¹⁵ ¿Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?"

¹⁶ 'Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús stib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdscuel me, ¹⁸ bzeet me lo zho zha gon miech me zeene laa zho gdziin Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. ¹⁹ Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰ Tibaque zeene wbig tsiel Zebedé wbignie me grop xingan me Jacob ni Juan, pquiitsgzhib me lo Jesús rnab me gon Jesús tib favor ne racladz me. ²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdziin dze ne laa luu zob zobnabey luu; tib zho nëz derech, stib zho nëz revés.

²² Pquiab Jesús rëb me lo wnaa co:

—¿Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëëb no.

²³ Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gnedz naa diidz sob to cue naa nëz derech, nëz revésgaa, led naad raguial min co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

²⁴ Grëraa xpëëdscuel me, zeene bin zho pe nac mine rnab Jacob grop Juan, blëë zho lo zho. ²⁵ Dzigo bredz Jesús zho grë zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladzttaa zho. ²⁶ Sangue to gon gungscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to. ²⁷ Scaquegaa zha ne racladz gnabey zho lo to, none glo cseed zho gon zho mine gnabey to zho. ²⁸ Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

Biac chop zha ne rold lo

(Mr. 10:46-52; Lc. 18:35-43)

²⁹ Miech guizhiu nal zhits Jesús, laa me zieriee guiedz Jericó. ³⁰ Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¿Jesús, men xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per le| hor cole nguiedzraa rbedz zho me. ³² Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien gun to naa?

³³ Pquiab zho rëb zho:

—¿Racladz no guiac lo no!

³⁴ Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho ziena| zhits me.

21

Bdziñ Jesús Jerusalén

(Mr. 11:1-11; Lc. 19:28-40; Jn. 12:12-19)

¹ Sca no Jesús nëz grë xpëedscuel me, laa me bdziñ guiedz Betfagé. Gaxle ga riaan Jerusalén, nëz danse squi riaan Gui Oliv. Dzigo pxeel me chop xpëedscuel me, rëb me lo zho:

² —Goltsie guiedz win ne ndxie danse lo ne i. Ga gdziñ to zaatne quiadoo tib burrgus grop xpëed, dzigo golxadz ma goltënie ma nu. ³ Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsan no ma.

⁴ Ga brieequia mine bnee tib men ne biadteed xtiidz Dios lo miech padzeela, zeene rëb me:

⁵ Golguiab lo men Jerusalén:

“Golwi ganle, laa men ne nac zhirey to ziaad i.

Tib men ligase rlu me, zob me lad tib burrgus win,

tib ladse ma ne rey yo zob me.”

⁶ Laa zho zie, zigne bnabeyse me zho ga, scase been zho. ⁷ Zeene wbire zho, laa zho bdzinnie burrgus co grop xpëed ma. Pxob zho lar ne rbix zho lad xpëed ma, laa me bzob ma.

⁸ Zigse zie me, no grë miech guizhiu co, rta zho lar ne rbix zho ro nëz rded burrgus ne zob me ga; nogaa zha ne rchoo nia grë yag nguia, rdziin zhow ro nëz rded me. ⁹ Grëse zho, zigtaa zha ne nera, zigtaa zha ne na|a, nguiedz roptsie zho rnee zho:

—¿Golgotsaa co ne xviv xingan David! ¿Golgotsaa gleynie ne me! ¿Zha ndzontaa Dios, pxeel me men nroob qui lo ne!

¹⁰ Zeene bdziñ me Jerusalén, rlozhd gzee zdoo grë miech ne ndxie ga, rnabdiidz|sa zho rnee zho:

—¿Bay cho nac men qui?

¹¹ Rquiab grë zha ne na| zhits me ga, rnee zho:

—¿Lëë Jesús i! ¿Lëë men Galilé qui, noteed xtiidz Dios lo miech!

Blee Jesús miech len yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziñ Jesús Jerusalén stib, güey me yadoo nroob ne zob lad guiedz co. Bdziñ me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmez h zha ne notsëë dimi, ptiixche me xmez h zha ne no wto palom; blee me zho ga grëse zho, ¹³ rëb me lo zho:

—Led znu gon zhobnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiayun to lugar rii zig tib zhibliee ngbaan.

¹⁴ Ga no me bdziñ bla zha ne ro|d lo, zla zha ne në ni, wbig zho lo me. Gzase zho beenguiac me. ¹⁵ Nzian mëedlas yeen ne ndxie len yadoo ga, psilo win nguiedz rnee win: “¿Zha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mëedlas co, rlëë zho, ¹⁶ rëb zho lo me:

—¿Pe ib rond luu ganle pe nonee grë mëedlas qui?

Pquiab me rëb me:

—Ron naaw. ¿To waa, pe ran̄de to gan̄le zha zhobnee lo Xtiidz Dios, zaatne raquiet miñe noyac nu? Led rneew lëë:

Haxta grë mëëdlas ne bii radz,
ye win rley win rool̄nie win me.

¹⁷ Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

¹⁸ Sil co zeene no me nëz gdziñ me Jerusalén, pcaabedz me. ¹⁹ Goñ me zob tib yag guigw gax ro nëz, dzigo güey me güeyso me low dieñ pe ndziel̄d tib nex low niow me. Bdziñ me goñ me loxaque zhiblagsew zëëb, nacne rëb me low:

—¿Lëë blozh xtse luu nu goñ! ¿Gdzindraa dze ne yquia nex lo luu!

²⁰ Biini liu, zeene laa zho zie Jerusalén stib, goñ xpëëdscuel me, laa yag guigw co bidzle. Bzee zdoo zho, bnabdiidz zho lo me rëb zho:

—¿Bui gan̄le, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to gan̄le, tel̄ne dib zdoo to rnalo to Dios, niicle ncuaane mazdraa ngan gnab to lo me, zun̄ mew. Lëëraasi none dib zdoo to gliladz to zaca, ni palal gacchopd guic to. ²² Grëse ncuaane gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

²³ Bdziñ me Jerusalén, wbiire güey me len̄ yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men̄ non lo men̄guedz, bnabdiidz zho lo me rëb zho:

—¿Cho dzigo nac luu ne squitaa ziaadnabey luu len̄ yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa gun̄ tib wbnabdiidz lo to. Tel̄ne stsire to low, dzigo gni naa lo to gan̄le cho rnabey naa ne laa naa noyun̄ grë ncuaane noyun̄ naa. ²⁵ Gol̄në dieñ, ¿cho pxeel̄ Juan Bautist biaad me pchoobnis me miech? ¿Pe Dios pxeel̄ me, te miechsew ye?

Psilo zho rnabdiidzlsa zho dieñ zha ctsire zho lo xtiidz me, rnee zho:

—Tel̄ne dzieets ne Dios pxeel̄ Juan, dzigo laa me gnë: “¿Pex nac dzigo waa bliladzde to miñe bnee me?” ²⁶ Tel̄ na dzieetsgaa ne, miechse pxeel̄ Juan, grieequiadaque ne.

Rdzieb zho niab zho miechse pxeel̄ Juan, sac nan̄ men̄guedz nli Dios pxeel̄ Juan biadteed Juan xtiidz me lo miech.

²⁷ Dzigo mazd miñe been̄ zho rëb zho lo me:

—Ndiond no dieñ cho pxeel̄ Juan.

Dzigo rëbchaa me lo zho:

—Niicle naagaa nagon̄, grieelod gni naa lo to cho rnabey naa quiayun̄ naa grë miñ rii.

Zha nac zha ne rond diidz

²⁸ 'Gol̄quiaadiaga gan̄le. Tib mgui, quianie me chop mëëdbgui. Tib dzew, bredz me tib zho rëb me lo zho: “Xin, none goñ tsie luu nadze, tsietop luu uv xcuaa ne.” ²⁹ Pquiab zho rëb zho: “¿Gad naa!” Wdzeelaaw, bien̄ zho nonguiel̄da ga sca gun̄ zho, dzigo bio zho nëz güey zho. ³⁰ Laa stib zho, zeene bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

³¹ 'Gol̄në dieñ, lo grop mëëd co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to gan̄le, miñcodaa quiayac nu niina: Grë zha ne rzac to mazdraa ngoopdol̄, zig nac grë zha ne rtop dimi ne razh lo zha Roma, zig nac grë wnaa ro nëz, mazd glöle zha co nozëëb xnëz Dios, lëdle to. ³² Biaadpaa Juan Bautist name biadseed me miech csaan zho xquiel̄ntseeb zho, gban zho zigne racladz Dios, ni pe liaadz to nion to miñe rnee me. Mazd grë wnaa ro nëz, grë zha ne rtop dimi ne razh lo zha Roma, znuse

psaan zho xquielntseeb zho. Laa to, niicle ran to nosaan grë zha co xquielntseeb zho, per ib rsaande to mine nac to.

Xcuent zha ne pquianap liu
(Mr. 12:1-12; Lc. 20:9-19)

³³ Dzigo bzodiidz me stib cuent lo zho rëb me:

—Tib men name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ 'Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne riegual me ycaa me. ³⁵ Per lel bnaaz zho zho, zha ne blooquie zho, zha ne bdeedgolp zho, haxta beet zho tib zho. ³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ 'Tibaque zeene pxeelaque me xpëed me, bza guic me rëb me: "Ganse zho xpëed naaw, zon zho mine gnee me."

³⁸ 'Pex nion zho diidz, zeene gon zho xpëed me, rëbcha zho: "jLëë zha qui nagon guiaannie liu rii! jGolgotsaa dziuut ne zho, zeena guiaana lo ne!" ³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ 'jZha sca dien rzac to gun bizhuan liu co gza zha co, zeene laa me gbire?

⁴¹ Pquiab grë zha ne nac pxoz ne rnabey, ni zha ne nac zha non lo menguedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne riegual me ycaa me.

⁴² Dzigo rëbcha me lo zho:

—Haxta lo Xtiidz Dios no tib zaatne znu rnee, jpe gard ganle glab tow? Rneew: Quie ne psëeb zha ne nozaa yu, ni nand zho lëepaa quie co nac mine rnazdziits yu. jNcuaa ne gzee zdoo new! Sac Dios bnabey sca goca.

⁴³ 'Gacnan to ganle, scadaa nagon gree to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlgar to. ⁴⁴ Zha ne tsietsobe lo quie ne raquiet ga, zac zho zig tib ncuaa ne rac tson tap lë; laa tel lëegaaw tsobe lad zho, zac zho zig tib ncuaa ne die die rac.

⁴⁵ Grë zha ne nac pxoz rnabey ga, ni grë zha farisé, zeene blozh pquiaadiag zho cuent ne bzodiidz me lo zho ga, bien zho zha ga rzeet me. ⁴⁶ Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nëd sëeb xnëz Dios

¹ Bzodiidz Jesús stib cuent lo zho, rëb me:

² —Grë zha ne rbedz Dios ygab zho xnëz me, none tsoxco zho gon zho mine rnee me; sac nenda gdieelo zho zig bdzieelo zha ne bredz tib rey co nie zho lo zhilni xpëed me.

³ 'Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdiin, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho. ⁴ Wbiire me pxeel me zla zho rëb me: "Goltsietsedz zho, golguiab, laa guielwagw ne yquiin goclole, siguiel zho na guiaad zho." ⁵ Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto, ⁶ nogaa zho lel bnaaz zho zha co, psacsi zho zho, beet zho zho. ⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëeg zho guiedz co. ⁸⁻⁹ Blozh ga biire pxeel me zla zho, rëb me: "Laa guielwagw rii goclole, mine naca goltsie tib nëz yu, zha ne gdieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguald zho guiaad zho nu."

¹⁰ 'Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzinnie zho zho lo lni. Gol hor wagw, biodzëse len yu ndxie miech. ¹¹ Zeene laa rey bzëëb zienee me lo zho, gon me lad co no tib zha co nacwxabd zho zigne rieguaļ gacwxab zha ne sca rie tib lo guieļtsieel. ¹² Dzigo rëbchaa me lo zho: "Bets, ĵpe nacne squise luu bzëëb luu nu, bui ganle nacwd luu lar ne bneedz zho niacw luu?"

'Dzese zob zho, rdziöld zho pe guiab zho lo me. Gonse me sca rac zho, ¹³ bnabey me zha ne nodziib lo mezh rëb me: "Golzobdoo zha rii, golxidoo grop nia zho, grop ni zho, golcuae zho nu goltsieron zho lo ncow nëz ley. ĵGa nac zaatne rieguaļ zho, ga gan zho guieļnëdox ne no ted zho, goonnë zho, haxta gow lay zho!"

¹⁴ 'Miñcodaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion

(Mr. 12:13-17; Lc. 20:20-26)

¹⁵ Blalaa zha farisé ne ndxie ga güey zho bnediidz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis. ¹⁶ Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu mine nac diidzli min co rnee luu lo zho. ¹⁷ Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiel da ye.

¹⁸⁻¹⁹ Bienga me racladz zho gungüet zho me, dzigo rëbchaa me lo zho:

—ĵPe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. ²⁰ Blozh ga, rëbchaa me lo zho:

—ĵCho nu, cho lë nu quia lo pes rii?

²¹ Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine rieguaļ sca ycaa rey, goldeeda lo rey; scaquegaa mine rieguaļ ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

ĵPe nli zrieeban miech?

(Mr. 12:18-27; Lc. 20:27-40)

²³ Dze coqew, güey bla zha saducé lo Jesús. Nac zha saducé riladzd zho zdziñ dze grieeban miech. Dzigo bdziñ zho, ²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsiel mgui, ni gopd wnaa mëëd, dzigo none betsaque zho ctsieelnia wnaa co stib, zeena gap wnaa mëëd ne guiaan xlugar xpëëd zha ne gut ga.

²⁵ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaan xpëëd zho. Dzigo ptsieelnia stib bets zho wnaa co. ²⁶ Blozh ga gutaque zha co, pa së zho nsan mëëd. Ptsieelniaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelnia me, ²⁷ tibaque zeene yeque me laa me gut. ²⁸ Mine racladz no gacndion no, ĵchopaa dzigo gac tsiel wnaa co zeene laa zho grieeban? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle riladzde to zrieelo me gun me ncuaan ro ne gard gan miech. ³⁰ Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa. ³¹ Stiba, ib nli zrieeban mengut. Mod rande to zha zhubnee zaatne raquiet zeene rëb Dios: ³² "Naa nac Dios ne riladz Abraham, naa

nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

Xley Dios mine mazdraa non

(Mr. 12:28-34)

³⁴ Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodiidz zho stib. ³⁵⁻³⁶ Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, jpa min nac mine mazdraa non?

Sca rëb zho, sac gocladz zho niungüet zho me. ³⁷⁻³⁸ Pquiab me rëb me lo zho:

—Lëë mine mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëëw nac mine mazdraa non, ni lëëw glopaa raquiet lo grëse ley. ³⁹ No stib mine rnee: “Bleynie samiech luu zigne rleynie luu luu.” Ye min rii nona, meraque lala con min glo. ⁴⁰ Zha ne gban zigne rnabey grop ley rii, lëële grë ley ne psan Moisés ga, lëële grë zhiwseed zha ne biadteed xtiidz Dios ga, ziana zho.

jCho xpëed nac Crist?

(Mr. 12:35-37; Lc. 20:41-44)

⁴¹⁻⁴² Gon Jesús nzian farisé ndxie lo me ga, nacne bnabdiidz me lo zho rëb me:

—jZha dien rzac to guiaad Men ne zëëble diidz ga cxeel Dios? jCho lo xtii griequia me?

Pquiab zho rëb zho:

—Lo xtii David griequia me.

⁴³ Dzigo rëbchaa me lo zho:

—jPe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

⁴⁴ Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

⁴⁵ Gase nagon telne nli zha xtii David gac Men ne cxeel Dios ga, jzha nac dzigo rnee David men co rnabey David?

⁴⁶ Ni tib zho ib bdziidz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Mine nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedscuel me, ² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. ³ Golguien golgon xtiidz zho, jper nsin golso, ib gunde to mine run zho! Nac zho, ni lalnu rund zho mine rseed zho miech. ⁴ Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

⁵ jGrë ncuane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. ⁶ jZeene rbedz miech zho tib wagw nroob, rdziladz zho zhapaa rzob groj mezh, niicle len yadoogaaw, zaatne glupaa zha non nac zho, ga rzob zho! ⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ 'Sangué to gon yguibde to dien zha gnee miech "zha rac" nac to, sac tibaque men rac no, lëe me ga zëëble diidz cxeel Dios; golguien ganle tel to lalga nac to, rrieequia bets to grë to. ⁹ Ib gunde to zig run grëraa miech, runnon zho tib samiech zho rnee zho lëe pxoz zho ga, sac tibaque men ne nac Pxoze to, lëe men co no gbaa. ¹⁰ Yguibde to sac miech topaa gunctsin zho lo Dios, sac loxaque Men ne nole diidz ga cxeel me, men cose zrieelo gunctsin zho lo me. ¹¹⁻¹² Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

¹³ 'jProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. ¹⁴ [jProbsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuaane rapse grë wnaa viud; ib tedsod gon guielndëdox ne yгаа to.] ¹⁵ jProbsaxe to, rzac to na lëew ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie to zho. ¹⁶ jProbsaxe to, nac diidz name to noseed miech, ni per ni to riend pe rnee to! Rnee to lo miech: "Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho." ¹⁷ jNadzpaa nxen to, nadzpaa ncow nac guic to! jNiacxe mazdraa non or lo yadoo? Golguien ganle por yadoo, naclay grë or co. ¹⁸ Rneeque to: "Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho." ¹⁹ jPe nlipaa rnee to peet riende to! jNiacxe mazdraa dzigo non gon que lo pcoog? jPe rande to por lo pcoog co raclay gon? ²⁰ Golguien ganle, zha ne rzeet lo pcoog, yele grë ncuaane ndziib low ga quizeet zho; ²¹ zha ne gzeetgaa yadoo, haxta Diosle ga gon rzeet zho, sac ga rbëz me. ²² Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

²³ 'jProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsii lal, rdeed to tib lala mine rieguiäl tsiesan to yadoo, laa ley ne mazdraa non zienied guic to gun to mine rnabeya. Nli rieguiälä gdeed to grë gon co, per none scaque tsoxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ 'jNe nlipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuaane row to, ni riende to rrieequia haxta tib camell rab to. ²⁵ jProbsaxe to, masaque nac to zig tib plat, zig tib tas ne nëz zhitssew mbe rna, laa nëz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to. ²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz lena. ²⁷ jProbsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz lena loxaque grë ncuaan biodz, loxaque grë dzit ngutoo nodzë. ²⁸ Sca gon nac to, ne rac to zootxe luu waa nli miech ndzinli nac to, per nëz len zdoo to loxaque zhgab ne dien zha yquidie to miech, zha csacsi to miech no to.

²⁹ 'jProbsaxe to maistr ley, probsaxe to farisé! Ni lalnu guielto guiend lo to, rio to rzhixcuaa to ro xpaä grë zha ne biadteed xtiidz Dios, ni lëepaa grë pxozgol to beet zho. Dieen peraa run to rquiaalo to rsoladz to zho. ³⁰ Rnee to: "Telne niaca mine nole ne len dze co, ndeete ne diidz nsacsi xmengol ne grë men rii." ³¹ jLëëque to gon nobeero ga, zha nactaa lo dii ntseeb ne ziaad to! ³² jScaque nasca golgun! jGoltsienäl grë mine been pxozgol to ga! ³³ jMiech ngoopdol! jZhin mendox! Telne csaande to xquielntseeb to i, ib tedsod gon gabil guey to.

³⁴ 'Grë zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne yгаа guielbiini yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lëëque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. ³⁵ Blactaa grë

miech ne sca peet xtoꝓd ziyut to grē xmengol to, psilow desde Abel haxta Zacarí xingan Berequí, meṅ ne beet xmengol to zaatne nac gax lo pcoog lenṅ yadoo. Ni ye to gonṅ zēēb xchen grēse zha co. ³⁶ ¡Gneli naa lo to ganle, grē miech ne gonṅ mban lenṅ dze rii, grē to zho yгаа guieṅnēdox ne tsieguiaṅ to por grētaa guieṅntseeb co!

³⁷ ¡Aque tow meṅ Jerusalén! ¿Pe nacne squitaa nac to, rut to zha ne ziadteed xtiidz Dios lo to, rgoquie to grē zha ne rxeelṅ me lo to? Blactaa gocladz naa, niacnie naa to, nquiianaap naa to, zig runṅ nguid rgueedz ma xpēēd ma, per bzhiguielṅde to. ³⁸ Gacnaṅ to sca ganle, nadzetaa gonṅ laa lidz to nu guiaanṅ ngan, ³⁹ sac gandraa to naa, haxta galṅ dze ne guiab to: “¡Zha ndzontaa meṅ qui pxeelṅ Dios lo ne!”

24

¡Nsin goṅso!

(Mr. 13:1-23; Lc. 17:22-24; 21:5-24)

¹ Laa Jesús zieriee lenṅ yadoo grē xpēēdscuel me, zeene pcuēēdzde zho me, rēb zho:

—Gotsaa gwi ne ganle zha niaataa yadoo rii.

² Blozhse bui zho low, rēbchaa me lo zho:

—Niicle squitaa nagonṅ niaaw, per dzziṅ dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me lenṅ yadoo ga grē me zho, laa zho zie nēz Gui Oliv. Bdziṅ zho cho gui co, ga bzob me grē me zho. Dzigo wbig gax bla zho lo me, bnabdiidz zho rēb zho:

—Bzhiguielṅ bnē lo no dienṅ, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndionṅ no laa dze co ziaadyoble?

⁴ Pquiab me rēb me lo zho:

—Nsin goṅso, zeena choot yquidiede to. ⁵ Sac nzian zha ne grieequia guiab zho zha nac Menṅ ne zēēble diidz cxeelṅ Dios; ni nzian miech ne yquidie zho. ⁶ Zeene gon to nēzrii nēzrec noxtseeb csilo diṅ, guiabde to togo lēēle dze ne guiaṅ naa ga bdziṅ; sac niicle noyacle diṅa, noxtseebragaa pa csilo gaca, led lēdle ne nitlo guidzliu ga. ⁷ Garaa csilo grē diṅdox, grē guiedz nroob laaw tiṅnie saguiedz nrooba; grē zha ne rnabey grē guiedz nroob, laa zho tiṅnie sazha rnabey zho. Nēzrii nēzrec csilo gni grē zhodox, nzian zaatne ganṅ miech gbin. ⁸ Ni lega loxaque mine rsilosew ga, sac nroobraa guieṅnē ne ganṅ miech lozh ga.

⁹ Zeene laa grē ncuaanṅ rii noyac, ¡nsin goṅso! Sac hor co laa miech tsielo to ladznia zha ne csacsi to, haxta zut zho palal to, grēse miech stsiṅdiṅ zho to loxaque ne nac to zha ne no xnēz naa. ¹⁰ Nzian zha ne nole xnēz naa, lenṅ dze co laa zho gbiche, laa zho csilo lēēque zha glēēnie zha ne nacgrē zho, haxta zielo zho zho ladznia zha ne gut zho. ¹¹ Lenṅ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza. ¹² Grē zha ne nole xnēz naa, zeene ganṅ zho grētaa guieṅntseeb, grētaa doṅ ne quiayunṅ miech lenṅ dze co, ndal zho gleyniedraa zho Dios dib zdoo zho. ¹³ Per zha ne tiblīque gac, gbiched zho lo Dios, niicle telṅ petaa ganṅ zho noyac, zha co gac zha ne gdziṅ lo me. ¹⁴ Niicle scataa noyac grē ncuaanṅ co, ib none ygaaz Xtiidz Ndzon Dios lo grēse miech, grētaa zaatne ndxie miech laa zho gacnana; lozhraa ga dzigo laa guidzliu rii nitlo.

¹⁵ Zeene ganṅ to zaatne nac Lugar Nda lenṅ yadoo, zo tib ncuaane rieguaṅd so ga, tib ncuaane ziaad gnitlo, zigne bzeet Daniel meṅ ne biadteed xtiidz Dios (zha ne glaba, none guieṅ zho zha naca), hor co golguib dienṅ zha xoonṅ to. ¹⁶ Zha ne no grēraa guiedz ne ngab Judé, none xoonṅ zho tsie zho dan, ga tsietsolan zho. ¹⁷ Zha ne lēētaque hor co no glaa guic lidz, none lēēlēd xoonṅ zho, ib guiabd zho sēēb zho lenṅ yu tsiebee zho ncuaane rap zho. ¹⁸ Zha ne quiagaa lo dziin dan, ib guṅd zho tsie zho lad guiedz tsiexi zho xab zho. ¹⁹ ¡Prob grē meṅ wnaa ne lēētse lenṅ dze co zoney xpēēd, meṅ ne quianiegaa mēdyeenṅ ne bii radz! ²⁰ Golnab lo Dios gande to guieṅnē co lenṅ mēē ne rac naṅ, dze ne rdziiladzga to lo dziin. ²¹ Ne nligaa guieṅnēdoxa. Wlal ne biaanṅ guidzliu haxta lo nadze, gard ganṅ miech tib guieṅnēdox sca, ni gandragaa zhow ted ga. ²² Telṅne csaan Dios nroob dze gac guieṅnē

co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

²³ 'Zigne rne naa ga, len dze ne scataa gan miech grë dil co, zha ne gnë lo to: "Golte nu ganle, lëë Men ne nole cxeel Dios ga blanso nu", gnëgaa zho: "Goltsie nec ganle, laa me bdzin ga", gliladzde tow. ²⁴ Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. ²⁵ ;Nsin sca golso! Benque laa naa nilew lo to. ²⁶ Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: "Goltsie ganle laa me no ga", gnëgaa zho pa tib len yu ne no me, ni tib xtiidz zho gliladzde to. ²⁷ Sac zeen gal dze ne guiaad me stib, gacda ncuaan ngueets zhliaan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëëb ngbidz, ;niacxe gand grëse miecha? ²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ 'Zeene lozhse gan miech grë guielndox co, laa lo ngbidz ycow, gziinidraa mëë. Grë mel ne ndziib gbaa, laa ma gliala; grëraa ncuaane no gbaa, masaque nëzrii nëzrec gaca. ³⁰ Horco zlu ganle zeene laa Mgui ne pxeel Dios ga, ziad-zëëb lo xcow con grë guielndzon, con grë poder ne rap me, grëse miech mban gac zho, zoon zho gan zho me. ³¹ Grë xanjl Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle. ³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle. ³⁴ Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca. ³⁵ Zdzin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ 'Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxoze naa nana.

³⁷⁻³⁹ 'Nanle to ganle zha bzhaac miech len dze ne wban Noé, ib bliladzde zho xtiidz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdzin laa Noé bzëëb len barcw; tibaque zeene biala zho biini laa guiedox co nonitlole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle. ⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan. ⁴¹ Zaatne quiyot chop wnaa, tib zho tsienal zhits me, stib zho guiaan.

⁴² ;Nsin sca golso, sac gon nande to dien pa horpaa guiaad me, benque laa vis racle lo to! ⁴³ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; ;niacxe zaaguies zho? Led sobna zho lëë, nsin nsin so zho. ⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgan ganle, masaque laa to gac nagon zig tib ngundziin ne riaannie ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga griee, ine niowse guiaan zho guiaannie zho grëraa zha ne no lidz me. ⁴⁶ Zha ne sca gun, jwen tsie zho, sac zeene gbire me gan me scataa noxco zho dziin ne pso me zho, zianzuiu zho lo me ⁴⁷ haxta so me zho, zha yquiaanap grëse ncuaane rap me!

⁴⁸ 'Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga, ⁴⁹ csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, ⁵⁰ tibaque zeene gan zho laa me bdzinle. ⁵¹ Zha ne sca gun, per peraa dien gun me, ib tedsod nroob caxtigw ne

cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guielnëdox ne ted zho.

25

Zha bzhaac tsii wnaa nguieg

¹ Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guieltsieel.

’Tsii wnaa nguieg name, brieë zho zixinëz zho mgui ne ctsieelnia, tib tib zho bise zho psin win ne rec nceit ne rziini. ²⁻⁴ Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhëñse zho psin co scase bi zhow, bid zho nceit ne niodzëraaw.

⁵ ’Goc pa hora rio zhimcaalo zho, ni rdziñdaque mgui ne zixinëz zho ga, tibaque zeen laa zho pquia mcaal. ⁶ Gol groļ guieela, zeen laa vis rac, laa mgui co ziaadle, zha ne zixinëz me ga, zac griee zho tsiedzieel zho me. ⁷ Lëëlēd brieë mcaallo gza wnaa nguieg co, psilo zho nozhixcuaa zho zhipsin zho. ⁸ Zeene gon gza zha nroladz co ygaadraa zhinceit zho, dzigo bñab zho lo zgaay zha co, gdeed zho niip nceit yquuin zho, sac laa zhipsin zho noyuule. ⁹ Pquiab zho rëb zho: “Grieeeloda, sac mine yquuinse zhipsin no ziaadnie no. Mazd gołtsie zaatne rto zhow, ga gołtsiexiw.” ¹⁰ Per lo lal ne ziexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb leñ yu. ¹¹ Dzigo psilo zho, rcaan nia zho ro yu, rbedz zho mgui co cxal me ro yu sëëb zho. ¹² Per bdeete me diidz nzëëb zho, rëb me: “Runbeyd naa to gon, nand naa dien cho nac to.”

¹³ ’jNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaannie dimi

¹⁴ ’Mgui ne pxeel Dios ga, ziaad gac me zig tib men ne no griee tsie tib viaj zit.

’Tib men name no griee me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow leñ dze ne guieñd me ga. ¹⁵ Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me griee lo zho gundziin zho, dzigo laa me brieë laa me zie.

¹⁶ ’Zha ne biaannie gaay mil pes plat co, güey zho bloonon zhow, beena gan zgaay mila. ¹⁷ Zha ne biaannie chop mila, ye zho güey zho bloonon zho dimi co, scaque beena gan schop mila. ¹⁸ Laa zha ne pcaania tib mila ga, leļ güey zho güeyteen zho tib guieer güeyloliu zhow.

¹⁹ ’Goc bla iza laa men co bdziñ, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

²⁰ ’Bdziñ zha ne pcaania gaay mil pes plat co, bdziñnie zho xtimi me, rëb zho: “Laa xtimi luu nu gon, lëë gaay mil pes ne psan luu lo naa nu, laa zgaay mil min rii nac mine bdziniaw.” ²¹ Rley me rëb me lo zho: “jZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena ygaa luu grë guieļbley ne quiayac nu!”

²² ’Blozh ga, bdziñaque zha ne biaannie chop mila ga, ye zho laa zho bdziñnie xtimi me, rëb zho: “Laa xtimi luu nu gon, lëë chop mil pes ne psan luu lo naa nu, laa schop mil min rii nac mine bdziniaw.” ²³ Pquiab me rëb me: “jSquiw nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. jNa bded, zeena ygaa luu grë guieļbley ne quiayac nu!”

²⁴ ’Zeene bdziñntaa zha ne biaannie tib mila ga, rëb zho lo me: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu

niaana; ²⁵ gane mazd bialoliu naaw. Tib mil naca bneedz luuw, ledaaw nu.” ²⁶ Blëë guic me, rëb me lo zho: “¡Biche nu, paat rquiind naa miech yozh, miech nroladz ne squi nac! Conque nanle luu sca nac naa, ²⁷ ¿pex nac dzigo waa bioxcod luu maase mbediin luu dimi qui, ndziniaaw palal ncaania naaw niina?” ²⁸ Dzigo rëbchaa me lo zha ne ndxie ga: “Niinagazh golcob tib mil pes qui lo zha qui, goldeeda lo zha ne ziaadnie tsiw i. ²⁹ Sac zha ne rioxco rundziin ncuaañe rcaania zho, zacnroobraa ncuaañe yquianie zho. Laa zha ne squi nac, haxta mine pcaaniale zho, zdioba lo zho. ³⁰ Golxen zha yozh qui, goltsiesan zho lo ncow nëz ley. Ga gan zho guieñdodox ne tsieguial zho, ga goon zho haxta gow lay zho.”

Zha gun Jesús guieñwxtis

³¹ Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj! naa, zlu grëtaa guieñdzon ne rap naa, laa naa sob lo xcan ne raguial naa soob naa. ³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiiil zho. ³³ Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa men ne rnabey, hor co laa naa cuetz zha ne no xnëz naa, guiep naa lo zho: “Goltë grëse to, to ne nac to zha ne nziuu lo Pxoñ naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. ³⁵ Sac zeene pcaabedz naa, bneedz to ncuaañe dow naa; zeene bnab zhis naa, bneedz to ncuaañe go naa; zeene bial naa ladz to, bneedz to lidz to blëz naa; ³⁶ zeene gon to guieñd xab naa, bgacwxab to naa; zeene bzhacñe naa, zeene bio naa ladzguiib, biaad to biaadgan to naa.” ³⁷⁻³⁹ See zdoo zho gnë zho: “¿Per pa hor bneedz no ncuaañe doow luu, ncuaañe go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziñd no nzhaacñe luu, bdziñd no niogaa luu ladzguiib?”

⁴⁰ 'Dzigo guiep naa lo zho: “Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to.”

⁴¹ 'Laa zha ne ndxie nëz revés, hor co laa naa gzonëz zho, guiep naa lo zho: “¡Golbiche lo naa nu, miech ndziibdee! ¡Golsë lo guidox ne rieguial to, zaatne no guey mendox grë xanj! ma! ⁴² Sac gon, bio dze pcaabedz naa ni bneedzde to ncuaañe niow naa; bnab zhis naa, ni bneedzde to pe nie naa. ⁴³ Bial naa ladz to, ni bneedzde to zaatne mbëz naa; gon to guieñd xab naa, ni ni tib lë lar bneedzde to niacw naa. Bio naa ladzguiib, bzhacñe naa, ni pe liaadz to niaadgan to naa.”

⁴⁴ 'Squiab zho gnë zho lo naa: “Per pa hor bdziñ no luu rcaabedz luu, rnabgaa zhis luu; pa hor bdziñ no guieñd pa cuëz luu, guieñd lar ne gacw luu; pa horgaa bdziñ no no luu ladzguiib, nixgaa luu rzacñe luu.”

⁴⁵ 'Dzigo guiep naa lo zho: “Grëse vuelte ne bzoliaadz to niuñ to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to.”

⁴⁶ 'Horco grëse zha co laa zho guey lo guidox ne gdziñdraa dze grieë zho; laa zha ne bioxco wban zigne rnabey naa, grëse zho laa zho ygaa tib guieñmban ndzon ne gdziñdraa dze lozh.

26

Bnediidz zho dien zha gnaaz zho Jesús

(Mr. 14:1-2; Lc. 22:1-2; Jn. 11:45-53)

¹ Zeene blozh sca bnee Jesús lo grë miech co, dzigo rëbchaa me lo xpëdscuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

³ Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. ⁴ Laa

zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. ⁵ Rnee zho: “Lëëraasi choot gnabeyd ygaa me merpaa dze lni, zeena gacntseebd menguedz.”

Pchoob tib wnaa nceit nex guic Jesús

(Mr. 14:3-9; Jn. 12:1-8)

⁶ Betain ga no tib men ne biac lo guiedz lepr, lë Simón. Lëëtaaque no Jesús lidz men co, ⁷ zeene bdziñ tib wnaa bdzinnie tiblo nceit nex, nosew tib len ncuaan win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. ⁸ Zeene gon xpëédscuel Jesús sca been wnaa co, blëë zho, rnee zho:

—¡Pa rieguiala squi pxin zhlë wnaa qui nceit qui! ⁹ Teñ niaca mine ndow, pe zhidaa dimi ne nguizh zhow, nquiinpa dimi co ngaaza lo grë zha ne guieñd pe yquiin.

¹⁰ Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Gołsaan me. Par naa nroob non mine been me i.

¹¹ Teñ nli lëë racladz to gun to xyudar zha ne guieñd pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. ¹² Led pxin zhlëd wnaa rii zhinceit me, sac gon rreequia laa me bzhixcuaale xcuerp naa nu gal dze ne ygueetsa.

¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëédscuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey, ¹⁵ rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. ¹⁶ Nacne psilo Judas noguib Judas dien zha gdeeda diidz csañ Judas me ladznia zho.

Dowxtseenie Jesús xpëédscuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëédscuel Jesús lo me dien pa lo racladz me tsiegunlo zho ncuaane gowxtseenie me zho wdze co. ¹⁸ Dzigo rëbchaa me lo zho:

—Nanle to ganle cho lidz zrieelo gdziñ ne. Gołtsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

¹⁹ Dzigo laa zho zie. Güey zho zaatne pxeel me zho ga, ga beenlo zho xtsee co.

²⁰⁻²¹ Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëëque tib to gon tsielo naa ladznia zha ne gnaaz naa nawdze rii.

²² Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

²³ Pquiab me rëb me lo zho:

—Zha ne gan to csëëb xcuun len xquien naa, lëë zho ga. ²⁴ Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²⁵ Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

²⁶ Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Gołquiina, lëë xcuerp naa i gon.

²⁷ Ni bzhēn me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grēse zho, rēb me:

—Golguie vin qui, ²⁸ sac lēē xchen naa i, mine no gzhiee par guiaanmbe grē miech lo xtoḷ zho sēēb zho xnēz Pxoḷ naa, sac lēē stib mod cub nu psan me parne sēēb miech xnēz me. ²⁹ Lēē lultm vuelt nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxoḷ naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

³⁰ Blozhse biilnie zho Dios, laa me brieē ga gza me zho, laa me zienie zho nēz Gui Oliv.

³¹ —Ible saan to naa nawdze rii —rēb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nēzrii nēzrec gliaal mēcwxiiil.”

³² Mincopaa nagon gun miech naa, per zeēne laa naa grieēban glōle naa ga Galilé, ga cuēz naa to.

³³ Dzigo rēbchaa Pedr lo me:

—Niicle telne saan grē zha qui luu, sangue naa gon csaand naa luu.

³⁴ Pquiab me rēb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuelt guiab luu runbeyd luu naa.

³⁵ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grēraa xpēēdscuel me.

Bzodiidznie Jesús Pxoḷ me Getsemaní

(Mr. 14:32-42; Lc. 22:39-46)

³⁶ Zeēne bdzinnie Jesús zho zaatne lē Getsemaní, dzigo rēbchaa me lo zho:

—Nuse nagon golsob, laa naa ga gazodiidznie naa Pxoḷ naa.

³⁷ Horco psilo mban rac zdoo me, riabguieḷnē me, dzigo bredz me Pedr, ni grop xingan Zebedé, bzēnie me zho palal ³⁸ dzigo rēbchaa me lo zho:

—Mban rac zdoo naa, zootle zig zet naa lo guieḷnē rii. Nuse nagon golguiaan, per golsobna.

³⁹ Bzē me spalal, dzigo pquitsgzhīb me haxta bdziḷ lo me lo liu; psilo me bnaḷ me lo Dios, rēb me:

—Papá, laa naa rnab lo luu, telne zala zdoo luu, bzhiguiel psilaa naa lo grē guieḷnē rii. Miḷ rii rnab naa lo luu, per telne grieeloda, mine gnētaa luu, miḷ co gac.

⁴⁰ Zeēne guso me, güey me zaatne biaan gza tson zha co, gon me laa zho nixguiesle; dzigo rēbchaa me lo Pedr:

—¿Pe ni palal blēbde to nzobna to? ⁴¹ Golsobna, golnab lo Dios zeēna yquiild mēndox to. Niicle ne squi lēbdraa xcuerp to sobna to, per golnab lo Dios, sac gon miḷ co nac miḷne racladz zhiespíritu to.

⁴² Dzigo güey me stib, güeyzodiidznie me Dios; scaque miḷne bnaḷ me glo mincoque bnaḷ me. ⁴³ Zeēne wbiire me bdziḷ me lo zho, gon me laa zho nixguieslaque, sac lēbdraa zho mcaal. ⁴⁴ Wbiire güey me güeynab me lo Dios, scaque mincoque bnaḷ me. ⁴⁵ Zeēne laa me wbiretaa bion vuelt co, rēbchaa me lo zho:

—Lēēw nagon, zacle na gagues to, zacle gdziiladz to. Naa ne nac naa Mgui ne pxeel Dios, laa hor nagon bdziḷ zeēne laa grē miech ntseeb rii guiadnaaz naa. ⁴⁶ Goltsieso, zeēna zio ne; sac gon laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeēne laa Judas (tib zha ne nac xpēēdscuel me) bdziḷ, bdzinnie Judas tib dzoon zha ne pxeel grē pxoz ne rnabey, ni grē zha ne nac zha non lo men guiedz Israel. No zho nzheḷ spad, nogaa zho nzheḷ yag. ⁴⁸ Biaanniele Judas

zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëë me ga, ligier so zho gnaaz zho me. ⁴⁹ Zigne bdziñ Judas pquiaabdiuzh Judas me, blozhse ga wbig Judas dow Judas bzhid cuas me. ⁵⁰ Dzigo rëbchaa me lo Judas:

—Judas, ¿pe ziaadgun luu nu?

Lëëlëd wbig be grë zha co, bzhen zho me. ⁵¹ Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoz nroob. ⁵² Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho. ⁵³ ¿Niacxe nan to na grielod gnab naa lo Pxoaz naa niina cxeel me tsiipchop partid xanj me guiaadla ne nu? ⁵⁴ Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

⁵⁵ Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? ⁵⁶ Per ible laa grë ncuaan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëëdsuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo mengüiedz Israel, laa zho ndxieie ga. ⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dien zha gun zho Jesús.

⁵⁹ Grë pxoz ne rnabey, grë zha ne nac zha non lo mengüiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me. ⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, ⁶¹ rëb zho:

—Bdzion no gon rnee me laa me ctixche yadoo ne zob lad güiedz nu, zaatne riodzian ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxoz nroob co rquiabdaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëëd Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nëz derech, ni zeene laa naa güieet gbaa zialzëëb naa lo xcow.

⁶⁵ Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios. ⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡lb rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me, ⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzoop ne quia dziin lidz men rnabey co; rëb ndzoop lo Pedr:

—¿Ye luu lëë rzënie Jesús, men Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Riend naa dien cho men rnee luu.

⁷¹ Laa Pedr ziele nöz ro puert ne quia ro nöz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdzinnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me.
⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdzin i. ¡Rlupaa name zig rnee zha nöz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieer ro Pedr zeene laa tib gall pcuedz. ⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuilt rëb luu runbeyd luu naa.” Dzigo mbanse rac Pedr. Brieer Pedr ga, psilo Pedr biin Pedr guielnë co.

27

¹ Ziadyiinile liuw, wbiire pcaalsa grë pxoz rnabey, grë zha non lo menguietz, bnediidz zho dien zha gnabey zho guet Jesús. ² Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëälëd güey Judas lo grë pxoz rnabey co, lo grë zha non lo menguietz ga, zietsire Judas dimi ne bdiizh zho Judas ga. Mban rac Judas, ⁴ bdzin Judas rëb Judas lo zho:

—Naraa rien naa lëda nu ben naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Mincotaa gon ndiond no! ¡Xcuentzhe luu ga!

⁵ Horco pchel Judas dimi co len yadoo. Lo guielnë co brieer Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, riend zho dien zha gun zhow.

—¡Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

⁷ Dzigo bzodiidz zho dien zha gaca, nacre mazd pquiin zhow bzhii zho tib lë liu, zaatne rdieen yu ne ríaa grë ncuuan psin ne rquiin; parne lo liu co ygueets grë zha zit ne guet Jerusalén. ⁸ Nacre brieelë liu co “Liu ren”, ni sca runbey zhow len dze rii. ⁹⁻¹⁰ Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuuan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menguietz, rzadraa ncuuane rquiaqui zho me; per ni tib diidz rtsired me lo zho. ¹³ Dzigo rëbchaa Pilat lo me:

—¿Pe nacre rquiabd luu? ¿Pe ib rond luu grëtaa ncuuane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menguietz laa. ¹⁶ Len dze co no tib zha ntseeb ladzguiib lë Barrabás, zëeb xtiidz zho. ¹⁷ Nacre rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdziñ tib mandad rëb lo me:

—Znu në tsieel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsieel luu.

²⁰ Grë zha rnabey co, bio zho pquiil zho menguietz gnab zho csilaa Pilat Barrabás, ni gnab zho guet Jesús. ²¹ Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—¡Barrabás psilaa!

²² Dzigo rëbchaa Pilat:

—Men ne waa nac diidz pxeel Dios lo to nu, ¿zha guñ naa me?

Pquiab zho rëb zho:

—¡Bnabey yquia me lo cruz!

²³ —¿Per pe nacre yquia men rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz. ²⁴ Gonse Pilat rquiaadiag zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nappaa naa peet falt rapd me!

²⁵ Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

²⁶ Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psan Jesús lадznia menguiib ne tsiequiaa me lo cruz.

²⁷ Biire grë menguiib co bzëebnie zho me nëz len yulow, ga pcaalsa grëraa menguiib ne nacgrë zho, briñ zho igose me. ²⁸ Blee zho xab me, bgacw zho me tib lar nizhnie nlaan, zig rna lar ne racw grë rey, ²⁹ bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquiitsgzhiz zho lo me, rnee zho:

—¡Golwi ganle zha ractaa zhirey zha Israel!

³⁰ No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

³¹ Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. ³² Nëz zienie zho me bdzieel zho tib men Ciren lë Simón, bnabey zho men co bi me zhicruz me.

³³ Zeene bdziñ zho zaatne nac “Gui Beerguic Ngutoo” (Gólgota), ³⁴ ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

³⁵⁻³⁶ Blozhse pquiaa zho me lo cruz, bzhen zho tib xab me pchug zhow biaannie zho tib lëgaw, laa stiba bio zho rif; dzigo laa zho bzob ga, bzobnap zho. ³⁷ Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz. ³⁸ Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me. ³⁹ Grëse miech ne rdedtaa ran zho laa me quia ga, rzhidznie zho me, haxta rdzi zho guic zho ⁴⁰ rnee zho lo me:

—Led rëb luu lëe laa luu ntsil yadoo, ni tsonaque ngbidz nzaalo luu stiba, ¿pe nac dzigo rriielod luu guieet luu i? Telne nli Xpëed Dios nac luu, biet lo qui.

⁴¹ Scaque grë pxoz rnabey, grë maistr ley, grë zha farisé ni grë zha ne nac zha non lo menguietz, rzhidznie zho me, rnee zho:

⁴² —Stib miech scataa beenguiaac me, stib miech scataa bla me, ¿pe nac dzigo rrieelod me gla me me? ¿Goon me name nac zhirey ne, quiet me i sca zho; zeena dzuunbey ne men rnbey nac me! ⁴³ ¿Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

⁴⁴ Ye ngbaan ne quiazga me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groł dzew, tibaque zeen goc tib ncow dipse lo guidzliu, haxta las tres biala biini stib. ⁴⁶ Horco nguiedz zëeb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacre psaan luu naa?

⁴⁷ Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me. ⁴⁸ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me. ⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, grołtaa goca; psilo bni tib zhodox, grë quie masaque wila, ⁵² nzian ro baan grë zha ne bnalo Dios mazd padzeela bzhial. ⁵³ Zeen goł dze ne brieaban me, ye zho laa zho brieaban, brie zho len baa, bzëeb zho lad guiedz; nzian miech ne gon zho.

⁵⁴ Grë menguiib ne quianap me ga, ni zha ne rnbey lo zho, zeene gon zho bni zho co, ni gon zho grë ncuane goc ga, per nli bdieb zho.

—¿Ne nlipagaa —rnee zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé.

⁵⁶ Lad co no Marí Magdal, Marí tsieel Zebedé, ni Marí ne nac xniaa Jacob grop José.

Bqueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëeb ngbidza, zeene bdzin tib mgui lë José lo Pilat, bnaab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zianal zhiwseed Jesús. Nacre pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigo güey José. Blozhse blit José me lo cruz, laa José neyle tib lë lar cub, pchel José me lar co, ⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. ⁶¹ Laa Marí Magdal bii biala ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnbey, grë zho zha farisé, güey zho lo Pilat, ⁶³ rëb zho: —Gon luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieaban. ⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieaban. Nanle luu ganle, tel gac min co, cho gnë peraa gzhixcuaa zho.

⁶⁵ Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigo laa zho zie zienie zho grë menguiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biala grë menguiib co yquiaanapa.

28

BRIEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanj Dios gbaa bdob me quie nroob ne nioog ro baa co, bdiix mew tib lad, bzobga me lada. ³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. ⁴ Grë menguiib ne quianap ro baa ga, zeene gon zho anjl co, per nli bdzieb zho, rzhidz zho. Lo dzeb co, pcowgazh zho, grëse zho biab liu. ⁵ Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to.

⁶ Per guiendle me nu, jlaa me brieabanle zigne bneele me ga! Golwi ganle nu nac zaatne pxob zho me. ⁷ Niinagazh goltsie goltsienie diidz lo xpëëdscuel me, golguiab lo zho laa me brieabanle. Galilé me cuëz me zho, ga gan zho me. Laa to nanlew nasca.

⁸ Lëëlëd brieë grop wnaa co ga, rias zho laa zho zienie diidz lo xpëëdscuel me; lala rdzieb zho, ni lala rley zho. ⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquiitsgzhib zho lo me, bdeedz zho ni me.

¹⁰ Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

¹¹ Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhiäl ro baa co. ¹²⁻¹³ Dzigo pcaalsa grë pxoz co grë zho zha ne nac zha non lo menguiidz, dien zha gun zho. Nacne biaan zho diidz, mazd gdeed zho dimi lo grë menguiib co, parne gneelid zho, sinque guiab zho, segur xpëëdscuelaque me güeybee me len baa, per bien zhow sac nixguies zho. Nroob dimi bdeed zho lo grë menguiib co, ¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdziñ dze ne gdzieelo Jesús xpëëdscuel me nëz Galilé, brieë gza tsiiptib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdzieelo me zho. ¹⁷ Zeene gon zho me pquiitsgzhib zho liu.

Lo grë zha ne ndxie ga, no zho rienpaa lëë me ga, nogaa zha ne bii racchop guic.

¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuane no gbaaw, nogaa guidzliuw, lадznia naa psan Pxoz naaw. ¹⁹ Niina nagon, laa naa rsan diidz lo to: goltsie dipse lo guidzliuw, goltsieseed miech gac zho zha ne sëëb xnëz naa, golchoobnis zho, golguiab lo zho lëë min co rnabey Pxoz naa, rnabey naa ne nac Xpëëd me, ni rnabeygaa Espíritu Sant. ²⁰ Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

XTIIDZ NDZON DIOS MI_{NE} PQUIAA MARCW

¹ Nu ganle laa naa csilo gzodiidz naa, mi_{ne} been Jesús, Me_n ne bneele Dios cxeel me lo guidzliu.

² Lo guits ne pqui_{aa} Isá, tib me_n ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co:

Sxel naa tib zha ne tedner lo luu,
zeena zha co gzhixcuaa nēz ne ted luu.

³ Dan tso zho,
zon miech zeene laa tsi zho zēēb gnee zho:
“Golzhixcuaa nēz ne ted me_n ne rnabey,
golsaan grē guie_lntseeb ne ru_n to.”

⁴ Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquie_lntseeb zho gbig zho lo Dios, ni chobnis zho, zeena csilaa Dios zho lo grētaa xto_l zho. ⁵ Dzigo rree miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdo_l zho grē xto_l zho, dzigo rchoobnis me zho le_n guiubee Jordán.

⁶ Guits lad camell niaa xab me, ncuane rzhidoo le_n me guid niaaw ni niapse nguzhanch ni dzin dan row me. ⁷ Zeene rseed me grē miech co, rnee me lo zho:

—Iraa ziaad me_n ne mazdraa non lo naa. Tel naa peet nond naa, tib guie_lnzaac nroob ga yгаа naa telne niaca mi_{ne} grieelo maase lab me glit naa; per na ni mi_n co rdzi_nd naa.

⁸ Laa naa rchoobnis to niina con nis; sangue me con Espí_{ri}tu Sant cchoobnis me to.

Brobnis Jesús

(Mt. 3:13-17; 4:1-17; Lc. 3:21-22; 4:1-15)

⁹ Le_n ngbidz coquew, laa Jesús brie_e guiedz Nazaret xtan zha Galilé, güey me pchoobnis Juan me le_n guiubee Jordán. ¹⁰ Laa me norieedze lo nis, zeene go_n me laa zhan gbaa bzhi_{al}, laa me_n ne nac Espí_{ri}tu Sant biet gbaa zig tib palom laa me ziad-zēēb guic me.

¹¹ Ni lēētaque zēēb tib tsi me_n co gbaa, rnee me:

—Xin, rley_nie naa luu go_n, nziuu luu lo naa.

¹² Zeene blozh brobnis me, dzigo güey_nie Espí_{ri}tu Sant me tib dan ngan, zaatne no grē ma ntseeb; ¹³ bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanj_l Dios güeygan zho me.

¹⁴ Le_n ngbidz co bnabey Herod bio Juan ladzguiib. Ladzguiible no Juan zeene brie_e Jesús güeyted me grē guiedz ne ngab Galilé güeyseed me miech Xtiidz Ndzon Dios, ¹⁵ rnee me lo zho:

—Laa dze ne gnabey Dios ziaadgaxle, laaw bdzi_n dzele. ¡Golsaan grē xquie_lntseeb to, go_lnab perdon lo Dios; dib zdoo to go_lliladz Xtiidz me!

Tap zha ne quia gooz me_l

(Mt. 4:18-22; Lc. 5:1-11)

¹⁶ Tib dze zieded Jesús ro Nisdoo ne lē Galilé, go_n me laa Simón grop Ndrés quia gooz me_l lo nis co; sac ible dziin co nac xtsi_n zho. Grop bets zho laa zho noro_n guiex ne rgaa me_l lo nis. ¹⁷ Dzigo bredz me zho, rēb me lo zho:

—¡Goltē, goltēna_l zhits naa! ¡Laa naa cxel to tsie to stib gooz, tsietop to grē miech ne sēēb xnēz Dios!

¹⁸ Horcogazh psan zho guiex ne rnaaz zho me_l ga, laa zho ziena_l zhits me.

¹⁹ Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guiey ne rnaaz zho mel, lëë grop xingan Zebedé ga; ²⁰ dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zienal zhits me.

Tib mgui ne nosacsi men̄dox.

(Lc. 4:31-37)

²¹ Laa zho bdziñ guiedz ne lë Capernaum. Zeene gol dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech. ²² Grë miech ne ndxie len yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

²³ Lad grë miech co no tib mgui ne nosacsi men̄dox, tibaque zeene nguiedz pcooptsie ma mgui, ²⁴ rnee ma:

—¿Pe gun luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtołd nac luu ni Dios pxeel luu.

²⁵ Dzigo goctox Jesús lo ma, rëb me:

—¿Psioog ro luu! ¿Na zeena psaan men qui!

²⁶ Horco masaque been̄cxidz ma mgui co, ni rquiaadan ma redz laa ma psaan mgui.

²⁷ Grëse miech ne ndxie ga, bzee zdoo zho rnabdiidzlsa zho rnee zho:

—¿Bay cho nac men qui? ¿Wseed cub i gon ziaadnie me! ¿Rlu zha rnabey nac me, zha haxta men̄dox rdzieb zeene ractox me lo ma!

²⁸ Znuse brieets bliaal diidz zha beenguiac Jesús mgui co; grëse guiedz ne ngab Galilé gocnan miecha.

Biac xniadzoop Simón Pedr

(Mt. 8:14-17; Lc. 4:38-41)

²⁹ Ga brieë Jesús güey me lidz Simón grop Ndrës gza me Jacob ni Juan. ³⁰ Bdziñ zho, lëëtaque laa xniadzoop Simón nix rlan xlëë, nacre rëb zhow lo me. ³¹ Dzigo bded me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuane dow zho.

³² Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacne, grë zha ne nosacsi men̄dox ne; bioogse ro yu co ndxie miech. ³³ Zootle zig grëse miech ne no lad guiedz co pcaalsa ga.

³⁴ Ndal grë men rzacne co zhaase zhaase guielguidz ne rzac zho, per beenguiac Jesús zho; zha ne nosacsi men̄dox, ben̄cxoon me grë men̄dox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

Pseed Jesús miech Galilé

(Lc. 4:42-44)

³⁵ Silgaw, scase bii ncow rnaw guche Jesús brieë me lad guiedz co, güey me zaatne guien̄draa miech, güeyzodiidznie me Dios. ³⁶ Zeene rnit me choot guien̄d; dzigo brieë Simón ni zla zha ne nacgza Simón güeyguib zho me. ³⁷ Zeene bdziel me, rëbchaa zho lo me laa grë miech co quiaguible me.

³⁸ Dzigo pquiab me rëb me lo zho:

—¿Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

³⁹ Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni run̄cxoon me grë men̄dox ne nosacsi miech.

Biac tib mgui ne rlan lepr

(Mt. 8:1-4; Lc. 5:12-16)

⁴⁰ Tib vuilt, wbig tib mgui ne rlan guiedzdox ne lë lepr lo Jesús (masaque riaal dipse guid lad mgui), pquiitsgzhib mgui lo me, rëb mgui:

—Tebaa sigueel luu gun̄guiac luu naa.

⁴¹ Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaanmbel!

⁴² Zigne sca bnee me laa mgui co biac, mbese biaan xcuerp mgui. ⁴³ Blozh ga bzonëz me mgui, ni pso me diidz lo mgui ⁴⁴ rëb me:

—Bina ganle, choot lo gzodiidzd luu gon zha biac luu. Bzë, güey lo pxoz, güey san gon ne rnabey xley Moisés gdeed luu; zeena gan zho ganle laa luu biacle.

⁴⁵ Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnana, nacne brieelodraa nenlo ndzin Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rrieë grë guiedz co rdzin lo me.

2

Biac tib men ne gutoo

(Mt. 9:1-8; Lc. 5:17-26)

¹ Goc bla dzew, laa Jesús biire bdzin lad guiedz Capernaum stib. Zeene bin zho laa me bdzin ro yu, ² miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

³ Laa grë miech co ndxie ga, zeene bdzin tap zha bgui ney zho stib men bgui, zhoobse me lo yag, ib gacd së me sac dipse me gutoo. ⁴ Ni ne scataa miech guizhiu ne ndxie, gacd ted zho nëz ro yu gdzinne zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga. ⁵ Zeene gon Jesús ne nli dib zdoo zho riladz zho me gunguiac men rzacnë co, dzigo rëbchaa me lo men co:

—Xin, niinagazh laa naa gun perdon grëse xtol luu.

⁶ Blalaa zha ne nac maistr ley zob ga, zeene bin zho sca rëb me lo men rzacnë co, bzachaa zdoo zho: ⁷ “¡Lëda i gon squi rnee men qui! Quiaguitnie me Dios i squi rzë xtiidz me. ¡Tibaque men ne run perdon xtol miech, ni lëë men co nac Dios!”

⁸ Bienga Jesús sca rza zdoo zho, dzigo rëbchaa me:

—¡Pe nacne rlëë to ron to mine rne naa? ⁹ Parga nli, cholze zha ne zac guiab: “Laa naa gun perdon grëse xtol luu.” ¹⁰ Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacnë co, rëb me:

¹¹ —¡Guche i, bi yag ne bzhoob luu i, zeen bzë!

¹² Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdoo zho, rleynie zho Dios rnee zho:

—¡Nasi laa ne nodzian ncuane gard dzian ne!

Bredz Jesús Leví

(Mt. 9:9-13; Lc. 5:27-32)

¹³ Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

¹⁴ Ro nis co ziezë me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

¹⁵ Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

¹⁶ Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëëdsuel me:

—¡Mod sca na rownie xmaistr to grë zha ngoopdol, grë zha beed ne nac recaudador!

¹⁷ Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacnë, ga rquiin zho, ¡niacxe squiin zho zaatne no zha ne ndip ndaan? Ni min co rac niina, tel naa zialguibd naa miech wen, sinque laa naa zialguib miech ngoopdol.

¿Pe nacne rcuand xpëëdscuel Jesús?

(Mt. 9:14-17; Lc. 5:33-39)

¹⁸ Lëëtaaque dze co nocuan xpëëdscuel Juan Bautist, grë zho zha farisé. Dzigo bdzin bla zha ne bnabdiidz lo Jesús, rëb zho:

—¿Pe nac waa ib rcuand xpëëdscuel luu? Zha grë xpëëdscuel Juan Bautist ni grë zha farisé, rcuan zho.

¹⁹ Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban? ²⁰ Per zdziñ dze zeene laa mgui co gbiche; ni zeene laa dze co gdziñ, dzigosi nagon rieguial tso zho guielnë, rieguial ycuan zho.

²¹ Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox. ²² Scaque tsod zha ne cotsow vin cub tib len guid ne padzeelale noquuin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

Ptop xpëëdscuel Jesús mzion zhobxtil

(Mt. 12:1-8; Lc. 6:1-5)

²³ Tib dze ne rdziiladz zho lo dziin nëz Israel, bdednie Jesús xpëëdscuel me zaatne zëëb zhobxtil, dzigo zigse zieded zho pchoo zho palal mzion zhobxtil co. ²⁴ Gon zha farisew, dzigo rëbchaa zho:

—¿Lëda i gon noyun to! ¿Golguien ganle dze nda nac dze rii!

²⁵ Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho? ²⁶ Rneew, bzëëb me len yadoo güeynab me guietxtil ne nac gon, downie me grë zha ne ziegza me ga, ni loxaque zha ne nace pxoz row guietxtil co. Len iz co nac men ne lë Abiatar pxoz nroob. ²⁷ Golgacnan sca ganle, biaan dze rii par csacsi miech xcuerp zho, sinque ne rleynie Dios miech gane psan mew. ²⁸ Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

3

Biac tib mgui ne mband tib nia

(Mt. 12:9-14; Lc. 6:6-11)

¹ Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia. ² Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. ³ Dzigo bredz me mgui co, bnabey me bzo mgui groltaa lo grë zha ne ndxie ga; ⁴ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. ⁵ Dze bui me lo zho grëse zho, wbiñladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

⁶ Grë zha farisé, ni grë zha ne nacie rey Herod, zigne brieë zho ga laa zho psilo bnediiz dien zha gdeeda diidz gut zho Jesús.

⁷ Len dze co, tib vueltd bdzin Jesús ro nisdoo grë xpëëdscuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé, ⁸ grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

⁹ Dzigo bnabey Jesús xpëedscuel me, yguib zho tib leñ barcw zaatne gac so me zeena ctaagwd grë miech co me. ¹⁰ Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grieelo maase lad xab me xen zho.

¹¹ Grë mendox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—;Xpëed Dios nac luu!

¹² Per ractox me lo ma, rsaand me gnee ma parne xoobnend cho nac me.

Ble Jesús gza tsiipchop xpëedscuel me

(Mt. 10:1-4; Lc. 6:12-16)

¹³ Blozh ga biepp me tib guic gui win zob ga, ga bredz me zha ne gocladzse me. Zeene pcaalsa zho grë zho, ¹⁴ dzigo lad co ble me tsiipchop zha ne sënie me, zha ne cxeel me tsieseed miech Xtiidz Dios. Lëë zha co bleelë me poxtl, ¹⁵ ni bdeed me poder lo zho guncxoon zho mendox.

¹⁶⁻¹⁹ Znu lë gza tsiipchop zha ne ble me ga:

Simón (lëë Simón co bleelë me Pedr),

Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

Rëb zho mendox nacie Jesús

(Mt. 12:22-32, 46-50; Lc. 8:19-21; 11:14-23; 12:10)

²⁰ Wbire Jesús ga, laa me bdziñ ro yu grë me zho. Scasaque ndal miech ne pcaalsa ga stib, ni rdeetew diidz gownie me zho. ²¹ Zeene bin menlidz mew, dzigo brieë zho xiexi zho me, sac rëb zho bod rzhinle guic me.

²² Haxta grë maistr ley, zha ne brieë nëz Jerusalén bdziñ ga, rnee zho:

—Beelzebú, ma ne rnabey lo mendox, ma co nacie me gane rrieelo runcxoon me mendox.

²³ Dzigo bredz me zho bzodiidz me tib cuent lo zho, rëb me:

—;Pa nan to na grieelo lëëque mendox guncxoon samendox ma? ²⁴ Tel tib guiedz nadien gac miech chop dii, csilo zho tillsa zho, ¿niacxe nitlod guiedz co? ²⁵ Tib diigaa miecha, tel csilo zho lëëque zha tilnie menlidz zho, ¿niacxe nitlod zho? ²⁶ Scaquegaa mendox nagon, telne lëëque lëë ma tilnie samendox ma, ¿pe nale na bnitlo ma! ²⁷ Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho.

²⁸ 'Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co; ²⁹ sangue zha ne gneenë Espiritu Sant, dol nroob ga run zho, gdziñd dze ne gun Dios zho perdon.

³⁰ Sca rëb me lo zho, sac sca quianee zho rëb zho mendox nacie me.

³¹ Horco laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me. ³² Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

³³ Pquiab me rëb me:

—;Xnia naa ye, bets naa ye?

³⁴ Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. ³⁵ Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

4

*Xcuent zha ne güey gon**(Mt. 13:1-23; Lc. 8:4-15)*

¹ Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacne güeytsep me tib len̄ barcw ne zo ro nis co, ga bzob me laa grē miech co bre tib ro nis. ² Ndal grē ncuaane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

³ —;Golquiaadiaga gan̄le! Tib mgui name, brie me güey me gon zhobxtil. ⁴ Zeene laa me quialaa| zhob co, min̄e bliaa| gax ro n̄ez; znuse güey grē mguin̄ güeytow maw. ⁵ Laa min̄e bliaa| zaatne nac lo quie, znuse znuse blana; ⁶ per zeene laa lo ngbidz brie, znusaque bgoola blozh ga bidzgaw; sac guiend̄ nroob low. ⁷ Laa min̄e bliaa| zaatne nac len̄ yag guiets, zeene laa grē yag guiets co broob znuse bnitlo yag guietsa, pasëw niac. ⁸ Sangue grē min̄e bliaa| zaatne nac lo liu naa|, blana, brooba ni goca; lo tib tib zhob co no mzion co brie galptsii zhob, now brie tson̄gala, nogaaw brie haxta tib gayoow.

⁹ Blozh ga, rëbcha me lo zho:

—Zha ne racladz guien̄ min̄e rne naa, yquiaadiag zhow.

¹⁰ Zeene laa grē miech co zey, laa gza tsiipchop xpëedscuel me, ni zla zha ne rzënie me, laa zho bnabdiidz lo me dien̄ zha nac cuent co. ¹¹ Dzigo rëbcha me lo zho:

—Tel̄ to, Dioszhal rlu lo to zha rnabey me, niicle ncuaane mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien̄ zhow. ¹² Per niicle scaw, nzhal diag zho ron zho, per peet rien̄d zho; nzhal lo zho rwi zho, per peet ran̄d zho; ib n̄ed zho gbig zho lo Dios, gnab zho gun̄ me zho perdon.

¹³ 'Nana to, tel̄ne bien̄de to zha nac cuent co, ¿zha guien̄ to grëraa min̄e gne naa dzigo? Golquiaadiaga gan̄le, znu gon̄ naca: ¹⁴ Mgui ne güeylaa| zhob ga, rrieequia lëe zha ne rienee Xtiidz Dios lo miech ga, laa zhobxtil co nac Xtiidz Dios. ¹⁵ No miech nac zig nac ro n̄ez ne bliaa| palal zhob co: rquiaadiag zho Xtiidz Dios, rlozh ga lëelëd rdziñ mendox rquiil ma zho, rsaanga zhow. ¹⁶ Nogaa zho nac zigne nac lo quie co: zeene rquiaadiag zho Xtiidz Dios, in̄e rley zho rcaania zhow, ¹⁷ per led dib zdood zho rcaania zhow; gane zeene laa miech rsilo rlëe lo zho, laa miech rtsidil̄ zho porne rliladz zhow, rsaanga zhow. ¹⁸ Zzhisгаа zho nac zigne nac len̄ yag guiets co: nli rquiaadiag zho Xtiidz Dios, ¹⁹ per rsilo zho lel̄ grē ncuaane no lo guidzliu rii mazdraa rionie guic zho, rquidie grē dimi zho, rzoobladz zho yquianie zho grëse ncuaane racladz zho. Grē ncuaan̄ co rioxcoraa zho, laa ne tsonie Xtiidz Dios guic zho, min̄ co rquiaqui ib rund̄ zho min̄e rnabey me. ²⁰ Laa nogaa zho nac zigne nac liu naa| co: rquiaadiag zho Xtiidz Dios, dib zdoo zho rliladz zhow, ni rban zhow zigne naca. Grē zha co, no zho nac zig mzion ne brie galptsii zhob ga, no zho nac zig min̄e brie tson̄gala, nogaa zho nac zig min̄e brie tib gayoow ga.

*Xcuent biini ni midz moxtaz**(Mt. 13:31-32, 34-35; Lc. 8:16-18; 13:18-19)*

²¹ Blozh ga, biire pcaalsa miech lo me, dzigo rëb me lo zho:

—;Pa dien̄ rquiin̄ biini? ¿Pe rquiaguiw par tsolana tib len̄ guin̄ o soogaaw tib zhan lon? Led zeene rquiaguiw lëe, zaatne grieelo gziiniw ga rzoob zhow. ²² Scaque nagon̄ grëse ncuaane rac ngueetsa, grëse ncuaane rnee miech zhliana, ib none xoobnena.

²³ 'Tel̄ne racladz to guien̄ to min̄e rne naa, golquiaadiaga; ²⁴ ni zigne ron tow scagaa go|tsoxco gol̄gūna. Tel̄ne tsoxco to gun̄ tow, scagaa ziogucraa tow. ²⁵ Sac zha ne tsoxcow, zdedraa Dios guielbiini lo zho; sangue zha ne tsoxcoda, haxta tel̄ palalse guielbiini ne bdeed me lo zho stiche mew.

²⁶ Ni rëb me lo zho:

—Znu gon̄ nac zha ne ngab lo Dios; nac zho zig bni ne ran̄ miech. ²⁷ Zha ne rielaal̄ bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw rroob, per rien̄d zho zha nacne laaw rroob.

²⁸ 'Zhal guidzliu rdeeda guie|nzaac co, guizh nac zhob co zeene r|ana, rac palal dzew laaw r|an m|zion. ²⁹ Laa zeene laaw ral, dzigo laa zho rietiitsa, sac laa dze bdzi|nle ne laaw tsas.

³⁰ '¿Zha gan|le gni naa lo to zeena guie|n to zha nac xquie|rnabey Dios? —rëb Jesús—. ¿Pa tib cuent gan|le gzodiidz naa lo to zeena guie|n to zha naca? ³¹ Naca gon| zigne nac tib midz moxtaz ne ran miech dan rii. Midz moxtaz nac midz ne mazdraa win, ³² ni tel| gacn|iw, rrooba, ni lëew rroobraa lo grë guizh ne ran zho ro yu, haxta grë mguie|n riezaa zhiptsieez ma low sacne ncala.

³³ Nzian grë cuent rii pquiin me par cseed me grë miech co, ni laa me bnee mi|ne rgobey me guie|n zho. ³⁴ Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

*Pcuëz Jesús tib medox
(Mt. 8:23-27; Lc. 8:22-25)*

³⁵ Zeene bdze dze co, rguetsle liuw rëb|chaa me lo xpëedscuel me:
—Gol|gotsaa dieedquia ne stib nëz lo nis rii.

³⁶ Blozhse bnee me lo grë miech co, laa zho bie|p len| barcw ne zob me ga grë me zho, laa zho zie. Ye blalaa barcw ne zob lo nis co ziena|.

³⁷ Laa zho zie, tiba|que zeene laa tib medox psilo brie|e, masaque r|lis me lo nis co; zeene riasoli low riechoo|na len| barcw, laa barcw psilo noyodzë|le nis. ³⁸ Dzigo güey zho güeycuaan zho Jesús, sac lëë|taque laa me nixguies nëz zhan barcw ncoogse me tib lmad.
—¡Maestro! —rëb zho—. Bui gan|le, ¿pe znuse csaan luu nitlo ne nu?

³⁹ Dzigo guche Jesús, bnee me lo me co, bnee me lo nis co, rëb me:
—¡Lëew ga na! ¡Gol|cuedze!

Zigne sca bnee me, laa me co blëz, niicle nis cow laaw bredze. ⁴⁰ Dzigo rëb|chaa me lo zho:

—¿Pe nacne squitaa rdzieb to? ¡Garda|que dzigo lëë gliladz to cho nac naa!

⁴¹ Riend|raa zho zha gun| zho lo dzeb co, ni rnabdiidz|sa zho rnee zho:
—¿Bay cho nac me, zha nacne haxta me, haxta nisdoo ron xtiidz me?

5

*Me|n Gadar ne nosacsi me|ndox
(Mt. 8:28-34; Lc. 8:26-39)*

¹ Bdzi|n Jesús nëz dan| ro nisdoo co gza xpëedscuel me, ga nac xtan zha Gadar. ² Laa me bieldze len| barcw, zeene laa tib mguie| ne nosacsi me|ndox bdzi|n lo me. Len| baa brie|e mguie| co bdzi|n me ga, ³⁻⁴ sac len| baa nac zaatne rëz me. Miech ne lëbd zho low, nzian vüelt ziezoo|b zho caden nia me, ni me ne, per znuse rchug mew, rzhoon|ga me. ¡Choot rlëbd lo me! ⁵ Dze, guieel quianzë me grë dan co, rietso me grë len| baa. Roptsi|edan me, ni lëë|que me rzhen| quie rchug me guidlad me. ⁶ Laa dze co, zitraa gon| me Jesús, rias me bdzi|n me pquiit|sgzhib me lo Jesús. ⁷⁻⁸ Dzigo goctox Jesús lo me|ndox ne noguitnie me, rëb Jesús:

—¡Me|ndox, psaan me|n qui!

Horco pcooptsi|edan me|ndox co mguie| co, ni rnee ma lo Jesús:

—¿Pe gun| luu naa Jesús? Run|bey naa luu, Xpëed Dios ne no gbaa nac luu. ¡Ne nli|pagaa been| guie|nzaac csacsid luu naa!

⁹ Dzigo bnabdiidz Jesús lo ma dien| cho lë ma. Pquiab ma rëb ma:

—Legion lë no, sac nzian nac no.

¹⁰ Rnab grë me|ndox co lo Jesús, gzonëzd me ma zit. ¹¹ Gaxaque zhan gui co ndxie tib dzoon nguts noyow, ¹² dzigo bnab ma lo Jesús, rëb ma:

—Bzhiguiel| lose grë nguts qui bzonëz no.

¹³ Bdeed Jesús diidz. Dzigo laa grë me|ndox co psaan mguie| co, laa ma zie bzëëb ma zdoo grë nguts ne ndxie ga; psilo grë nguts co rquiaa ma corr güey|pix ma glaa tib ro yee ne

quia ro nisdoo co, bliaa| ma haxta lo nis. Ga biep ma nis, grëse ma gut. Rga ma zig chop mil.

¹⁴ Zha ne quianap grë nguts co, gzase zho bzhoon güeyzodiidz zhow lad guiedz, ni grëraa yu ne zob gax ga. Brieë grë miech co, zieso zho. ¹⁵ Zeene bdziñ zho, per nli bdzieb zho, sac gon zho laa mgui ne sca bdziitnie meñdox ga zobse lo Jesús, laa mgui nacwxable, rlu ndzinlile nac guic mgui. ¹⁶ Psilo grë zha ne gon zha biac mgui co, ni zha goc grë nguts co, psilo zho rzodiidz zhow lo grë zha ne bdziñ ga. ¹⁷ Miñ co bin grë zha co, mazd bnab zho lo Jesús siguiel me gbi me xtan zho.

¹⁸ Zeene laa Jesús zie sëëb me len barcw, dzigo laa mgui co wbigaque lo me, nan mgui nziguie| me nienal mgui zhits me. ¹⁹ Per bdeete me diidz, rëb me:

—Wbire, güey güeyzodiidz lo grë menlidz luu ganle pa lotaa pquia zdoo Dios luu, zha nactaa milagr nroob ne been me beenguiaac me luu.

²⁰ Dzigo wbire mgui. Güey mgui dib xtan zha Decápolis, güeyzodiidz mgui lo grë miech co zha beenguiaac Jesús mgui. Grëse zha ne rona, rzee zdoo zho.

Brieëban xpëdwanaa tib men lë Jair

(Mt. 9:18-26; Lc. 8:40-56)

²¹ Zeene laa Jesús biire brieëquia stib nëz ro nisdoo co, miech guizhiu ne pcaalsa lo me ga. ²² Ga zo me zeene laa tib men ne nacgrë zha ne rnabey yadoo lë Jair bdziñ. Zigne bdziñ me lo Jesús pquiitsgzhib me, ²³ rëb me:

—Been tib guie|nzaac gotsaa guio ne gunguiaac luu xpëëd naa. Laa win rlozhle; nanpaa naa telne cxobnia luu guic win, ziac win.

²⁴ Dzigo laa Jesús zie nëz lidz men co. Ndal miech ne zienal zhits me, haxta rtaagw zho me. ²⁵ Lad grë miech co zienal tib wnaa, gocle tsiipchop iz rlan me tib guie|guidz, rzac me zigne rzac men wnaa gzob mëë, tibaque rlan mew ib rbëzda. ²⁶ Nzianle lo men ne run rmed ziye me, grëse ncuane rap me bloozh me lo rmed; per laa ne cuëz guie|guidz co, lel znu rzhizhooraaw. ²⁷⁻²⁸ Ziyonle me grë milagr ne run Jesús. Bza zdoo me rëb me: “Totsaque ygaa maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús. ²⁹ Nligaa hor cogazh laa guie|guidz co blëz, bien me laa me biac.

³⁰ Zeene bien Jesús ne laa me beenguiaac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

³¹ Rëbchaa xpëëdscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

³² Per laa me rwi lo grë miech co dien chow. ³³ Nanpaa wnaa co ne me ga, rdzieb me, rzhidz me laa me wbig pquiitsgzhib me lo Jesús bneeli me zha nacne sca been me. ³⁴ Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guie|guidz co bichele.

³⁵ Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëëd luu gutle.

³⁶ Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

³⁷ Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

³⁸ Zeene bdziñ zho lidz men co, tib ruid ne rac, nguiedz zëëb tsi zho roon zho no zho xquie|në mëëd co. ³⁹ Dzigo bzëëb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzooop win rii, nixguies ndzooop.

⁴⁰ Leḷ rzhidznie grē miech co me, bin zho sca rēb me. Dzigo bnabey me brieē zho ley grēse zho, loxaque pxoz mēēd co, xniaa win ni gza tson xpēēdscuel me zha ne naḷ zhits me ga bzēēbnie me len yu ne nix win. ⁴¹ Wbig me bzhen me nia win, rēb me lo win:

—¡Guche i na, ndzooop yeen! (Talita, cumi.)

⁴² Zigne sca bnee me laa mēēd co guche, laa win bzē. Tib mēēd tsiipchop iza. Grēse miech co per nli rzee zdoo zho. ⁴³ Dzigo pso me diidz lo zho choot lo gneed zhow; blozh ga bnabey me bdeed zho ncuaane dow mēēd co.

6

Güey Jesús ladz me

(Mt. 13:53-58; Lc. 4:16-30)

¹ Ga brieē Jesús grē xpēēdscuel me, laa me bdziḅ Nazaret zaatne nac ladz me.

² Laa zeene goḷ dze ne rdziiladz zho lo dziin, laa me bdziḅ len yadoo, psilo me pseed me grē miech co. Per nli rzee zdoo zho ron zho grē miḅ rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guieḷbiini ne squitaa rap me i, ne rnee miech ndal grē milagr ne run me? ³ Tib ngurēyagse name nac me. Led lēē xingan Marí i, bets me name nac Jacob, nac José, nac Judas ni Simón, grē bzian mew, nu no zho grē zho.

Ib beencasd zho me. ⁴ Zeene gon me sca rac zho, dzigo rēb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lēdle ladz zho, ni menlidz zho ni menladz zho nēd gunbey zho.

⁵ Brieelod niun me nzian milagr ga, blase zha rzacnē pxobnia me guic, beenguiac me.

⁶ Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grē guiedz ne ndxie gax ga, güeyseed me miech.

Pxeel Jesús xpēēdscuel me tsieseed zho miech

(Mt. 10:5-15; Lc. 9:1-6)

⁷ Tib dze, bredz me gza tsiipchop xpēēdscuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par gunxoon zho mendox.

⁸ Pso me diidz lo zho güeyd zho pe yquiin zho nēz, lēē gdib tib lē yag ne gzoxca zho güey zho. Zig nac ncuaane gow zho, zig nac dimi, pe tib bziuudgaa, güeyd zhow. ⁹ Lab zho, miḅ quiaze ni zho; xab zho, miḅ nacwse zho mincose tsienie zho. ¹⁰ Ni rēb me lo zho:

—Guiedz ne gdziḅ to, zha ne gneedz zaatne cuēz to, lidz zha co goḷcuēz haxta gdziḅ dze ne gbi to guiedz co. ¹¹ Laa zaatne ne ib gneedzd zho pa cuēz to, niicle nēdgaa zho yquiaadiag zho miḅ gnee to, dzigo goḷlit grē yudie co ni to, goḷrieegazh ga, zeena guien zho ganle lēda ga been zho.

¹² Dzigo laa zho brieē, laa zho zie. Güey zho, güeynee zho lo grē miech csaan zho xquieḷntseeb zho, gbig zho lo Dios. ¹³ Nzian zha ne nosacsi mendox, benxoon zho mendox co; grē zha ne rzacnē, bdēēb zho nceit guic zho, beenguiac zho zho.

Gut Juan Bautist

(Mt. 14:1-12; Lc. 9:7-9)

¹⁴ Bin rey Herod rzeet zho Jesús, sac tel pa lotaaw zēēb diidz grētaa milagr ne run me. Grē miech co, no zho rzac brieēban Juan Bautist lēē me ga nac Jesús, gane run me grētaa milagr co; ¹⁵ nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Diosa, zig biaad grē zha ne biaad padzeela.

¹⁶ Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lēē me ga brieēban.

¹⁷⁻¹⁸ Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me nonguiēda ga lēēque Herodí ptsieelnia me; sac tsielpaa bets me Lip nac Herodí.

¹⁹ Blēēnie wnaa ne nac Herodí ga Juan, rzac me tebaa zha gut me Juan; per rdeetew diidz, ²⁰ sac rdzieb Herod lega pe gun me Juan, rien me tib zha ne zienal miḅ nac diidzli,

tib zha ne peet xtołd nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgab riend me dien zha gun me, per rdziladz me rquiaadiag me grē mine rnee Juan.

²¹ Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grē zha ne nacie me dziin, grē zha ne zo lo menğuiib, ni grē zha non lo zha Galilé. ²²⁻²³ Laa zho no mezh noyow zho, zeene bzēēb xindzooop Herodí psilo ndzooop biee ndzooop. Bdziladz Herod gon me zha biee ndzooop, grē zha ne zob lo mezh ga ne. Dzigo rēb Herod lo ndzooop, tel petaa gnab ndzooop zdeed mew; haxta brieer ro me rēb me:

—Ncuaane gacladztaa luu gnab luu, niicle zig groł grē ncuaane rap naaw, znedz naaw.

²⁴ Rias ndzooop güeynabdiidz ndzooop lo xniaa ndzooop. Dzigo rēbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

²⁵ Bdziñ ndzooop lo Herod rēb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

²⁶ Zeene bin Herod sca rēb ndzooop, mbanse rac me; per rdeetraaw diidz niab me grieeloda, sac grēse zha ne zobnie me ga, bin zho rēb me zdeed me ncuaane gnabtaa ndzooop. ²⁷ Dzigo racse me pxeel me tib menğuiib ne tsiechug guic Juan.

²⁸ Güey menğuiib co len ladzguiib pchug zho guic Juan. Bdziñ zho, zhoobsew tib len plat bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

²⁹ Zeene bin xpēēdscuel Juana, dzigo güey zho güeylis zho me ga güeyqueets zho me.

Bguiaan Jesús gaay mil miech

(Mt. 14:13-21; Lc. 9:10-17; Jn. 6:1-14)

³⁰ Zeene laa gza xpēēdscuel Jesús bdziñ lo me stib, psilo zho bzodiidz zho lo me grēse tel zha güey zho, grēse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grē xpēēdscuel me. Dzigo rēb me lo zho:

³¹ —Mazd golgotsaa guio ne tib zaatne zitlaa lo grē miech rii, zeena grieeło gdziiladz to niip.

³² Dzigo bzēēb me tib len barcw grē me zho, laa zho zie. ³³ Nzian zha ne gon zie me, beenbey zho ne mew. Dzigo ndal miech ne no grē guiedz gax co brieer, rias zho zie zho glole zho bdziñ zaatne no gdziñ me. ³⁴ Zeene biet me len barcw, gon me laa grē miech guizhiu co ndxiele ga. Pquia zdoo me zho gon me scataa ndxie zho zootle grē mēcwxiił yeen ne guiend xbaxtor, dzigo psilo me nzian grē ncuaane pseed me zho.

³⁵⁻³⁶ Goł bdze dze co, wbig xpēēdscuel me lo me rēb zho:

—Mazd gudz lo grē miech qui guey zho na, zeena guiob tsie zho grē guiedz ne ndxie dib gax i, tsiesi zho ncuaane gow zho; sac gon laa dze bdzele, ni choot miech guiend nu.

³⁷ Pquiab me rēb me lo zho:

—To goldeed ncuaane gow zho.

Rēbchaa zho lo me:

—¿Pe zhizhe dimi ne yquiiñ gziuu guietxtil ne gow grētaa miech qui?

³⁸ Dzigo bnabdiidz me lo zho, rēb me:

—¿Bla guietxtil ziaadnie to? ¿Gołwi dien!

Zeene biire zho güeyso zho, rēbchaa zho lo me:

—Loxaque gaay guietxtil ziaad, ni ziaad chop mel.

³⁹ Dzigo bnabey me bzob grē miech co, wdzeepaaw bioogse lo guizh nguia ne zēēb ga ndxie zho. Tib dzoonga tib dzoonga zho bre, ⁴⁰ zaatne bre tib gayoo zho, zaatne breega grol gayoo zho.

⁴¹ Dzigo bzhen me gza gaay guietxtil co, ni grop mel co, blis lo me bui me nēz gbaa, bdeed me xquizh lo Dios. Blozh ga, beengrol me guietxtil co, zigse rdeed mew lo xpēēdscuel me, scase scase noguiiz zhow lo grē miech co. Scaque been me grop mel co.

⁴² Grēse miech co, dow zho haxta zaatne bieltaa zdoo zho. ⁴³⁻⁴⁴ Miech tafa, zha bguise rgaa zig gaay mil; ni zeene blozh dow zho, scase ncuaane nroob biaan, biodzē tsiipchop chicuid bio grē guietxtil co, bio grē mel co.

*Rzë Jesús lo nisdoo**(Mt. 14:22-27, 34-36; Jn. 6:16-21)*

⁴⁵ Zeene blozh ga, bnabey Jesús xpëedscuel me bzëëb zho len barcw, zeena zienerga zho tedquia zho stib nêz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co. ⁴⁶ Blozhse bzonëz me zho, dzigo güey me tib guic gui zob gax ga, güeyzodiidznie me Dios.

⁴⁷ Zig rguets liuw, laa barcw ne zie xpëedscuel me ga no lo nis co. Laa me zo ga tipse me, ⁴⁸ ran me rlu ib gacd csëëniob zhow, sac rriee me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

⁴⁹ Zeene gon zho laa men co sca ziaad-zë lo nis co, bdzieb zho, broptsie zho rnee zho: —;Tib ndziin i gon ziaad i!

⁵⁰ Sac grëse zho ranlo zho laa me sca ziezë lo nis co. Dzigo bnee me lo zho rëb me: —;Gdziebde to, naa zial nu!

⁵¹ Zeene laa me biep len barcw ne zie zho ga, laa me co blëz; dzigo mazdraa bzee zdo zho. ⁵² ;Per ib riend zho cho nac me, niicle ne gonle zho been me milagr nroob co bguiaan me miech guizhiu co!

⁵³ Zeene laa zho bdziñ stib nêz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. ⁵⁴ Loxaque biet me len barcw laa grë miech co beenbeyle me. ⁵⁵ Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz zho lo yag, rdzinnie zho zho lo me zaatne rontaa zho no me. ⁵⁶ Zaatne gdzintaa me, niicle guiedz nrooba, niicle guiedz lasa, rbee grë miech co zhimguidz zho rienie zho zho zaatne nac len guiedz; ga rnab zho lo me siguiel me maase ni lar ne mbixse me xen grë men rzacnë co. Ni grëse zha ne rzhen xab me, riac zho.

7

*Ncuaane runctal xtol miech**(Mt. 15:1-20)*

¹ Tib dze, bdziñ bla zha farisé, ni zla maistr ley ne ziaad nêz Jerusalén, lo Jesús. ² Dzigo gon zho blalaa zha ne nac xpëedscuel Jesús, zeene laa zho row rguibd zho nia zho zigne nacpaa grë zhiwseed xmengol zho.

³ (Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zianałdox zho mine nac costumbr. ⁴ Zeene rbire zho lo lgui, ib no mod ne riar nia zho dzigora r zob zho row zho. Nzian grë wseed co psan xmengol zho zianał zho, zig nac zha riar grë tas, grë cant, grë xtsiin rotie zho mine niaa guib, ni grë lo bangw ne rzob zho row zho.)

⁵ Dzigo rëb zho lo Jesús:

—;Pe nacne zianałd xpëedscuel luu mine blu xmengol ne? ;Pe nacne squize nia beed zho i row zho?

⁶ Pquiab Jesús rëb me lo zho:

—Nlipaa mine bnee Isá, men ne biaad pteed Xtiedz Dios, zeene znu pquiaa me: Grë miech rii, rquiaalose zho runnon zho naa, rond zho diidz gun zho mine rnabey naa.

⁷ Paat rquiind riaad zho riaadgan zho naa;

sac niapse guicle zho riab grë wseed ne quialu zho lo miech.

⁸ Sac tel to gon, nosaan to grë mine rnabey Dios, lel grë xcostumbr miech zianał to.

⁹ Xcostumbr to nac mine mazdraa rioxco to, laa mine rnabey Dios quiasan to tib lad.

¹⁰ Led znu gon rnee ley ne bdeed Dios lo Moisés: “Gon pxoz luu, gon xniala luu”, ni no stib mine rnee: “Zha ne quie pxoz, quiegaa xniala, ib none guet zho.” ¹¹ Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me. ¹² Tole rdeete diidz ga gun zho xyudar pxoz zho, xyudar xniala zho. ¹³ Tib ladle

gon rsan to Xley Dios ga sca run to, lëëpaaze grë costumbr ne biaannie to, ni quiasangaa lo lo zha ne ziaadquia, min co noxcoraa to. Ni nzianraa grë falt ne squi quiayun to.

¹⁴ Dzigo bnee me lo grëraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca. ¹⁵⁻¹⁶ Golgacnan ganle: Grë ncuaañe rdzin zdoo miech, led mincod runctal xtol zho; sinque grë ncuaañe ntseeb ne rza zdoo zho, min co nac mine runctal xtol zho.

¹⁷ Laa zeene laa me bdzin ro yu grë xpëëdsuel me, dzigo bnabdiidz zho lo me dien zha nac diidz ne sca rëb me lo grë miech co. ¹⁸ Rëbchaa me lo zho:

—¿Pe niicle to riendaqew dzigo lëë? ¿Pe riende to, grë ncuaañe row miech, led mincod runctal xtol zho? ¹⁹ Sac grë ncuaañe row zho rdzinda len zdoomban zho, zhaa zaatne rdzina. Grë guielwagw, len bziuud zdoose zho, len zhitripse zho rieteda, rlozh ga rriiegaw xcuerp zho.

Ga blu me lo zho ganle, grëse ncuaañe nac guielwagw lëda runctal xtol miech. ²⁰ Ni rëb me lo zho:

—Mine rza zdoomban miech, min co nac mine runctal xtol zho. ²¹ Sac zdoomban zho rza grë ncuaañe ntseeb ne run zho, zig nac:

zeene rio zho grë zhgab yozh,

zeene run zho grë guilyozh,

zeene rban zho,

zeene rut zho samiech zho,

²² zeene rionie zho zha ne nacd tsieeld zho,

zeene rzoobladz zho ncuaañe rap stib miech,

zeene run zho grë guielntseeb,

zeene rquidie zho,

zeene rien zho run zho grë ncuaañe ndzinlid,

zeene në rac zdoo zho ran zho cho zha ne stibnoded,

zeene rhixcuua zho diidzguizh,

zeene racniats zho,

zeene run zho grëraa ncuaañe paat rquiind.

²³ Grëse ncuaañe ntseeb rii, zdoomban miech rzaw, ni lëëw nac mine runctal xtol zho.

Biac xpëëd tib wnaa zit

(Mt. 15:21-28)

²⁴ Ga brieë Jesús, laa me zie nëz Tiro. Zeene bdzin me nëz co ga bdziel tib yu ne blëz me, gocladz me choot niacnand ne laa me no ga; per brieeloda, znuse bien diidza.

²⁵⁻²⁶ Zeene bin tib wnaa Sirofenis laa Jesús bdzin ga, dzigo güey me, sac noguitnie mendox tib xpëëd me. Zigne bdzin me pquiitsgzhib me lo Jesús, rnab me tsieguncxoon Jesús mendox co. Tib wnaa zit nac wnaa co; ²⁷ dzigo rëbchaa Jesús lo me:

—Blëz niip dien. None glo mëëd gow, nonguielda cuee ne quiet nia mëëd gdeed new lo mëcw.

²⁸ Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grë mine rrieengaa nia mëëd.

²⁹ Dzigo rëbchaa Jesús:

—¿Squiw nagon! Lëëgazha i rnee luu. Peet tsieniedraa guic luu naa sca; bzë, laa mendox ne nosacsi xpëëd luu bichele.

³⁰ Laa wnaa co zey. Zeene bdzin me lidz me, gon me ine laa xpëëd me nixse lo lon, per laa mendox co psaanle win.

Biac tib men ne rcuaat

³¹ Ga brieë Jesús, güeyted me nëz Sidón. Sidón brieë me bdzin me ro Nisdoo Galilé stib, zaatne nac xtan zha Decápolis. ³² Ga bdzinne zho tib mgui lo me, rcuaat mgui ni nca rnee mgui; bnab zho lo me cxobnia me guic mgui gunguiac me mgui.

³³ Dzigo blee me mgui lad grë miech ne ndxie ga. Zitlaa güeynie me mgui, ga psëëb me mzhugnia me gropse len̄ diag mgui ni bdëëb me zhinzuc me lo ludz mgui. ³⁴ Blozh ga, blis lo me bui me nëz gbaa, bneeladz zdoo me, dzigo rëb me:

—jBzhial! (jEfata!)

³⁵ Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. ³⁶ Dzigo pso Jesús diidz lo grë miech co, choot lo gzodiidzd zho zha biac mgui co.

Per laa ne rso me diidz lo zho, dzigole nëzrii, nëzrec rzodiidz zhow; ³⁷ sac rzeedox zdoo zho gon̄ zho min̄e been̄ me ga.

—jNcuaane gzee zdoo ne i been̄ men̄ qui! —rnee zho—. Zha haxta nguaat, haxta ngop, run̄guiac me.

8

Bguiaan̄ Jesús tap mil miech

(Mt. 15:32-39)

¹ Len̄ dze co, miech guizhiu ne biire pcaalsa lo Jesús stib. Zeene goc tson̄ ngbidza, guien̄draa ncuane gow zho. Dzigo bredz me xpëëdscuel me, rëb me lo zho:

² —Rquia zdoo naa grë miech rii, tson̄le ngbidz ga rac blanso zho nu, ni na quianiedraa zho ncuane gow zho. ³ Tel̄ne squise zho gzonëz naa zho, glëbd zho, scow zho nëz, sac no zho zit brieë zho ziaad zho nu.

⁴ Pquiab zho rëb zho:

—jPer pe yguiaan̄ ne zho? jPa guioxi ne guietxtil ne gow grëtaa miech qui dan rii, naca zaatne guien̄d miech?

⁵ Dzigo bnabdiidz me lo zho, rëb me:

—jBla guietxtil ziaadnie to i?

—Gadzaquew —rëb zho.

⁶ Dzigo bnabey me grëse miech co bzob zho liu. Blozh ga bzhen̄ me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol̄ mew, scase scase rdeed mew lo xpëëdscuel me rguizh zhow lo grë miech co. ⁷ Zienie zho zla mel̄ las; bzhen̄ me gza mel̄ co bdeed me xquizh lo Dios, blozh ga bnabeyaqué me zho bdiiz zho ma.

⁸⁻⁹ Grëse miech co, dow zho haxta zaatne bieltaa zho dzigo laa me bzonëz zho. Rгаа zho maase tap mil, ni zeene blozh dow zho bii bdop gadz chicuid min̄e biaan̄.

¹⁰ Blozh ga, laa me bzëëb len̄ barcw grë xpëëdscuel me, laa zho zie nëz xtan zha Dalmanut.

Racladz zha farisé gan̄ zho milagr

(Mt. 16:1-12; Lc. 12:54-56)

¹¹ Blalaa zha farisé ne no nëz co, zeene bin zho laa me bdziñ ladz zho, güey zho rzadraa ncuane rlisqui zho lo me. Rnab zho glu me cho nac me, rëb zho lo me:

—Racladz no dzian̄lo no gun̄ luu tib milagr, tel̄ne nli gbaa ziaad luu.

¹² Zeene gon̄ me sca rac zho, bio me guiel̄në; dzigo haxta bneeladz zdoo me, rëb me lo zho:

—jZha rnaraa milagr ne racladz to gan̄ to? Gneli naa lo to gan̄le, ni stib milagr gon̄ gandraa to.

¹³ Blozhse sca rëb me lo zho, ndxieque zho ga laa me bzëëb len̄ barcw laa me zie stib nëz ro nis co.

¹⁴ Zeene brieë zho ga, zoladzd xpëëdscuel me ney zho ncuane niow zho, lëë gdib tib guietxtil zienie zho len̄ barcw. ¹⁵ Laa zho zie, tibaqué zeene rëb me lo zho:

—Gol̄guien̄ gon̄, napaa noyac-wet to lo zhincobi zha farisé, lo zhincobigaa rey Herod.

¹⁶ Zeene bin zho sca rëb me, bza zdoo zho rnee zho:

—Ne gon̄ me nagon̄ ziaadnied ne guietxtil gane squi rnee me.

¹⁷ Bieñ me sca rnee zho, dzigo rëbchaa me lo zho:

—¿Pe nacne rnee to ziaadniede to quietxtil? ¿Riende to lëe zha rne naa? Ndip nac zdoo to gane riende tow. ¹⁸ ¿Pa rquiin lo to, pa rquiin diag to ne laaw zob? ¹⁹ ¿Pe rsoladzde to zeene gaayaque quietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

²⁰ Dzigo rëbchaa me:

—Zeene waa gadzaque quietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

²¹ Dzigo rëb me lo zho:

—¿Pe niicle nana riendaque to pe rne naa?

Biac tib men ne rcow lo

²² Bdziñ Jesús guiedz ne lë Betsaid, ga güeynie zho tib mgui ne rcow lo lo me, bnaab zho cxobnia me guic mgui gunguiac me mgui. ²³ Dzigo bzheñ me nia mgui güeynie me mgui zaatne nacle ro guiedz co. Ga bdëëb me zhinzuc me len bziaalo mgui, ni pquiaania me zhits guidlo mgui; blozh ga bnaabdiidz me lo mgui dien pe ranle mgui palal.

²⁴ Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

²⁵ Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuane ran mgui, niicle zitraaw niini ran mguiw.

²⁶ Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidz mguiw lad guiedz.

Bnee Pedr cho nac Jesús

(Mt. 16:13-20; Lc. 9:18-21)

²⁷ Blozhse ga, laa Jesús brie ga grë xpëedscuel me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bnaabdiidz me rëb me lo zho:

—¿Cho dien ron to rnee miech nac naa?

²⁸ Pquiab zho, rëb zho:

—No zho rnee Juan Bautista, no zho rnee Líw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Dios.

²⁹ Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¿Luu nac Men ne zëëble diidz ga cxeel Dios guiaad lo guidzliu!

³⁰ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Lc. 9:22-27)

³¹ Bded ga, psilo Jesús bzeet me lo grë xpëedscuel me zha csacsi miech me. Rëb me nroob grë ncuane cteed zho me; grë zha non lo menguedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeban. ³² Grëse mine ted me, laaw nozodiidz me lo zho.

Goñ Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet. ³³ Zeene goñ me zha rzë xtiidz Pedr, zoque Pedr ga biecw me bui me lo grëraa xpëedscuel me, goctox me rëb me:

—¿Biche lo naa nu mendox! Zienied guic luu mine rnabey Dios, sinque laa guic luu zienie mine racladz luu.

³⁴ Dzigo blunia me lo grë miech ne ndxie ga, yquiaadiag zho mine gnee me; rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho. ³⁵ Sac zha ne yquia zdoo xquielmban, lel znu nitlo zho; sangue zha ne

sca cueeladz xquielmban porne rleyne zho naa, porne rleyne zho grë Diidz Ndzon rii, zha co yгаа tib guielmban ne mazdraa ndzon. ³⁶ Nana, tel zha ne gunlo grëse ncuaaane no lo guidzliu rii. ¿Pa yquiiin grë ncuaañ co lo zho, tel lëew yquiaaqui laa zho guey gabil? ³⁷ ¿Niacxe zrieelo gdziib zho dimi co laa zho len gabil? ³⁸ Naa ne nac naa Men ne pxeel Dios zial naa lo guidzliu, zha ne ctoladz guiab zho lo grë miech ngoopdoł rii laa zho no xnëz naa, o ctoladzniegaa zho xtidz naa, scaque naa stoladznie naa zho gal dze ne laa naa guial stib. Dze ne guialnie naa grë anjl, ni glu naa grë guielndzon ne rap Dios.

9

¹ Ni rëb me lo grë miech co:

—Gneli naa lo to ganle, nzian grë zha ne ndxie nu niina ib tedsod gardaque guet zho, bii zan zho ganle zeene laa Dios glu ne nli men rnabey nac me.

Bdzëëlo Jesús

(Mt. 17:1-13; Lc. 9:28-36)

² Goca xoop ngbidz, brieë Jesús gza me Pedr, Jacob ni Juan, güey zho bzoquia zho tib guic gui glaa.

Bdziñ zho glaa guic gui co, tibaque zeene gon zho laa me bdzëëlo. ³ Masaque rquiabni xab me, nquitsbie rnaw; ni tib miech grielod scataa mbe quiib lar. ⁴ Gonlo zho zeene laa Lí ni Moisés (grop zha ne biadteed xtiidz Dios glo) bdziñaque, laa zho nozodiidznie me.

⁵ Dzigo rëbchaa Pedr lo me:

—Maestro, ¿ne nligaa wena guiaan ne nu! Laa no gzaa tson yu yag xiid win nu tso to: tiba tso luu, tiba tso Moisés, stiba tso Lí.

⁶ Rdzieb Pedr gza Pedr schop zha co, lo dzeb co niicle rien daque Pedr pe rnee Pedr.

⁷ Tibaque znuse bdop tib xcow pquia ngali zaatne zo zho ga; dzigo bin zho zëëb tib tsi men co lo xcow co, rnee me:

—Lëë xpëed naa i gon, rleyne naa me. Golgon mine rnee me.

⁸ Lëëled biecw lo zho rwi zho, choot gondraa zho, Jesússe zo lo zho ga.

⁹ Blozhse ga, laa zho wbique ga. Laa zho ziezëëb dan noyet zho cho gui co, zeene rëb me lo zho:

—Mine gon to gon, choot lo gneede tow. Golcuëz haxta gal dze ne grieeban Men ne pxeel Dios.

¹⁰ Nacne choot lo bneed zhow, per psilo zho gza tson zho rnabdiidzlsa zho, zha mod grieeban tib zha ne gutle.

¹¹ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora gaa guiaad Men ne zëëble diidz ga cxeel Dios?

¹²⁻¹³ Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

Biac tib niib ngop

(Mt. 17:14-21; Lc. 9:37-43)

¹⁴ Zeene bdziñ Jesús zaatne biaan grëraa xpëedscuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodiidiidznie zho. ¹⁵ Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. ¹⁶ Dzigo bnabdiidz me rëb me:

—¿Pe nadien squitaa nodiidiidz to?

¹⁷ Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacd gnee win sac noguitnie mendox win. ¹⁸ Tel pataa zo win, zeene laa ma rzëëb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win.

Blansonie naa win nu, dzigo bñab naa lo xpëëdsçuel luu guñçxoon zho mençox co, per brieelod zho.

¹⁹ Dzigo rëbçhaa Jesús lo zho:

—¡Pe na squitaa miech nad nac to, ib rnalode to Dios! ¡Palal tiemp ne so naa gne naa lo to? ¡Nçuaane çxecwdraa naa lo to squi nac to! ¡Golçtënie mëëdwin qui nu!

²⁰ Güey zho güeynie zho mëëdwin co lo me. Zigne gon mençox co me, psilo beençxidz ma win, znuse biab win liu, rtiibxto win ni rdzib mtsiin ro win. ²¹ Dzigo bñabdiidz me lo pxoz win, goc palal dze psilo sca rac win.

Rëbçhaa pxoz win:

—Bii mëdyeen win psilo squi rac win. ²² Pe zhidaa vüelt zieron mençox qui win lo gui, zieron ma win lo nis ne, racladz ma gut ma win. Bzhiguiel telne zrieelo guñguiac luu xpëëd naa, ¡pquia zdoo naa, been tib guielnzaac beenguiac win!

²³ Rëbçhaa Jesús lo me:

—¡Zha rnee luu “telne zrieelow”? ¡Zha ne dib zdoo rnalo Dios, grëse nçuaane racladz zho, zaca!

²⁴ Lëëlëd pquiab pxoz mëëd co, rëb me:

—Rnalo naa Dios, per bzhiguiel been xyudar naa, ¡dib zdoo naa gnalo naa me!

²⁵ Zeene gon Jesús laa grë miech co rbigberaa, dzigo goctox me lo mençox ne noguitnie mëëd co, rëb me:

—Mençox, luu gon psan ngop mëëd rii, luu psan nguaat win. ¡Niinagazh psaan win, ib gbiiredraa luu ygaal luu win!

²⁶ Horco biire beençxidz ma mëëd co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win. ²⁷ Laa zeene bzhen Jesús nia win, blis me win ga, laa win bzoli.

²⁸ Zeene bdzin Jesús len yu ne rbëz me grë xpëëdsçuel me, bñabdiidz zho lo me rëb zho:

—¡Bay pe nace brieelod no ndziuñçxoon no mençox co?

²⁹ Dzigo rëbçhaa me lo zho:

—Grë mençox ne sca nac, rquiiin dib zdoo ne gnab ne lo Dios dzigo zrieelo guñçxoon ne ma.

Bzeet Jesús laa miech csacsi me

(Mt. 17:22-23; Lc. 9:43-45)

³⁰⁻³¹ Brie Jesús ga grë xpëëdsçuel me, laa zho wbire nëz xtan Galilé stib. Racladz me cho gacnan pa lo no me; sac len dze co nzian grë nçuaane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladhnia miech, ni zut zho naa. Per zeene gac tson ngbidz gut naa, laa naa grieegan.

³² Per ib rienç zho pe nace sca rnee me, niicle gnabdiidzgaa zho rdzieb zho gnabdiidz zhow lo me.

¡Cho nonraa?

(Mt. 18:1-5; Lc. 9:46-50)

³³ Bdzin zho guiedz ne lë Capernaum; grëse zho laa zho ndxie len yu ne blëz zho, tibaque bñabdiidz Jesús lo zho, rëb me:

—Golnë dien, ¡pe scataa nodildiidz to zeene ziaad ne nëz?

³⁴ Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

³⁵ Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

³⁶ Dzigo bzo me tib mëëdbgwi win glowtaa lo zho; blozh ga bdeedz me win ni rëb me lo zho:

³⁷ —Zha ne ngab xnëz naa, ni gleynie zho tib mëëdwin zig mëëdwin rii, gun naa cuent naa ga rleynie zho; ni zha ne sca rleynie naa, ye le men ne pxeel naa ga rleynie zho.

³⁸ Blozh ga, rëbchaa Juan lo me:

—Maestro, bdzion no gon bzeet tib zha co lë luu zeene benxoon zho mendox; nacne nli blisqui now lo zho, sac gon, led yed zho nacgrë ne.

³⁹ Dzigo pquiab me rëb me lo zho:

—¡Gunscade to! Sac gon zha ne sca rzeet lë naa zeene run zho milagr, niacxe lëëque zha glëë lo naa. ⁴⁰ Zha ne nacnie ne, glëëd zho lo ne.

⁴¹ 'Golgacnan sca ganle, grëse zha ne gdeed maase tib zhigaque nis guie zha ne ngab lo naa, ib tedsod stsire Dios mine been zho ga. ⁴² Sangue zha ne yguib gunctal zho xtol zho ne nac zho zig tib mëëdlas yeen; mazd lëëtaa mine ted zha co sobdoo tib quie molin zhobxtil yquiaw yan zho tsieron zho zho nisdoo.

Choot gdeete diidz guiab lo dol

(Mt. 18:6-9; Lc. 17:1-2)

⁴³⁻⁴⁴ 'Zha ne rien nia zho nac mine rquiaqui runctal zho xtol zho, mazd cchuggazh zho nia co zho. Peet nacd maase tibaque nia zho zob totsaque yгаа zho guielmban ndzon ne gdziind dze lozh, lëdle zob gropa ni laa zho guey gabil, lo beldox ne gdziind dze guiuu.

⁴⁵⁻⁴⁶ Telne riengaa zho ni zho nac mine rquiaqui runctal zho xtol zho, mazd cchuggazh zho ni co zho. Peet nacd maase tibaque ni zho zob totsaque yгаа zho guielmban ndzon ne gdziind dze lozh, lëdle zob gropa ni laa zho guey gabil, lo beldox ne gdziind dze guiuu.

⁴⁷ Tel tib logaa zho nac mine rquiaqui runctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque yгаа zho guielmban ndzon co, lëdle zob grop bziaalo zho ni laa zho guey gabil. ⁴⁸ Zaatne nac gabil, ib gdziind dze ne guiuu lo bel co; grë mziog ne ndxie ga, gdziind dze ne nitlo ma. ⁴⁹ Grëse zha ne gdziin ga, masaque cuib gui lad zho zig rbib zed lad bëël.

⁵⁰ 'Zig nac zed, rquiindoxa zeene nzhiw, per zeene nzhida, ¿pa dien yquiina? Scauegaa to nagon golgac zig zed ne nzhi, zeena yquiin to lo guidzliu rii; niowse golbannie samiech to, glëëlsade to.

10

Zha ne rsëbtsieel

(Mt. 19:1-12; Lc. 16:18)

¹ Brieë Jesús Capernaum güeyted me grë guiedz ne ndxie nëz xtan zha Judé, grë guiedz ne ndxie nëz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

² Tib vuelt bdziin bla zha farisé gocladz zho niungüet zho me, par dien pe nxiind me tib diidz; bnabdiidz zho rëb zho:

—Maestro, mgui ne racladz csëbtsieel, ¿pe gnë luu pe zrieelo csëbtsieel zho?

³ Pquiab me rëb me lo zho:

—¿Zha zho psan Moisés diidz lo to?

⁴ Pquiab zho rëb zho:

—Tel Moisésa, bdeed me diidz csëbtsieel zha ne racladz csëbtsieel, lëëraasi none yquia tib guits gdeed zho lo wnaa zaatne raquiet ne laa zho psaan wnaa.

⁵ Dzigo rëbchaa me lo zho:

—Ne squicxe waa miech nad nac to ib ronde to diidz, min co nacne biaan ley co. ⁶ Per ib nodne csëbtsieel miech; sac gon, zeene psan Dios grëtaa ncuane no, tib nëz miech bzaa me: tib mgui ni tib wnaa. ⁷⁻⁸ Gacxe waa, mgui ne rtsieelnia ib none griezhaa zho lo pxoz zho, lo xnias zho, par gbannie zho wnaa ne nac tsieel zho; laa zho gactipse grop zho. Nacdraa zho chop miech, sinque laa zho rac tibaque. ⁹ Dios nac men ne psan ycatsieel miech, cho dzigo nac miech par quiits zho mine rnabey me.

¹⁰ Laa zeene bdziin me len yu ne rbëz zho, dzigo bnabdiidzaque xpëëdscuel me min co lo me stib. ¹¹ Dzigo rëbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsieel zho ga, ni dol ga run zho. ¹² Niicle wnaagaaw, wnaa ne rsëbtsieel ni rbannie zho stib mgui, lëëque dolaque ga run zho.

Beenlay Jesús mēēdlas

(Mt. 19:13-15; Lc. 18:15-17)

¹³ Tib vuelt nzian men ne bdziñ bdziñnie zho xpēēdlas zho lo Jesús, par cxobnia me guic win gunlay me win. Grē zha ne nac xpēēdscuel me, leļ psilo zho ndox zho lo grē zha ne bdziñnie grē mēēdlas co.

¹⁴⁻¹⁵ Zeene gon me sca quiayun zho, wbinladz guic me, dzigo rēb me lo zho:

—Ctsirede to grē mēēdlas yeen qui, golsaan guiaad win lo naa. Sac gon grē mēēdlas yeen, ni zha ne nac zigne nac win, zha co nac zha ne sēēb ygab lo Dios.

¹⁶ Blozhse sca bnee me, dzigo psilo me bdeedz grē mēēdlas co, ni pxobnia me guic win beenlay me win.

Bzodiidznie tib zha ricw Jesús

(Mt. 19:16-30; Lc. 18:18-30)

¹⁷ Laa Jesús nole nēz tsie me stib guiedz, zeene rias tib niib nguieg bdziñ pquitsgzhib lo me, rēb niib lo me:

—Nan naa luu nac tib men ne noseed miech, ni tib men wen nac luu; ĵbnē dien pe nac mine gun naa zeena ygaa naa guielmban ndzon ne gdziñdraa dze lozh?

¹⁸ Rēbchaa Jesús lo niib:

—Rnee luu lēē tib men wen nac naa. ĵNligaaw, Diosse nac men wen! ¹⁹ Nanle luu ganle zha nac Xley Dios, rneew:

Gute luu samiech luu,
telne nole tsieel luu, tsonied luu zha ne led tsieeld luu,
cuand luu samiech luu,
yquiadiidzguizhd luu samiech luu,
yquidieed luu samiech luu,
gon pxoz luu, gon xniaa luu; bin mine rnabey me luu.

²⁰ Dzigo pquiab niib rēb niib lo me:

—Maestro, grēsew zigne bzeetse luuw i, ni tiba gard quits naa wlal ne nac naa zha nguieg.

²¹ Dze rwi Jesús lo niib, rleynie me niib.

—Stibaque mine rquin gun luu —rēb me—, güey, güeyto grēse ncuaane quianie luu, dzigo bdiiz dimi co lo grē zha mban ne guiend pe yquiin; sca nroobraa guielnzaac ne ygaa luu gbaa. Lozh ga, bleeladz xquielmban luu dēnal zhits naa.

²² Zeene bin niib co sca rēb Jesús, biab guielnē niib, mbanse rac niib laa niib zey; sac ne nligaa nroob ncuaane quianie niib.

²³ Dze rwi me gon me laa zha nguieg co zey, dzigo rēb me lo xpēēdscuel me:

—ĵGrē zha ne squi rapchen, rzacxuu zho par sēēb zho xnēz Dios gnabey me zho!

²⁴ Zeene bin zho sca rēb me, rzee zdoo zho. Dzigo biire me bnee me rēb me lo zho:

—Xin, ĵne nligaa tib miech ne ndziib rap chen, rzacxuu zho sēēb zho xnēz Dios gnabey Dios zho! ²⁵ Mazd znuse rded tib camell guieer guzh, lēdle sēēb tib zha ricw xnēz Dios.

²⁶ Zeene bin zho sca rēb me, mazdraa bzee zdoo zho, rnabdiidzlsa zho rnee zho:

—Bay, ĵchose dzigo nac zha ne zrieelo sēēb xnēz Dios?

²⁷ Dze rwi me lo zho, dzigo rēbchaa me:

—Par miech zootle tsod zha ne grieelo sēēb xnēz me. Sangue me, nan me no zho; sac tsod ncuaane grieelod gun me.

²⁸ Dzigo rēb Pedr lo me:

—Tel no, grēse ncuaane rdziaap no laa no psana, laa no ziaadnal zhits luu.

²⁹ Pquiab me rēb me:

—Grēse zha ne psan lidz, psan zho bets zho, bzian zho, xniaa zho, pxoz zho, xpēēd zho, liun zho, porne riladz zho naa ni riladz zho Xtiidz Ndzon Dios; ³⁰ nli nroob guielnē

gan̄ zho, per gneli naa lo to gan̄le: grēse ncuane sca psan̄ zho ga, lo guielmban riique laa zho gbiire gana stib tib gayoogaw tib tiba; ni ib tedsod zgaa zho tib guielmban ndzon ne gdzindraa dze lozh.

³¹ Nli zig nac niina, no zha ne rzac zha non nac zho, per zeene gal̄ dze co peet gacnond zho; laa zha ne rzac zho peet nond, gal̄ dze co lalga gac zho grē zho.

Biire bzeet Jesús laa miech csacsi me

(Mt. 20:17-28; Lc. 18:31-34)

³² Brieet Jesús ga laa me zie Jerusalén. Nzian grē zha ne zianał zhits me, nerse me lo zho laa zho zie. Grē zha ne nac xpēēdsuel mew, rzee zdoo zho; laa grēraa miech co per nli rdzieb zho. Dzigo bredz me gza tsiipchop zha ne nac xpēēdsuel me ga, psilo me bzeet me grēse tel̄ zha ziaadyob ted me, rēb me lo zho:

³³ —Bii zan̄ to gan̄le, naa ne nac naa Men̄ ne pxeel̄ Dios, niina ne laa ne gdziñ Jerusalén ible zielo zho naa ladznia grē zha ne nac pxoz nroob ni grē zha ne rseed miech ley. Grē zha co gnab guet naa, ni san̄ zho naa ladznia grē zha ne nacdreaa zha Israel. ³⁴ Xidznie zho naa, stsuc zho lo naa, zguin̄ zho naa, ni haxta zut zho naa; per dze ne gac tson̄ ngbidz gut naa laa naa grieeban.

³⁵ Dzigo wbig gax Jacob grop Juan (xingan Zebedé) lo me, rēb zho:

—Maestro, laa no gnab tib favor lo luu, per racladz no siguiel̄ luu gun̄ luuw.

³⁶ Dzigo rēb me:

—¿Pe favor ne racladz to gun̄ naa lo to?

³⁷ Rēbchaa zho:

—Laa no racladz, siguiel̄ luu zioob no cue luu gal̄ dze ne laa luu nac rey rnabey luu, tib no nēz derech stib no nēz revés.

³⁸ Pquiab Jesús, rēb me lo zho:

—¿Ni to gon̄ riend pe rnab to! ¿Pe zlēb to gan̄ to grē guielnē ne gan̄ naa, pe zlēb to ted to grē mine teed naa?

³⁹ Rēbchaa zho:

—¿Zlēb no!

Dzigo rēbchaa me lo zho:

—Nli zan̄ to guielnē ne gan̄ naa, ni zded to mine teed naa; ⁴⁰ per ne gnedz naa diidz sob to cue naa nēz derech o nēz revésgaa, led naad raguial̄ min̄ co; laa lugar co biaan̄le par zha ne nole diidz ygaaw.

⁴¹ Grēraa zha ne nac xpēēdsuel me, zha ne nacgza Jacob ga grop Juan, zeene bin zho zha rzē xtiidz Jacob grop Juan blēē zho lo zho. ⁴² Dzigo bredz Jesús zho grēse zho, rēb me lo zho:

—Ran̄ to gan̄le zha run̄ grē zha ne rnabey grē guiedz ne ndxie lo guidzliu, ni grē zha ne nac zha non, masaque rnabey zho samiech zho zigne racladztaa zho. ⁴³ Sangue to gon̄, gun̄scade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaan̄win gac zho zig tib ngundziin lo to. ⁴⁴ Scaquegaa, zha ne racladz gnabey lo to, none glo cseed zho gun̄ zho mine gnabey to zho. ⁴⁵ Golgan̄ gan̄le, niicle naa ne nac naa Men̄ ne pxeel̄ Dios, ziald naa par gnabey naa miech, sinque laa naa zial̄ par gac naa tib ngundziin lo zho, ni gded naa xquielmban naa zeena laa zho lo grētaa ncuane ngadoo zho. Ni nan̄paa naa miech guizhiu ne laa.

Biac tib men̄ lē Bartimé

(Mt. 20:29-34; Lc. 18:35-43)

⁴⁶ Sca no grē miech guizhiu co nēz, laa zho bdziñ guiedz Jericó. Laa zeene laa grē miech taf co zieriee ro guiedz co, laa tib mgui ciegw lē Bartimé zob ga rtop gon̄ (xingan tib men̄ lē Timew). ⁴⁷ Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¿Jesús, men̄ xtii rey David, pquia zdoo naa!

⁴⁸ Nzian grē miech co ndox lo me nan̄ zho guioog ro me, per dzigole mazdraa nguiedz roptsie me, rnee me:

—¡Jesús, pquia zdoo naa!
⁴⁹ Dzigo pçuëezni Jesús, bnabey Jesús güeytsedz zho me. Bdzin̄ zho lo me, rëb zho:
 —¡Ligier guso i! Dë gan̄le laa me rbedz luu.
⁵⁰ Zeene bin mew, haxta squi bron̄ me lar ne mbix me, guso me ga laa me bdzin̄ lo Jesús. ⁵¹ Dzigo rëbchaa Jesús lo me:
 —Bnë nadien̄, ¿pe racladz luu gun̄ naa?
 Pquiab me rëb me:
 —Maestro, racladz naa guiac lo naa.
⁵² Dzigo rëbchaa Jesús:
 —¡Niinagazh laa lo luu gan̄! Laa luu biac, sacne dib zdoo luu bnalo luu naa. Ligier na bzë.
 Horcogazha laa lo men̄ co psilo bui, laa me zienal̄ zhits Jesús.

11

Bdzin̄ Jesús Jerusalén

(Mt. 21:1-11, 18-19; Lc. 19:28-40; Jn. 12:12-19)

¹ Zhile gdzin̄ zho Jerusalén, laa zho zie gax zaatne riaan̄ guiedz Betfagé ni guiedz Betain, nëz dan̄ squi riaan̄ Gui Oliv, zeene bredz Jesús chop xpëedscuel me ² rëb me lo zho:

—Goltsie guiedz win ne ndxie dan̄se lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. ³ Tel̄ cho gnabdiidz pe nacne noxadz to ma, dzigo golguiab: men̄ ne rnabey ne men̄ co rquiin ma, na zigne lozh xtsiin̄ ma guiaadsan̄ no ma.

⁴ Laa zho zie, nligaaw laa zho güeydziel burr co quiadoo ma tib ro nëz, gax tib ro yu.

⁵ Blalaa zha ne zo ga, zeene gon̄ zho laa zho noxadz ma, rëbchaa zho:

—¿Pe gun̄ to burr qui dzigo na, ne noxadz to ma?

⁶ Dzigo pquiab zho zigne rëbse Jesús lo zho ga, nacne bdeed men̄ co diidz laa zho zienie ma.

⁷ Bdzinnie zho ma lo Jesús lëëque lar ne rbix zho pxob zho lad ma, bzobga me ma.

⁸ Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin̄ zho zaatne rded me. ⁹ Grëse zho, niicle zha ne ner lo mew, niicle zha ne nal̄ zhits mew, rley zho nguiedz roptsie zho, rnee zho:

—¡Zha ndzontaa men̄ qui pxeel̄ Dios lo ne! ¹⁰ ¡Zha wentaa ziaad me gac me zhirey ne! ¡Me gnabey zigne bnabey pxozgol̄ ne rey David! ¡Zha ndzontaa Dios ne zob gbaa!

Sca nguiedz roptsie zho rleyne zho me, laa me bdzin̄ Jerusalén.

¹¹ Bdzin̄ me Jerusalén, güey me güeyso me len̄ yadoo. Blozhse bui me dipse len̄ yadoo, laa me brieëque ga laa me zie nëz Betain grë xpëedscuel me, sac bdzele dzew.

¹² Biini liu, loxaque zieriee zho Betain laa me psilo rcaabedz. ¹³ Zitlaa ziaad me gon̄ me tib zhan yag guigw, nxii nac low zëëb zhiblaga; dzigo zie me zieso me dien̄ pe gdziel̄ tib guigw low gow me. Bdzin̄ me zaatne zoba, ni tib guigw guiend̄ low loxaque zhiblagsew scataa zëëb, sac gardpaa gdzin̄ mëë ne rquia guigw. ¹⁴ Dzigo rëb me lo yag guigw co:

—¡Squitaa nagon̄ guiaan̄ luu! ¡Gdzindraa dze yquia nex lo luu gow miech!

Grëse xpëedscuel me, bin zho sca bnee me lo yag co.

Blee Jesús miech len̄ yadoo

(Mt. 21:12-17, 20-22; Lc. 19:45-48; Jn. 2:13-22)

¹⁵ Bdzin̄ zho Jerusalén, bzëëb me len̄ yadoo. Psilo me blee me grëse miech ne quiayun̄ lgui ga, zigtaa zha ne no wtow, zigtaa zha ne no wziw. Grë zha ne no wto palom, grë zha ne notsëë dimi, ptiixche me xmezsh zho. ¹⁶ Blozh ga, pso me diidz choot nodraa sëëbnie grë ncuaan̄ co len̄ yadoo, ¹⁷ rëb me lo zho:

—Led znu gon̄ rnee lo Xtiidz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon̄ quiayun̄ to lugar rii zig tib zhibliee ngbaan.

¹⁸ Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. ¹⁹ Zeene laa liu pcow, laa me wbique Jerusalén stib grë xpëedscuel me.

²⁰ Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. ²¹ Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

²² Pquiab me rëb me:

—Zha ne dib zdoo rnalo Dios, ²³ gneli naa lo to ganle: Niicle ncuaane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho. ²⁴ Golgona sca ganle, grëse ncuaane gnab to lo Dios, dib zdoo to golliladz ne zneedz mew, dzigo sca zac mine rnab to. ²⁵ Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena scagaa, Pxoaz to men ne zob gbaa zun me to perdon tel pe nactaa xtol to. ²⁶ Sac telne gunde to samiech to perdon, dzigo niicle megaa, gund me to perdon.

Cho rnabey Jesús

(Mt. 21:23-27; Lc. 20:1-8)

²⁷ Blozh ga, laa zho bdzinaque Jerusalén stib. Lëëtaaque laa Jesús quiawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo mengüiedz, ²⁸ rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

²⁹ Pquiab me rëb me lo zho:

—Laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaane noyun naa. ³⁰ Golinë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

³¹ Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” ³² Tel na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse mengüiedz nan ne nli Dios pxeel Juan biadteed Juan xtiidz Dios lo miech. ³³ Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë ncuaan rii.

12

Xcuent zha ne pquianap liu

(Mt. 21:33-46; Lc. 20:9-19)

¹ Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieegaa, laa me zey zit.

² Zeene gol mëë ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. ³ Per lel bnaaz zho moz co, bdiin zho zho; blozh ga, scase bzonëz zho zho.

⁴ Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdiin zho zho, blë zho guic zho.

⁵ Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. ⁶ Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

⁷ Zeene gon zho laa xpëed me bdziñ, rëbchaa zho: “¡Lëë zha qui nagon guiaannie liu rii! ¡Golgotsaa dzuut ne zho zeene guiaana lo ne!” ⁸ Dzigo bnaaz zho men co, beet zho me, güeyga zho güeyron zho me tib lad lo liu co.

⁹ Sca nagon —rëb Jesús—, been zha ne quianap liu co. Golnëse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csan me liun me.

¹⁰ Golsoladz ganle znu rnee lo Xtiidz Dios:

Quie ne psëeb zha ne nozaa yu,
ni nanð zho lëepaa quie co nac mine rnazdziits yu.

¹¹ ¡Ncuaane gzee zdoo new! Sac Dios bnabey sca goca.

¹² Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

Pe nonguiel quizh miech contribucion

(Mt. 22:15-22; Lc. 20:20-26)

¹³ Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. ¹⁴ Bdziñ zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu ziana cseed zho mine nac diidzli zeena sëeb zho xnëz Dios. Min co nagon, nacne racladz no gnë luu lo no dien, ¿pe nonguiela ga rdeed no dimi ne razh lo rey te nonguiel da ye? ¿Pe zdizhraa no dimi co, te mazd dizhdraa now ye?

¹⁵ Bienga Jesús racladz zho gungüet zho me, dzigo rëbchaa me lo zho:

—¿Pe nacne racladz to gungüet to naa? Golguiid tib xpes to nu ganle.

¹⁶ Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, ¿cho nu quia lo pes rii? ¿Cho lë nu quia low?

Pquiab zho rëb zho:

—Lëë rey Roma i, lëë lë me i quia low.

¹⁷ Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gun zho.

¿Pe nli zrieeban miech?

(Mt. 22:23-33; Lc. 20:27-40)

¹⁸ Bdziñaque zla zha saducé, rëb zho lo me:

¹⁹ —Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsieel mgui ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁰ Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho. ²¹ Dzigo ptsieelnia stib bets zho wnaa co, blozh ga gutaque zha co, pasë zho nsan mëed. Ptsieelniaque me stib zho, goc zho tson, niicle zha co psandaque mëed. ²² Sca sca haxta bza gza gadzse zho ptsieelnia me, per ziese zho ni tib zho psand mëed; tibaque zeene yeque me, laa me gut. ²³ Mine racladz no gacndion no, ¿chopaa dzigo gac tsieel wnaa co gal dze ne laa zho grieeban; sac gza gadzse zho ptsieelnia me?

Sca bnabdiidz zho, sac nac zha saducé rliladz zho ne nli zdziñ dze grieeban zha ne ret.

²⁴ Dzigo pquiab Jesús rëb me lo zho:

—I nagon laa to rxin. Mine naca riende to zha nac Xtiidz Dios, niicle rliladzde to zrieele me gun me ncuaan ro ne gard gan miech. ²⁵ Sac gon, zeene gal dze ne laa grë

miech grieëban, niicle mguiw niicle wnaaw led yedraa hor co dien cho ctsieelna zho; sac hor co laa zho gac zig nac grë anjl ne no gbaa. ²⁶ Stiba, ible nli zrieëban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne rililadz Abraham, naa nac Dios ne rililadz Isaac, naa nac Dios ne rililadz Jacob.” ²⁷ Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

Xley Dios mine mazdraa non
(Mt. 22:34-40)

²⁸ Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguiel bnë lo naa dien, lo grë xley Dios, ¿pa min nac mine mazdraa non?

²⁹ Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne rililadz ne, tibaque me ni me nac men ne rnabey ne. ³⁰ Dib zdoo to, dib xalm to, dib guielbiini ne no guic to, dipse xfuers to golleynie me.” Lëë tiba nu, ³¹ laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

³² Dzigo rëbchaa maistr ley co lo Jesús:

—Diidzli rnee luu maestro, tibaque Dios no. ³³ Ni none dib zdoo ne, dib guielbiini ne no guic ne, dipse xfuers ne gleynie ne me; ni gleynie ne samiech ne zigne rleynieque ne ne. Min co nac mine mazdraa non, lëdle gzëëg ne pe cos cogon ne lo me o dien peragaa gun ne.

³⁴ Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

¿Cho xpëëd nac Crist?
(Mt. 22:41-46; Lc. 20:41-44)

³⁵ Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacte rnee grë maistr ley, lo xtii rey David ga grieëquia Men ne nacle diidz ga cxeel Dios? ³⁶ Sac zeene bdeed Espiritu Sant guielbiini lo rey David, znu bnee David: Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznie luu.”

³⁷ Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

Zha run grë maistr ley
(Mt. 23:1-36; Lc. 11:37-54; 20:45-47)

³⁸ Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdziel zho zho dib ro nëz. ³⁹ Zig nac len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob groj mezh zeene laa wagw gac. ⁴⁰ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

’Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

Gon ne bdeed tib wnaa viud
(Lc. 21:1-4)

⁴¹ Blozh ga, güey Jesús güeysob me gax zaatne zhoob grë alcancí. Dzese rwi me ran me zha riesan miech gon len grë alcancí co; ndal grë zha ricw rdzin, nroob dimi rсан zho.

⁴² Tibaque zeene bdzin tib wnaa viud, tib men prob nac me, ye me laa me psan chop gaay win len alcancí co.

⁴³ Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. ⁴⁴ Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

13

¡Nsin golso!

(Mt. 24:1-28; Lc. 17:22-24; 21:5-24)

¹ Laa Jesús zierie len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡Zha rnataa grë quie ngol ne niaaw!

² Pquiab me rëb me lo zho:

—Nligaa lëe zha niaataaw. Per niicle squitaa gon ran tow niina, dzin dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me ga, laa me zie gza me zho. Bdzin zho cho Gui Oliv, ga bzob zho grë zho. Nienpaa ro yadoo co zaatne zob zho ga; dzigo wbig Pedr, Jacob, Juan ni Ndrës lo me, gza tap zho bnabdiidz lo me rëb zho:

⁴ —Bzhiguiel bnë lo no dien, ¡pa hor dzigo gac mine bzeet luu ga? ¡Zha nac señ ne tso zeene laaw csilo gac?

⁵ Dzigo psilo me bnee me lo zho, rëb me:

—Nsin golso zeena choot yquidiede to. ⁶ Sac nzian zha ne griequia gnë zho zha nac Men ne zëëble diidz cxeel Dios; ni nzian miech ne yquidie zho.

⁷ Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. ⁸ Sac garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

⁹ Zeene laa grë ncuaan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, ¹⁰ sac ib none brieets bliaallex lo grëse miech zeene gal dze ne laa guidzliu nitlo. ¹¹ Zeene tsiezo zho to lo wxtis, tso de to zhgab dien pe guiab to lo wxtis; sac Espiritu Sant nac men ne gacniën to, ni mine csiaab me guic to min co gnee to.

¹² Len dze co, zio zha ne lëëque zha tsielo bets zho lадznia zha ne gut zho; zio zha ne lëëque zha tsielo xpëed zho lадznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho. ¹³ Ible gandzed miech to, grëse zho glëë lo to sacne rliladz to naa; per scagaa, grëse zha ne dziits so haxta lozh grë guielnë co, ible scaania Dios zho.

¹⁴ Zeene gan to laa ncuaane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho. ¹⁵ Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuaane nacchen zho. ¹⁶ Zha ne zogaa dana, ib gund zho ne laa zho tsie ro lidz zho tsie xi zho xab zho. ¹⁷ ¡Prob grë men wnaa ne lëëtaque len dze co zoney xpëed, men ne quianiegaa mëdyeen ne bii radz! ¹⁸ Glnab lo Dios gande to guielnë co len mëë ne rac nal, sac ne nligaa guielnë nrooba. ¹⁹ Wlal ne biaan guidzliu haxta lo nadze, gard gan miech tib guielnëdoh sca, ni

gdzindragaa dze ne gan zhow stib. ²⁰ Telne csaan Dios nroob dze gac guieḽnē co, ni stib miech rii guiaandraa; per na por grē zha ne bzooblo me sēēb xnēz me, gdeete me diidz gaca nroob dze.

²¹ Len dze co, tel cho zha gnē lo to: “Golwi ganle, lēē meḽ rii nac Meḽ ne nole diidz ga cxeel Dios”, gnēgaa zho: “Golwi nec ganle, lēē me i”, gliladzde tow. ²² Sac ndal grē zha ne grieequia guiaadquidie miech, no zho gnē zha nac meḽ co, nogaa zho gnē zha ziadteed Xtiidz Dios lo miech; ni zuḽ zho grē milagr parne yquidie zho miech, parne yquidie zho haxta grē zha ne ngable lo Dios. ²³ ;Nsin sca goḽso! Ib cxende to, benque laa naa nilew lo to.

Ziaad Jesús stib

(Mt. 24:29-35, 42, 44; Lc. 21:25-36)

²⁴ Zeene lozhse gan miech grē guieḽnēdox co, laa lo ngbidz ycow, gziinidraa mēē. ²⁵ Grē mel ne ndziib gbaa, laa ma gliaaḽ; grēraa ncuane no gbaa, masaque nēzrii nēzrec gaca. ²⁶ Horco bii zan zho ganle, zeene laa Meḽ ne pxeel Dios ziad-zēēb glaa lo xcow con grē guieḽndzon con grē poder ne rap me. ²⁷ Lozh ga laa me gnabey grē xanjḽ me, tsie zho tsietop zho grēse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

²⁸ Golzoob cuidad zha nac yag guigw. Led nanle to ganle, zeene laa grē zhicwa racnieen, ni rsilo rdzib zhiblaga, gase rlu ne laa mēē nēēg ziaadgaxle. ²⁹ Scaquegaa nagon, zeene gan to laa grē mine rne naa lo to nu rsilo noyac, dzigo nanle to lēē dze co ziaadyoble. ³⁰ Gneli naa lo to ganle, nzian miech ne mban niina bii zan zho zeene laa grē ncuane co csilo gac; sac ible ncuane gaca. ³¹ Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. ³² Lēēraasi choot nand dien pa dzew, dien pa horgaaw, per ni grē anjḽ ne no gbaa, per ni naa nanda; loxaque Pxoze naa nana. ³³ Gacxe waa, nsin goḽso, goḽnab lo Dios; sac gon nande to dien pa hora.

³⁴ Nac cuent rii zig nac tib zha ne rriee zie tib guiedz zit. Zeene laa zho rriee, rsanse zho diidz dien pe guḽ tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho. ³⁵ Scadaa to nagon nsin goḽso, sac zig bizhuan yu co scaquegaa naa nande to pa hor guaḽ naa, yase glanso naa tib bdze dze, tib groḽ guieel, wxingaa horne rcuedz gall, o ziaadyunmbegaa liu. ³⁶ Nsin goḽso, zeena ine zobna to zeene laa naa glanso. ³⁷ Mine rne naa lo to nu, laaw rne naa par grēse miech.

14

Bnediidz zho dien zha gnaaz zho Jesús

(Mt. 26:1-5; Lc. 22:1-2; Jn. 11:45-53)

¹ Schop ngbidz runfalt csilo lni Pascw, lni ne row zho quietxtil ne riotsd ncobi; grē pxoz nroob ni grē maistr ley, laa zho noguib dien zha ngeetsse gnaaz zho Jesús gut zho me, ² rnee zho:

—Laa me no yгаа, per lēēraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

Pchoob tib wnaa nceit nex guic Jesús

(Mt. 26:6-16; Lc. 22:3-6; Jn. 12:1-8)

³ Len dze co, laa Jesús no guiedz Betain. Lēētaaque laa me no mezh lidz Simón ne blan guiedz lepr, zeene bdziḽ tib wnaa bdziḽnie tiblo nceit nex, nosew tib len ncuane win niaa niapse quie rbebni, tiblo nceit niazha. Dzigo blē wnaa co ncuane win co, blozh ga pchoob me nceit co guic Jesús.

⁴ Blalaa zha ne zobgrē Jesús ga, zeene gon zho sca been wnaa co, blēē zho, rēb zho:

—;Pa rieguaḽa squi pxin zhlē wnaa qui nceit qui? ⁵ Telne niaca mine ndow, nguizhpaa zhow tson gayoo pes plat, nquiinpaa dimi co ngaaza lo grē zha mban ne guiend pe yquiin.

Laa zho nolisquiw lo wnaa co, ⁶ dzigo rēbchaa Jesús lo zho:

—Golsaan me. ;Pe nacne rlisqui tow lo me? Led lega pxind mew, tib guieḽnzaac nroob i been me lo naa. ⁷ Telne nli rquia zdoo to zha ne guiend pe yquiin, zac ygad to lo zho stib

dze, sac tibaque ran to zho; sangue naa zdzin dze ne gbiche naa lo to, gandraa to naa. ⁸ Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets. ⁹ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

¹⁰ Lo gza tsiipchop zha ne nac xpëedscuel Jesús ga, briece zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntregar. ¹¹ Zeene bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

Dowxtseenie Jesús xpëedscuel me

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Mer dze ne rsilo lni Pascw, dze ne rowxtsee zho tib carner, ni rsilo zho row zho guietxtil ne rquiad ncobi lad, dze co bnabdiidz xpëedscuel Jesús dien pa lo racladz me tsiegunlo zho ncuane gowxtseenie me zho wdze co. ¹³ Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyan tib re nis, dzigo goltsienal zhits me.

¹⁴ Yu ne gan to sëeb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëedscuel me wdze rii?” ¹⁵ Dzigo ga glu me tib len yu nroob ne riaan glaa, nzhixcuaale lena, grële ncuane yquiin no ga; dzigo ga golgunlo zhixtsee ne.

¹⁶ Laa grop zha co briece, laa zho zie. Bdzin zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

¹⁷ Bdze dzew, laa me bdzin len yu co grë xpëedscuel me.

¹⁸ Laa me no mezh noyownie me zho, zeene rëb me lo zho:

—Laa naa gni lo to ganle, lëëque tib zha ne gon noyownie naa nu tsielo naa ladznia zha ne gut naa.

¹⁹ Zeene bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

²⁰ Pquiab me rëb me lo zho:

—Ladaque to no zho, zha ne nosëeb xcuun len xquien naa, lëë zho ga. ²¹ Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

²² Laa zho noyow zeene bzhen Jesús tib guietxtil, bdeed me xquizh lo Dios, blozh ga beengrol mew dzigo bdiiz mew lo zho, ni rëb me:

—Golquiina, lëë xcuerp naa i gon.

²³ Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co. ²⁴ Ni rëb me lo zho:

—Lëë xchen naa i, mine gzhiee par grëse miech ne sëeb xnëz Dios, sac lëë stib mod cub nu psan Dios parne sëeb miech xnëz me. ²⁵ Lëë lultm vuelt nu guie naa vin rii, sac zhaale stib vin cub ne guie naa zeene laa naa gdzin zaatne rnabey Pxoz naa.

Dzigo psilo me biil me bla salm gza me zho.

Bzeet Jesús zha gun Pedr

(Mt. 26:30-35; Lc. 22:31-34; Jn. 13:36-38)

²⁶ Blozhse biilnie me Dios grë me zho, dzigo laa me brieenie zho ga zienie me zho nëz Gui Oliv.

²⁷ —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiil.” ²⁸ Sca gun zho naa, per zeene laa naa grieeban glole naa ga Galilé, ga cuëz naa to.

²⁹ Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

³⁰ Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

³¹ Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

Bzodiidznie Jesús Pxoze me Getsemani

(Mt. 26:36-46; Lc. 22:39-46)

³² Bdziñ Jesús zaatne lë Getsemani gza me zho, dzigo rëbchaa me lo zho:

—Nuse nagon goḥsob, laa naa ga gazodiidznie naa Pxoze naa.

³³ Horco psilo mban rac zdoo me, riabguieḥnë me, dzigo bredz me Pedr, Jacob ni Juan, bzënie me zho palal ³⁴ dzigo rëbchaa me lo zho:

—Mban rac zdoo naa, zootle zig zet naa lo guieḥnë rii. Nuse nagon goḥguiaan, per goḥsobna.

³⁵ Bzë me spalal, dzigo pquitsgzhib me haxta bdziñ lo me lo liu; psilo me bñab me lo Dios ne telne zrieelow mazd tete me grë guieḥnë ne no gan me, ³⁶ rëbchaa me:

—¿Papá, par luu grëse cos zrieelo gun luuw! ¿Bzhiguiel psilaa naa lo guieḥnë rii! Per telne grieloda, miñe gnëtaa luu, sca gaca.

³⁷ Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëe? ¿Pe ni palal blëëbd luu nzobna luu? ³⁸ Goḥsobna, goḥnab lo Dios zeena yquild mendox to. Niicle ne squi lëbdraa xcuerp to sobna to, per goḥnab lo Dios, sac gon miñ co nac miñe racladz zhiespíritu to.

³⁹ Dzigo biire güey me stib, güeyzodiidznie me Dios; scaque miñe bñab me glo miñcoque bñab me stib. ⁴⁰ Zeene bdziñ me lo zho, gon me laa zho bii nixguies. Ni rdziel zho pe guiab zho lo me.

⁴¹ Laa zeene goc tson vuelt biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa. ⁴² Goḥtsieso, zeena zio ne; sac gon laa zha ne glu naa lo zho ziaadle nu.

Bnaaz zho Jesús

(Mt. 26:47-56; Lc. 22:47-53; Jn. 18:2-11)

⁴³ Laa Jesús bii quianeeque, zeene laa Judas (tib zha ne nac xpëëdscuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo menguiedz Israel. No zho nzhen spad, nogaa zho nzhen yag. ⁴⁴ Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier goḥso goḥxen me, ib csaande to xoon me.

⁴⁵ Nligaaw, zigne bdziñ Judas bredz Judas Jesús; blozh ga dow Judas bzhid cuas me.

⁴⁶ Horco wbig grë zha ne zianaḥ zhits Judas ga bzhen zho me. ⁴⁷ Lo grë zha ne nacgza Jesús ga, hor co biasaque tib zho bdoob zho zhispad zho pchug zho tib diag xmoz men ne nac pxoz nroob.

⁴⁸ Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? ⁴⁹ Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuuan rii gon noyac zeena gac grë miñe raquiet lo Xtiidz Dios.

⁵⁰ Grë zha ne nac xpëëdscuel me ga, grëse zho bzhoon, tipse me psan zho ga. ⁵¹ Tibaque mgui nguieg bii güeynaḥ zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; ⁵² per znuse brieem mgui len lar co, bzhoon mgui coletse mgui.

Güeynie zho Jesús lo zhiwxtis zha Israel

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ga brieenie zho Jesús bdzinnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo mengüiedz, laa zho pcaalsa ga.

⁵⁴ Ye Pedr, maase zit zit na| Pedr laa Pedr bdzin xley men co. Bdzin Pedr, güeysobga Pedr lo grë zha ne ndxienap, lëëtaque laa zho quiadzëë lo gui.

⁵⁵ Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew. ⁵⁶ Nzian zha ne pquidie rëb zho znu znu nac ncuane noyün me, per rrieequiad xtiidz zho; sac zhaase zhaase rnee zho. ⁵⁷ Tibaque zeene guso blalaa zho, bnexuu zho rëb zho:

⁵⁸ —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

⁵⁹ Niicle scaw, rzëdaque xtiidz zho tipse.

⁶⁰ Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacne rquiabd luu? ¡Diidzli dzigo lëë nac grë mine rnee zho!

⁶¹ Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

⁶² Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zob cue Dios nëz derech, ni zeene laa naa guieet gbaa zialzëëb naa lo xcow.

⁶³ Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—, ⁶⁴ laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

⁶⁵ Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

Rëb Pedr runbeyd Pedr Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Laa Pedr bii zoque ley. Ga zo Pedr, zeene laa tib wnaa ne nac zhicriad men rnabey co bdzin; ⁶⁷ gon me laa Pedr zob gax lo gui nodzëë Pedr. Dze rwi me lo Pedr, tibaque zeene rëb me:

—¿Ye luu lëë rzënie Jesús, men Nazaret ne bdzinnie zho i?

⁶⁸ Per bneelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nëz ro zawan, lëëtaque hor co pcuedz tib gall. ⁶⁹ Dzeque rwi wnaa co lo Pedr, dzigo rëbchaa me lo grë zha ne ndxie ga:

—¿Lëëw, zha ne rzënie me nac mgui qui!

⁷⁰ Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie men co. ¡Zha Galilé name nac luu!

⁷¹ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¿Dios zobwi ganle, telne rned naa diidzli, maase cuibdee naa!

⁷² Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelt rëb luu runbeyd luu naa.” Dzigo mbanse rac Pedr, psilo Pedr biin Pedr guielñë co.

15

*Güeynie zho Jesús lo Pilat**(Mt. 27:1-2, 11-14; Lc. 23:1-5; Jn. 18:28-38)*

¹ Ziadyiinile liuw, scase bii nchool rñaw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bñediidz zho, laa zho pxidoo Jesús güeysañ zho me lo Pilat men ne nac gobernador.

² Bdzin me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

³ Tibaque quia grë zha ne nac pxoz non, rzadraa grë ncuaane rcaadz zho me. ⁴ Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaane rcaadzdoł zho luu.

⁵ Bzee zdoo Pilat gon Pilat ible pquiabd me.

*Bnab zho guet Jesús**(Mt. 27:15-31; Lc. 23:13-25; Jn. 18:38-19:16)*

⁶ Gzobse lni Pascw rsilaa Pilat tib zha ne no ladzguiib, tel cho zha ne gnabtaa menquiedz laa. ⁷ Len dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. ⁸ Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

⁹ Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa men ne rnee zho zhirey to nu?

¹⁰ Sca rëb Pilat lo zho, sac nanle me niapse por rlëë grë pxoz non co ran zho Jesús gane bnabey zho bgaa me güeysañ zho me ga. ¹¹ Per lel psilo grë miech co rnab zho csilaa Pilat Barrabás; ni lëëque grë pxoz co pquiil zho. ¹² Dzigo rëb Pilat lo zho:

—¿Zha dzigo racladz to gac men rnee zho zhirey to nu?

¹³ Pquiab be grë miech co, roptsie zho rnee zho:

—¿Bnabey yquia me lo cruz!

¹⁴ —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¿Bnabey yquia me lo cruz!

¹⁵ Gon Pilat zha rac zho ni racladzaque me guianñziuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menquib ne tsiequiaa me lo cruz.

¹⁶ Biire grë menquib co bzëëbnie zho Jesús nëz len yulow, ga pcaalsa grëraa menquib ne nacgrë zho. ¹⁷ Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey. ¹⁸ Dzigo psilo zho nguiedz roptsie zho rnee zho:

—¿Golwi ganle zha ractaa zhirey zha Israel!

¹⁹ Bzhen zho tib goobgui, rdeed zhow guic me, rtsuc zho lo me, rquiaalo zho rquiitsgzhib zho lo me zig rquiitsgzhib zho lo zha non.

*Güeyquiaa zho Jesús lo cruz**(Mt. 27:32-44; Lc. 23:26-43; Jn. 19:17-27)*

²⁰ Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

²¹ Nëz zienie zho me, bdzieel zho tib mgui Ciren lë Simón (lëë pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

²² Zeene bdzinnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”); ²³ ga bdeed zho nziu notsa guizh rmed ne lë mirr, nan zho nie mew, per god mew. ²⁴ Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaannie zho tib lëgaw tib tib zho, laa stiba bio zho rif. ²⁵ Zig hor wxeeeren ga pquiaa zho me lo cruz.

²⁶ Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LĚĚ MEN RII QUIA NU, PORNE NAC ME ZHIREY ZHA ISRAEL.”

²⁷ Ye chop ngbaan pquiaagza zho me lo cruz, tibga zhiczuz zho bzo tib nëz cho zhiczuz me.

²⁸ [Ga briequia minë raquiet lo Xtiidz Dios, zaatne rnee: “Bloo zho me lad zha ntseeb.”]

²⁹ Grë miech ne rded zaatne quia me lo cruz ga, runnguzee zho me, rzhidznie zho me, haxta rdzi guic zho rnee zho lo me:

—jPe led rëb luu lëë, laa luu ntsil yadoo ni tsonaque ngbidz nzaalo luuw stib! ³⁰ Nana zho, jpe gacd lëëque luu bla luu lo caxtigw qui, biet lo cruz qui!

³¹ Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiaac me, stib miech scataa bla me, pe nac dzigo rriyelod me gla me me. ³² jTelne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiazga me lo cruz ga, rbidzgo zho lo me.

Gut Jesús

(Mt. 27:45-56; Lc. 23:44-49; Jn. 19:28-30)

³³ Goj grol dzew, tibaque zeene goc tib ncow dipse lo guidzliu, haxta las tres biao biini stib. ³⁴ Horco nguiedz zëëb tsi Jesús, rnee me:

—jEloi, Eloi! ¿Lama sabactani?

(Diidz co nac zig nacne rnee ne: jLuuse name nac xDios naa! jPe nacne psaan luu naa?)

³⁵ Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. ³⁶ Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—jGotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

³⁷ Tibaque zeene pquiaa me stib redz nroob, znuse blozh me.

³⁸ Lëëtaaque laa me nolozh, zeene briez nzoli lar nroob ne quia len yadoo, groltaa goca. ³⁹ Gax lo me ga zo men ne rnabey lo grë menguiib co, zeene gon men co zha gut me, rëbchaa me:

—jNe nligaa, Xpëed Dios nac men qui!

⁴⁰ Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José. ⁴¹ Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdzin me Jerusalén.

Bgueets Jesús

(Mt. 27:57-61; Lc. 23:50-56; Jn. 19:38-42)

⁴²⁻⁴³ Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnaab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdzin dze ne gnabey Dios.

⁴⁴ Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quianap Jesús; ⁴⁵ haxta bdzinraa men co rëb nliw, dzigora bdeed me diidz tsielit José Jesús lo cruz.

⁴⁶ Nacne güey José, güeyysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

⁴⁷ Ga zo Marí Magdal ni Marí xniaa José, gon zho pa lo bgueets me.

16

BRIEBAN JESUS

(Mt. 28:1-10, 16-20; Lc. 24:1-53; Jn. 20:1-23)

¹ Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grë nceit nex ne tsietëëb zho lad xcuerp Jesús. ² Laa zeene biini liu, dze ne rzobni zhmäl, silgaw loxaque ziaadlan ngbidza laa gza wnaa co brieë laa zho zie ro baan Jesús.

³ Nöz no zho, rnabdiidzlsa zho dien zha gdioob quie nroob ne nioog ro baa, cho siguiel coba. ⁴ Ni zeene bdziñ zho, gon zho laa quie co bdiooble.

⁵ Laa zho bzëëb leñ baa, zeene gon zho nöz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me; ⁶ dzigo rëbchaa me lo zho:

—Gdziebde to. ¿Jesús lëë, meñ Nazaret ne pquiaa zho lo cruz, meñ co ziaadguib to? Guiendle me nu, ¡laa me brieëbanle! Golwi ganle nu nac zaatne pxob zho me. ⁷ Goltsie, golguiab lo Pedr ni lo grëraa xpëëdscuel me tsie zho Galilé, ga tsiedzieel zho me zigne rëble me lo zho glo.

⁸ Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

⁹ [Dze ne rzobni zhmäl ga, sil co brieëban Jesús, ni Marí Magdal nac zha ne glopaa gon me; lëë Marí co ga beenguiaç me zeene bençxoon me gadz mendox ne nosacsi Marí.

¹⁰ Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquielñë me. ¹¹ Niicle bin zho rëb Marí laa me brieëbanle, gonlo Marí me; per bliladz zhow.

¹² Bded ga, brieëquia me lo schop xpëëdscuel me lëëtaque no zho nöz zie zho dan.

¹³ Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.

¹⁴ Laa stibtaa vüelt, lëëtaque ndziib zho lo mezh no zho wagw gza tsiiptib zho, tibaque zeene laa me brieëquia; dzigo goctox me lo zho sac gon me ib bliladz zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieëban me, ni bliladz zhow. ¹⁵ Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios. ¹⁶ Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga. ¹⁷⁻¹⁸ Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë meñ rzacñë, zunguiac zho zho; grë mendox ne noguitnie miech, zeene gzeet zho lë naa zuncxoon zho ma.

¹⁹ Blozhse sca bnee me lo zho, laa me zey gbaa bzob me cue Dios nöz derech.

²⁰ Dzigo grëse xpëëdscuel me laa zho brieë, brieets bliaa zho zieseed zho miech Xtiidz Dios. Ni me nac meñ ne noyacniñ zho run zho grë milagr nroob, zeena glu ne nli Xtiidz me nac miñe noseed zho miech.]

XTIIDZ NDZON DIOS MIÑE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaañe goc zeene biaad Jesús men ne pxeel Dios ga. ² Ncuaañe nlipaa goca, grë ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

³ Yequa naa pquiaa naa wen wen bnabdiidz naa, bleeni naa diidz grëse dien zha psilo grë ncuaañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnan luuw; ⁴ zeena lozh gacnan luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tsiel mew, zha xtii pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguiitsd me. ⁷ Men gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí gun zho dziin len yadoo. ⁹ Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bgaa Zacarí. ¹⁰ Goxyaal co nolaadz me len yadoo, laa grë miech ne ndxie nëz ley nonabgaa lo Dios, ¹¹ tibaque zeene briequia tib xanjl Dios bzo cue pcoog nëz derech, zaatne nozëeg me yaal ga. ¹² Zeene gon me anjl co bdzieb me, rdzieldraa me zha gun me lo dzeb co. ¹³ Dzigo rëb anjl co lo me:

—¡Gdziebd luu! Diidzse zialnie naa lo luu, gacnan luu ganle miñe bnab luu lo Dios ga, pquiaadiag mew; gane niina laa tsiel luu gap tib mëedbgui. Zeene gal win, Juan cueelë to win. ¹⁴ Tib guielebley nroob gac win lo to, niicle lo grëragaa miecha, ¹⁵ sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant nacniele win. ¹⁶ Win gac men ne co guic nzian grë zha Israel, gbiire gbig zho lo Dios, men ne rnabey zho. ¹⁷ Zigne goc Lí, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquielntseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuaañe gacd i gon rnee luu! Zigtaa naaw, zigtaa tsiel naaw, mengol-le nac no.

¹⁹ Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. ²⁰ Per ne squi riladzd luuw, na laa luu guiaan ngop, haxta gal dze ne gac miñe rne naa lo luu nu, dze co glan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëeg me yaal ga. ²² Zeene brie me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne been me dziin len yadoo, dzigo laa me zey lidz me. ²⁴ Goca bla ngbidz, laa mëed co pquialo zdoo tsiel me.

Dipse len gaay mëë bio zhuz co ro yu, ib bried me, rley me rnee me:

²⁵ —¡Zha wentaa Dios, bneedz me diidz bdzin dze yquianie naa mëed rii, zeena gzhidzniedraa miech naa!

Güeynie tib anjl diidz laa Jesús gac mëed

²⁶ Goc xoop mëë zoney Lisabet mëëd, pxeel Dios anjl co stib güey me Nazaret, guiedz ne ndxie xtan zha Galilé. ²⁷ Ga no tib ndzooop nguieg lë Marí, len dze co no xtiidz ndzooop co ctsieelnia ndzooop tib zha xtii rey David, lë José. ²⁸ Bdzin anjl co zaatne no ndzooop, pquiaabdiuzh me ndzooop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹ Zeene gon Marí anjl co, ni gon Marí zha rnee me, bzee zdoo Marí, riennd Marí dien pe nac scataa rzë xtiidz me. ³⁰ Dzigo rëbchaa me lo Marí:

—¡Gdzieebd luu! Laa Dios gon bzooblo luu ygaa luu tib guielnzaac nroob. ³¹ Zdoo luu yquiaalo tib mëëdbgui, zeene laa win gal, JESUS cueelë luu win. ³² Tib men nroob gac win, zien miech ganle Xpëëd Dios ro ne no gbaa nac win; ni so me win gnabey win zig bnabey xmengol win David. ³³ Win gnabey lo grëse zha Israel, ni gdziind dze ne lozh xquielrnabey win.

³⁴ Pquiab Marí rëb Marí lo anjl co:

—¿Mëëd ye? ¿Per zha grieelo gap naa mëëd, ni tib naa zo nu?

³⁵ Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëëd co yquiaalo zdoo luu; gacxe waa Xpëëd Dios gunbey miech win, mine rnabey Dios min co gun win. ³⁶ Ye belyeen luu Lisabet, niina lo guielgol-le laa tib mëëd pquialo zdoo me; zëëb diidz ib grieelod gap me mëëd, per na racle xoop mëë zoney me mëëd, ³⁷ sac par Dios tsod ncuaane grieelod gac.

³⁸ Dzigo rëb Marí:

—Tel scaw, mine rnee luu i, maase gaca. Laa naa zo nu par gun naa mine gnabeytaa Dios naa.

Blozhse ga, laa anjl co zey.

Güeygan Marí Lisabet

³⁹⁻⁴⁰ Goc bla dzew, brieë Marí ga zie me ziegan me Lisabet tib guiedz win ne ndxie gui glaa ne nac xtan zha Judé. ⁴¹ Bdzin me, wbig me pquiaabdiuzh me Lisabet. Bdiuzh co bnee me, zeene biasoli xpëëd Lisabet zdoo Lisabet; dzigo hor co bdeed Espíritu Sant guielbiini lo Lisabet, ⁴² nguiedz bnee Lisabet rëb me lo Marí:

—¡Dichos luu Marí bgaa luu guielnzaac qui! Sac gon, lo grëraa no nac no men wnaa, luu bzooblo Dios. Mëëd ne zoney luu i, zha nziuu nac win lo me. ⁴³ ¡Ib guiaanladzd naa dze rii, znu biaad luu nac luu xniasa men ne rnabey naa, biaadgan luu naa! ⁴⁴ Haxta mëëd ne zoney naa nu, rley win biasoli win zdoo naa, zeene pquiaabdiuzh luu naa. ⁴⁵ ¡Dichos luu, bin luu mine në Dios, ni bliladz luu zun mew!

⁴⁶ Dzigo hor co bnee Marí rëb me:

¡Men nroob nac Dios! ¡Gdib zdoo naa roolnie naa me!

⁴⁷⁻⁴⁸ Rleynie naa me nac me men ne psilaa naa, sac gon niicle peet nond naa, tib ngundziin winse nac naa lo me, per laa me bzooblo naa.

Grë miech, zigtaa len dze riiw, zigtaa len dze ne ziaadragaaw, ziaab zho naa nac tib wnaa ne mazdraa dichos.

⁴⁹ Ne nligaa zha nactaa guielnzaac rii bneedz me lo naa.

Men ro, men nroob nac me, ¡guiendrasa cho zig me!

⁵⁰ Grëse miecha, zha ne rioxco rquiaadiag mine rnabey me, tibaque racnie me zho, ib rsaand me zho.

⁵¹ ¡Golwi ganle zha nactaa grë ncuaane run me!

Grë ncuaane no guic zha niats gun zho, bnitlo mew,

⁵² ptiche me grë zha ne zob rnabey.

Laa grë zha ndooladz, zha ne rzac miech peet nond, beennon me zho.

⁵³ Grë zha mban ne guiennd pe yquiin, nroob guielnzaac ne bdeed me lo zho, laa grë zha ne rapchen, scase bzonëz me zho.

⁵⁴ ¡Pe zhidaa ziyacnie me grë zha ne nac xtii Israel, mengol ne goc zig tib ngundziin lo me ga! ¡Tibaque rlu me rleynie me zho!

⁵⁵ Ib biaanladzd me xtiidz me mine bnee me lo pxozgol ne Abraham, zeene rëb me gdziind dze ne csaan me Abraham, ni grëraa zha ne grieequia lo xtii Abraham.

⁵⁶ Maase tson mëë biaan Marí ga blëz me lo Lisabet, dzigora wbi me ga bdziñ me lidz me stib.

Gol xpëéd Lisabet

⁵⁷ Bdziñ dzew, laa xpëéd Lisabet bza mëë, laa me gop win. ⁵⁸ Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëëd co lo me, rley zho güeygan zho me.

⁵⁹ Dze ne goc mëëdbgui yeen co xon ngbidz, blalaa zha ne güeynal zhits pxoz win, zhits xniaa win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan zho Zacarí nrieelë win, zigne lëque pxoz win, haxta scale nonee zho lo win, ⁶⁰ per hor co rëb Lisabet, led scad gac lë win, Juan grieelë win.

⁶¹ Dzigo pquiab zho rëb zho:

—¡Pe nacre sca grieelë win? Ni tib menlidz to lëd Juan.

⁶² Bnabdiidzaque zho lo pxoz win, blu zho señ lo me dien zha racladz me gac lë win.

⁶³ Dzigo bnab me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieelë win.” ⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. ⁶⁵ Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëëd co gol, grëse guiedz ne ndxie gui glaa co gocnan miecha. ⁶⁶ Zha ne rona, rza zdoo zho rnee zho: “¡Bay cho gac mëdyeen co?” Sac nligaa rlu nacie Dios win.)

⁶⁷ Horco bdeed Espiritu Sant guieibiini lo Zacarí, psilo me bnee me rëb me:

⁶⁸ ¡Xquizh xquieinzaac men nroob ne rnabey, men ne nac xDios ne nac ne zha Israel! Sac gon laa me ziaad, ziaadgan me ne, ziadbee me ne lo xquieinë ne.

⁶⁹ Nasi laa me pxeel men nroob ne ziaadsilaa ne, lëë men co ga no grieequia lo zha xtii David, men ne been xtsiin me ga.

⁷⁰ Padzeelale bzeet me cxeel me men co, grë zha ne biaz pteed xtiidz me, bzeet zhow.

⁷¹ Rëb zho, ib sxeel me men ne guiaadsilaa ne ladznia zha ne nosacsi ne, zha ne rlëë lo ne.

⁷² Sac ib gdziind dze csaan me grë zha xtii pxozgol ne, rquianëpaa zdoo me zho.

Ib guiaanladzd me mine rëb me lo Abraham,

⁷³ zeene rëb me laa me cxeel men ne csilaa ne,

⁷⁴ zeena dziodzbdraa ne lo zha ne rlëë lo ne, lo zha ne rsacsi ne; sinque ine tibli gac ne dziuun ne mine rnabey me.

⁷⁵ Gzataa dze ne gneedz me guieimban lo ne, ine mbe zdoo ne, dziuun ne mine rleynie me.

⁷⁶ Luu gon xin, bzooblo Dios ro ne zob gbaa, cteed xtiidz me lo miech, luu tedner tsienee luu lo zho, laa men co no guiaad.

⁷⁷ Luu gnee lo grë zha Israel, guien zho ganle zha gun Dios zho perdon, parne ycaania me zho.

⁷⁸ Ne nligaa rleynie me ne, rquia zdoo me ne, gane laa me cxeel Xpëéd me, men co gac zig tib biini,

⁷⁹ Biini co gziini lo grë zha ne mban lo guieicow, zeena biini co glu nëz lo ne, guio ne nëz ne peet zhgab, peet dzeb guieind.

⁸⁰ Zigse zie dzew, scase scase zieroo mëdyeen co, ni scaquegaa dib zdoo win rleynie win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

2

Gol Jesús
(Mt. 1:18-25)

¹ Lëëtaaque len̄ dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan̄ me dien̄ palal zho. ² Lëë primer vuelt ga ptop zho lë miech, lëë iz co zob men̄ ne lë Cirein zobnabey me guiedz Siria.

³ Bnabey August grëse miech zha ne no stib ladz ben̄, laa zho no tsie zaatne nacpaa ladz zho tsiedeed zho lë zho, parne ga ygab zho. ⁴ Min̄ co nagon̄ nacne brieë José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David. ⁵ Gard ctsieelniapaa me Marí, per nole xtiidz me grop me. Len̄ dze co ziaadyobpaa gal xpëëd Marí.

⁶⁻⁷ Bdzin̄ me Belén, bgaadraa me zaatne nrieelo mbëz me len̄ yu, lega nac ti len̄ lidz ma bdeed zho blëz me. Lëëtaaque bdzin̄ me ga, laa mëëd co gol. Racse Marí pchēl me win lar, bdiix me win tib len̄ yag ne row ma guizh; lëë mëëdglo ga lo me.

⁸ Guieel co, blalaa zha ne nac baxtor, laa zho ndxie quianap zho xpëcwxiiil zho dan, ⁹ tibaque zeene brieequia tib xanj̄l Dios lo zho, dipse zaatne ndxie zho ga biab tib biini nroob. Zeene gon̄ zho anjl co, gon̄ zho biini nroob co, per nli bdzieb zho. ¹⁰ Dzigo bnee anjl co, rëb me lo zho:

—jGdziebde to! jGolgon diidz cub ne gan̄le zialnie naa lo to nu! jTib guiēlbley nroob gac diidz rii lo grëse miech! ¹¹ Men̄ ne gon̄ quiambëz to ga guiaad csilaa to, laa me blansole lo guidzliu. Me nac Men̄ ne zëëble diidz ga cxeel Dios, me nac men̄ ndzon ne rnabey. Belén, zaatne goc ladz rey David, ga gol me naguieel. ¹² Goltsie, zaatne tsiedziel to tib mëëdbgui yeen̄, nrielse win lar zhoob win len̄ yag ne row ma guizh, lëë me ga.

¹³ Tibaque zeene gon̄ zho laa stib dzoön anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:

¹⁴ jHaxta zaatne glaaraa gbaa, nozhoobnen̄ gan̄le pa lotaa men̄ nroob nac Dios! jNasi, grëse miech zrieelo guiaan̄wen zho lo me; zdoo me rala laa me nobedz zho!

¹⁵ Zeene laa grë anjl co zey gbaa stib, psilo grë baxtor co rnee zho:

—jNiinaga golgotsaa guio Belén! jGotsaa guiowi ne dien̄, zeena dzian̄ ne mine biaadnie anjl co diidz lo ne nu!

¹⁶ Lëëlëd bio zho nëz laa zho zie. Bdzin̄ zho zaatne blëz José ga grop Marí, nligaa laa mëdyeen̄ co nix ga, nixse win tib len̄ yag ne row ma guizh. ¹⁷ Dzigo bzodiidz zho grëse zha rëb anjl co lo zho, zeene güeynie me diidz laa win gol.

¹⁸⁻¹⁹ Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

²⁰ Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel̄ me xanj̄l me güeynie diidz lo zho, rley zho sac brieelo gon̄ zho mëdyeen̄ co.

²¹ Dze ne goc xon ngbidz gol win, dze co bio win bey ne rio xpëëdbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanj̄l Dios zeene güeynie me diidz ne laa win gac mëëd lo Marí.

Güeynie zho Jesús yadoo

²²⁻²⁴ Nac ley ne psan̄ Moisés lo zha Israel, wnaa ne sca rap mëëdbgui, zeene rac zho tap zhmal, none tsienie zho chop ma cogon zho len̄ yadoo; yase tsienie zho tib nëz coc, tib nëzgaal palom. Ni rnabeya: “Grëse mëëdbgui ne rac mëëdglo, ib none gdeed zho win gac win tib zha ne gun̄ xtsiin̄ Dios.” Nacne zeene bza dze co, dzigo brieë Marí zie me Jerusalén grop me José, zienie me mëdyeen̄ co yadoo csan̄ me win ladznia Dios; lëë nëzle ga zienieque me gon̄ ne no gdeed me ga.

²⁵ Lëëtaaque dze ne bdzin̄nie zho win len̄ yadoo, laa tib men̄ lë Simeón no ga. Men̄ Jerusalén nac men̄ co, rleynie me Dios, rioxco me mban me zigne rnabey Dios, ni nacnie Espíritu Sant me. Quiambëz me gan̄ me Men̄ ne nole diidz ga cxeel̄ Dios csilaa zha Israel,

²⁶ sac rëble Espíritu Sant lo me ible laa me no gan men co. ²⁷ Laa dze co, Espíritu Santaque psiaab guic me zie me yadoo. Nacne lëëtaque no me len yadoo, laa zho bdziinne mëdyeen co ga, ziesan zho win ladznia Dios zigne rnabey ley. ²⁸ Dzigo me wbig bdeedz win, rdeed me xquizh lo Dios, rëb me:

²⁹ Xquizh xquielnzaac luu Dios, mine në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

³⁰⁻³¹ ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

³² ¡Grëse miech ne ndxie lo guidzliu, me nac biini ne gziini lo zho!

¡Me csanziiuu zha Israel, ne nac zho zha ne ngab lo luu!

³³ Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me. ³⁴ Dzigo bnaab Simeón lo Dios gacnien Dios me gza me mëdyeen co. Blozh ga, rëbchaa Simeón lo xniaa win:

—Tib guielbley nroob ne gac mëed rii lo zha Israel, por win ndal zho griece lo guielcow ne no zho, laa zho gbig lo Dios. Ni scagaa zrieequia zha ne glëënie win, per lëëque zha csacsi zho ga. Mban gac zdoo luu, nroob guielnë ne tso luu gan luu zha sac miech win.

³⁵ Ga glu ganle zha nac zdoo tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tseele me. Lëë pxoz me ga brieelë Fanuel, lëë zhey co ga nac zha xtii Aser. Tib men ne rteed xtiidz Dios lo miech nac me, ³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac men ne quiambëz zho ga guiaadsilaa zho.

³⁹ Blozhse been José mine rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me. ⁴⁰ Ga broob win, zigse zierooob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëëdbgui ne rap lalga iz, zrieelele tsie zho lo lni co.

⁴³ Zeene laa lni co bded, laa me bio nëz grop me laa me wbi ga. Ib biend me biaan win Jerusalén, ⁴⁴ tibaque güeynie guic me lad grëraa miech ne wbire lni, lad co zienal win. Laa me no nëz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me, ⁴⁵ per ni tib zho choot rdeete win diidz. Nacne wbireque me nëz Jerusalén stib, zieguib me win.

⁴⁶ Dze ne racle tson ngbidz blozh lniw, dzigora güeydziel me win len yadoo, laa win zob lo grë zha ne nac maistr ley, noquiaadiag win grë zhiwseed zho ni nzian grë ncuane rnabdiidz win lo zho. ⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. ⁴⁸ Zeene gon me laa win zob lad grë men co, bzee zdoo me; dzigo rëbchaa xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rëb win:

—Nguibde to naa. ¿Pe rande to ib none gun naa xtsiin Pxoz naa?

⁵⁰ Ib biend me pe nacne sca rëb win. ⁵¹ Dzigo laa win zienal zhits me, laa me zeynie win Nazaret; nose grë min co zdoo xniaa win.

Tib mëed nguzobdiidz nac win, ron win xtiidz me. ⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

*Psilo Juan Bautist noseed me miech
(Mt. 3:1-12; Mr. 1:1-8; Jn. 1:19-28)*

¹⁻² Bdzin dzew, laa Juan psilo pseed miech. Lëe len iz co rac tsiin iz zob men ne lë Tiber nac me rey, rnabey me grë guiedz ne ngab lo zha Roma. Len dze co zob Pilat rnabey me grë guiedz ne ndxie nëz Judé, laa Herod zob rnabey grë guiedz ne ndxie nëz Galilé. Len dze coque zob bets Herod, men ne lë Lip rnabey me grë guiedz ne ndxie nëz Ituré ni nëz Traconit; laa Lisian rnabey grë guiedz ne ndxie nëz Abilin. Zha ne nac zhipxoz nroob zha Israel len dze co, nac Anás ni Caifás. Len dze copaa nagon güeynee Dios lo Juan (xpëed Zacarí) dan ngan ne no Juan ga.

³ Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquieintseeb zho gbig zho lo Dios ni chobnis zho, zeena csilaa Dios zho lo grë xtol zho. ⁴ Ga briequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zëeb tib dan ngan, rnee me:

“Golzhixcuaa nëz ne ted men ne rnabey,

golsaan grë guieintseeb ne run to.

⁵ Zaatne nac len blë, golcodzëew,

grë gui glaa, grë gui las, golsiaablow.

Nëz ne niecw, nëz ne quiaya quiaguet nac, golzhixcuaaw.

⁶ Grëse miech, laa zho gan men ne pxeel Dios ga ziaadsilaa zho.”

⁷ Zeene ran Juan laa miech rdzin lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Nan to na lëe, loxaque chobnis to laa to laale lo grë guieinédox ne ziaadyob guiaad. ⁸ Led scada gon, none ndzinli gban to zeena glu nlipaa psaan to xquieintseeb to. Ni gacniatsde to guiab to, loxaque por nacse to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech ne gac zha xtii Abraham. ⁹ Nanle to ganle, grë yag nex ne rquiad nex lo, zeene ran zho sca naca, rchug zhow, rzëeg zhow; scadaa nagon sac grë zha ne gband zigne racladz Dios, ib tedlaad zho lo gui; sac rriequia laa me nzhenle xquiiyag me, cchug me grë yag ne sca nac.

¹⁰ Dzigo rnabdiidz zho lo Juan, pe no gun zho parne ygaad zho grë guieinë co. ¹¹ Dzigo rquiab me rnee me lo zho:

—Telne quianie to chop lar ne racw to, none gdeed to tiba lo zha ne guiend xab; telne quianiegaa to ncuane gow to, none gdeed to palala yquiin zha ne quianieda.

¹² Wbigaque bla recaudador ne zie chobnis, rnabdiidz zho dien pe gun zho. ¹³ Pquiab Juan, rëb Juan lo zho:

—Cuandraa to samiech to, mine riegualse zho quizh zho, min co golnab lo zho.

¹⁴ Ye zla menguiib wbig, rnabdiidz zho rëb zho:

—¡Telzhe no waa, pe nac mine dziuun no?

Rquiab Juan rnee Juan lo zho:

—Ndzinli golgac, ib ctsebe to samiech to par dien pe gla to lo zho; zha ne peet xtold, ib yquiaaquide to zho ncuane been d zho. None sac zdoo to dimi ne quiayazh to.

¹⁵ Nzian grë miech co quiambëznë zho gacnan zho dien pe lëele Men ne bzooblo Dios ga cxeel me nac Juan. ¹⁶ Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguald naa gac naa. ¹⁷ Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdzind dze guiuuw.

¹⁸ Sca rnee me lo zho, par guien zho zha nac Xtiidz Dios. ¹⁹ Tib vuelt haxta lo rey Herod goctox me, sac lëëque Herodí, wnaa ne nac tseeel bets Herod nonie Herod; grë

guielntseeb ne quiayun Herod, blisqui mew. ²⁰ Per laa ne nion Herod diidz, le_l been_l me stib guielntseeb, bna_{bey} me b_{gaa} Juan bio Juan ladzguiib.

Brobnis Jesús

(Mt. 3:13-17; Mr. 1:9-11)

²¹ Le_n dze ne nochoobnis Juan miech ga, tib dzew laa Jesús bdzi_n lo Juan ga, ye me bna_b cchoobnis Juan me. Blozhse brobnis me, laa me quiazodiidznie Dios, tiba_{que} zeene bzhial zhan g_{baa}, ²² laa me_n ne nac Espíritu Sant biet, rlu me zig rlu tib palom, laa me bdzi_n guic Jesús, hor co blu zëeb tib tsi me_n co nëz g_{baa}, rnee me:

—Xin, rley_{nie} naa luu go_n, nziuu luu lo naa.

Xmengol Jesús

(Mt. 1:1-17)

²³ Gal_{ptsii} iz rap Jesús, laa me psilo xtsi_n me pseed me miech. Zha ne run_{bey} me, rzoob zho xpëed José nac me,

²⁴ José co goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

²⁵ José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

²⁶ Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

²⁷ Judá goc xpëed Joan,

Joan goc xpëed Resa,

Resa goc xpëed Zorobabel

Zorobabel goc xpëed Salatiel,

Salatiel goc xpëed Neri,

²⁸ Neri goc xpëed Melqui,

Melqui goc xpëed Adi,

Adi goc xpëed Cosam,

Cosam goc xpëed Lmodam,

Lmodam goc xpëed Er,

²⁹ Er goc xpëed Josué,

Josué goc xpëed Liezer,

Liezer goc xpëed Jorim,

Jorim goc xpëed Matat,

³⁰ Matat goc xpëed Leví,

Leví goc xpëed Simeón,

Simeón goc xpëed Judá,

Judá goc xpëed José,

José goc xpëed Jonán,

Jonán goc xpëed Liaquim,

³¹ Liaquim goc xpëed Melé,

Melé goc xpëed Mainán,

Mainán goc xpëed Matata,
 Matata goc xpëed Natán,
³² Natán goc xpëed David,
 David goc xpëed Isaí,
 Isaí goc xpëed Obed,
 Obed goc xpëed Booz,
 Booz goc xpëed Salmon,
 Salmóngoc xpëed Naasón,
³³ Naasón goc xpëed Minadab,
 Minadab goc xpëed Aram,
 Aram goc xpëed Srom,
 Srom goc xpëed Far,
 Far goc xpëed Judá
³⁴ Judá goc xpëed Jacob,
 Jacob goc xpëed Isaac,
 Isaac goc xpëed Abraham,
 Abraham goc xpëed Taré,
 Taré goc xpëed Nacor,
³⁵ Nacor goc xpëed Serug,
 Serug goc xpëed Ragau,
 Ragau goc xpëed Peleg,
 Peleg goc xpëed Heber,
 Heber goc xpëed Sala,
³⁶ Sala goc xpëed Cainán,
 Cainán goc xpëed Rfaxad,
 Rfaxad goc xpëed Sem,
 Sem goc xpëed Noé,
 Noé goc xpëed Lamec,
³⁷ Lamec goc xpëed Matusalén,
 Matusalén goc xpëed Enoc,
 Enoc goc xpëed Jared
 Jared goc xpëed Mahalaleel,
 Mahalaleel goc xpëed Cainán,
³⁸ Cainán goc xpëed Enós,
 Enós goc xpëed Set,
 Set goc xpëed Adán.
 Adán goc zig tib xpëed Dios.

4

Gocladz mēndox niungüet ma Jesús
(Mt. 4:1-17; Mr. 1:12-15)

¹ Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend. ² Ga bio Jesús, ni tib lë peet dowd me; gzase dze pquiana| mēndox niungüet ma me niun me mine racladz ma. Zeene goc choo dze no me ga, gon ma lēbdraa me rcaabedz me, ³ dzigo rēbchaa ma lo me:

—Telne nli Xpëed Dios nac luu, bnabey tsaalo grē quie rii ncuaañe gow luu.

⁴ Dzigo pquiab me rēb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grēse guiedz ne ndxie dib lo guidzliu lo me, ⁶ rēb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guie_lndaan ne no low, znedz naaw lo luu ⁷ telne squiitsgzhib luu lo naa, gunnon luu naa.

⁸ —;Biche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegua_l yquitsgzhib luu; ni mine rnabey me min co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, ¹⁰ benque led znu rnee lo Xtiidz me: “Znabey Dios grë xanj_l me yquiaanap luu, ¹¹ zgueedz zho luu, zeena ni tib quie ycaand ni luu.”

¹² Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuaane nod gun me.”

¹³ Gonse ma rdziel zha gun_güet ma Jesús, dzigo biche ma lo me palal dze.

¹⁴ Blozhse ga, dzigo laa Jesús wbi ga bdzi_n me nëz Galilé, scaque nacie Espíritu Sant me. Znuse beenbey miech me por grëtaa ncuaan ro ne ru_n me, grëse guiedz ne ndxie nëz co, rzeet zho me. ¹⁵ Zaatne rdzi_ntaa me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

Güey Jesús Nazaret

(Mt. 13:53-58; Mr. 6:1-6)

¹⁶ Tib dzew, laa me bdzi_n Nazaret, zaatne broob me. Go_l dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene go_l horne rlab zho Xtiidz Dios, dzigo bded me, ¹⁷ bdeed zho mine pquiaa Isá glab me. Pخال me low, lëëtse zaatne znu rnee blab me:

¹⁸ ZhiEspíritu Dios nacie naa,

ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw. Laa me pxeel naa gne naa lo grë zha ne ngadoo lo ncuaane nosacsi zho, zeena guien zho zha grie_e zho lo grë ncuaan co.

Laa me pxeel naa gziini naa lo grë zha ne no lo guie_lcow,

grë zha ne rzac guie_ndraa zha grie_e zho lo zhizhgab zho, laa me pxeel naa, naa cuee zho lo zhgab co.

¹⁹ Laa naa zialnie diidz lo miech, gacnan zho pa lotaa noxco Dios gunlay me grëse zha ne gbig lo me.

²⁰ Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no len yadoo ga, dze rwi zho lo me, ²¹ dzigo bnee me lo zho, rëb me:

—Grë diidz ne blozh blab naa lo to nu, len dze rii gon laaw noyac cumplir.

²² Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—;Bay zha squitaa pseed men qui? ;Led lëë xingan José i!

²³ Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grë milagr ne ziyon to ben naa guiedz Capernaum.

²⁴ Gneli naa lo to ganle: Zha ne riaad rteed xtiidz Dios, ible znu randzed menladz zho zho; gane rriyelod pe gun zho. ²⁵⁻²⁶ Golsoladz ganle zeene biaad Lí, bio tib tiemp ne biabd guie tson iz gro_l, tib gbindox ne gon miech Israel nu. Ndal wnaa viud ne nac menladz me mban bded zho, guie_nd pe nquiiin zho, per brieelod niun me xyudar zho; le_l xyudar tib wnaa Sarept pxeel Dios me güeygun me, guiedz ne ndxie gax Sidón. ²⁷ Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; le_l tib zha Siria lë Naamán, men co beenguiac me.

²⁸ Zeene gon zho sca rnee me, blëe zho. ²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, ³⁰ zeene znuse bded me lad zho, ziega me.

Biac tib mgui ne nosacsi mendox

(Mr. 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho. ³² Rzee zdoo zho ron zho grë zhiwseed me, grëse minë rnee me, rlu zha rnabey nac me.

³³ Tib vuelt, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —¡Psaan no! ¿Pe gun luu no Jesús Nazaren? ¿Ziaad luu lëe par gnitlo luu no? ¡Runbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me:

—¡Psoog ro luu! ¡Na zeena psaan men qui!

Horco, squi ndxie grë miech co bron ma mgui co liu, mincose been ma, laa ma brie laa ma zie. ³⁶ Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta mendox rdzieb ma me, rzhoon ma zeene laa me ractox lo ma?

³⁷ Grëse guiedz ne ndxie gax ga, zigse zie dze rzhoon diidz scataa milagr ne run me.

Biac xniadzoop Pedr

(Mt. 8:14-17; Mr. 1:29-39)

³⁸ Brie Jesús len yadoo, zie me nëz lidz Simón. Bdziñ me lëetaque laa xniadzoop Simón nix rlan xlëe, nzho rac me; dzigo wbig zha ne been vis laa zhuz co rzacnë, bnab zho lo me gunguiac me me. ³⁹ Nacne bded me zaatne nix zhuz co, goctox me lo xlëe co. Horcogazha laaw blëz, guche zhuz co ga, beenlo me ncuane dow zho.

⁴⁰ Laa ngbidz rzëblew, zeene bdziñ grë miech co lo Jesús, bdziñnie zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac. ⁴¹ Nzian zho beñcxoon me mendox ne nosacsi zho, zeene laa ma rree, nguiedz roptsie ma rnee ma lo me:

—¡Rdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

⁴² Biini liu co, silgaw brie Jesús lad guiedz co güey me tib zaatne choot miech guiend. Zeene bnit me lo grë miech co, brie zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me. ⁴³ Dzigo rëbchaa me lo zho:

—Grieeloda, ib none ga naa grëraa guiedz, gaseed naa miech gacnan zho zha racladz Dios gban zho; sac ible min co pxeel me naa zial naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bgaa

(Mt. 4:18-22; Mr. 1:16-20)

¹ Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios. ² Gax ga zo chop barcw, blalaa ngooz mel biet lena, laa zho no lo nis ga noguieb zho guiex ne rnaaz zho mel. ³ Nacne güey me biep me tib len barcw co, bnabey me Simón psëe Simóna bzëeba lo nis palal; sac lëe xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne quietlaa nis, zeena gron to guiex ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

⁶ Bron zho guiee co lo nis, zeene laa zho cueew, ya zig zrieza, biodzëse lena no mel.

⁷ Horco blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdzin zha co gocgza zho, gropse len barcw co pcodzëë zho grë mel co; ya zig zdedquiew lo nis.

⁸ Zeene gon Simón scataa mel taf ne bgaa, pquiitsgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga. ¹⁰ Scasaque rac Jacob ni Juan (xingan tib men lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon rioxco luu rиаad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëëb xnëz Dios.

¹¹ Zigne bdziinne zho barcw co ro nis, bzo zhow ga, laa zho ziena zhits me.

Biac tib zha ne rlan guiedz lepr

(Mt. 8:1-4; Mr. 1:40-45)

¹² Laa Jesús no tib guiedz co, tib dzew, bdzin tib mgui ne rlan guiedzdox ne lë lepr lo me, pquiitsgzhib mgui haxta bdzin lo mgui liu, rëb mgui lo me:

—Tebaa siguieel luu gunguiac luu naa.

¹³ Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbel!

Horcogazha laa mgui biaanmbe lo guiedz co. ¹⁴ Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güey san gon ne rnabey xley Moisés gdeed luu; zeena gan zho ganle laa luu biacle.

¹⁵ Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdzin lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho. ¹⁶ Zhiga, zhiga rbiche me lo miech, rie me zaatne choot guieñd riezodiidznie me Pxoz me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieë dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

¹⁸ Laa grë miech co ndxie ga, zeene bdzin bla zha bgui, ney zho stib men bgui, zhoobse me lo yag, ib gacd së me sac dipse me gutoo. Gocladz zho nzëëbnie zho me len yu ne no Jesús ga, ndziinne zho me lo me. ¹⁹ Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacné co dib yag ne zhoob me ga, bdzin me lo Jesús.

²⁰ Zeene gon Jesús ne nli dib zdoo zho rnalo zho me, me gunguiac men rzacné co, rëbchaa me lo men co:

—Peet tsienied guic luu, niinagazh laa naa gun perdon grëse xtol luu.

²¹ Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëë men co nac Dios!”

²² Bienga Jesús sca quianee zho, dzigo rëbchaa me:

—¿Pe nacne rzac to laa naa quiyun falt? ²³⁻²⁴ Nli cholze zac guiab laa zho gun perdon xtol miech, per grieelod gunguiac zho zho. Golwi ganle laa naa gunguiac mgui rii, zeena

gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacne co, reb me:

—jNiinagazh guche i, bi yag ne bzhoob luu i, zeen bzë!

²⁵ Zigne sca bnee me, laa mgui co bzoli, squi ndxie gre miech co laa me blis yag co, ine roolnie me Dios laa me zey. ²⁶ Psilo zho grese zho, roolnie zho Dios; lala rzee zdoo zho, lala rdzieb zho, rnee zho:

—jNadzesi, laa ne bdzian ncuane gard dzian ne!

Bredz Jesús Levi

(Mt. 9:9-13; Mr. 2:13-17)

²⁷ Blozh ga, laa Jesús brie ga. Ro nöz zieded me gon me tib men le Levi, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. ²⁸ Bianaque xmez h me ga, guso me ga, laa me zienal.

²⁹ Bded ga, güeynie me Jesús tib wagw lidz me. Gre zha ne run dziin co, ni grëragaa zha ne bdzin ga, tipse brenie Jesús zho gre xpëedscuel me.

³⁰ Blalaa zha farisé, ni zla maistr ley, rlëe zho gon zho sca zobnie Jesús gre zha co, bded ga rebchaa zho lo xpëedscuel me:

—jLëda i gon run to! jPe nacne sca tipse rownie to gre zha ngoopdol co, gre zha beed ne nac recaudador ga?

³¹ Dzigo rebchaa Jesús lo zho:

—Nanle to ganle, zha ne run rmed, zaatne no zha rzacne ga rquiin zho, jniacxe squiin zho zaatne no zha ne ndip ndaan? ³² Scaque naa nagon, zialguibd naa zha wen, sinque laa naa zialguib gre zha ngoopdol, zeena gbig zho lo Dios.

jPe nacne rcuand xpëedscuel Jesús?

(Mt. 9:14-17; Mr. 2:18-22)

³³ Bdzinaque bla zha ne bnabdiidz, reb zho lo Jesús:

—jPe nac waa ib rcuand xpëedscuel luu, tibaque quiayow zho, tibaque quiaye zho? Zha xpëedscuel Juan, zha xpëedscuel farisé, rdzian no tibaque nocuan zho, tibaque nonab zho lo Dios.

³⁴ Pquiab Jesús reb me lo zho:

—Zaatne nadien noyac tib guieltsieel, jniacxe znabey to ycuan gre zha ne ndxie lo lni, ni ran to laa mgui ne notsieelnia zo lo zho? ³⁵ Per zdzin dze zeene laa mgui co gbiche, ni zeene laa dze co gdzin, dzigosi nagon rieguial ycuan zho.

³⁶ Blozhse sca bnee me, rebaque me lo zho:

—Zha ne rquiaabdie lar, tsod zha ne ctsiez xab cub cuee zho tib le lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib le lar cub lad lar gox. ³⁷ Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stiesz vin cuba; lozh ga zigtaa vina, zigtaa guid cow, laaw nitlo ga. ³⁸ Gacxe waa, tel vin cuba none len tib guid cubaque tsotsowa.

³⁹ 'Nac cuent rii zig rzac miech vin, zha ne bienle rie vin ne padzeelale notsow, rdziladz zho guie zho vin cub; sac biane guic zho rnee miech: "Vin ne padzeela notsow, min co nizhrraa rdioow."

6

Dze ne rdziiladz zha Israel lo dziin

(Mt. 12:1-8; Mr. 2:23-38)

¹ Tib vuelt, lëetse dze ne rdziiladz zho lo dziina, bded Jesús zaatne zëeb zhobxtil gre xpëedscuel me; psilo zho pchoo zho mzion zhobxtil co, zigse runmbe zho zhob co, scase row zhow. ² Gon blalaa zha farisé sca no zho, dzigo rebchaa zho:

—jLëda i gon noyun to! Golguien ganle dze nda nac dze rii.

³ Pquiab Jesús reb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho? ⁴ Rneew, bzëëb me len yadoo güeynab me grë quietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row quietxtil co.

⁵ Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mt. 12:9-14; Mr. 3:1-6)

⁶ Go! stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me. ⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; ⁹ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuane yquiiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—jBzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

Bzo Jesús zha ne tsienee xtiidz me

(Mt. 4:23-25; 10:1-4; Mr. 3:13-19)

¹² Tib vuelt, güey Jesús tib guic gui, dipse guieel blëz me ga bzodiidznie me Dios. ¹³ Biini liu co, bredz me grëse zha ne nac xpëëdscuel me, dzigo lad co ble me tsiipchop zho, zha ne tsiepa tsienee xtiidz me lo miech. ¹⁴⁻¹⁶ Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

¹⁷ Cho gui co biet me grë xpëëdscuel me, bdziñ zho tib ro lets. Loxaque bdziñ zho ga, laa stib dzoon xpëëdscuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, nogaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

¹⁸ Nzian grë zha co nosacsi mendox, grëse zho beenguiac me zho. ¹⁹ Rbig be grë miech co racladz zho xen zho lad xab me, sac ran zho, zha ne rzen lad xab me, tel pe guielguiidztaa rzac zho, runguiac me zho por grëtaa poder ne rap me.

Cho nac zha ne wen zie

(Mt. 5:1-12, 38-48; 7:1-5, 12)

²⁰ Dzigo dze bui Jesús lo grëse zha ne nac xpëëdscuel me, rëb me lo zho:

—;Wen zie zha ne rien none gbig zho lo Dios, sac ib zdziñ zho zaatne rnabey me!

²¹ ;Wen zie zho! Sac niicle telne noyan zho gbin, per me gdeed ncuaane yquiiñ zho; niicle tel no hor mban rac zho roon zho; per zdziñ dze ne gdeed me tib guieñbley nroob lo zho.

²² 'Zig nac to, zeene csilo miech glëënie zho to, guñcxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, ;wen zie to ga! ²³ ;Nley golco zdoo to dze co, nguieel golgac, sac gon tib guieñzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

²⁴ 'Sangue grë zha ne rzac grëse ncuaane rquiiñ zho quianie zho, ib rquiiñ zho gbig zho lo Dios, ;probsaxe zho, sac lo guidzliu riise gac ncuaan co guieñbley lo zho!

²⁵ ;'Probsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guieñlë!

²⁶ 'Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, ;probsaxe to telne yguib to sca gleynie miech to!

²⁷ 'Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho. ²⁸ Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho. ²⁹ Tel gneedz zho tib puñet lo to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho. ³⁰ Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. ³¹ None zaacse gac to lo miech, zeena scagaa zha, zaacse gac zho lo to.

³² 'Sac gon, tel loxaque zha ne ndzieeldiidz to, zha cose rleynie to, ;led ncuaan nroobd ga run to! Haxta grë zha ntseeb run min co. ³³⁻³⁴ Tel loxaque zha ne runsegaa favor lo to, lo zha cosegue run to favor; zeene rungaa to tib pextad, lo zha ne rgobeyse to zguizh lo to, lo zha cose runxtad to, ;ni lalnu peet nond ncuaane run to ga! Sac gon haxta grë zha ntseeb run min co.

³⁵ 'Golguien sca, none gleynie to zha ne rlëë lo to, none gacnie to zho lo xliaadz zho. Zha ne guiaad tib pextad lo to, goldeed ncuaane rnab zho, ib guiabde to nend lega scase gun to favor co lo zho. Zha ne gun grë min rii, nroob guieñzaac ne gdeed Dios lo zho, ni ga glu zho ganle nli xpëed me nac zho; sac gon tel me wen me lo grëse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho. ³⁶ Ndzinli sca golgac, zigne sca wen Pxoz to lo grëse miech, scaque none wen gac to lo zho.

³⁷ 'Ib gunde to në gac zdoo to, zeene ran to ncuaane nonguield ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon; ³⁸ sac grëse ncuaane run miech, mincoque rcaania zho. Grëse ncuaane gun to, scaania tow, ni haxta ndziibraa mine ycaania to. Sac ncuaane gun to lo samiech to, mincoque gun Dios to.

³⁹ Blozh sca bnee me, dzigo rëbcha me:

—Golwi ganle, zig nac zha ne rolđ lo, ;niacxe zrieelo glu zho nëz lo stib zha ne rolđ lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

⁴⁰ 'Grë zha ne nac mëedscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdziñ zho medid co.

⁴¹ ;Lëda ga gon tso to lozhd gzee zdoo to dien cho pe run, ni nenda mazdraa mine run to! ⁴² ;Pe ro to glisqui to mine run stib zho, ni tel mazdraa nac mine run to? ;Golguien sca glude to ncuaane nacde to! ;Glo goltsocxo ndzinli gac to, dzigo lozh ga zac tsienee to zha gacndzinli stib zho!

*Nex rlu zha nac tib tib yag
(Mt. 7:17-20, 24-27; 12:34-35)*

⁴³ 'Tib tib yag rdeedsew xnexa. Grieelod yquia nex ncuaan tib lo yag ne rdeed nex wen; grieelodгаа yquia nex wen tib lo yag me rquia nex ncuaan. ⁴⁴ Teḷ zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodгаа lbë zarz ne gdeed uv. ⁴⁵ Scadaa nagon nac miech, zha ne wena, ncuaan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, teḷ zha rzë xtiidz tib miech, gase rlu zha nac zdoo zho.

⁴⁶ 'Grieelod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷ 'Zha ne rquiaadiag mine rne naa, ni rioxco zho rban zhow zigne naca, ⁴⁸ rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda. ⁴⁹ Laa zha ne rquiaadiag xtidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaand.

7

*Biac tib zha ne rquia dziin tib lo menguiib**(Mt. 8:5-13)*

¹ Zeene blozh bnee Jesús lo grë miech co, dzigo laa me wbi ga, bdzin me Capernaum. ² Lëëtaaque len dze co rzacne tib zha ne run dziin lo tib men ne rnabey lo xmenguiib zha Roma, no guiedz co; nzho rac zho zootle laa zho guetle. Rleyniedox men co zho, ³ zigne bin me laa Jesús bdzin, lëëled pxeel me bla zha ne nac zha non lo menguiiedz Israel, güey zho güeynee zho lo Jesús siguiel Jesús tsiegunguiac Jesús zhingundziin me. ⁴ Bdzin zho bnaab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me, ⁵ rleynie me menladz ne, haxta bzaa me tib xyadoo no lad guiedz nu.

⁶ Dzigo zienal Jesús zhits zho. Zhile gdzin zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodzin naa lo luu guiaad luu haxta ro lidz naa. ⁷ Nligaa rien naa tib zha winse nac naa par gbig naa lo luu, gane niicle biald naa nialdziej naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa. ⁸ Sca rnee naa, sac teḷ naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacгаа zhingundziin naaw, mine rnabeytaa naa zho, run zhow.

⁹ Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

¹⁰ Grë zha ne güey mandad ga, zeene bdzin zho gon zho laa ngundziin co biacle.

Rrieaban xpëed tib wnaa viud

¹¹ Bded ga, güey Jesús tib guiedz lë Naïn grë xpëedscuel me, miech guizhiu ne zienal zhits zho.

¹² Zeene bdzin zho gax ro guiedz co, lëëtaaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co. ¹³ Gon Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

¹⁴ Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, jguche i!

¹⁵ Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

¹⁶ Zeene gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—¡Tib men nroob ne gon ziadteed xtiidz Dios i, ziaad lo ne! ¡Laa ne bdzian niina ganle, laa Dios ziaadgan ne, ziadbee me ne lo xquielnë ne!

¹⁷ Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

Zha ne pxeel Juan Bautist

(Mt. 11:2-19)

¹⁸ Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho, ¹⁹ zienabdiidz lo Jesús, dien pe me nac Men ne nole diidz ga cxeel Dios, te dzigora gdzin men co ye.

²⁰ Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëele Men ne nacle diidz ga cxeel Dios i nac luu, te naraa guiaad me ye.

²¹ Lëëtaaque ndal miech ndxie lo me ga, quiayunguiac me grë men rzacnë. Nzian zho, tel pe guielguidztaa rzac zho, no zho nosacsi mendox, no zho rold lo, grëse zho runguiac me zho. ²² Dzigo rëbchaa me lo zha ne pxeel Juan ga:

—Grëse mine bin to rne naa, grëгаа ncuane gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieaban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios; ²³ ni golguiab lo me: dichos zha ne tiblrique riladz cho nac naa.

²⁴ Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, ²⁵ te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho. ²⁶ Nligaa cho güeynie guic to nac me, ¿te rëb to ye tib men ne noteed xtiidz Diosa?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co. ²⁷ Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nëz ne ted luu.” ²⁸ Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

²⁹ Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. ³⁰ Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

³¹ Blozhse sca bnee me, rëbchaa me:

—Nac grë miech rii, ib riend zho pepaa racladz zho. ¿Cho ganle run zigne run zho? ³² Lëë zho run mine run grë mëedlas ne rio wguic dib ro nëz. Niicle rool xcompañer win di nguieel, rieed win; niicle roolгаа zho di ngan, roond win. ³³ Sac gon, ziaad Juan, ran zho rowd me grë ncuane nac xquielwagw zho, niicle vina ried mew; dzigo rnee zho mendox nacie me. ³⁴ Blozh ga, ziaad Mgui ne pxeel Dios, ran zho row me, rie me, laa zho rneequa lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. ³⁵ Sca rnee zho, sangue zha ne rgaa guielbiini ne rdeed Dios, riend zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

³⁷ Lad guiedz co no tib wnaa ro nēz, bin me laa Jesús bđzin lidz zha farisé co, dzigo bi me tib bot nceit nex, tiblo nceit niazha, brie me zie me nēz lidz zha co. ³⁸ Bđzin me ga, wbig me zaatne zob Jesús, psilo me roon me. Zigse roon me, lēēque nis ne riet lo me ga, bđiib me ni Jesús, ni pcuidz mew con guits guic me. Dzigo ptsieelro mew, blozhse ga blee me nceit co bđēēb mew.

³⁹ Zeēne gon zha farisé co sca been wnaa co, bza zdoo zho rēb zho: “Telne niaca minē nli meṅ ne ziadteed xtiidz Dios nac meṅ qui, niēṅ me ganle tib wnaa ngoopdol i, ndeete me diidz squitaa nguēēbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rēb me:

—Pquiaadiaga ganle Simón: Chop mgui name, quia zho guielqui lo meṅ ne blediin dimi lo zho. Tib zho zēēb gaay mil pes plat, stib zho zēēb gaay gayoow. ⁴² Gonse meṅ co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnē nasca dien, lo grop zha co, ¿cho mazdraa sac zdoo minē been meṅ co?

⁴³ Dzigo pquiab Simón, rēb Simón:

—Par naa, zha ne nroobraa xquielqui ga, zha co sacraa zdoo minē been me.

—Scaw gon —rēb Jesús—. ⁴⁴ ¡Mincopaa nagon squi rac wnaa prob qui! Gon ganle zeēne bzēēb naa lidz luu, bneedzd luu nis niar ni naa; mazd me gon bđiib me ni naa, maase niicle con nis ne biin me bđiib mew, ni haxta pcuidz mew con guits guic me.

⁴⁵ Zeēne blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa. ⁴⁶ Nac costumbr none nchoob luu nceit guic naa, per beend luuw; mazd mele gon biaad biadtēēb me nceit nex rii zhits ni naa.

⁴⁷ Laa me noyū min rii, sacne nlipaa rzac zdoo me beṅ naa me perdon grētaa doldox ne nzēēb me. Zigne rneeque ne ga, tel zha ne zhis xtoḷa, zhi rzac zdoo zho zeēne laa zho rac perdon.

⁴⁸ Dzigo bnee Jesús lo wnaa co, rēb Jesús peet tsienied guic me, laa Jesús beenle perdon grēse xtoḷ me. ⁴⁹ Zha ne zobgza Jesús lo mezh ga, zeēne gon zho sca rēb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtoḷ wnaa qui?

⁵⁰ Horco biire Jesús bnee me lo wnaa co, rēb me:

—Laa naa psilaa luu lo xtoḷ luu, sac dib zdoo luu bnalo luu naa. Bzē naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brie Jesús grē xpēēdscuel me güey me grēraa guiedz ne ndxie nēz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa meṅ wnaa güeynal zhits zho, tel pe ncuaane quianie grē meṅ wnaa co, rdeed zhow run zho xyudar me; sac rzac zdoo zho beṅguiac me zho. No zho beṅguiac me lo guielguidz, nogaa zho beṅcxoon me meṅdox ne nosacsi zho. Ga güeynal tib wnaa lē Marí Magdal (lēē wnaa co beṅcxoon Jesús gadz meṅdox ne nosacsi me), ga güeynal stib meṅ lē Zhuan (lēē tsieel Chuz ga, meṅ ne quianap grē lo xtsiin rey Herod) ni stib meṅ lē Susan.

Nac Xtiidz Dios zig zhobxtil

(Mt. 13:1-23; Mr. 4:1-20)

⁴ Tib dzew, miech guizhiu ne pcaalsa lo Jesús; nzian guiedz ne brie zho bđzin zho lo me. Laa me noseed zho, zeēne bzodiidz me tib cuent rii lo zho, rēb me:

⁵ —Tib mgui name, brie zho güey zho gon zhobxtil. Zeēne laa zho quialaal zhob co liu, now bliaal gax ro nēz, now bliaal lad quie, nogaaw bliaal len yag guiets. Mine bliaal ro nēz ga, zha ne bded bzēni zhow, blozh ga güeyaque grē mguin dow maw. ⁶ Mine bliaal

zaatne nac lad quie, blana per znuse bidza sac guiend gop ga. ⁷ Mine bliaa_l len_l yag guiets co, zigne blana blanaque stib dzoon yag guiets, znuse bnitlo yag guietsa. ⁸ Sangue mine bliaa_l zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rëb me:

—;Zha ne racladz guien_l mine rne naa, yquiaadiag zhow!

⁹ Dzigo wbig grë zha ne nac xpëëdsuel me, bnabdiidz zho lo me dien_l zha nac cuent co. ¹⁰ Rëbchaa me lo zho:

—Tel_l to, Dioszhal rlu lo to gan_lle zha rnabey me, niicle ncuaane mazdraa ngueetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien_l zhow; per niicle scaw, ib rzoobdiagd zhow, ib rioguicd zho zha naca.

¹¹ 'Znu gon_l nac cuent co: Zhobxtil co nac Xtiidz Dios. ¹² Ro nëz ne sca bliaa_l zhob co, ga rlu gan_lle zha rzac zha ne rquiaadiag Xtiidz Dios, per znusaque rdzi_ln men_ldox rquii_ll ma zho gliladz zhow, zeena laad zho lo do_l. ¹³ Lad quie ne bliaa_l spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli riladz zhow palal dze, per zeene ran_l zho zha run_l miech zho, zha rnee miech lo zho, rsaanga zhow. ¹⁴ Nogaa zho nac zig len_l yag guiets co. Rquiaadiag zho Xtiidz Dios, per laa ne tsoniew guic zho, lel_l rsilo zho grë zhgab ne dien_l zha gapchen_l cho, dien_l zha gdeedguxt xcuerp zho lo guidzliu rii, min_l co rionie guic zho; pa së zho gban zigne rnabey Dios. ¹⁵ Laa lo liu naa_l co, ga rlu gan_lle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho riladz zhow. Grëse ncuaane run_l zho, ndzinli rrieequiaw; sac tiblique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len_l yu, zeena guiab biini lo grëse zha ne sëëb len_l yu. ¹⁷ Scaque nagon_l, grë ncuaane rac ngueets, grë ncuaane rnee miech zhlian, none xoobne_l.

¹⁸ 'Wen wen golquiaadiag mine rne naa, ni gol_lsoxcow. Sac zha ne tsoxcow, zdeddraa Dios guiel_lbiini lo zho; sangue zha ne tsoxcoda, haxta tel_l palalse guiel_lbiini ne rzac zho quianie zho, stiche mew.

¹⁹ Dze co, scaque noseed me miech, zeene bdzi_ln xniaa me ni zha bets me zieg_lan zho me. Per brieelod ndzi_ln zho haxta lo me, sac miech guizhiu ne ndxie lo me ga. ²⁰ Dzigo rëb tib zho lo me:

—Laa xniaa luu gon_l, ni zha bets luu bdzi_ln ley ziaadguib zho luu.

²¹ Pquiab me rëb me:

—;Xnia naa ye, bets naa ye? Grëse zha ne gon_l rquiaadiag Xtiidz Dios ni rioxco zho mban zhow, lëë zha co nac xniaa naa, zha co nac bets naa, zha co nac bzian naa.

Pcuëz Jesús tib medox

(Mt. 8:23-27; Mr. 4:35-41)

²² Tib bdze dze, bzëëbnie Jesús xpëëdsuel me tib len_l barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo brie_le tib medox, masaque riasoli lo nis co, zootle laa barcw ne no zho ga yguiitsle len_l nis. ²⁴ Zeene gon_l zho scataa ntseeb rac lo nis co, lëë_lëd güey zho güeycuaan zho me.

—;Maestro! —rëb zho—. ;Blee mcaallo luu gan_lle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. ²⁵ Dzigo rëbchaa me lo zho:

—;Pe nacne rdzieb to? ;Niacxe riladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—;Bay cho nac me? ;Zha nacne haxta me, haxta nis ron xtiidz me?

Men Gadar ne nosacsi mendox
(Mt. 8:28-34; Mr. 5:1-20)

²⁶ Bdzin zho stib nēz ro nis co, ga nac xtan zha Gadar. Zo zho ga, nēz dan squi riaan xtan zha Galilé. ²⁷ Laa Jesús bieldze len barcw, zeene laa tib mgui ne no nēz co bdzin lo me. Mban rlu mgui co nosacsi mendox me, niicle xab me nacwdraa me; ib rbēzd me lidz me, niapse grē len xpaā ngutoo rio me. ²⁸ Zeene gon me Jesús, masaque roptsie me bdzin me pquitsgzhīb me lo Jesús, zēēb tsi me rnee me:

—¡Psaan naa Jesús! Nanpaa naa gon Xpēēd Dios nroob ne zob gbaa nac luu. ¡Bzhiguiel csacsid luu naa!

²⁹ Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzē me grē dan ngan, zaatne choot miech guiend.

³⁰ Dzigo bnabdiidz Jesús lo ma dien cho lē ma. Pquiab ma rēb ma:

—Legion lē no.

Sca rēb ma sac nzian nac ma no ma zdoo mgui co. ³¹ Ni bnab ma lo Jesús gzonēzd me ma lo ncowdoo ne noraa ma ne nacgrē ma. ³² Gaxaque ga ndxie tib dzoon nguts notop lag, bnab ma gdeed me diidzbey lose grē nguts co gdzin ma. Dzigo bdeed me diidz.

³³ Horco laa grē mendox co psaan mgui co, güeysēēb ma zdoo grē nguts co. Psilo grē nguts co rquiaa ma corr, güeypix ma tib ro yeedox ne quia ro nis co, bliaa ma haxta lo nis; grēse ma gut.

³⁴ Grē zha ne quianap nguts co, bzhoon zho, rias zho güeyzodiidz zhow lad guiedz, ni grēraa yu ne zob gax ga. ³⁵ Nacne brieē grē miech co ziewi zho. Zeene bdzin zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me. ³⁶ Psilo grē zha ne gon zha biac me rzodiidz zhow lo grē zha ne bdzin ga. ³⁷ Mazdraa bdzieb grē miech co bin zhow, dzigo mazd bnab zho lo Jesús siguiel me gbi me xtan zho.

³⁸ Zeene laa Jesús zie sēēb me len barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguiel Jesús nienal me, rēb Jesús lo me:

³⁹ —¡Biaa! Güey, güeyzodiidz lo grē menlidz luu ganle zha nactaa milagr ne been Dios beenguiac me luu.

Dzigo wbire men co. Güey me lad guiedz, grēse lo miech güeyzodiidz me zha nactaa guielnzaac ne been Jesús ga, beenguiac Jesús me.

Brieēban tib xpēdwnaa tib men lē Jair
(Mt. 9:18-26; Mr. 5:21-43)

⁴⁰ Zeene laa Jesús biire bdzin stib nēz ro nis co, miech guizhiu ne quiambēz me ga, rley zho gon zho laa me bdzin. ⁴¹ Loxaque bdzin me, laa tib men ne rnabey yadoo lē Jair wbigle pquitsgzhīb lo me. Rnab Jair siguiel me tsienal me lidz Jair tsiegunguiac me tib xpēdwnaa win Jair.

⁴² Nzhoo rac mēēd co, tib mēēd tsiipchop iza, ni lēēse mēēd ga lo me.

Dzigo laa Jesús zie nēz lidz men co. Miech guizhiu ne zienal zhits me, haxta rtaagw zho me. ⁴³ Lad grē miech co zienal tib wnaa rzacnē, gocle tsiipchop iz rlan me tib guielguidz, rzac me zigne rzac grē men wnaa gzob mēē; tibaque rlan mew ib rbēzda. Grēle ncuaane rap me bloozh me lo grē men ne run rmed, per ni tib zho runguiacd me. ⁴⁴ Laa me no lad co, tibaque wbig gax me nēz zhits Jesús, bzhen me ni lar ne mbix Jesús; hor cogazha laa me biac. ⁴⁵ Bien Jesús sca bzhen wnaa co lad xab me, dzigo rēbchaa me:

—¿Cho ga bzhen lad xab naa?

Grēse zho rnee led zhada. Dzigo rēbchaa Pedr lo me:

—Maestro, wi ganle zha ndaagwtaa ziaad luu lad grē miech rii, haxta rcheep zho luu, ¿zha nan luu choot xend lad xab luu?

⁴⁶ —Per no cho bzhen lad xab naa —rnee me—, sac bienpaa naa beenguiac naa zho.

⁴⁷ Zeene gon wnaa co bien Jesús sca bzhen me lad xab me, rdzieb me laa me wbig pquitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac. ⁴⁸ Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdzin, rëb zho lo Jair:

—Csodziindraa luu lo men qui, laa xpëed luu gutle.

⁵⁰ Zeene gon Jesús sca rëb zha co, rëbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpëed luu.

⁵¹ Bdzin zho lidz Jair, psaandraa Jesús nal grë miech co zhits me ndzin zho zaatne nix mëed co. Loxaque Pedr, Jacob, ni Juan, pxoz win ni xniaa win bzëebnie me len yu ne nix win. ⁵² Grë miech ne ndxie ga, roon zho no zho xquieinë win; dzigo rëbchaa Jesús lo zho:

—Goonde to; sac gon nixguiesse mëedwin rii, gute win.

⁵³ Psilo zho lel rzhidznie zho me, sac nanpaa zho gutle win. ⁵⁴ Dzigo wbig me, bzhen me nia win, nguiedz bnee me lo win, rëb me:

—¡Guche i na, ndzooop yeen!

⁵⁵ Zigne sca bnee me, laa mëed co brieaban, laa win guche ga; dzigo bnabey me bguiaan zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidz me zha brieaban win.

9

Pxeel Jesús xpëedscuel me güeyseed zho miech

(Mt. 10:5-15; 14:1-12; Mr. 6:7-29)

¹⁻² Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan zho zha racladz Dios gban zho; bdeed me poder lo zho guncxoön zho grë men dõx ne nosacsi miech, ni gunguiac zho grë men rzacnë.

³ —Goltsie —rëb me lo zho—. Per ib güeyde to ncuane yquiuin to nëz. Zig nac dimi, zig nac ncuane gow to, pe bziuud, pe baxtongaa, güeyde tow; xab tow, mine nacwse to mincose goltsienie. ⁴ Guiedz ne gdzin to, zha ne gneedz zaatne cuëz to, lidz zha co golcuëz, haxta gdzin dze ne gbi to guiedz co. ⁵ Per telne gdzin to tib guiedz, nëd miech yquiaadiag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nëd zho ycaania zho xtiidz me.

⁶ Dzigo laa zho brieë, laa zho zie. Grëse guiedz ne ndxie dib gax ga, güey zho güeynee zho xtiidz Dios lo miech, ni beenguiac zho grë men rzacnë.

⁷ Bin rey Herod rzeet zho Jesús, sac tel pa lotaaw zëeb diidz grëtaa milagr ne run me. Grë miech co, no zho rzac Juan Bautist ga brieaban, lëë me ga nac Jesús; ⁸ nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieaban me gane ziaad me stib.

⁹ Zeene ron Herod rnee grë miech co lëë Juan ga, rio me zhgab, rnee me:

—¡Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grë zha ne pxeel Jesús ga wbire bdzin lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeene bin grë miech co laa me brieë, dzigo brieenal zho me, bdzin zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grë zha ne rzacnë. ¹² Laa dze rdzelew, wbig gza tsiipchop xpëedscuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuaañe gow zho.

Pquiab zho rëb zho:

—Gaayaque guietxtil ni chop meļ ziaadnie no nu, ꝑpe rnase ncuaañ co lo grëtaa miech qui! Niicle niaca minē gziuu ncuaañe gow zho, pe zhidaa dimi yquiin, ꝑpa guioxi now?

¹⁴⁻¹⁵ Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho groļ gayooga, groļ gayooga zho tib lugar. ¹⁶ Laa grë miech co bzob, dzigo bzhen Jesús gza gaay guietxtil co ni grop meļ co, blis lo me nēz gbaa, bdeed me xquizh lo Dios. Blozhse ga, beengroļ me gza guietxtil co, meļ co ne, dzigo zigse rdeed mew lo xpëēdscuel me, scase scase rguiz zhow lo grë miech co. ¹⁷ Grëse zho dow haxta zaatne bieltaa zdoo zho; ni zeene blozh dow zho, biodzë tsiipchop chicuid bio grë minē biaan.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey me tib zaatne güeyzodiidznie me Dios; loxaque xpëēdscuelse me güeynaļ zhits me. Ga bnabdiidz me lo zho rëb me:

—ꝑCho dien ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee Líw (meñ ne biadteed Xtiidz Dios padzeela); nogaa groļ zho rnee no cho stib meñ ne biadteed Xtiidz Dios padzeelaw, sinque brieaban me gane ziaad me stib.

²⁰ —ꝑTo waa? —rëb me lo zho—. ꝑCho rzac to nac naa?

Horco pquiab Pedr, rëb Pedr lo me:

—ꝑLuu nac Meñ ne zëēble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Mr. 8:31-9:1)

²² Tib vuilt bzeet Jesús lo grë xpëēdscuel me zha csacsi miech me. Rëb me, nroob grë ncuaañe cteed zho me; grë zha non lo menguiedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieaban.

²³ Ni rëb me lo grë miech ne ndxie lo me ga:

—Zha ne racladz sëēb xnēz naa, none cueeladz zho zho, none lëb zho gzataa dze guiaadnaļ zho minē rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, ²⁴ sac zha ne yquia zdoo xquielmban, leļ znu nitlo zho; sangue zha ne sca cueeladz xquielmban porne no zho xnēz naa, ib zgaa zho tib guielmban ne gdziñd dze lozh. ²⁵ Zha ne zienie guic loxaque gapchen, ꝑpa dien yquiina lo zho, tel por lëw rsacsi zho zho, tel lëw yquiaaqui guey zho gabil? ²⁶ Naa ne nac naa Mgui ne pxeel Dios, zha ne ctoladz guiab zho laa zho no xnēz naa, ctoladzniegaa zho xtidz naa; scaque naa stoladznie naa zho gaļ dze ne laa naa guial stib. Dze ne guialnie naa grë xanjļ Pxoaz naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

Bdzëēlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëēlo. Masaque biinidoo ne rree lo me, xab mew, nquitsbie rnaw, haxta rquiabniw. ³⁰⁻³¹ Tibaque briequia Lí grop Moisés bdziñ

lo me ga, psilo zho nozodiidznie zho me grë guielnë ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoo new.

³² Laa zha ne zienal zhits me, rcow zho mcaal zob zho ga; per zeene biab biini nroob co, hor co bzhal lo zho gon zho zha rlu me gza me Lí ni Moisés. ³³ Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr riendaque dien pe nacne sca rnee Pedr.

³⁴ Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan len xcow co. ³⁵ Dzigo bin zho zëëb tib tsi men co lo xcow co, rnee me:

—Lëë Xpëed naa i gon, rlynie naa me. Golgon mine rnee me.

³⁶ Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

Biac tib mëed ne nosacsi mendox

(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me. ³⁸ Lad grë miech co brieë tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëëdbgui rii nac mëed lo naa, ³⁹ ni na laa mendox nosacsi win. Zeene rdziñ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. ⁴⁰ Blansonie naa win nu, bnab naa lo xpëedscuel luu guncxoon zho mendox co, per brieelod zho.

⁴¹ Dzigo rëbchaa Jesús:

—iPe nac squitaa miech ntseeb nac to, ib nëde to gnalo to Dios! iPa lal dze ne so naa gne naa lo to? iNcuaane cxecwdraa naa lo to squitaa nac to! Dënie xpëed luu nu —rëb me lo men co.

⁴² Zeene laa mëed co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, beñcxoon me ma. Horcogazh biac mëed co, laa me bdeed win lo pxoz win. ⁴³ Grë miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

Bzeet Jesús stib laa miech csacsi me

(Mt. 17:22-23; Mr. 9:30-32)

⁴⁴ Biire Jesús bzeet me lo xpëedscuel me zha gun miech me, rëb me:

—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible zielo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzga zho, rdzieb zho gnabdiidz zhow lo me.

iCho nonraa?

(Mt. 18:1-5; Mr. 9:33-40)

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëdbgui win, ⁴⁸ rëb me:

—Grë zha ne no xnëz naa, zha ne gunças tib mëëdwin zig mëed rii, gleynie zho win, rrieequia naa ga rlynie zho. Ni zha ne gleynie naa, rrieequia men ne pxeelle naa ga rlynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

⁴⁹ Blozh ga, rëbchaa Juan lo me:

—Maestro, bdzion no tib zha co gon bzeet zho lë luu zeene beñcxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—iGunscade to! Sac gon zha ne racnie ne, grieelod lëëque zha glëenie ne.

*Ndox Jesús lo Juan grop Jacob
(Mt. 8:19-22)*

⁵¹ Len dze ne ziaadyob gbi Jesús lo guidzliu rii, len dze co bio me nêz laa me zie nêz Jerusalén. Tiblique bio guic me, ib pquiad zdoo me, laa me zie. ⁵² Zeene bdziñ me xtan Samar, pxeel me bla zho bdedner zie zho tib guiedz win ne ndxie nêz co, par dieñ pa lo gdeed miech co cuêz me. ⁵³ Bdziñ zho guiedz co, choot bzhiguielđ ndeed zaatne mbêz me; sac bien zho nêz Jerusalén tsie me. Nac zha Samar, rlëenie zho zha Israel.

⁵⁴ Zeene bin Jacoba grop Jacob Juan, blëe guic zho, rëbcha zho lo me:

—Maestro, ðmazd tibaque gotsaa gnab ne gliaal gui lad grë miech rii, zeena nitlogazh zho!

⁵⁵ Biecwaque me, goctox me lo zho rëb me:

—Riende to lëe zhapaa nac men ne nacie to. ⁵⁶ Golguien ganle, naa ne nac naa Mgui ne pxeel Dios, zialđ naa par gnitlo naa miech, sinque laa naa zial csilaa naa zho lo dol.

Ga brie zho güey zho stib guiedz.

⁵⁷ Nêz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. ⁵⁸ Dzigo pquiab Jesús rëb Jesús lo me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grë mêz, grë mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuêz naa, gangazh naa tsoliu pxoz naa.

⁶⁰ Rëbcha me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnan zho zha racladz Dios gban zho.

⁶¹ Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

⁶² Dzigo rëbcha me:

—Zha ne xen nia rad ni csilo zho gwi zho nêz zhits zho, niacxe zrieelo ygan zho ngon. Scaque zha ne sëeb xnêz Dios, grieelod sëeb zho telne mazdraa rleynie zho grë ncuuan lo guidzliu rii.

10

*Güey tsongaltsii zha ne güeynee Xtiidz Dios
(Mt. 11:20-24)*

¹ Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

² —Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambêz yquiaadiag Xtiidz me, zha ne gneelew lo zho rgaad. ³ Goltsie sca, per nsin nsin golso. Golguien ganle rriequia nac to zig cho mëcwxiił yeen, ni laa naa rxel to zaatne no grë coyot dox. ⁴ Peet güeyde to, güeyde to dimi, güeyde to ncuaañe gow to, lab tow, miñe quia se ni to miñcose goltsienie.

'Miech ne yquiaabdiuzh to nêz, sode to dieen zharaa yquiaabdiuzh to zho. ⁵ Zeene yguib to zaatne cuêz to, yu ne gdziñtaa to, golnab gunlay Dios grë zha ne no yu co. ⁶ Telne squiaadiag zho miñe rnee to, zunlay me zho; telne nëdgaa zho yquiaadiag zhow, dzigo toque gunlay me. ⁷ Zha ne gneedz zaatne cuêz to, lidzse zha co golcuêz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho miñe non xtsiin zho.

⁸ 'Guiedz ne yquiaadiag miech miñe zienee to, zaacse golgac lo zho, tel pe guielwagw ne gneedz zho, golquiina; ⁹ golgunguiac grë men rzacne ne no ga. Golguiab lo zho, laa dze ne nolu Dios zha sëeb miech xnêz me, laa dze co bdziñle. ¹⁰ Sangue guiedz ne siguielđ miech yquiaadiag zho miñe zienee to, golriee grë ro xnêz zho, ¹¹ ganlo zho glit to grë yudie co ni to, zeena guien zho ganle nêz ne nitlo zho ga zie zho. Golguiab lo zho, zha

bguiba, sac binpaa zho zha grieelo sēēb zho xnēz Dios ni nēd zho gon zho diidz. ¹² Gacnañ zho ganle, gal dze ne guñ Dios xquielwxtis me, lēētaa gac guielnē ne tsieguial zha Sodom, mazdraa nac guielnē ne tsieguial zho.

¹³ Scadaa nac zha Corazín ni zha Betsaid. ¡Probsaxe zho, sac gon gonpaa zho grē milagr ne ruñ Dios, per ib psaand zho xquielntseeb zho! Teñ niaca miñe ngaa grē men Tiro, grē men Sidón, nian grē milagr ne gon zho, ib ndedsod mban niac grē zha co nio zho guielnē, zēēb nsaan zho xquielntseeb zho mbig zho lo Dios. ¹⁴ Gacnañ zho ganle, gal dze ne guñ Dios guielwxtis, lēētaa caxtigw ne yгаа zha Tiro ni zha Sidón, mazdraa miñe yгаа zho. ¹⁵ Scaque zha Capernaum, masaque rzac zho niina zha nziuuraa lo Dios, per gacnañ zho ganle haxta guiet len gabil ga guey zho.

¹⁶ Blohse sca bnee me, rēbchaa me lo zho:

—Grēse zha ne yquiaadiag miñe gnee to, rriequia naa ga rcaania zho. Zha ne nēdгаа ycaania to, rriequia naa ga nēd zho ycaania zho; ni zha ne nēd ycaania naa, rriequia men ne pxeel naa ga nēd zho ycaania zho.

Wbire tsongaltsii zha ne pxeel Jesús ga

(Mt. 11:25-27; 13:16-17)

¹⁷ Zeene laa gza tsongaltsii zha co wbire, rley zho bdziñ zho lo Jesús. Rēb zho haxta grē mendox bdzieb ma zho, zeene bzeet zho lē me.

¹⁸ Dzigo pquiab me rēb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye.

¹⁹ Laa naa bneedz poder qui lo to, parne gdeete to diidz guñ ma miñe racladz ma; grē meeldox, grē meegu ntseeb, niicle gzoobni to ma, peet gacde to. ²⁰ Nli laa to runcxoon mendox niina, per gleyde to por miñ co, sinque mazd golley porne laa lē to zhooble lo Dios, laa to ngable lo me.

²¹ Horco biaad tib guielbley nroob zdoo Jesús, bnee me lo Dios, rēb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grē miñe noyun luu nu niina, bdeete luu diidz niacnañ grē zha raca, sinque laaw blu luu lo grē zha ne nac zig grē mēēdlaa. Sca quiayun luu, sac ib scale racladz luu gaca.

²² Blozh ga rēb me lo grē miech ne ndxie lo me ga:

—Grēse ncuaane ran to quiayun naa, Dios men ne nac Pxoza naa, me bneedz poder rii lo naa; sac ib laa me bzo naa, naa gūna. Xpēēd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rēbchaa me lo xpēēdscuel me:

—Dichos to bgaa to noyan to grē miñ rii. ²⁴ Sac gon blactaa zha ne biadteed xtiidz Dios padzeela, haxta grē zha ne bnabey len dze co, bzoobladz zho nian zho grē ncuaane noyan to, bzoobladz zho nquiaadiag zho grē ncuaane noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rēb zho:

—Maestro, bnē lo naa dien, ¿pe nac miñe guñ naa parne grieelo yгаа naa guielmban ndzon ne gdziñd dze lozh?

²⁶ Pquiab Jesús rēb me:

—¿Zha dien zhobnee lo ley? ¿Pe rnabeya?

²⁷ Rēbchaa maistr ley co:

—Znu rneew: “Dib zdoo luu, dib nase luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

²⁸ —¡Miñ qui nagon bioxco guñ luu —rēb Jesús—, zeena yгаа luu guielmban ndzon ne gdziñd dze lozh ga!

²⁹ Per par glud ne noxcd me guñ me miñe rnabey ley, dzigo pquiaalo me rēb me lo Jesús:

—¿Chopaa dzigo nac samiech naa, zha ne no gleynie naa?

³⁰ Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuaane ney me, haxta xab me blan ngbaan. ³¹ Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad. ³² Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. ³³ Sca nix me ga, zeene laa tib zha Samar bdiñ. Zeene gon zho me, wbig gax zho lo me; pquia zdoo zho me gon zho zha rna me. ³⁴ Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdiñnie zho me tib yu ne rbëz miech ne zo nëz; ga blëznie zho me, pquianap zho me.

³⁵ 'Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbcha me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbcha Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëedscuel me. Bdiñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdiñ zho lidz Mart, lëälëd bzëeb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu. ⁴² No tib ncuaane mazdraa none tsoxco luu, ni lëe min co nu gon noyun Marí; gane grieelod ycaa naa mine quiayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vuel, loxaque blozh bzodiidznie Jesús Dios, wbig tib xpëedscuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëedscuel me zha gzodiidznie zho Dios.

² Dzigo rëbcha Jesús:

—Zeene gzodiidznie to Dios, golguiab:

Dios, luu nac Pxoz no, zob luu gbaa;

luuse nac men ne mazdraa ndzon.

Luu nac men ne gnabey no,

mine gnabeytaa luu, zigne raca gbaa,

scaque none gaca lo guidzliu nu.

³ Been guielnzaac bneedz ncuaane dioow no nadze.

⁴ Bzhiguiel been no perdon grëse dol ne ziodziun no lo luu, zigne rdziun no samiech no perdon grë falt ne run zho lo no.

Gdeete luu diidz yquuil mendox no,

been guielnzaac bla no lo ma.

⁵ Sca nagon gnee to —rëb Jesús—. Ncuaañe gnab to lo me zneedz mew. Samiechse to name, gzoob ne wxiña, lega nacle glanso tib zha ne ndzieeldiidz to ni guiend pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuun luu lo naa. ⁶ Lega nacle blanso tib zha ne runbey naa, na guiend pe gded naa yquiiin zho.” ⁷ Segur znë zho: “Gunneete luu naa nu, dziitsle nioog ro lidz naa, nataa nixguies grë xpëed naa; grielod gache naa gnedz naa ncuaañe racladz luu.” ⁸ Per telne sonaad to ga, ganse zho tibaque quianee to, gnid naa zho tsieched zho gneedz zho ncuaañe racladz to. Per gneedzd zhow porne ndzieeldiidz to zho, sinque laa zho gneedza porne gon zho tibaque quianab tow. ⁹ Scaque nagon none gun to, zeene pe gnab to lo Dios. Ncuaañe rquiiin to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzlë me, scagaa me scaania me to. ¹⁰ Sac grëse zha ne rbig lo me rnab zho ncuaañe rquiiin zho, rdeed mew. Zha ne rguib ncuaañe racladz zho, racnie me zho rdziel zhow. Zha ne rbedzlë me, rcaania me zho.

¹¹ Golguien ganle, zig nac to, zeene rnab xpëed to tib mel gow win, ¿niacxe ziazh to co to tib meel nia win? ¹² Zeene rnabgaa win tib dzit, ¿niacxe zgo to tib meegu nia win? ¹³ Led rioxco to lëe niapse ncuaañe wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel Pxoaz to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaañe rquiiin zho, zdeed mew; haxta zha ne gnab cxeel me Espiritu Sant gacnie zho, zun me mine gnab zho.

*Rëb zho mendox nacie Jesús
(Mt. 12:22-30, 43-45; Mr. 3:20-27)*

¹⁴ Tib vult beñcxoon Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne beñcxoon Jesús ma, laa mgui psilo bnee. Grë miech ne ndxie ga, bzee zdoo zho gon zhow. ¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo runcxoon me mendox. ¹⁶ Brieequia spalal zho, rnab zho lo me gun me pe stib milagr, parne gliladz zho nli Dios pxeel me.

¹⁷ Bien Jesús zha rza guic zha ne noneenë me ga, dzigo rëbchaa me lo zho:

—¿Ncuaañe gacd gon rnee to! Tel tib guiedz nadien, csilo miech, lëëque zha tilnie menladz zho, ¿niacxe nitlod guiedz co? Tib diigaa miecha, tel lëëque zha tilnie menlidz zho, led znuse lëe nitlo dii co. ¹⁸ Scaque mendox nagon, telne lëëque lëe ma guncxoon samendox ma, ¿pe nale na bnitlo ma! Laa naa rne min rii lo to, porne rnee to ma ne rnabey lo mendox nacie naa, gane rrieelo runcxoon naa ma. ¹⁹ Nana telne sca rzac to, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dolldox i quiaun to squi rnee to. ²⁰ Sanguel tel naa, Dios nacie naa runcxoon naa mendox, ni ga rlu ganle laa Dios pxeelle men ne gnabey lo to.

²¹ ¿Masaque nac mendox zig tib zha ne no xfuers! Tib zha ne no xfuers, tel tibaque ney zho xquiiib zho, ¿cho dien lega sëëb lidz zho gla ncuaañe quianie zho? ²² Per zeene rrieequia stib zha ne mazdraa no xfuers, zha cole rtiche zha co, runcxoon zho zho, riaannie zho grë ncuaañe gopchen zho. ²³ Golgacnan sca ganle, zha ne rlëë lo naa, ga rlu nacdied zho naa; ni zha ne racnied naa lo xtsin naa, paat yquiind zho.

²⁴ Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuëz ma; ranse ma rdziel zaatne cuëz ma, rnee ma: “Mazd gbire naa guia naa lidz naa stib.” ²⁵ Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhixcuaa len. ²⁶ Dzigo rie ma riexi ma zgadz samendox ma, ma ne mazdraa ntseeb, rdzin ma gza ma rzëëb ma zdoo zha co, rsilo ma rsacsi ma zho. ¿Horcole mazdraa mban run ma zho!

²⁷ Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¿Dichos wnaa ne gop luu, wnaa ne bgadz luu!

²⁸ Pquiab Jesús rëb me:

—¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

Zha ne riladzd cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiadzinraa lo me ga, dzigo bnee me rëb me:

—Nadzpaa ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. ³⁰ Haxta dzigora nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. ³¹ Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, biaad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni néd to gon to xtiidz me. ³² Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsod zha ne yquiaagui tib biini, lozh ga ctoos zho pe cos low, gzolanga zhow zaatne ngeets. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu. ³⁴ Rriequia nac bziaalo miech zig nac tib biini. Telne niapse lo grë ncuane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuane nonguielgdga rwi zho, dzigo gdipse xcuerp zho no lo guielcow ga. ³⁵ Golguien sca pa lo rwi to, napaa laa ne tso to lo biini, lel lo guielcow no to. ³⁶ Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh, ³⁸ psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho; ³⁹ dzigo rëbcha me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielggaan run to; masaque nac to gon zig tas, zig plat ne nëz zhitsse mbe rna, laa nëz lena rnadraa di beed. ⁴⁰ ¡Nadzpaa ncow nac guic to! ¿Pe riende to racladzd Dios ne laglaase glu miech wen nac to, sinque racladz me desde zdoo to gac to miech wen? Sac dib nacle to psan me to. ⁴¹ Laa ne squi no to noban to, mazd goldeed ncuane nacchenppaa to lo grë zha ne guien pe yquiin, zeena gac to miech ne nlipaa wen.

⁴² ¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcod to gban to zigne rnabey Dios, ib rioxcod to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to. ⁴³ ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz. ⁴⁴ ¡Probsaxe to, lëeta rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuane noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ¿ye no dzigo lëe rzoob luu squi nac?

⁴⁶ Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gon miech, ni per ni to rioxcod to squier csilo to gon tow. ⁴⁷ ¡Probsaxe to! Paat rquiinda gon squi rio to, rlozhd

dieen paraa rzhixcuaa to ro xpaa grë zha ne biadteed xtiidz Dios padzeela. ⁴⁸ ;Igal ntseeb to grë pxozgol to! Sac gon, zha beet grë zha co, laa to no rzhixcuaa to ro baa. ⁴⁹ Nanle Dios squitaa ntseeb zdo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho groļ zho.” ⁵⁰ Gacnañ to sca ganle, grë to miech ne mban leñ dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu, ⁵¹ desde Abel haxta Zacarí men ne beet pxozgol to leñ yadoo zaatne nac gax lo pcoog. ;Ne nligaa grëse dol co gon, to quizha! ⁵² ;Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëedgaa to gliladz zha ne racladz ycaaniaw.

⁵³⁻⁵⁴ Blozhse ga, laa me brieë ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaañe rñabdiidz zho lo me, rguib zho dien zha gunglëë zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

12

Grë ncuaañe rac ngueets zhliaan

(Mt. 10:19-20, 28-33; 12:32)

¹ Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëëdsuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho. ² Sac grëse ncuaañe sca ngueets rac, grëse ncuaañe rlud miech, dzin dze ne xoobnëa.

³ Zig nac grë ncuaañe zhlianse rnee to lo ncow niina, dzin dze ne gon miecha zobna ngbidz; grë ncuaañe rnee to leñ yuse, dzin dze ne dib lad guiedz gacnañ miecha.

⁴ Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grielodraa zho gun zho. ⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz leñ gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladz me ma. ⁷ Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoon mguin.

⁸ Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanj Dios, nacie naa zho. ⁹ Sangue zha ne ctoladznie naa lo miech, scaque naa ziep naa lo grë anj co runbeyd naa zho. ¹⁰ No zha ne rneenë naa, per zun Dios zho perdon dol co; sangue zha ntseeb ne gneenë Espiritu Sant, ib gundraa me zho perdon.

¹¹ Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsode to zhgab dien pe gnee to; ¹² sac zeene sca tsiegala, Espiritu Sant csiaab guic to pe nac mine gnee to lo zho.

Zha ne loxaque rapchen

¹³ Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuaañe psan pxoz no, gneedz zho mine ragual naa yca naa.

¹⁴ —Aque luuw nli —rëb Jesús—, ;cho në lo luu laa naa noyun guielwxtis co? Ziald naa gon par quiiz naa ncuaañe rap miech.

¹⁵ Dzigo bnee me lo grë miech co, rëb me:

—;Golguien gon, gzoobladzde to demas gapchen to! Sac niicle ndziibraa gapchen miech, grielod por grë ncuaañ co ndzon gac lo xquielmban zho. ¹⁶ Znu gon bzhaac tib men ne nroob gopchen. Nat liu quianie me, zeene rlaap me grë ncuaañe ran me, nroob ncuaañe rlis me low. ¹⁷ Bdzin tib dze rgaadraa pa tsotsow grë ncuaañ co, dzigo

bzob me dien zha gun me. ¹⁸ Tibaque zeene rëb me: “Mine naca laa naa gun nroob grë yu qui, zeena zigtaa grë guieInzaac quiw, grëragaa ncuane rap naa, ga tsotsowa grësew. ¹⁹ ¡Pe zhidaa iz ne lëb grë ncuane co! Peet tsieniedraa guic naa, ine guxt sob naa, gow naa, guie naa ncuane gacladztaa naa.” ²⁰ Min co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. ¡Zhaale zha ne guiaannie grëtaa ncuane beenlo luu i!”

²¹ Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuane cose rionie guic zho, ib rioxcod zho gun zho ncuane non nëz lo Dios.

Rsaand Dios zha ne no xnëz me
(Mt. 6:19-21, 25-34)

²² Blozh ga, rëbchaa me lo xpëedscuel me:

—Gacxe waa, gni naa lo to ganle: Tsoode to zhgab dien zha gban to lo guidzliu rii, pa griee pe gow to par gban to, pa gdzielgaa ncuane gdze xcuerp to. ²³ Mazd golconie guic to dien zha gac xquielmban to, dien pa tsiebannie to xcuerp to.

²⁴ 'Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuane row ma. ¡Tel to gon, mazdraa non to lo grë mguin co! ²⁵ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¡niacxe zrieelo to gunnool tow? ²⁶ Nanle to ganle led ncuane grieelod ga. ¡Pe nac dzigo tant tso to zhgab ncuane mazdraa nroob? ²⁷ Zig nac lar, ¡pe nacte tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow. ²⁸ Gase na ganle golwi, niicxe grë guiee dan co na, zna dze zob nguiaaw, gzhe widz laaw bidzle, laaw tsecle, ni scataa niow rgacwxab Diosa; ¡pe lel to dzigo ygacwxabd me, niicle ne squi gard guien to dib zdoe to gnalo to me?

²⁹ 'Tsodraa to zhgab sca, guiab to: “¡Pa griee pe dioow ne, pa griee pe dio ne?” ³⁰ Grë miech ne runbeyd Dios, tibaque zhgab co rio zho. Sangue to, golsoladz ganle Pxoz to men ne zob gbaa, nanle me pe nac grë xliaadz to. ³¹ Me nac men ne gneedz ncuane yquiiin to, per ib none glo tsoxco to gban to zigne rnabey me.

³² 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley Pxoz to men ne zob gbaa, laa me rneedz grëse ncuane rap me lo to. ³³ Gacxe waa, laa ne tsonie guic to dien zha gacnroob ncuane rap to, mine quianie to goltow, dzigo goldeed dimi co yquiiin zha ne rappaa liaadz; zeena sca nroobraa guieInzaac ne yгаа to gbaa. GuieInzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebгаа lo mxil.

³⁴ 'Sca golgun, sac gon guieInzaac ne gunlo to, zaatne gunlo tow, ga gdzin to.

¡Nsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ 'Nsin sca golso —rëb me lo zho—. ³⁶ Golgac zig tib ngundziin ne rquiambëz gbire men ne rnabey zho zeene pa rie me tib lo guieItsieel. Nsin rzo zho, zigne rdziin me, rxal zho ro yu rzëëb me.

³⁷ 'Dichos zha ne nsin zo zeene laa men ne rnabey zho glanso. Ib tedsod, steed me zho nëz len yu, soob me zho lo mezh, csilo me mezhazh gdziib ncuane gow zho. ³⁸ Nligaa dichos zha ne sca nsin so, horne glansotaa me; niicle tel wxina, ziadyiinigaa liuw. ³⁹ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw, ¡niacxe zaaguies zho? Led sobna zho lëë, nsin nsin so zho parne csaand zho sëëb ngbaan lidz zho. ⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rëbchaa Pedr lo me:

—Maestro, mine blozh bnee luu i, ¡pe par nose naca, te ye par grëraa miecha ye?

⁴² Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuaane gow zho.

⁴³ 'Dichos zho, telne ine niowse noyun zho dziin co zeene laa men ne rnabey zho glanso. ⁴⁴ Zeene gan mew, ib tedsod so me zho, zha gnabey grëse ncuaane quianie me. ⁴⁵ Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho, ⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

⁴⁷ 'Sac gon zha ne sca nanle pe nac mine racladz men ne rnabey zho, ni tsoxcod zho gun zhow; ible nroob nac caxtigw ne ted zho. ⁴⁸ Mazd lëetaa caxtigw ted zha ne peet nand, niicle gund zho mine rnabey me. Grëse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

⁴⁹ 'Niina ne laa naa zial, rrieequia zialzobgui naa lo guidzliu. ;Ni zoot naa gon, tebaa ranle naa laaw quiayazbel! ;Tebaa psiaalle naa lo dziin ne zialgun naa! ⁵⁰ Per na naraa none teed naa tib guielnë nroob, ni mbanse gon rac zdoo naa quiambëz naa gdzin dze co. ⁵¹ ;Masaque nan to na lëë, laa naa zial loxaque par cuin wense miech? Lëda gon, ye zial naa zialgunctil naa zho. ⁵² Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa ston zha ne guiaan ga, ctsidil zho; tel sëëbgaa tson zho, scaque grop zha ne guiaan ga, gandzed zho zho. ⁵³ Mëëd ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëëda, zeene gan zho laa xingan zho, laa xindzooopgaa zho bzëëb xnëz naa, gandzed zho zho. Zha ne nac nguzhizha, zlëënie xniaa tsiel zho zho; tel xniaagaa tsiel zhow, zlëënie zho me.

⁵⁴ Blozhse sca bnee me, rëbchaa me lo grë miech ne ndxie ga:

—;Pe nlipaa rnee to riende to pe nac grë ncuaane noyac len dze rii! Zha zeene ran to rquia xcow nëz ne rzëëb ngbidz, znuse rien to laa guie guiab. ⁵⁵ Zeene rangaa to ziaad me nëz ne rzë ngbidz len mëë nal, nanle to laa nëëg gac. ⁵⁶ ;Guielwquiaalo i lo to gon! Zha zëëb dzigo runbey to grë señ ne rlu zhan gbaa, rlugaa lo guidzliu, laa grë mine quiayan to len dze rii riende to.

⁵⁷ ;None guien to tozhal cobey dien pe nac mine nonguiel gun to! ⁵⁸ Gzoob ne bdiñnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdzin lo wxtis, ib znabey wxtis zha ne co to ladzguiib. ⁵⁹ Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

13

Grëse miech, ngoopdo nac zho

¹ Len dze co, bdzin bla zho lo Jesús bzodiidz zho lo me zha bnabey Pilat gut bla zha Galilé, lëëtse zeene no zho len yadoo noyut zho ma ne nogogon zho lo Dios. ² Dzigo rëbchaa Jesús lo zho:

—Segur na lëë, rëb to mazdraa ngoopdo grë zha co lo grëraa zha ne no nëz Galilé, gane sca bdzieelo zho. ³ ;Lëda gon! Zigtaa ngoopdo zha co, scaque to ngoopdo nac to; telne csaande to xquielntseeb to gbig to lo Dios, ye to znitlo to. ⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdo zho lo grëraa zha Jerusalén, gane sca gut zho. ⁵ Per gacnan to ganle, jléda! ;Zig rne naa ga, ye to miech ngoopdo nac to, ni telne csaande to xquielntseeb to gbig to lo Dios, ye to dzin dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, ⁷ dzigo bnabey me zha ne quianap liu co cchuggazh zhow, rëb me: “¡Pchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.” ⁸ Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdziñ beeba. ⁹ Telne yquiadaque nex low iz ne ziaad, maase cchug new dzigo.”

Biac tib zhuz ne nosacsi mendox
(Mt. 13:31-33; Mr. 4:30-32)

¹⁰ Tib dze ne rdziiladz zha Israel lo dziina, bdziñ Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me. ¹² Zeene gon Jesús me, dzigo bredz me me, pxobnia me guic me, rëb me lo me:

—¡Niinagazh gon, laa luu guiac!

¹³ ¡Horcogazh laa zhits me ga gocnli, rley me, psilo me rdeed me xquizh lo Dios! ¹⁴ Laa zha ne rnabey yadoo, zeene gon zho sca beenguiaac Jesús me dze co, blëë zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, jled tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¡Pezhe ga waa run to zeene rsilaa to xcon to, rsilaa to xpurr to dze rii rieguie to ma nis? ¹⁶ Zha nac dzigo rzac to, nonguielda nu ben naa beenguiaac naa wnaa rii, dze rii. Golwi ganle zha xtii Abraham nac me, len tsiimtson iz goc sca nosacsi mendox me.

¹⁷ Zha ne rlëë ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—¡Zha ganle racnroob lo xtsiin Dios lo guidzliu rii? ¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racbniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ Ziaadaque gon gaca, zig ncobi. ²¹ Sac tel ncobiw, niipaquew rcots men wnaa tson lmud rin, ni dib nase ncob co rzibe.

Zha ne ycaania Dios
(Mt. 7:13-14, 21-23)

²² Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina. ²³ Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

²⁴ —Nligaa zhis zho, sac masaque naca zig tib puert niase. Goltsoxco sca niinasraa golsëëb xnëz me ycaania me to, sac zdziñ dze ne nzian zho gacladz sëëb, per grielo-draaw. ²⁵ Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëëb to, per cxaldræa mew. “Runbeyd naa to”, gnë me, “nand naa dien cho zha to.” ²⁶ Niicle guiab to runbey me to, biaadpaa me ladz to pseed me miech, haxta downie to me. ²⁷ “Laa naa nile”, gnë me, “runbeyd naa to. ¡Gunneetraa to naa, ib rdziguiend naa grë miech yozh, miech ngoopdol ne nac to!”

²⁸ Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biance nëz ley. Nligaa mbandox gac to, zoon to, haxta zow lay to lo guielnë co. ²⁹ Ni mazdraaw gon, zeene gan to pa lo guidzliu brieë grë miech ne bdziñ ga, ine zobnie me zho lo xmezhe me noyownie me zho. ³⁰ Grë zha ne rzac to niina peet nond, lëëtse zha co yгаа guielnzaac co; laa grë zha ne rzac non zho niina, peet ygad zho.

Bzeet Jesús zha nac zha Jerusalén
(Mt. 23:37-39)

³¹ Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me. ³² Dzigo rëbchaa me lo zho:

—Goltsie golguiab lo mëz win co cxecw me spalal, nadzese ni gzhe gunguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guiendle naa nu. ³³ ¡Nligaa nadesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ ¡Aque tow men Jerusalén! ¡Pe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa niacnie naa to, nquiianaap naa to zig run nguid rgueedz ma xpëed ma, per bzhiguielde to. ³⁵ Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “¡Zha ndzontaa men qui pxeel Dios lo ne!”

14

Biac tib men ne rriee gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziñaque tib men bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. ³ Dzigo rëbchaa Jesús lo zho, ni lo grë maistr ley ne ndxie ga:

—Golnë dien, ¡pe nonguiela gunguiac naa miech dze rii, te nonguielda ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, ⁵ rëbchaa me lo zho:

—¡Pe nli na peet dziin runde to dze rii? Tel zha tsietsobe tib xpëed to, tib xmagaa to tib len guiuu dze rii, ¡niacxe tsiebeegazhde to xpëed to, tsiebeegazhdgaa to xma to ga?

⁶ Loxaque lo zho rac, ib bdzielz zho pe nquiab zho.

⁷ Grëraa miech ne nodziñ ga, no zho rguib zho dien zha yгаа zho zaatne nzhixcuaraa sob zho. Gon Jesús zha rac zho, dzigo bnee me lo zho, rëb me:

⁸ —Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaraa. Sac gon, nenda glanso tib zha ne nonraa lo to, ⁹ lozh ga, laa zha ne bredz to lo lni guiaadliso to ga, gnë zho: “Guso i dien sob men rii.” Led tib guielto ga par to, racse to laa to tsieso ga, tsiesob to zaatne rialle ro beel. ¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaad-xi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, zianñziuu to lo zho. ¹¹ Golsoladz ganle: grë zha ne lëëque zha runnon zho, lel riaanwin zho; laa zha ne riaanwin, runnon miech zho.

¹² Blozh ga, rëbchaa me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldidz luu, loxaque zha bets luu, zha lidzse luu, lo grëгаа zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho mine been luu ga. ¹³ Mazd bredz grëse miech, zig nac zha ne guiend pe yquiin, zig nac zha ne guiend tib nia, zha ne guiend tib ni, zha ne roldgaa lo; ¹⁴ zeena gal dze ne grieban grë zha ne bioxco wban zigne racladz Dios, ine gley luu yгаа luu guielnzaac ne tsieguial luu gneedz me lo luu.

¹⁵ Lad zha ne zobgrë me lo mezh ga, pquiab tib zho rëb:

—¡Dichos grë zha ne sca yгаа tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib men name, nzian zha ne bredz me tsie tib wagw lidz me. ¹⁷ Zeene gol dze ne laa guielwagw co gac, pxeel me tib zhingundziin me ziexi grë zha co. ¹⁸ Per pasë zho nie, zhaase zhaase ncuane pquiaqui zho. Tib zho rëb: “Griee lod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar.” ¹⁹ Stib

zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.” ²⁰ Laa stib zho rëb: “Grieelod së naa, sac niina wriin ptsieelnaa naa, bzhiguiel gudz lo me gacd guial naa.”

²¹ Bdzin ngundziin co bzodiidz zho lo me zha rzë xtiidz grë zha co. Zeene bin mew, wbinladz guic me, bnabey me zho güey zho dib lad guiedz güeyxi zho grë zha ne guiend pe yquiin, grë zha ne guiend nia, zha ne guiend ni, zha ne rold lo, grëse zho bdzinnie zho ga. ²² Blozh ga, rëbchaa zho lo me: “Laa naa wbirele xmandad luu gon, per scase noraa zaatne cue miech.” ²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa. ²⁴ Sac grë zha ne bredz naa glo ga, ni lalnu racladzdraa naa yгаа zho guielwagw rii.”

*Zha ne racladz sëëb xnëz Jesús
(Mt. 10:37-38)*

²⁵ Laa Jesús no nëz zie me nëz Jerusalén, miech guizhiu ne nal zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho mine rnabey naa. Sac zha ne mazdraa rleynie pxoz, mazdraa rleynie xniala, mazdragaa rleynie zho tsieel zho, xpëëd zho, bets zho, bziangaa zho, xquielmban zhow, rquia zdoo zhow, peet xtsiind grë zha co par sëëb zho xnëz naa. ²⁷ Sac ni tib zha ne sca yquia zdoo cueeladz zho zho guiaadnal zho zhits naa, grieelod ygab zho lo naa. ²⁸ Antes ne yquiabladz to sëëb to xnëz naa, none wen wen sob to dien pe zlëb to ted to mine rieguial to. Zig nacse tib zha ne gzaa tib yu glaa ne gac chop tson xcuaa, led rzobgagh zho rbee zho cuent dien pe zгаа xtimi zho tsaalow. ²⁹ Sac gon nenda loxaque cueeze zhow, ni lozh ga grieelod gzaalo zhow. Miech ne gana laa zho gzhidznie zho, ³⁰ guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.” ³¹ Scaque rey ne no tilnie stib rey, led none sobgagh zho gan zho dien pe zlëëb tsii mil xmenguiib zho tsietilnie gal mil xmenguiib stib rey co. ³² Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuëz lo xtil zho.

³³ Scaque to nagon none glo gwi to pe nac grë ncuane no csaan to, parne grieelo ygab to xnëz naa. ³⁴ Sac gon zed ne nzhid, ipa dien yquiina? ³⁵ Per ni par gaca beeb peet xtsiinda; mine ractaaw, laaw rziaab. Zha ne no liaadz guien zho pe rnee naa, yquiaadiag zhow.

15

*Zha rzac Dios zha ne zozit lo me
(Mt. 18:10-14)*

¹ Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me. ² Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho. ³ Dzigo bnee me lo zho, rëb me:

⁴ —Togase nadien, gzoob ne quianie to tib gayoo mëcwxiil, ni lega naclew rziaab tib ma, ipa dien run to? Led rsan to ma ne ndxie lo to ga lëë, laa to rie rieguib to ma ne bziaab ga, haxta rdziel to ma. ⁵ Zeene rdziel ma lo to, lo guielbley co haxta rxobyan to ma rdzinnie to ma ro yu. ⁶ Lëëled rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiil to brieequia. ⁷ Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

⁸ Zig rzacгаа tib men wnaa, gzoob ne nzhen me tsii gayoo pes, ni lega naclew rsëëb me tib gayoow, ipa dien run me? Led hor cogagh lëë rquiaa me biini, rsilo me dzega dzega rloob me len lidz me haxta rdziel me dimi co. ⁹ Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. ¹⁰ Zig rne naa ga, scadaa

nagon rzac grë xanjl Dios, tib guielbley nrooba lo zho zeene ran zho laa tib zha ngoopdol rsaan xquieIntseeb, laa zho rbig lo Dios.

¹¹ Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui. ¹² Tib dze, rëb zha ne nac zha niab lo me: “Papá, tel pe nac ncuaane no gneedz luu lo no, bzhiguiel niinaga beengrola, zeena gneedz luu mine raguial naa.” Dzigo beengrol me ncuaane rap me, bdeed mew lo zho.

¹³ Zhisaque goca, pto zha niab co grëse ncuaane bial zho, brie zho laa zho zie. Bdziin zho stib dan, ga been zho grë guelyozh ne gocladztaa zho, grëse xtimi zho pxin zho ga. ¹⁴ Tibaque zeene laa xtimi zho blozh, mbanse rac zho guiendraa pe gow zho, ni lëëtaque len dze co laa tib gbin psiloque nëz co. ¹⁵ Dzigo racse zho güeyguib zho dziin lad guiedz co, ga briequia tib men co bree zho, pxeel me zho yquiaanap zho nguts. ¹⁶ Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

¹⁷ Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaane raclo row grë zha co, haxta riana, ni laa zho sca noded ga; rëbchaa zho: ¹⁸ “Mazd mine naca laa naa guia gdziin naa lo pxoz naa stib, guiep naa lo me gun me naa perdon grëta falt ne ben naa lo me, falt ne bengaa naa lo Dios. ¹⁹ Maase sacdraa me naa zig xpëed me, siguiel me ycaania me naa gac naa zig tib zha ne quise dziin lo me.” ²⁰ Horco bio zho nëz laa zho zey nëz lidz pxoz zho. Zitaa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

²¹ “Papá”, rëb zho lo me, “rien naa nroob falt ne ben naa lo Dios, bengaa naa lo luu. Rieguialdraa sac luu naa zig tib xpëed luu.”

²² Ni blëzd me nlozh nee zho, lëëled bredz me zha ne quia xtsiin me, rëb me: “jNa goltënie tib nëz lar wen nu gacw xpëed naa! jGoltënie tib nil wen tso nia me, tib nëz guielguid cub yquia ni me!” ²³ Bnabey me zho güeyxi zho tib ngon ne mazdraa ndaan, beet zho, rëb me: “jIb none gac tib lni, none dioow ne, none dio ne! ²⁴ jSac gon gun naa cuent, brieaban xpëed rii naa! jBnitle me ga, na laa me bdziel!” jLaa lni psilo!

²⁵ Lni co noyac, zeene laa stib xpëed me zha ne nac zha gol ga, wbire lo dziin dan. Bdziin zho gax ro yu, rlu rquia di, haxta wiee rlu noyac; ²⁶ dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac. ²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.” ²⁸ Blëë zha gol co bin zhow, lo guielblëë co bzëëbd zho ro yu. Nacne brie pxoz zho, bnee me lo zho sëëb zho ro yu. ²⁹ Dzigo rëbchaa zho lo me: “jLëdraaw i gon papá noyun luu! Bui ganle blactaa iz ne quia yun naa dziin lo luu, waltaa gard quits naa tib xtiidz luu. Ni zha rna tib dze, siquier tib chiv yeen ygad luu lo naa, gownie naa grë zha ne ndieeldiiz naa. ³⁰ Cho dzigo nac zha qui, blozhse güeyloozh zho xtimi luu lo grëta guelyozh ne been zho, na no luu beet luu ngon ne mazdraa ndaan, noyun luu zilni zho.” ³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëta ncuaane quianie naa, luu guiaanniew. ³² Per niina ne laa bets luu blanso, ib nonguiela znu dziuun ne tib lni gleyne ne me; sac gon bnit me, ni na laa me bdziel. jDziuun ne cuent brieaban me nu!”

16

Ligier miech par lo guieIntseeb

¹ Tib vuelt bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëta ncuaane rap me; tib dzew, lega nacle bded diag me zhliaan noxin zha co xtimi me. ² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quia yun luu dziin; sac grieelodraa so luu lo grë ncuaane rap naa.”

³ 'Wbire zho ga, rëb zho: "Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabgaa ne na ga naa gatop naa gon, rtoladz naa gnab naa gon lo miech." ⁴ Tibaque zeene biab guic zho rëb zho: "¡Laa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!"

⁵ 'Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnabdiidz zho lo zho dien palal nzëeb zho lo me. ⁶ Rëb zha co: "Tib gayoo tamb nceit nac mine nzëeb naa lo me." Dzigo rëbchaa zho: "Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, gro! tamba zëeb luu." ⁷ Bdzinaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbchaa zho: "Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëeb luu."

⁸ 'Zeene bien men co zha noyun zho, bzee zdoo me gon me scataa ndzielguic zho. Ncuane ntoladza, per grëse miech ne zienal ncuuan lo guidzliu rii, ndzielguic zho par gun zho grë guielntseeb. Par min co ndziibraa ndzielguic zho lo zha ne no xnëz Dios. ⁹ Sangue to gzoobladzde to gun to min co, ncuane rap to lo guidzliu rii, golquiina per par gun to xyudar samiech to. Zeene laa ncuuan co grë, nenda zacnie zho to, per mine mazdraa non Diosi ible zacnie me to, zneedz me tib lugar ndzon cuëz to, led yedraa ga pe nitlo.

¹⁰ 'Zha ne ndzinli rundziin tel palal yeense ncuane riaannie zho, scaque ndzinli gundziin zhow zeene guiaannie zho nrooba. Laa zha ne ndzinlid, mine gun zho zeene guiaannie zho ncuuan zhis, mincoque gun zho zeene guiaannie zho ncuane nroob. ¹¹ Nana zha ne sca gacd ne ndzinlise gundziin zho ncuane no lo guidzliu rii, ¡zha dzigo grieelo gundziin zho ncuuan ndzon ne gdeed Dios lo zho zaatne no me? ¹² Stiba, tel sca ndzinlide to lo chen ben, ¡pe naczhe ncuane gun to tib ncuane chenpaa to? ¹³ Golgona ganle, grielod gon gleyne to dimi ni gleyneque Dios. Ib none telne Dios rleyne to, me none gleyne to, togo dimigaaw, dimi golleyne.

¹⁴ Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi. ¹⁵ Dzigo rëbchaa me lo zho:

—Masaque rzac to nalë nli miech wen nac to nëz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me mine run to.

¹⁶ 'Leñ dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, min co nac mine güeynal to. Per zeene psilo Juan pseed me miech, desde hor co laa miech quiayacnan stib mod ne grielo ygaa zho zaatne rnabey Dios; gane na nzian zha ne noxco ygaa lugar co. ¹⁷ Per guiabde to togo nondraa ley, sac grëse mine zhobnee lo ley, ¡jib laaw none gac! ¡Zig nac guidzliu, zig nac gbaa zrieelo nitlow, sangue ley nitloda, tibaque naca! ¹⁸ Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniagaa tib wnaa ne psëbtsieel, dol ga quiayun zho; zigtaa do!a padzeela, scaque niina do!a.

Xcuent tib zha prob lë Lazz

¹⁹ 'Tib ricw name —rëb Jesús—, niapse grë lar niazh racw me, gzobse dze run me lni lidz me. ²⁰ Zaatne noque me ga, guiedz co no tib zha prob lë Lazz, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co, ²¹ rquiambëz me dien pe grielod gow me maase ncuane rriengaale lo xmez h men co; ga zob me haxta rdzin grë mëcw rzëeludz ma lo guiedz ne rlan me ga.

²² 'Bdzin dzew laa Lazz gut, dzigo biet xanj! Dios beynie zho me lo Abraham, zaatne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me; ²³ zeene biala me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazz zobnie Abraham ga.

²⁴ Horco bnab me lo Abraham siguiel Abraham cxeel me Lazz, maase guic mzhugniase

Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. ²⁵ Dzigo rëbchaa Abraham lo me: “Xin, psoladz ganle zeene wban luu lo guidzliu, ncuuaane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui. ²⁶ Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.” ²⁷ “Bzhiguieļ sca”, rëb men ricw co, “pxeel Lazh tsie me lidz pxoz naa, ²⁸ tsienie me diidz lo zgaay bets naa zha ne biaan, guiab me lo zho ib gund zho mine beņ naa, zeena guiaate zho nu ygaa zho lo guielnëdox rii.” ²⁹ Pquiabchaa Abraham, rëb Abraham: “Tel mincow, tsov glab zho lo grë ley ne psan Moisés, lo grë mine bnee grë zha ne güeyteed xtiidz Dios, beņque lo co zhobnee zha no gban zho.” ³⁰ “Nliw”, rëb me, “per tel squi tib men ne gutle tsie tsienee lo zho, rien naa znuse csaan zho xquieļntseeb zho gbig zho lo Dios.” ³¹ Dzigo rëbchaa Abraham: “Telne rond zho mine rnabey grë ley ne psan Moisés, grë mine bnee zha ne güeyteed xtiidz Dios, scaque gond zho diidz niicle tsie tib zha ne brieebanle tsienee lo zho.”

17

Zha ne gunctal xtol stib zho

(Mt. 18:6-7, 21-22; Mr. 9:42)

¹ Tib vuelt rëb Jesús lo xpëedscuel me:

—Nac lo guidzliu rii, ib gunfalte ncuuaane rgogui miech gunctal zho xtol zho, jper probsaxe zha ne rquiił samiech runctal zho xtol zho! ² Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo, lëdle guielnëdox ne gan zho; sac gon dol nroob ga gun zho yquiił zho zha ndooladz ne no xnëz naa. ³ ;Golguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon. ⁴ Niicle telne nzian vuelt sca gun zho falt lo luu tib dze, beņ zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rëb me:

—Tel niaca mine gzoob ne rnalole to Dios siquier lal tib midz moxtaz, niicle ncuuaane mazdraa ngan gnab to lo me, zuņ mew.

⁷ ;Pe ran to ganle, zha nac zha ne run xtsiin beņ? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: “Na bded, bzob, zeena gowxtsee luu.” ⁸ Mine run me, gloque rnabey me zho gunlo zho ncuuaane gowxtsee me, gdziib zhow lo me; rlozhraa row me, dzigora rowxtsee zho. ⁹ Niicle scataa ron zho mine rnabey me, ni rlozh ga, per ni xquizh rdeete me lo zho. ¹⁰ Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziinse nac to, mine rieguaļ to ga, min co beņ to.

Biac tsii zha ne rlan guiedz lepr

¹¹ Laa Jesús no nëz zie me nëz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé, ¹² zeene brieequia tsii zha ne rlan guiedz lepr. Zit zo zho, ¹³ nguiedz rbedz zho me, rnab zho lo me yquia zdoo me zho. ¹⁴ Zeene gon me zho, rëbchaa me lo zho:

—;Goltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co. ¹⁵⁻¹⁶ Lo gza zho, hor co rias tib zho wbire, nguiedz rnee zho:

—;Zha ndzontaa Dios! ;Golwi ganle laa me beenguiacle naa!

Zigne bdziņ zho lo Jesús, pquiiłsgzhib zho lo me, haxta bdziņ lo zho lo liu, rdeed zho xquizh lo me. Tib zha Samara, zha zit nac zho. ¹⁷ Dzigo rëbchaa Jesús:

—;Yoraazhe grë zha co waa? Conque tsii zho name beenguiac naa. ¹⁸ ;Tibaque zha zit rii dzigo lëë rzac zdoo mine beņ Dios lo zho?

¹⁹ Dzigo bliso me zha co ga, rëb me lo zho:

—Porne dib zdoo luu gon bnaloo luu Dios, gane biac luu. Bzë, peet tsieniedraa guic luu.

Zeene gbiire guiaad Mgui ne pxeel Dios

(Mt. 24:23-28, 36-41)

²⁰ Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuane ganlopaa miech. ²¹ Grielod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

²² Bded ga, rëbchaa me lo xpëedscuel me:

—Zdzin dze, gacladz to tebaa zha znu so naa lo to maase tibaque dze, per gacdraaw.

²³ Len dze co, zio zha ne gnë lo to: “Goltë ganle laa Mgui ne pxeel Dios bdzin nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho. ²⁴ Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëëb ngbidz, ¿niacxe gand grëse miecha?

²⁵ Per ansraa ne gac min co, ible nroob guielnë ne cteed miech rii naa, ni lalnu gandzed zho naa. ²⁶⁻²⁷ Len dze ne guial naa ga, grë miech ne ndxie lo guidzliu gal hor co, zhaa grë ncuane tsonie guic zho. Rsoladz to ganle zha rac miech len dze ne biaad Noé, lel lo grë zhilni zho no zho, zha ne notsieelnia, zha ne nobediin xpëed, tibaque zeene biao zho biini laa guiedox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guial naa. ²⁸ Zig racgaa miech Sodom len dze ne brie Lot ga. Scaque, loxaque ncuane lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. ²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co. ³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëëtaque hor co no glaa guic yu, ib guiabd zho sëëb zho len yu tsiebee zho ncuane no len lidz zho, zha ne quiaaa lo dziin dana, ib guiabd zho gbi zho guey zho ro yu. ³² ¿Golsoladz ganle zha bzhaac wnaa ne goc tsieel Lot! ³³ Grëse miech, zha ne sca rquianë zdoo grë ncuane rap zho, ible znitlo zho xquielmban zho; sangue zha ne rquiad zdoo grë ncuane co, haxta xquielmban zho rbeeladz zhow, nitlod zho. ³⁴ Gal hor co, zaatne tipse nixguies chop zho, tib zho sënal zhits naa, laa stib zho guiaan. ³⁵⁻³⁶ Zaatne tipse quiaayot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaan.

³⁷ Dzigo rëbchaa xpëedscuel me lo me:

—¿Pa lo dzigo gdzin grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdzin ma.

18

Zha ne rnab lo Dios

¹⁻² Stib dzew, bzodiidz Jesús tib cuent lo xpëedscuel me, par guien zho ib guiaan zdoo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdoo me samiech me, per ni Dios rdziebd me. ³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëë lo zhuz. ⁴⁻⁵ Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guidgunneetraa me naa, mine naca mazd laa naa gun guielwxtis ne rnab me.”

⁶ Blozhse bzodiidz Jesús cuent co, rëbchaa me lo zho:

—Telne sca bdzin dze ne pquiaadiag zha ntseeb co mine bnab wnaa viud co, ⁷ ¿pe lel Dios dzigo yquiaadiagd xtiidz zha ne ngab lo me, tel tibaque gnab zho mine racladz zho?

⁸ ¡Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. ¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdo, zig nace zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa. ¹² Haxta chop vuelt rcuan naa tib len zhmal, grëse ncuaane run naa gan, run naaw tsii lal, rnedz naa tib lal mine rieguial luu.” ¹³ Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiase nia zho zdo zho, rnee zho lo Dios: “¡Dios, rnab naa lo luu pquia zdo naa znutaa miech ngoopdo nac naa!”

¹⁴ 'Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

Beenlay Jesús mëédlas

(Mt. 19:13-15; Mr. 10:13-16)

¹⁵ Tib dze, nzian men ne bdziñ lo Jesús, bdziñnie zho xpëédlas zho lo me, parne cxobnia me guic win gunlay me win. Grë zha ne nac xpëédscuel me, le psilo zho ndox zho lo grë zha ne bdziñnie grë mëédlas co. ¹⁶ Zeene gon me sca quiayun zho, dzigo bredz me zho, rëb me lo zho:

—¡Tsirede to grë mëédlas yeen qui! ¡Golsaan guiaad win lo naa! Sac gon grë mëédlas yeen qui, ni zha ne nac zig nac win, zha co nac zha ne sëëb ygab lo Dios. ¹⁷ Nligaa zha ne gacndooladz, zha ne gliladz dib zdo, zigne run grë mëédlas, grielod gdziñ zho zaatne rnabey Dios.

Ncuaane run dimi

(Mt. 19:16-30; Mr. 10:17-31)

¹⁸ Tib vuelt, wbig tib men ne nac zha non lo menguedz Israel, rëb me lo Jesús:

—Nan naa luu nac tib men ne noseed miech, ni tib men wen nac luu, ¡bnë lo naa dien, pe nac mine gun naa parne grielo ygaa naa guielmban ndzon ne gdziñd dze lozh?

¹⁹ Pquiab Jesús rëb me:

—Rnee luu lëë tib miech wen nac naa. ¡Nligaaw, Diosse gon nac men wen! ²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsieeld luu,

gute luu samiech luu,

cuand luu samiech luu,

yquiadiidzguizhd luu samiech luu.

Gon pxoz luu, gon xniaa luu, cueed luu xquielto me.

²¹ Dzigo rëbchaa men co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

²² Horco rëb Jesús lo me:

—Stibaque mine rquiin gun luu. Güey, güeyto grëse ncuaane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, dë, dënal zhits naa.

²³ Zeene bin men co sca rëb Jesús, mbanse rac me laa me zey; sac nroob ncuaane quianie me. ²⁴ Dzigo rëbchaa Jesús lo xpëédscuel me:

—¡Zha ngantaa lëë, rzac zha ne squi rapchen sëëb zho xnëz Dios gnabey me zho!

²⁵ Mazd ngandse rded tib camell guieer guzh.

²⁶ Grë zha ne ndxie ga, zeene bin zho sca rëb me, rneechaa zho:

—Telne scataa ngan sëëb miech xnëz Dios, ¡chomezhe dzigo waa nac zha ne zrieelo sëëb xnëz me?

²⁷ Dzigo rëbchaa Jesús:

—Nligaa par miech, zootle tsod zha ne grieelo sëëb xnëz me; san̄gue me nan̄ me no zho. Sac tel̄ me, tsod ncuaañe grielod gun̄ me.

²⁸ Horco pquiab Pedr, rëb Pedr lo me:

—Tel̄ no, grë ncuaañe rdziaapse no psan̄ now, laa no ziaadnal̄ zhits luu.

²⁹ Pquiab me rëb me:

—Gol̄gacnana gan̄le, grëse zha ne psan̄ lidz, psan̄ zho tsieel zho, psan̄ zho xpëed zho, psan̄ zho pxoz zho, psan̄ zho xn̄iaa zho, psan̄ zho bets zho, bziangaa zho, porne bzëëb zho xnëz Dios, ³⁰ na lo guiel̄mban riique, mazdraa nroob min̄e gan̄ zho, ni lozh ga ib tedsod zgaa zho guiel̄mban ndzon ne gdziñdraa dze lozh.

Bzeet Jesús stib zha csacsi miech me

(Mt. 20:17-19; Mr. 10:32-34)

³¹ Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun̄ miech me, rëb me:

—Grëse min̄e bzeetle zha ne biadteed xtiidz Dios padzeela teed naa, niina ne laa ne gdziñ Jerusalén, laaw gac cumplir. ³² Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, ³³ zguin̄ zho naa, ni haxta zut zho naa. Per zeene gac tson̄ ngbidza, zriebaanaa.

³⁴ Per ib biend̄ zho dien̄ zha nacne sca rnee me.

Biac tib zha ne rold lo

(Mt. 20:29-34; Mr. 10:46-52)

³⁵ Laa Jesús bzëëb ro guiedz Jericó, miech guizhiu ne nal̄ zhits me. Ro nëz co zob tib men̄ ne rold lo, rnab me gon. ³⁶ Zeene bien̄ me rlu nzian miech noded ga, dzigo bnabdiidz me dien̄ pe nacne scataa ziaad grë miech co ga. ³⁷ Dzigo rëb zho lo me, Jesús, men̄ Nazaret ziaad ga, zhits me ziaadnal̄ grë miech co. ³⁸ Horco psilo me nguiedz rbedz me, rnee me:

—¡Jesús, men̄ xtii rey David, pquia zdoo naa!

³⁹ Grë zha ne ner, psilo zho ndox zho lo me parne guioog ro me, per lel̄ hor cole nguiezdraa rbedz me Jesús, rnab me yquia zdoo Jesús me. ⁴⁰ Nacne zeene bdziñ Jesús gax zaatne zob me, blëz Jesús, bnabey Jesús güeyxi zho me. Bdziñ me lo Jesús, rëbchaa Jesús lo me:

⁴¹ —¡Pe nadien̄ gun̄ luu naa?

Pquiab me rëb me:

—¡Racladz naa guiac lo naa!

⁴² Dzigo rëbchaa Jesús:

—¡Niinagazh gon̄ laa luu gan̄ stib! Laa luu biac, sacne dib zdoo luu bnalo luu naa.

⁴³ Horcogazh laa men̄ co psilo bui, in̄e rley me rool̄nie me Dios, laa me zienal̄ zhits Jesús. Haxta grë miech ne zienal̄ ga, zeene gon̄ zhow, ye zho rool̄nie zho Dios.

19

Güey Jesús lidz tib men̄ lë Zaquew

¹⁻² Guiedz Jericó, ga no tib men̄ ne rnabey lo grë zha ne rtop dimi ne razh lo rey Roma, lë me Zaquew. Zeene laa Jesús zieded lad guiedz co, ³ brieë me, ziewi me, sac racladz me gun̄bey me Jesús. Bdziñ me, pasëse me gan̄ me Jesús, sac lala miech guizhiu ne nal̄ zhits Jesús, ni lala ndopse me. ⁴ Min̄e been̄ me, rias me bdedner me güeytsep me tib lo yag guigw zob ro nëz co, par gdeeda diidza gan̄ me Jesús, zeene laa Jesús ted ga. ⁵ Zeene laa Jesús bded ga, blis lo Jesús gon̄ Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

⁶ Rley Zaquew gon̄ Zaquew sca rëb Jesús, lëëled̄ biet me lo yag co, laa me zienie Jesús nëz lidz me.

⁷ Zeene gon̄ grë miech cow, rlëë zho, rnee zho:

—¡Pe lëëtaa lidz zha ngoopdo! qui ziebëz me!

⁸ Laa Zaquew, in̄e rley zobnie Jesús. Tibaque bzoli Zaquew, rëb Zaquew:

—Gacnan̄ luu gon̄, lo grë ncuane rap naa, laa naa gded grola ygaaz lo grë zha ne guiend̄ pe yquiin, ni tel̄ nogaa zha ne ndziibraa min̄e beenquizh naa zho, naa maase ctsiree naa tap lal min̄e blan naa zho ga.

⁹ Horco pquiab Jesús, rëb me lo zha ne ndxie ga:

—I nagon̄ rlu laa men̄ qui wbigle lo Dios, parne ycaania Dios me. Nli zha xtii Abraham nac me, per bzonziaab me ¹⁰ ni naa ne nac naa Mgui ne pxeel̄ Dios, ible laa naa zial̄ zial̄silaa naa grë zha ne zonziaab.

Zha ne biaannie dimi

¹¹ Grë miech ne zienal̄ zhits Jesús ga, rzac zho zigne laa me gdziñ̄ Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

¹² —Tib xpëed̄ zha non name, no me tib guiedz win, nacle diidza laa me no tsie zaatne zob men̄ nroob ne rnabey, parne gzo zho me gac me rey guiedz ne no me ga. ¹³ Zeene laa dze co bdziñ̄, dzigo bredz me tsii zha ne quia xtsiin̄ me, nroob dimi ne psan̄ me lo zho tib tib zho, parne gundziin̄ zhow, mientras gbire me.

¹⁴ 'Nzianlaa zha ladz me, rlëe zho ran̄ zho me, dzigo pxeel̄ zho bla zha ne güey lo men̄ ne rnabey ne zie me ga, güey nab zho gdeete men̄ co dziin̄ co lo me. ¹⁵ Per niicle sca güey grë zha co, peet brieelod niun̄ zho. Blozhse bzo rey co me, laa me bdziñ̄ ladz me. Zeene bdziñ̄ me, bredz me gza zha ne biaannie xtimi me ga, par dien̄ palal ziyaca. ¹⁶ Bdziñ̄ tib zho, rëb zho: “Laa xtimi luu nu gon̄, tsii lal min̄e psan̄ luu ga naca niina.” ¹⁷ Rley me rëb me lo zho: “¿Zha squi nagon̄ racladz naa! ¿Wen brieequia xtsiin̄ luu! Niicle zhis ncuane psan̄ naa lo luu, per bien̄ luu niowse bendziin̄ luuw. Na nagon̄, laa naa gzo luu, gnabey luu tsii guiedz.” ¹⁸ Bdziñ̄ stib zho, rëb zho: “Laa xtimi luu nu gon̄, gaay lal min̄e psan̄ luu lo naa ga naca niina.” ¹⁹ Scaque rley me. Bzo me zho gnabey zho gaay guiedz. ²⁰⁻²¹ Zeene bdziintaa tib zho, rëb zho: “Nli bendziind̄ naa xtimi luu, sac nan̄le naa zha nac luu, niicle paraa niundziin̄ naaw, grëse min̄e niuna gan lo luu niaana; gane mazd pquia naaw tib lë lo lar, blootsow naaw, ledaaw nu.” ²² Blëe guic me, rëb me lo zho: “¿Biche nu, paat rquiind̄ naa miech yozh ne squi nac! Conque nan̄le luu zha nac naa, ²³ ¿pex nac dzigo waa bioxcod luu maase mbediin̄ luu dimi qui, ndziniaaw palal ncaania naaw niina?” ²⁴ Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.” ²⁵ Pquiab zho rëb zho: “Per pe nacne zha coque ycaania, ni nrooblew beenlo zho.” ²⁶ “Ib sca no gaca”, rëb me, “sac zha ne rien̄ zha gundziin̄ zho ncuane rcaania zho, nroobraa ncuane ycaania zho. Laa zha ne squi nac, haxta min̄e pcaaniale zho, zdiooba lo zho. ²⁷ Sangue zha ne sca ptsidil̄ niac naa rey, goltsiexi zho, niinaga racladz naa ganlo naa gut to zho.”

Bdziñ̄ Jesús Jerusalén

(Mt. 21:1-17; Mr. 11:1-11, 15-19; Jn. 2:13-22; 12:12-19)

²⁸ Blozhse bzodiidz Jesús cuent co lo zho, laa zho bio nëz stib, nerse me lo zho. ²⁹ Zeene bdziñ̄ zho gax Gui Oliv, zaatne ndxie guiedz Betfagé ni guiedz Betain, pxeel̄ me chop xpëed̄scuel me, ³⁰ rëb me lo zho:

—Goltsie guiedz win ne ndxie danse lo ne i. Ga gdziñ̄ to zaatne quiadoo tib burr yeen̄ ne choot gard sob lad, dzigo golxadz ma, goltënie ma nu. ³¹ Tel̄ cho gnabdiidz lo to pe nacne noxadz to ma, golguiab lo zho: men̄ ne rnabey ne, men̄ co rquiin̄ ma.

³² Laa zho zie. Bdziñ̄ zho, zaatne quiadoo burr co, ³³ nligaa, lëëtaque noxadz zho ma, zeene laa bizhuan ma bdziñ̄.

—¿Pe gun̄ to xpurr naa? —rëb me lo zho—. ¿Pe nacne noxadz to ma?

³⁴ Dzigo rëbchaa zho:

—Men̄ ne rnabey ne, men̄ co rquiin̄ ma.

³⁵ Bdziñ̄ zho ma lo Jesús, pxob zho lar ne rbix zho lad ma, bzob me ma. ³⁶ Zigse zie me, no grë miech guizhiu co rta zho xab zho ro nëz rded burr ne zob me ga. ³⁷ Grëse

miech co, rleynie zho me. Laa zho xiuxto dze cho gui Oliv, zeene psilo zho nguiedz zëëb tsi zho, rley zho roolnie zho Dios, por grëtaa milagr ne ziyan zho run Jesús; ³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guiebley dze rii!

³⁹ Blalaa zha farisé ne zienal ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho. ⁴⁰ Dzigo rëbchaa me:

—¡Zac guioog ro zho, per hor co dzigo laa grë quie rii csilo goolniew naa!

⁴¹ Zeene bdziñ me zaatne nieenpaa Jerusalén, psilo biab guieñe me, biin me gon me guiedz co, ⁴² rëb me:

—¡Prob to men Jerusalén! ¡Tebaa ye to nien niunbey to men ne needz guiebley rii lo to! Per na ib biende tow, masaque rzac to zig zha ne nioog lo. ⁴³ Na nagon laa dze co bdedle. Grë zha ne rlëë lo to, ible ziaad zho ziadsioog corral zho to, ni tib nëz tedlaade to lo zho, ⁴⁴ haxta guiab to ladznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

⁴⁵ Bdziñ me Jerusalén, güey me yadoo, psilo me blee me grëse zha ne noyun lgui ga, rëb me lo zho:

⁴⁶ —Znu zhobnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

⁴⁷ Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menguiedz, quiaguib zho dien zha gdeeda diidz gut zho me. ⁴⁸ Per rdziel zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

20

Bnabdiidz zho cho nac Jesús

(Mt. 21:23-27; Mr. 11:27-33)

¹ Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdziñ bla zha ne nac pxoz ne rnabey, grë zho bla maistr ley ni zla men ne nac men non lo menguiedz, ² rnabdiidz zho lo me dien cho nac me, cho rnabey me, zha nacne sca quiayun me. ³ Dzigo rëbchaa me lo zho:

—Ye naa laa naa gun tib wnabdiidz lo to. ⁴ Golnë dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” ⁶ Tel na dzieetsgaa ne, miechse pxeel Juan, grieequiadaque ne; zgoquie menguiedz ne, sac grëse zho rililadz Dios pxeel Juan.

⁷ Dzigo mazd lëë gdib mine been zho, rëb zho nand zho dien cho pxeel Juan. ⁸ Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

Xcuent zha ne pquianap liu

(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenbni me lo liun me. Blozh ga blediñ me liu co lo bla zha ne ran liu, dzigo laa me brieeg ga, zey me stib dan.

¹⁰ Zeene gol mëë ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiñ zho zho, blozh ga scase bzonëz zho zho. ¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiñ zho zho. ¹² Pxeelaque me stib zho, goc zho tson, scasaque been zho, haxta psiwee zho zho. ¹³ Quianie me tib mëëd,

rleynie me mëed co. Zeene gon me sca been zha co, rëbchaa me: “Mine naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me.”

¹⁴ Pex guien zho cho nac xpëed me, zeene gon zho men co, rëb zho: “jLëe zha qui nagon guiaannie liu rii! jGolgotsaa dziuut ne zho, zeena guiaana lo ne!” ¹⁵ Bnaaz zho xpëed me, güeynie zho me zaatne nac tib lad lo liu co, ga güeygut zho me.

jZha sca dien rzac to gon bizhuan liu co gza zha ntseeb co? ¹⁶ Ib tedsod lëe, zeene gbire me, znitlogazh me zho. Lozhse ga, cuedinga me liun me lo zla zha ne gundziina.

Zeene bin zho sca rëb me, rneechaa zho:

—jlb lic Dios qui, dziuunscad no!

¹⁷ Dze bui me lo zho, dzigo rëbchaa me:

—Per led znu lëe, zhobnee lo Xtiidz Dios: “Quie ne psëeb zha ne nozaa yu, ni nand zho lëepaa quie co nac mine rnazdziits yu.”

¹⁸ Ni quie co gon, zha ne tsietsobe low, zac zho zig tib ncuane rac tson tap lë; laa tel lëegaaw tsoe lad zho, zac zho zig tib ncuane die die rac.

¹⁹ Grë zha ne nac pxoz ne rnabey, ni grë maistr ley, hor co bien zho mine nac zho ga, bzeet me lo cuent co. jGocladz zho gagazh naaz zho me! Per bdzieb zho, niacntseeb grë miech ne ndxie ga. ²⁰ Dzigo mine been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios, ²¹ bdzin zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guiaannziuu luu lo zho, sinque niapse mine nac diidzli, mine rlu zha sëeb zho xnëz Dios, min co rnee luu lo zho. ²² Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguiel da ye.

²³ Bienga me racladz zho gungüet zho me, dzigo rëbchaa me lo zho:

²⁴ —jGolneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—jCho nu? jCho lë nu quia lo pes rii?

Pquiab zho rëb zho:

—Lëe rey Roma i, lëe lë me i quia lo qui.

²⁵ Dzigo rëb me lo zho:

—Mine riegual sca ycaa rey Roma, goldeeda lo rey Roma; scaquegaa mine riegual ycaa Dios, lo Dios goldeeda.

²⁶ Bzee zdoo zho gon zho sca ptsire me lo xtiidz zho. Mazd dzese bre zho, sac bdziel zho zha niungüet zho me; gocladz zho squi ndxie miech nxin me pe tib diidz, per brieelod niungüet zho me.

jPe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeyaque zla zha saducé lo Jesús. Nac zha saducé rliladzd zho zdzin dze grieeban miech; bdzin zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mëed, dzigo none betsaque zho ctsieelna wnaa co stib, zeena gap wnaa mëed ne guiaan xlugar xpëed zha ne gut ga.

²⁹ Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaand xpëed zho. ³⁰ Dzigo ptsieelna wnaa co stib bets ngutoo co. Blozh ga, gutaque zha co, pa së zho nsa mëed. ³¹ Ptsieelnaque me stib zho, goc zho tson, niice zha co psandaque mëed. Sca sca haxta bza gza gadzse zho ptsieelna me, ³² tibaque zeene yeque me laa me gut. ³³ Mine racladz no gacndion no, jchopaa dzigo gac tsiel wnaa co, zeene laa zho grieeban, ne sca gza gadzse zho ptsieelna me?

³⁴ Pquiab Jesús rëb me:

—Tiba, gacnan to ganle, lo guielmban riise rtsieelna miech. ³⁵ Zeene grieeban zho, zig nac zha ne yгаа guielnzaac gdziñ zho zaatne no Dios, led yedraa ga ctsieelna zho. ³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanj l me, mëed gac zho lo me. ³⁷ Laa stiba, gacnan to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Zeene sca rëb me, ga rlu ganle mban zha co. ³⁸ Sac tel me, nacd me xDios mengut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¡Cho xpëed nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¡Zha nac dien ne rnee zho tib xpëedaque rey David gac Men ne nacle diidz cxeel Dios ga? ⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieeda lozh gnaz naa grëse zha ne rlëe lo luu, csañ naa zho ladznia luu.”

⁴⁴ Gase ganle rlu, led scada; telne nli zha xtii David gac men co, ¡zha nac dzigo ne lëeque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedscuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdziel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob grol mezh zeene laa wagw rac. ⁴⁷ Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, ¡per ib tedsod nroob caxtigw ne yгаа zho!

21

Gon ne bdeed tib wnaa viud

(Mt. 24:1-2; Mr. 12:41-44; 13:1-2)

¹ Laa Jesús no len yadoo ga noseed me miech. Ga no me, gon me zha rdziñ grë zha ricw, nroob dimi rsañ zho len alcancí ne zob ga. ² Tibaque zeene bdziñ tib wnaa viud, tib men proba, ye me laa me psañ chop gaay win len alcancí co. ³ Zeene gon Jesús a, rëbchaa me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psañ grë zha qui. ⁴ Sac tel zha, dimi ne rianle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquiuin me, per laa me bloogona.

⁵ Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuane ngalguiee lena. Zeene gon mew, rëbchaa me lo zho:

⁶ —Niicle squitaa gon ran to niaaw niina, per dzziñ dze ne nitlow, dib nacsew. Ni stib quie qui guiaandraa zigne squi zhobxcuaaw i.

¡Nsin golsol!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¡poc dzigo gac mine bzeet luu ga? ¡Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne grieequia, guiab zho laa dze co bdzinle, guiab zho zha nac Men ne zëëble diidz ga cxeel Dios. ¡Ib gliladzde tow! ⁹ Zeene gon to pa lo ndxiedil tib guiedz, pa lo noyacgaa grë dilodox, ib gdziebde to. Ib none gac grë ncuuan co, per lega loxaque mine csilosew ga.

¹⁰ Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. ¹¹ Nèzrii nèzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuane glu zhan gbaa, nzian grë ncuuan co, ncuane ctseb miecha. ¹² Per ansraa gac grë ncuuan co, stsidil miech to, squiana zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa. ¹³ Ga nagon gdeeda diidz gnee to lo grë zha co, gacnan zho ganle cho nac naa. ¹⁴ Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to; ¹⁵ sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

¹⁶ Haxta pxoz to, xniaa to, bets to, grë menlidz to, grë zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co. ¹⁷ Grëse miech glëë gan to porne nac to zha ne no xnëz naa. ¹⁸ Nli stiche zho xquielmban to lo guidzliu rii, per, ¡ni tib guits guic to, grieelod zho gnitlo zho! ¹⁹ Tiblique sca golgac, sozite to lo naa, zeena yгаа to guielmban ndzon ne gneedz Dios.

²⁰ Zeene gan to igose guiedz Jerusalén ndxienap menguiib, nanle to len dze co laaw nitlo. ²¹ Grë zha ne no guiedz ne ngab Judé, none xoon zho tsie zho nèz yagui, ga tsietsolan zho. Zha ne no Jerusalén nu, none grieeniob zho. Grëgaa zha ne quia dziin dana, ib guiabd zho gbire zho lad guiedz. ²² Tib guielndox ne csiaab Dios gan grë miech rii len dze co, ga gac grë mine raquiet lo Xtiidz me ted zho. ²³ ¡Prob grë men wnaa ne lëëtse len dze co zoney xpëed, men ne quianiegaa mëed ne bii radz! ¡Mbandox ted miech, guielndox ne csiaab Dios gan zho guiedz rii! ²⁴ Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grë zha zit co, sëëb gunchen Jerusalén; haxta gdziñ dze ne gnabey Dios grieë zho.

Ziaad Jesús stib

(Mt. 24:29-35, 42-44; Mr. 13:24-37)

²⁵ Nzian grë ncuane glu lo ngbidz, glu lo mëë, glu lo mel. Mbanse gac miech, zdiebdox zho zeene gon zho bidox ne tso tsasoli nisdoo. ²⁶ Nzian zha ne haxta scow zho lo dzeb, zeene laa zho gan grëtaa ncuane noyac lo guidzliu len dze co. Grë ncuane no zhan gbaa, nèzrii nèzrec gaca. ²⁷ Horco bii zan zho ganle zeene laa naa zialzëëb tib lo xcow con grë guielndzon, con grë poder ne rap naa. ²⁸ Zeene gan to laa grë ncuuan co rsilo noyac, nley golco zdoo to; ¡sac hor co laa Dios ycaania to!

²⁹ Golzoob cuidad ganle zha nac yag guigw, beelzegaa pe stib yag. ³⁰ Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëë nëëg ziaadgaxle. ³¹ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. ³² Gneli naa lo to ganle, nzian grë miech ne mban niina, bii zan zho zeene laa grë ncuuan co gac; sac ible ncuane gaca. ³³ Zdzin dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac. ³⁴⁻³⁵ ¡Nsin sca golso, zaacse golgac! ¡Adel gal dze ne laa naa guial, lel lo grë ncuane ndzinlid, lel lo guielgonziu, lel lo grë zhgab ne rac lo guidzliu rii no to, zigne gun grëraa miech! Sac gon, lega naclew glanso naa. ³⁶ Nligaa nsin golso. Tibaque glnab lo Dios, gacnien me to peet gacde to lo grë guielnë co, ine peet xtolde to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdzin len yadoo, parne yquiaadiag zho zhiwseed me. Guidze sca rseed me zho, laa pcow liu riebëz me cho Gui Oliv.

22

Bnediidz zho dien zha gnaaz zho Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad. ² Grë zha ne nac pxoz rnabey ni grë maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid mengüedza; sac rdzieb zho gacntseeb mengüedz.

³ Tib dzew, laa mendox bzëeb zdoo Judas Iscariot, tib zha ne rzëniepaa me ga, ⁴ rias Judas güey Judas lo grë pxoz rnabey co, lo grë men ne zo lo zha ne rquianap yadoo, rëb Judas zha csan Judas Jesús ladznia zho. ⁵ Zeene bin zhow per nli rley zho, nacne biaan zho diidz quizh zho Judas. ⁶ Dzigo desde hor co psilo Judas noguib Judas dien zha gdeeda diidz guiend miech csan Judas me ladznia zho.

Dowxtseenie Jesús xpëedscuel me

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, len dze ne sca row zho quietxtil ne rquiad ncobi lad, ni rut zho carner yeen ne rowxtsee zho. ⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co. ⁹ Dzigo bnabdiidz zho lo me, rëb zho:

—¿Pa lo racladz luu guio no guiodziunlo now?

¹⁰ Rëbchaa me lo zho:

—Goltsie Jerusalén. Zeene sëëb to lad guiedz, ga gan to tib mgui nzobyan tib re nis, goltsienal zhits me. Yu ne gan to sëëb me, ¹¹ golguiab lo bizhuan yu co: “Znu në Maestro, ¿pa len yu me gneedz luu gac zaatne gowxtseenie me xpëedscuel me wdze rii?” ¹² Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëedscuel me. Xtsee co no zho, ¹⁵ zeene rëb me lo zho:

—¿Blactaa gon pquiambéz naa gdzin dze rii, znu gowxtseenie naa to nawdze rii, ansraa csacsi miech naa, gut zho naa! ¹⁶ Lëë lultm vuelt nu gon teed naa lni Pascw rii, haxta gdzin dze ne laa Dios csilo gnabey, dze ne glupaa ganle zha nac xtsee rii.

¹⁷ Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiin vin rii gza to. ¹⁸ Gneli naa lo to ganle, lëë lultm vuelt nu guie naa vin rii, haxta gdzin dze ne laa Dios csilo gnabey.

¹⁹ Ni bzhen me quietxtil, bdeed me xquizh lo Dios, blozh ga beengrol mew bdiiz mew lo zho, rëb me:

—Golquiina, rriequia gon lëë xcuerp naa i, sac gon znu gun zho xcuerp naa parne csilaa naa to grë to. Zeene gdeedtaaw diidz, golgun min rii parne glu to ganle tibaque rsoladz to naa.

²⁰ Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rriequia xchen naa nu nac vin rii, ren ne gzhiee xcuert to, ren ne tso firm trat co par glu nona. ²¹ Ni gacnan to ganle, lo mezhaque nu gon zob zha ne tsielo naa ladznia zha ne gut naa. ²² Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, ¿per probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien cho nac zha ne rzeet me ga; ²⁴ haxta psilo zho nodiidiidz zho dien cho gac zha ne gacnon lo zho. ²⁵ Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhi zho zho, per zha gunraa miech, lëë gdib rxecw zho, haxta rnee zho nroob quiayun zha co xyudar guiedz. ²⁶ Sangué to gon, zha ne gnabey lo to, none guien zho gac zho zig tib ngundziin lo to; zha ne racladzgaa gacnon, none guien zho guiaanwin zho.

²⁷ Lo guidzliu rii, zha ne rnabey, rzobse zho, zha ne nac ngundziin, zha co rdziib ncuane row zho. ¡Sangue lo ne, led scad naca! ¡Golwi ganle, tib ngundziin nac naa lo to!

²⁸ 'Tose goc zha ne tibaque gocnie naa lo grëtaa mine bdeed naa len dze rii. ²⁹ Gane niina, laa naa gneedz tib guielnzaac nroob lo to yгаа to gdziñ to zaatne bneedz Pxoз naa gnabey naa; ³⁰ zeena ine znu tipse zioob ne lo xmez h naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

³¹ Horcoque bnee me lo Pedr rëb me:

—Bina ganle Pedr, racladz Satanás gon ycuuib ma to, zigne run zho zhobxtil. ³² Per laa naa bnable lo Dios, gacniñ me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

³³ Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, ¡telne gutгаа zho luu, zaatne guet luu, ga guet naa!

³⁴ —Bina ganle Pedr —rëb Jesús—. ¡Guieel riigazh gon, gardle ycuedz gall, tsonle vuelt rëb luu runbeyd luu naa!

³⁵ Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuane gow to, per ni lab to bide to. ¡Pe beenfalt ncuane nquuin to hor co?

Pquiab zho rëb zho:

—Beenfaltedew.

³⁶ Dzigo rëbchaa me:

—Horco nagon peet bide to, sangue niina zha ne quianie dimi, zha ne quaniegaa ncuane gow zho, none güey zhow. Niina nagon none laa to yquuin spad. Zha ne quianieda, none maase tib xab zho cto zho, si zho tiba. ³⁷ Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

³⁸ Pquiab zho rëb zho lo me:

—¡Bui ganle laa chop spad nule!

Dzigo rëbchaa me:

—¡Mazd peet gnedraa naa lo to!

Bzodiidznie Jesús Pxoз me Getsemaní

(Mt. 26:36-46; Mr. 14:32-42)

³⁹ Blozhse ga, laa me brie zie me nëz Gui Oliv, zaatne rietaque me; zienalaque gza xpëedscuel me zhits me. ⁴⁰ Bdzin zho ga, rëbchaa me lo zho:

—Golnab lo Dios gacniñ me to, zeena yquuild menodox to.

⁴¹ Bzë me spalal, bdzin me zig zaatne riab tib quie ne rchel ne nia ne, dzigo ga pquiitsgzhib me, psilo me bnab me lo Dios, ⁴² rëb me:

—Papá, laa naa rnab lo luu, telne zala zdoo luu, psilaa naa lo grë guielnë rii. Per telne grieeloda, mine gnëtaa luu sca gaca.

⁴³ Horco biet tib anjl gbaa bdzin pchoobladz zdoo me. ⁴⁴ Mban rac me laa me nozodiidznie Pxoз me, per hor cole mazdraa rnab me lo Pxoз me; lo guielnë ro co haxta rzonis me, masaque zëbdzuun grë nis co lo me zootle ren.

⁴⁵ Zeene laa me guso ga, bdzin me zaatne biaan xpëedscuel me, gon me gzase zho laa zho nixgues. Ye zho mban rac zho, lo guielnë co bguudz zho mcaal. ⁴⁶ Dzigo pcuaan me zho, rëb me lo zho:

—¡Nixgues to ye? Lëda i gon, ¡golsobna! Golnab lo Dios, gacniñ me to, zeena yquuild menodox to.

Bnaaz zho Jesús

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

⁴⁷ Laa Jesús quianeeque, zeene laa Judas bdziñ bdzinnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

⁴⁸ —¡Judas! —rëb me—. ¿Con tib bzhid dzigo lëë glu luu naa lo grë zha qui?

⁴⁹ Zeene bien xpëëdsuel me, me zienaaz grë miech co, rëbchaa zho lo me:

—Maestro, ¿zha dziuuñ ne? ¿Pe zdeed spad no zho?

⁵⁰ Znuse biet tib zho pchel zho tib nia spad, pchug zho diag tib xmoz men ne nac pxoz nroob. ⁵¹ Dzigo bnee Jesús lo zho rëb me:

—Golsaan zho, ndzinli golgac.

Horco wbig me bzhen me diag zha co, beenguiac mew, lëëtse miñ derecha.

⁵² Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menguedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan? ⁵³ Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë miñe racladz to grë to mendox, niina laaw gac.

⁵⁴ Horco wbig be zho bnaaz zho me, laa zho zienie me nëz lidz men nac pxoz nroob.

⁵⁵ Bdziñ zho lidz men co, bre zho xley me, bzëëg zho gui, laa zho no nodzëë zho. Ye Pedr maase zit zit nal Pedr, laa Pedr bdziñ ga; laa Pedr wbig bzob lo zho ga. ⁵⁶ Zeene gon tib wnaa ne quia xtsiin men co laa Pedr zob ga, dze rwi me, tibaque rëb me:

—¡Ye mgui qui gon rzënie men ne blansonie to i!

⁵⁷ —¿Naa ye? —rëb Pedr—, ¡per ni runbeyd naa men qui!

⁵⁸ Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëë ye luu nacie men ne bgaa i?

Scasaque bneelid Pedr. ⁵⁹ Wdzeelaaque goca, zeen laa stib zho brieequia, rëb zho:

—Lëë tib zha ne nacie men qui nu gon. ¡Rlu zha galilé nac zho!

⁶⁰ Pquiab Pedr, rëb Pedr:

—¡Riend naa gon, pe nacne squi rnee luu!

Gardle lozh gree diidz co ro Pedr, zeene laa tib gall pcuedz. ⁶¹ Gall co nocuedz, zeene ptsire lo Jesús, dze bui me lo Pedr; dzigora psoladz Pedr zeene rëb me lo Pedr: “¡Guiel riigazh gon, gardle ycuedz gall, tsonle vuelt rëb luu runbeyd luu naa!” ⁶² Mbanse rac Pedr. Brie Pedr ga, psilo Pedr biin Pedr guieñe co.

⁶³ Grë zha ne zopaa quianap Jesús, nzian grë ncuane run zho me, psilo zho noyunguzee zho me. ⁶⁴ Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ¿bnë sca dien cho ga bdiñ luu?

⁶⁵ Nzian grë ncuane rgoredz zho lo me.

Güeynie zho Jesús lo zhiwxtis zho

(Mt. 26:59-66; Mr. 14:55-64; Jn. 18:19-24)

⁶⁶ Zeene biini liu, pcaalsa grë men ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdziñ me ga, bnaabdiidz zho lo me rëb zho:

⁶⁷ —Bnë lo no dien, ¿pe lëë Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëë men co nu nac naa, gliladzde tow, ⁶⁸ tel pe gnabdiidzga naa lo to, ctsirede to low; sac gliladzde to miñe nac diidzli. ⁶⁹ Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nëz derecha, men nroob ne rrieelo run grëse ncuane racladz me.

⁷⁰ Horco grëse zho pquiab, rëb zho lo me:

—¿Xpëëd Dios dzigo lëë nac luu?

Dzigo rëbchaa me:

—Tozhal name rnee, nli Xpëëd me nac naa.

⁷¹ Horco rëb zho:

—¡Pe mazdraa textigw ne racladz ne! ¡Laa ne bdzionle ganle mezhal rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

¹ Horcogazh pcaanie zho Jesús nëz, bdziñnie zho me lo Pilat, men ne nac gobernador ne nzoob zha Roma ga. ² Ga psilo zho nzian grë ncuaañe rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquuil me menladz no gacntseeb zho. Rnee me lo zho nonguielda gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

³ Dzigo bnabdiidz Pilat lo me, rëb Pilat:

—¡Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¡Ni tib dol rapd men rii!

⁵ —¡Zha gapd me dol? —rëb zho—. Ni zaatne zieetaa me noquuil me miech gacntseeb zho lo zhirey ne. ¡Dible nëz Judé nu güeyted me; desde nëz Galilé briece me ziaad me haxta nu!

⁶ Gon Pilat sca rëb zho, dzigo bnabdiidz me dien pe zha Galilé nac Jesús. ⁷ Zeene gocnañ me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; læëtaque len dze co laa Herod no Jerusalén ga.

⁸ Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gon me pe tib milagr. ⁹ Psilo Herod nzian grë ncuaañe rnabdiidz Herod lo me, per ni tib lo wnabdiidz co ib ptsired me. ¹⁰ Zeene gon Herod rquiaabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, ¹¹ nacne lel psilo Herod grë xmenquiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. ¹² Glo ib rdzieeld xtiidz Herod grop Pilat, laa dze co laa zho psilo bneewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menguedz, ¹⁴ rëb Pilat lo zho:

—Laa zho biad-zoob xdemand men rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me.

¹⁵ Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaañe guiab ne rieguial guet me. ¹⁶ Mine gaca, laa naa gnabey ted me tib caxtigw, lozh ga dzigo laa naa csilaa me.

¹⁷ Nac costumbr, gzobse lni Pascw rsilaa zho tib zha ne no xcuent lo wxtis. ¹⁸ Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me! ¡Barrabás psilaa!

¹⁹ Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo. ²⁰ Bguib Pilat dien zha nrieelo nsilaa me Jesús, ²¹ per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

²² —Per, ¡pe nacne gnabey naa yquia me lo cruz? —rëb Pilat stib—. ¡Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc minë racladz zho. ²⁴ Racse Pilat, laa Pilat bdeed diidz. ²⁵ Blozhse bnabey Pilat psilaa zho Barrabás, zha ntseeb ne no ladzguuib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nèz zienie zho me, bdzieel zho tib men Ciren lë Simón wbire lo dziin dan, pcutëz zho men co, bnabey zho me bi me zhiczuz Jesús; nalse me zhits Jesús, laa zho zienie Jesús. ²⁷ Miech guizhiu ne zie ga, ndal grë men wnaa psilo zho roon zho no zho xquielnë me, ²⁸ dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; ²⁹ sac zeene gal dze co grë men wnaa ne quianie mëed, ziab zho: “Mazd wenaque zie zha ne quianied mëed, zha ne nand zha radz mëed, zha ne niaadga gap mëed.” ³⁰ Horco grë miech, laa zho gnab tebaa zha pixche grë gui guiaan zho zhana. ³¹ ¡Golwi ganle, telne znutaa minë nodeed naa nac naa zig tib yag nguia, pelej to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz. ³³ Zeene bdzin zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhiczuz zho bzo tib nèz cue zhiczuz me. ³⁴ Lo cruz co quia me, zeene nguiedz bnee me rëb me:

—¡Papá! Ncuane quiaayun grë miech rii nu, bzhiguiel gunquizhd luu zhow; sac riend zho pe run zho.

Gza menguib ne bdzin ga yquiaanap me, hor co tib tib zho bzhense zho tib lë xab me, laa stiba bio zho rif. ³⁵ Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiac me, stib miech scataa bla me. ¿Pe rac me na ne riete me i? ¡Guet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

³⁶ Wbig menguib co rdeed zho nziu bla guie me, rzhidznie zho me, rnee zho:

³⁷ —¡Zhirey zha Israel name nac luu! Psilaa luu lo guielnë qui nazho.

³⁸ Glaa guic zhiczuz me quia choplan diidz ne pquiaa zho, rneew: “LËË ZHIREY ZHA ISRAEL NU.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rëb luu lëë, luu nac Men ne zëëble diidz ga cxeel Dios! ¡Blu nazho nli men co nac luu, psilaa ne lo guielnë rii!

⁴⁰ Horco pquiab stib zha co, rëb zho lo zho:

—¡Psioog ro luu! ¿Pe niicle niina ne laa luu guetle ib rdzieebd luu Dios? ⁴¹ Bien ganle, ¡tel ne ible min rii riogual ne grop ne, nu nodizh ne grë guielntseeb ne bdziun ne; sangue men qui, peet dol rapd me!

⁴² Dzigo rëb zho lo me:

—¡Bzhiguiel zeene guiaad luu gnabey luu, ib csand luu naa tib lad!

⁴³ Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoza naa.

Gut Jesús

(Mt. 27:45-56; Mr. 15:33-41; Jn. 19:28-30)

⁴⁴⁻⁴⁶ Gol groldzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biao biini stib. Horco pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co brie ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grolta goca.

⁴⁷ Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—¡Ne nlipagaa tib men peet xtold goc men qui!

⁴⁸ Scaque grë miech ne goclo ga, zeene gon zho zha blozh me, biabguielnë zho, mbanse rac zho laa zho wbi ga. ⁴⁹ Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brie me nëz Galilé, grë zho laa zho ndxiese tib lad rwi zho.

Bgueets Jesús

(Mt. 27:57-61; Mr. 15:42-47; Jn. 19:38-42)

⁵⁰ Lad grë zha ne nac zhiwxtis men Israel ga, no tib men guiedz Arimaté lë me José; lëe guiedz co ndxie xtan Judé. Tib miech wen nac me, noxco me mine rnabey Dios, ⁵¹ ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. ⁵² Nacne hor co güey me lo Pilat, bnab me diidz bey tselit me xcuerp Jesús lo cruz. ⁵³ Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

⁵⁴ Lëe bdze dze co no zho xco ne laa dze ne gdziiladz zho lo dziin sëeb. ⁵⁵ Grë men wnaa ne sca nacgza grë zha ne brieenal zhits me zeene brie me nëz Galilé ga, ye zho güeynal bgueets me, gon zho pa lo bio me. ⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëeb zho lad xcuerp me; dzigo laa zho bdziiladz zigne rnabey ley no gun zho.

24

BRIEBAN JESUS

(Mt. 28:1-10; Mr. 16:1-8; Jn. 20:1-10)

¹ Laa zeene gol dze ne rzobni zhmal, silgaw laa gza men wnaa co brie, bi zho grë zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble; ³ bzëeb zho len baa gon zho, niicle xcuerp me guiendle ga. ⁴ Laa zho zo ga, rien zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop men bgui zole lo zho ga, masaque riaazbel lad xab grop men co. ⁵ Horco per nli bdzieb zho, lo dzeb co mine been zho laa zho pquitsgzhib haxta bdziñ lo zho lo liu. Dzigo rëb grop men bgui co lo zho:

—¡Pe nacne ziaadguib to men mban zaatne rio mengut? ⁶ ¡Laa me brieabanle! ¡Guiendle me nu! Golsoladz ganle zha në me lo to len dze ne no me nëz Galilé, ⁷ në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieeban.”

⁸ Dzigoraa psoladz zho, nligaa sca bnee me, ⁹ hor co lëëlëd güeynie zho diidz lo gza tsiiptib zha ne nac xpëedscuel me, ni lo grëraa zha ne nacgza zho ga. ¹⁰ Nzianlaa nac men wnaa co, lad co no Marí Magdal, no Zhuan, ni Marí ne nac xniala Jacob.

¹¹ Niicle bzodiidz zhow lo xpëedscuel me, per con rnee zho led ncuaan gacd ga, ni lalnu bliladzd zhow. ¹² Tibaque zeene brie Pedr, rias Pedr laa Pedr zie nëz ro baa. Bdziñ Pedr bdiixlo Pedr len baa co, gon Pedr nligaa, ¡loxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

Gon zho Jesús nëz Maús

(Mr. 16:12-13)

¹³ Dze co brie chop xpëedscuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdziñ zho ga. ¹⁴ Nëz no zho nozodiidz zho grë mine pteed miech Jesús ga, ¹⁵ tibaque zeene bien zho laa zho bgaa tib lo men co, gocgza me zho laa zho no nëz, per, ¡ib biend zho lëe Jesús ga! ¹⁶ Ranlo zho laa me ziegza zho ga, per

ni lalnu beenbeyd zho ne mew, sac zig nac zeen pe tib ncuane ptse lo zho. ¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guieñe no to?

Dzigo bzodze zho. Mban rac zho, haxta lo zho rlu nroob guieñe no zho. ¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuane goc Jerusalén len dze rii? Grëse zha ne name güey Jerusalén, gocnana.

¹⁹ —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios. ²⁰ Per lel brie grë pxoz rnabey, grë zho zha ne nac wxtis, bnaaz zho me, bnaab zho gut me, pquiaa zho me lo cruz. ²¹ Tibaque rdzieets no, me niac tib men ne nsilaa zha ladz ne ladznia zha Roma. Pasëse min co niac, nadzele rac tson ngbidz beet zho me. ²² Per riend no dien zha nac cuent co, sac nasil güey bla men wnaa ne nacgrë no ro baan me, ²³ zeene wbire zho bzodiidz zho lo no në zho guiendle xcuerp me len baa, loxaque chop anjl brieequia lo zho ga, rëb anjl co mban me. ²⁴ Blozh ga, güeyaque bla zha bgui ne nacgrë no, gon zho nligaa guiendle xcuerp me ga.

²⁵ Dzigo rëbchaa me lo zho:

—¿Nadzpaa ncow nac guic to, nadzpaa ndip nac zdoo to! ¿Rliladzde to grë mine dzigo lëe bzeet zho padzeela ted Men ne nole diidz ga cxeel Dios? ²⁶ Bzeetle zha co name ible no csacsi miech me, antes ne gbire me lo guieñdzon ne no me.

²⁷ Dzigo psilo me bnee me lo zho pa lo zhobnee grë mine bded me ga, psilo me desde grë mine pquiaa Moisés, haxta grë mine pquiaa grëraa zha ne biadteed xtiidz Dios. ²⁸ Sca no zho nëz laa zho bdzin Maús. Bdzin zho ga, rac me zig nac zeene tib ted me, ²⁹ dzigo quia zho rnab zho lo me cuëz me ga, sac laa dze bdzele, zhile laa liu ycow. Nacne blëz me.

³⁰ Laa zho zob lo mezh gowxtsee zho, bzhen me quietxtil bdeed me xquizh lo Dios, blozh beengrol mew bdeed mew lo zho. ³¹ Dzigoraa zig nac zeene bzhiat lo zho, laa zho beenbey me. Per par nianraa zho me, znuse bnit me lo zho, gondraa zho me. ³² Horco per nli rley zho rnee zho:

—Con razon zeene sca ziaadgza ne me nëz nonee me lo ne zha raquiet lo Xtiidz Dios, masaque tib guieñbley nroob ne biaadnie xcodiidz me zdoo ne.

Sca rnee zho, sac bien zho bdzin tib guieñbley nroob zdoo zho, zeene sca nonee me lo zho. ³³ Lëëldaque brie zho ga, bio zho nëz wbire zho Jerusalén stib. Bdzin zho lo gza tsiiptib zha ne bzëniepaa me ga, ni grëraa zha ne nacgrë zho, ³⁴ rëbchaa zha co lo zho:

—¿Tebaa gan to ganle nli brieaban xmaistr nel! ¿Laa Pedr gonle me!

³⁵ Psiloque zho grop zho bzodiidz zho zha gon zho me no zho nëz, per haxta horne no zho xtsee, zeene laa me beengrol quietxtil dzigoraa beenbey zho me.

Brieequia Jesús lo grë xpëëdscuel me

(Mt. 28:16-20; Mr. 16:14-20; Jn. 20:19-23)

³⁶ Lëëtaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rëb me lo zho, peet tsieniedraa guic zho. ³⁷ Lel rdzieb zho, haxta rzhidz zho lo dzeb co, sac rëb zho bod ndziin ga ran zho. ³⁸ Dzigo bnee me lo zho rëb me:

—¿Pe nacne rdzieb to? ¿Pe nacne rliladzde to naa nu? ³⁹ Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav. ⁴¹ Per nli rley zho, rzee zdoo zho, per rliladzdaque zho dien pe nlipaa lëe me ga. Gon me sca rac zho, nacne bnaab me ncuane gow me lo zho. ⁴² Dzigo bdeed zho tib lë mel bguiee lo me, ⁴³ bnaaz me mel co, squi ndxie zho gon zho dow me ma. ⁴⁴ Dzigo rëb me lo zho:

—¿Pe ib rsoladzde to nile naa laa grë min̄ rii no gac? Led ni naa lo to, grëse mine bzeet Moisés, grëse mine bzeet grë zha ne biadteed xtiidz Dios, mine raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienpaa zho zha zhobnee lo grë guits co, ⁴⁶ rëb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson̄ ngbidza, laa naa grieegan. ⁴⁷ Rneew, Jerusalén nu, nu csilo gacnan̄ miech ible none csaan zho xquiełntseeb zho, gnalo zho naa, parne gun̄ Dios zho perdon. ⁴⁸ Ni to gon̄ gan̄le grëse min̄ co, goca. ⁴⁹ Na len̄ dze ne ziaadaque nu, laa naa cxel̄ Espíritu Sant gacniē to, sac ib scale nac xtiidz Pxoꝝ naa. Per guiabde to niinaga grieē to tsienee to lo miech, Jerusalénse nu gołcuēz, haxta nieeda yгаа to poder ne gneedz Espíritu Sant lo to.

⁵⁰ Zeene goł dze ne laa me guey gbaa, dzigo güey me güeynie me zho nēz Betain. Bdziñ zho ga, blis me nia me, psilo me noyunlay me zho. ⁵¹ Laa me quiayunlay zho, tibaque zeene laa me bias lo guidzliu, įgonlo zho laa me bzoquia gbaa!

⁵² Horco pquitsgzhīb zho liu, beennon zho me, rnee zho grë diidz ndzon lo me; blozh ga in̄e rley zho laa zho wbi ga, bdziñ zho Jerusalén stib. ⁵³ Psilo zho gzataa dze rie zho yadoo roolnie zho Dios, rdeed zho xquizh lo me.

XTIIDZ NDZON DIOS MI_{NE} PQUIAA JUAN

¹⁻² Jesús, men ne nac Diidz Ndzon, nole me zeene biao grëtaa ncuaane no; lo Dios no me ni Diosaque nac me. Notaque me, tibaque nac me: me ni Dios. ³ Me bzaa grëtaa ncuaane no, tsod ncuaane lega scase niaan; sac me bzaaw grësew. ⁴ Ladznia me no guielmban ne gdziñd dze lozh, nac guielmban co zig tib biini ne rziini lo miech. ⁵ Me nac biini ne quiaziini zaatne nac lo guielcow, ni rriee lod guielcow ctsew lo biini co.

⁶⁻⁷ Bio tib mgui brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús. ⁸ Led Juand nac biini, sinque loxaque biaad Juan biaadlu Juan Jesús, men ne nac biini co. ⁹ Bdziñ dzew laa Jesús biaad, ni niina me nac men ne noziini lo grëse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me. ¹¹ Per ni menladz me, niicle ne lopaa zho bdziñ me ib gondzed zho me; tib chop zha ne blëzlo me. ¹² Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios. ¹³ ¡Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁴ Zeene bdziñ dze ne laa men ne nac Diidz Ndzon ga goc miech biaad me lo guidzliu, grop lo no bdziñ no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mëed lo Dios, men ne nac Pxoze.

¹⁵ Zeene bzeet Juan Bautist me lo miech, tib vuelte haxta blu Juan me lo zho, rëb Juan: “Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶ Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me. ¹⁷ Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sangue niina ne laa Xpëed me Jesús biaad, men co biaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús
(Mt. 3:11-12; Mr. 1:7-8; Lc. 3:15-17)*

¹⁹ Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan. ²⁰ Dzigo bneeli Juan lo zho, rëb Juan:

—Golgacnan ganle, led naad nac Men ne quiambëz to ga cxeel Dios.

²¹ —¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lí naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

²² —¿Cho dzigo nac luu? —rëb zho—. Bnë dien cho nac luu; sac gon ib none gdziñnie no tib xtiidz luu lo zha ne pxeel no.

²³ Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zëeb tsi tib mgui dan rnee me lo miech: ¡Golgun nguudz zdoo to, sac gon ib ziaad men ne rnabey nel!”

²⁴ Horco laa zha ne pxeel zha farisé pquiab, rëb zho lo Juan:

²⁵ —Telne led luud nac Men ne zëëble diidz ga cxeel Dios, niicle led luud nac Lí, niicle nacdga luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

²⁶ Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to. ²⁷ Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

²⁸ Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquieip zho me.

¿Cho nac Jesús?

²⁹ Biet stib dzew, laa Jesús bdziñ zaatne no Juan ga. Zeene gon Juan me, rëbchaa Juan lo grë miech ne ndxie ga:

—¿Golwi ganle, lëë men qui gon csilaa miech lo grëtaa xtol zho! ¡Me gac zig tib carner yeen ne guet tsogon lo Dios par guiaanmbe miech lo dol! ³⁰ Lëë men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.” ³¹ Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

³² Dzigo bzodiidz Juan lo zho, zha gonlo Juan biet Espíritu Sant gbaa, rlu me zigne rlu tib palom blëz me guic Jesús.

³³ —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu quiet Espíritu Sant gbaa cuëz me guic tib mgui ne nochoobnis luu, dzigo gocnan lëë men co nac men ne rxeel Espíritu Sant zdo miech.” ³⁴ Gonlo naa blëz Espíritu Sant guic me; gane nanween naa ne nli Xpëed Dios nac me.

Zha ne glopaa goc xpëedscuel Jesús

³⁵ Biini liu co, laa Juan zoque ga zonie me chop xpëedscuel me. ³⁶ Ga zo me, gon me laa Jesús zieded ga; dzigo rëbchaa me lo zho:

—¿Golwi ganle! ¡Lëë men qui gon nac Xcarner yeen Dios!

³⁷ Zigne bin zhow, laa zho zienal zhits Jesús. ³⁸ Zeene ptsire lo me, gon me laa zho nalte zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrës lë tib zha ne güeynal zhits me ga; lëë Ndrës co nac bets Simón Pedr. ⁴¹ Dzigo zigne brieë Ndrës ga güey Ndrës güeyguib Ndrës Simón. Bdziñ Ndrës rëb Ndrës lo Simón:

—¿Nasi gon laa no bdzion Men ne nacle diidz ga cxeel Dios!

⁴² Dzigo güeynie Ndrës Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

⁴⁴ Zha Betsaid nac Lip, ni zha coque nac Ndrës grop Simón.

⁴⁵ Dzigo güey Lip güeyguib Lip Natanael; rëb Lip lo Natanael:

—¿Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëë me ga nac Jesús, xingan José!

⁴⁶ Pquiab Natanael, rëb Natanael:

—¿Nazaret ye? ¿Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie. ⁴⁷ Squi ziaad Natanael, zeene gon Jesús Natanael rëbchaa me:

—¿Golwi ganle, lëë zha qui gon nac merpaa zha Israel, sac mesi ib rquidied me!

⁴⁸ —¿Zha nacne runbey luu naa? —rëb Natanael.

Pquiab me rëb me:

—Gole naa beenbey luu, dzigora bredz Lip luu. Zeene zob luu tib zhan yag guigw, hor co gon naa luu.

⁴⁹ Rzee zdoo Natanael, rëb me lo Jesús:

—¿Nlique nagon luu nac Xpëed Dios! ¿Luu nac zhirey zha Israel!

⁵⁰ Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¿Naraa ganle gan luu ncuane mazdraa nroob!

⁵¹ Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhial, zlupaa grë xanj Dios, zha ne ziad-zëëb zha ne ziequia, quiayuñ zho dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, ² ni bredz zho me; nacne bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvín men rii blozh. ¿Guiendraa pe quiiz zho!

⁴ Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne gacnañ miech cho nac naa.

⁵ Niicle sca rëb Jesús lo me, güey me lo zha ne quiaguiiz vin ga rëb me lo zho:

—Mine gnabeytaa me to, golguna.

⁶ Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena.

⁷ Dzigo bnabey Jesús zha ne rguiiz vin ga pcodzëë zho nis len gza guies co. ⁸ Blozhse guiel guiel pcodzëë zhow, rëbchaa me lo zho:

—Golcúee niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin. ⁹ Ni lalnu ib güeynied guic men co pa brieë vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelna ga, rëb me:

¹⁰ —¿Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lel naraa bnabey luu brieë vin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedscuel me, zeene bdziñ now, hor co bliladz no nli me nac Men ne zëëble diidz ga cxeel Dios.

¹² Zeene blozh guieltsieel co, laa no wbiere guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

Blee Jesús grë zha ne noyū lgui len yadoo

(Mt. 21:12-13; Mr. 11:15-18; Lc. 19:45-46)

¹³ Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brieë Jesús zie me nëz Jerusalén.

¹⁴ Bdziñ me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiil,

zha ne no wto palom ne, haxta zha ne rtsëë dimi ndxie ga. ¹⁵ Dzigo bzhixcuua me tib lë doo zig ríaa dooguid ne rcaa ma, bzhen me doo co bençxoon me zho ga grë xma zho; blozh ga, ptiixche me xmez h zha ne notsëë dimi ga, nëzrii nëzrec blaal me xtimi zho.

¹⁶ —¡Niinagazh golcúee grë ncuaan qui nu! —rëb me lo zha ne rto palom—. ¡Golguien ganle lidz Pxo z naa nu! ¡Nacda yu lgui parne tso to wto nu!

¹⁷ Dzigo psoladz no zha ziaad lo Xtiidz Dios, zaatne rnee: “Rbinladz guic naa, sac ne nligaa racladz naa yquiaanap naa lidz luu.”

¹⁸ Blalaa zha non lo mençgüedz Israel, zeene gon zho sca bençxoon me grë miech co, wbig zho lo me rëb zho:

—¿Cho nac luu ne squitaa noyuu luu grë ncuaan qui? ¡Been tib milagr, dzigo zlidadz no men rnabey nac luu!

¹⁹ —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

²⁰ Pquiab zho rëb zho:

—¡Ncuaane gliladzdraa no rnee luu! ¡Len choopxopraa iz name bíaa yadoo rii! ¿Zhazhe guu luu, tsonaque ngbidz gzaa luuw stib?

²¹ Per zeene sca bnee Jesús lo zho, xcuerp me ga nac yadoo ne bzeet me. ²² Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

²³ Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios. ²⁴ Per ib pxend me lo zho, sacne nanwen me zha nac zho tib tib zho. ²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoo zho.

3

Jesús ni Nicodem

¹ Ziecowle liuw, bdziñ tib zha farisé lë Nicodem zaatne rbëz Jesús; tib zha non nac me lo mençgüedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grielod gdziñ zho zaatne rnabey Dios.

⁴ Pquiab Nicodem, rëb Nicodem:

—¿Gal zho stib ye? ¿Zha grielo gal miech stib? Tib zha ne nacle mengol, ¿niacxe zrieelo sëëb zho zdoo xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grielod sëëb zho zaatne rnabey Dios. ⁶ Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. ⁷ Gacxe waa, gzeed zdoo luu znu rne naa: “Grëse miech, ib none gal zho stib.” ⁸ Nac cuent rii zig nac me ne rtop xcow, zeene rriee me, nëzrii nëz rec zie me, ron luu razh zhoob me; per rand luu dien pa nëz zie me dien pa nëz ziaadgaa me. Scaque nagon nac zha ne ral stib, grielod guien miech zha rnabey Espíritu Sant lo xquielmban zho.

⁹ —Riend naa zha rnee luu —rëb Nicodem—. ¡Riend naa dien zha grielo gac grë mine rnee luu i!

¹⁰ Rëbchaa Jesús:

—¿Riend luu ye zha rne naa? ¡Men rseed miech name nac luu lo mençgüedz Israel! ¹¹ Mine rne naa nu ncuaane rien naaw, ncuaane gon naaw, ni riende to zha naca. ¹² Telne riend luu zha nac grë mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa grë ncuaane rac gbaa?

¹³ Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëë men co nu nac naa. ¹⁴ Ni zigne pquianga Moisés

tib mee| brons tib guic yag zeene nonie me zha Israel dan zit co; scaque none yquianga naa tib lo yag, ¹⁵ zeena grëse miech, zha ne gbig dib zdoo zho gnalo zho naa, zгаа zho tib guie|mban ne gdziñd dze lozh. ¹⁶ Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zгаа zho tib guie|mban ne gdziñd dze lozh; led yed zho nitlo. ¹⁷ Laa Dios pxeel naa lo guidzliu par csilaa naa miech lo dol, zia|d naa par gdziibdol naa miech. ¹⁸ Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitlole ga, sac gon Xpëed Dios nac naa ni bliladz zho naa. ¹⁹ Laa zho bnitlole, sac gon bиаadpaa biini lo guidzliu ni laa ne nleynie zho biini, le| guie|cow bleynie zho, sac guie|ntseeb nac mine ziana| zho. ²⁰ Grëse zha ne run guie|ntseeb, rlëe zho ran zho biini. Ib rbigd zho lo biini, sac racladz zho xoobne| grë guie|ntseeb ne quiayun zho. ²¹ Sangue zha ne run mine rnabey Dios, haxta rley zho rbig zho lo biini, zeena glu gan|le ziana| zho mine rnabey me.

Rzeet Juan Bautist Jesús stib

²² Ga brieet Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

²³⁻²⁴ Len dze co gard guiab Juan Bautist ladzguiib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëedscuel Juan, psilo zho nodi|diidz zho dien cho zhiwrobnis nonraa; pe zhiwrobnis Jesús, te zhiwrobnis Juana ye. ²⁶ Blozhse bdi|diidz zho, wbig xpëedscuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, jye me laa me quiachoobnis miech niina, ni ndal miech niapse lo me zie zho, ziaatraade zho nëz rii!

²⁷ Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. ²⁸ Mine pso Dios naa, laaw ben naa: laa naa biallu gan|le cho nac Men ne zëëble diidz ga cxeel Dios. Ni bneeli naa lo to gan|le led naad nac men co; laa naa zia| loxaque par gzet naa me lo miech zeena gunbey zho me. ²⁹ Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, jled zha lëe rzobnie ndzooop ne notsieelnia zho! Ni grë zha ne ndzieeldiiz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuane run me. ³⁰ Zigse zie dze, laa me gacnonraa; scagaa naa, zigse zie dze laa naa guiaanwinraa.

³¹ Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuane riense tib miech lo guidzliu min co rne naa; ³² sangue me, niapse grë mine bin me, grë mine gon me min co rnee me lo miech; jni choot riladzda! ³³ Zha ne riladzse xtiidz me, rien zho gan|le niapse diidzli rnee Dios. ³⁴ Xtiidz Dios rnee me lo miech; sac Espíritu Sant rdeed guie|biini lo me, ni Dios nac men ne pxeel me. ³⁵ Rleyniedox Dios me, nac me Xpëed Dios; gane grëtaa ncuane no gbaa, no lo guidzliu, ladznia me psan Dios. ³⁶ Grëse zha ne gnalo me, laa zho bgaale tib guie|mban ne ib gdziñd dze lozh; sangue zha ne gond xtiidz me, gdziñd zho gbaa, zaatne yгаа zho guie|mban co. jGrëse zha co, ible zгаа zho guie|nëdnox ne csiaab Dios!

4

Tib wnaa Samar

¹ Zeene bien Jesús laa zha farisé gocnan|le ndalraa miech ziana| zhiwseed me, ni ndalraa miech ne quiachoobnis me lo Juan ² (niicle ne led medpaa rchoobnis, sinque zha ne nac xpëedscuel me zha co rchoobnis), ³ nacte brieet me xtan zha Judé ga, wbiere me nëz xtan men Galilé stib.

⁴ Par gdziñ me Galilé, none ted me xtan men Samar. ⁵ Xtan men Samar zieded me, zig groļ dzew, laa me zie gax guiedz ne lē Sicar, ⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëed me José padzeela. Rdzag me ziaad-zë me lo nëëg co, bdziñ me bzob me ro guiuu co; ⁷⁻⁸ ga blëz me, laa no zio lad guiedz Sicar zioxi no ncuaane díoownie no me.

Ro guiuu co zob me bdziñ tib wnaa Samar ziexi nis ga; dzigo rëbchaa me lo wnaa co:
—Bzhiguiel bzoladz niip zhis luu guie naa.

⁹ Bzee zdoo wnaa co gon me bnab Jesús nis lo me, sac rlëedox zha Judé ran zho zha Samar, per ni rneed zho lo zho.

—jNcuaane gliladz naa! —rëb me—. jTi zha Judé gnab nis lo ti zha Samar!

Dzigo rëbchaa Jesús:

¹⁰ —Tel niaca mine guien luu ganle cho rnab nis lo luu, ni guien luu zha nactaa ncuaane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

¹¹ Pquiab wnaa co, rëb me:

—Per ni nzheñd luu name pe cuee luu nis, jpa dzigo tsiebee luu nis ne rdeed guielmban ga? jGon ganle, quietdox bzie rii! ¹² Stiba, jniacxe mazdraa dzigo nac luu que pxozgol ne Jacob, men ne psan bzie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiire rnab zhis zho; ¹⁴ sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

¹⁶ —Güeygash —rëb Jesús—, güeyxi tsieel luu, dzigo goltë grop to.

¹⁷ —Guiend tsieel naa —rëb wnaa co—. Gard ctsieelnia naa.

—Nli rnee luu —rëb Jesús—; ¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. jNli mine rnee luu i!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. ²⁰ Tel scaw, bzhiguiel bnë dien, jzha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmengol no ga güeygan zho Dios.

²¹⁻²⁴ Pquiab Jesús rëb me:

—Bina ganle, zdziñ dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoz ne. jNi laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espiritu Sant guielbiini lo zho.

j'choot grielod gan Dios; gacxe waa zha ne gleynie me, none gleynie zho me zigne rdeed Espiritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziunbey no men ne riogan no, sac gon lo xtii men Israel ziaad men ne guiaadsilaa miech lo dol.

²⁵ —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

²⁶ Pquiab Jesús, rëb me:

—jNaa gon nac men co! Lëe me nu nonee lo luu.

²⁷ Lëëtaaque hor co grëse no ne nac no xpëedscuel me laa no bdziñ. Bzee zdoo no bdzion no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quiazodiidznie me wnaa co.

²⁸ Laa wnaa co, zoque xche me ga, rias me laa me zie nöz lad guiedz. Bdzin me, rëb me lo grë miech co:

²⁹ —¡Goltë ganle gunbey to ti men co! ¡Bzeet me grëse zha nac lo xquielmban naa! ¡Bay pe lëdle Men ne nole diidz cxeel Dios ga?

³⁰ Horco brieë grë miech co lad guiedz, ziaad zho zaatne gon wnaa co Jesús.

³¹ Laa no, quia no rdeed no ncuane gow me, per nëd me.

³² —Gowd naa —rnee me—. No stib xquielwagw naa mine runbeyde to.

³³ Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

³⁴ Nëchaa me lo no:

—Lëë xquielwagw naa nac ne gun naa mine rnabey Dios naa, ni csiaal naa dziin ne pxeel me naa zialgun naa. ³⁵ To lëë rnee to: “Len stapraa mëë csilo gac wlaap.” ¡Per golwi lo grëtaa miech qui ganle, nac zho niina zig grë guielgon ne golle gliaap! ³⁶ Gacxe waa, ib none tsie to tsielaap to, tsietop to zho, zeena yгаа zho tib guielmban ne gdziind dze lozh. Ni zigne razh zha ne rie wlaap, scaque zguizh Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne rlaapa! ³⁷ Ible nli diidz ne znu rnee: “Zhaa zha ne rie gon, stible zha ne rie wlaap.” ³⁸ Zig nac niina, laa naa rxel to tsielaap to zaatne ni tib xtsiin to psëebde to; zhaa zha ne güey gon, na tole tsie wlaap.

³⁹ Laga laa me sca quianee lo no, laa grë menladz wnaa co no nöz ziaad zho nöz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús. ⁴⁰ Laa zeene blanso zho ga, bnab zho lo me cuöz me ladz zho zhis. Dzigo nacte blöz me lo zho chop ngbidz. ⁴¹ Nzianraa grë miech co bliladz me, zeene bin zho grë zhiwseed me.

⁴² —Nasi nagon laa no riladz me —rnee zho lo wnaa co—, sac nozhal bdzion me, ni bdzion no grë mine rnee me. Nliw, ible me nac men ne ziaadsilaa grëse miech lo xtol zho.

Biac xpëed tib zha ne quia dziin lo rey

⁴³ Zeene goc chop ngbidz co, laa no brieë ga gza no me, laa no bdzio nöz stib zio no nöz Galilé. ⁴⁴ Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per ⁴⁵ zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

⁴⁶ Nöz no no bdzin no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëëtaque len dze co rzacnë xpëed me.

⁴⁷ Bin me laa Jesús brieë xtan men Judé, laa me no gdzin Galilé. Dzigo biaad me biaddzieelo me Jesús ga, bnab me lo Jesús tsienal Jesús zhits me Capernaum, tsiegunguiac Jesús xpëed me; sac nzhoo rac win. ⁴⁸ Dzigo rëbchaa Jesús lo me:

—¡Pe haxta gan to dzigo gun naa milagr, dzigora gliladz to naa?

⁴⁹ —Been tib guielnzaac gotsaa guionio ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guielnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nöz laa me zey. ⁵¹ Zhilew gdzin me lidz me, zeene bdzieelo me bla zha ne quia xtsiin me, rëb zho laa xpëed me biacle.

⁵² Dzigo bnabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Min co been me zeene wbire me nöz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, ⁴ sac nac diidz poc poc riet tib xanj] Dios riesini lo nis co, dzigo zha ne znuse sëeb lo nis co, tel pe guielguiidztaa rzac zho, riac zho].

⁵ Ga nix tib mgui, gocle galptsiiipxon iz rzacnë me. ⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guien cho csëeb naa len pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

⁸ Dzigo rëbchaa Jesús lo me:

—¿Nasca zeena guche i! ¿Bzoli, bi yag ne bzhoob luu i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieega.

Ni ne dze co nac tib dze nda lo zha Israel, ¹⁰ zeene gon zho ney me yag ne bzhoob me, rëbchaa zho lo me:

—¿Pe rien luu nda nadze! ¿Lëda i gon squi yquianlan luu ncuuan qui dze rii!

¹¹ Pquiab me rëb me:

—Men ne beenguiac naa, mezhal në lo naa, güey naaw.

¹² —¿Cho men sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëeble lad grë miech co. ¹⁴ Haxta len yadoora bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guielguidz ne mazdraa ntseeb.

¹⁵ Zeene laa me brieega, güey me lo zha ne rnabey lo zha Israel ga, rëb me lo zho Jesús nac men ne beenguiac me. ¹⁶ Nacne psilo zho quiana zho dien zha gnaaz zho Jesús pe nacne runguiac me miech dze nda. ¹⁷ Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

¹⁸ Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

Men nroob nac Xpëed Dios

¹⁹ Ni rëb me:

—Gneli naa lo to ganle: peet grielod gun Xpëed Dios lega guicse me, sinque ncuane ran me run Pxoz me, min co run me. ²⁰ Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoo to; ncuane palalse i gon to niina ne biac men qui. ²¹ Sac telne gacladz me cueeban me tib mengut, zbeeban me zho, zigne rbeebanaque Pxoz me mengut. ²² Ni bzo Dios me, me gun guielwxtis, ²³ zeena grëse miech guien ganle zigne nonaque Pxoz me, scaque men non nac me, ni sca none gunnon zho me. Sac tel zha ne gunnond me, yele Pxoz me ga (men ne pxeel me) runnond zho.

Ni rëb me:

²⁴ —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdziind dze lozh. Led yedraa zho ygaa guielndox ne ygaa grëraa miech ntseeb; sac laa zho brielee ladznia guielgut ga, bdzin zho lo guielmban co. ²⁵ Zdzin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¿Ni lëe dze co bdzin niina! ²⁶ Sac gon, zigne rdeed Dios guielmban lo miech,

scaque zrieelo gded naa guie|mban lo miech. ²⁷ Ni bzo me naa, naa gun guie|wxtis, gded naa mine tsieguial tib tib miech.

²⁸ ;Gzeed zdoo to! Sac ne nligaa, zdziñ dze, grëse mengut ne no len baa, laa zho grieeban ²⁹ zeene gon zho tsi naa. Grëse zha ne ndzinli wban, hor co laa zho yгаа tib guie|mban ndzon; sangue zha ne been guie|ntseeb, hor co laa zho guey lo guie|nëdox ne rieguial zho.

³⁰ Per grieelod gun naa guie|wxtis naase, ib none gacnan Pxoз naaw. Grëse guie|wxtis ne gun naa, laaw gun naa zigne gnabey Pxoз naa, laaw gun naa zigne nonguiela, sac gon gund naa mine guiaabtaa guic naa, sinque laa naa gun mine racladz Pxoз naa.

³¹ Telne niaca mine naase rne cho nac naa, zrieequia zha ne guiab nlida. ³² Per na, no stib men ne rzeet naa lo miech; ni nan naa diidzli rnee me. ³³ Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw. ³⁴ Laa naa rzet min rii lo to, zeena gliladz to cho nac naa, zeena sca laa to lo xto| to; sac rquiindpaa dien cho miech guidzliu rii gnee cho nac naa. ³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. ³⁶ Nli bnee me cho nac naa; per grë milagr ne run naa min co quiaxobnenraa ganle cho nac naa. Pxoз naa rneedz diidz run naaw; ni ga rlu ganle ne me pxeel naa. ³⁷ Haxta ye me mezhal quialu ganle cho nac naa, parga nli gard gan to me, niicle gard gon to tsi me. ³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to grë guits ne ziaad Xtiidz me, sac rien to ga ziaad dien zha yгаа to guie|mban ne gdzind dze lozh. Ni niicle ne lo co zhobnee ganle cho nac naa, ⁴⁰ per nëde to gbig to lo naa, zeena yгаа to guie|mban co. ⁴¹ Nëde to gunbey to naa, nëde to guien to cho nac naa, per peet nacd min co; ⁴² runbey naa to, ni lalnu rleyniede to Dios. ⁴³ Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëë|ëd rcaania to zho. ⁴⁴ ;Min co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. ⁴⁵ Ni guiabde to togo naapaa gazo to lo Pxoз naa, glisqui naa grë ncuaane run to. Moisés gon nac men ne glisquiw; sac ley ne psan me, mine rnalo to csilaa to lo xto| to, lëew glu ganle pe nac grëtaa ncuaane quiaayun to. ⁴⁶ Sac gon, telne niaca mine nlipaa rililadz to grë mine pquiaa Moisés, zililadz to dzigo cho nac naa; golgan ganle, lo grë guits ne pquiaa me, ga rzeet me naa. ⁴⁷ Rlu rililadzde to grë mine pquiaa Moisés ga, gane rililadzde to mine rne naa lo to.

6

Row gaay mil miech

(Mt. 14:13-21; Mr. 6:30-44; Lc. 9:10-17)

¹ Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenal zhits me, sac ziyan zho grëtaa milagr ne run me, runguiac me grë men rzacnë. ³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me, ⁵ zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, ;pa guioziu ne ncuaane gow grëtaa miech qui?

⁶ Per lega scase rëb me lo Lip, par dien pe guiab Lip; sac nanle me pe nac ncuaane gun me.

⁷ —;Ne nligaa pe zhidaa zho! —rëb Lip—. Niicle telne niaca mine gziuu nzian gayoo quietxtil, ni ygaad ncuaan co yгаа zho tiblë wingaw tib tib zho.

⁸ Dzigo pquiab Ndrés, bets Pedr, stib zha ne nacgza no; rëb Ndrés:

⁹ —Nu zo tib mēēdbgui win ney gaay quietxtil cebad ni schop mel win. ¿Per pa ygaa ncuaan co lo grētaa miech qui?

¹⁰ —Golnee lo zho dien —nē me lo no—. Golguiab lo zho sob zho.

Ndzon zēēb guizh nguia ga, dzigo laa grē miech guizhiu co bzob lo guizh nguia co (zig gaay mil rgaa loxaque zha bguise). ¹¹ Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grē miech co; scaque been me grop mel co. ¿Grēse miech co, dow zho zaatne bieltaa zho! ¹² Blozhse dow zho, nēchaa me lo no:

—¿Goltsietop grēse mine biaan i, zeena nitloda!

¹³ Psilo no ptop no grē quietxtil ne biaan ga, zeene blozh bdopa, ¿lo gaay quietxtil cebad co, biodzē tsiipchop chicuid biow!

¹⁴ Zeene gon grē miech co milagr ro ne been Jesús ga, rneechaa zho:

—¿Ne nlipagaa, lēē men qui ga quiambiaaz ne! ¿Me nac Men ne zēēble diidz ga cxeel Dios lo guidzliu guiadteed xtiidz me!

¹⁵ Biena Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

Rzē Jesús lo nis

(Mt. 14:22-27; Mr. 6:45-52)

¹⁶ Rguetsle liuw, bzhiuxto no dan bdziñ no ro nisdoo co; ga bliaaz no me. ¹⁷ Bdzionse no choot rlansod ni laa liu rcowraa, dzigo mazd laa no bziaab len canó, laa no zio nēz Capernaum.

¹⁸ Laa no zionie canó co lo nis, tibaque zeene psilo rriee me, ntseeb riasoli lo nis co.

¹⁹ Maase gaay kilómetro o xoopgaaw goc zio no, tibaque zeene bdziñ no laa me ziaad-zē lo nis co, gaxle lo no ga. Zeene bdziñ no sca ziaad-zē me lo nis, bdzieeb no. ²⁰ Dzigo bnee me, nē me lo no:

—¿Gdziebde to! ¿Naa zial nu!

²¹ Dzigoraa rley no bdziñ no laa me bzēēb len barcw; tibaque zeene bien no laa no brieequiale zaatne no gdziñ no ga.

²² Biini liu co, grē miech ne biaan stib nēz ro nis co, laa zho bdziñ zaatne nac ro nis ga, quiambēz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. ²³ Gax zaatne bguiaan me zho ga, ga bdziñ bla barcw ne ziaad nēz Tiberias; ²⁴ dzigo gonse zho niicle me niicle no ne nac no xpēēdscuel me, choot guiend ga, nacne bzēēbaque zho len barcw ne bdziñ ga ziaad zho nēz Capernaum.

Jesús nac men ne rdeed guielmban

²⁵ Zeene blanso zho Capernaum, laa Jesús zole lo no ga; dzigo rēbchaa zho lo me:

—Maestro, ¿pa horzhe waa blanso luu nu?

²⁶ Dzigo rēbchaa me:

—¿Naa lēē ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to. ²⁷ ¿Golguien, tsienied guic to loxaque ncuaane gowse to, sac znuse rnitlo grē ncuaan co! Sinque, goltsoxco golgun mine racladz Dios, zeena ygaa to tib guielmban ne ib gdziñ dze lozh. Ni naa ne nac naa Mgui ne pxeel me, naa gneedz guielmban co lo to; sac ible miñ co pxeel me naa.

²⁸ Dzigo bnabdiidz zho lo me, rēb zho:

—¿Zha dzigo dziuun no mine racladz Dios? ¿Pe nac ncuaane dziuun no?

²⁹ Pquiab me rēb me:

—Mine racladz Dios gun to: gliladz to cho nac men ne pxeel me.

³⁰ —Telne scaw —rēb zho—, none dzianlo no gun luu nzian milagr, zeena gliladz no luu. ¿Nligaa peet milagr nroob gard dzian no gun luu! ³¹ Tel grē pxozgol ne, zeene wban zho grē dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

³² Pquiab me rēb me:

—Golḡacnan ḡanle led Moisésd bdeed guietxtil co, sinque Pxoḡ naaw. Ni niina gonḡ laa me quianeedz merpaa guietxtil gbaa lo to. ³³ Sac gonḡ, me pxeelḡ meḡ ne biet gbaa ziaddeed guielḡmban lo grē miech rii; meḡ co nac guietxtil gbaa co.

³⁴ —Beenḡ tib guielḡnzaac sca —rēb zho—, ḡgzataa dze bneedz guietxtil co dioow no!

³⁵ Pquiab me rēb me:

—Naa gonḡ nac guietxtil ne rdeed guielḡmban ga. Grēse zha ne gbig lo naa sēēb zho xnēz naa, ḡdzindraa dze ne ycaabedz zho; grēse zha ne gliladz cho nac naa, ḡdzindraa dze ne ḡnab zhis zho. ³⁶ Laa to gonḡ, zigne bnelegaa naa lo to ga, ḡniicle ranḡ to naa, per rililadzde to cho nac naa! ³⁷ Grēse zha ne rxeelḡ Pxoḡ naa, rlanso lo naa; ni tib zho ctsireed naa. ³⁸ Sac gonḡ, laa naa bieet gbaa zialḡḡnḡ naa miḡne racladz Pxoḡ naa (meḡ ne pxeelḡ naa); bieete naa par ḡḡnḡ naa miḡne ḡacladztaa naa. ³⁹ Ni miḡne racladz me, grēse zha ne bneedz me lo naa, ni tib zho nitlod, sinque cueeban naa zho ḡalḡ dze ne laa guidzliu nitlo. ⁴⁰ Sac racladz me: grēse zha ne gbig lo naa ni gliladz zho naa dib zdoo zho, grēse zho yḡaa tib guielḡmban ne ib ḡdzind dze lozh, ni cueeban naa zho ḡalḡ dze ne nitlo guidzliu.

⁴¹ Dzigo psilo grē zha Israel rneenē zho me, loxaque ne rēb me, me nac guietxtil ne biet gbaa; ⁴² rnee zho:

—Meḡ rii ga name rnee zho Jesús, me nac xingan José. Rdziuunḡbey ne xnīaa me, rdziuunḡbey ne pxoz me. ḡZha nac dzigo ne rnee me gbaa biet me?

⁴³ Dzigo rēbchaa me lo zho:

—Lēēwga na, ḡolsioog ro to. Nodne squitaa gzee zdoo to miḡn co. ⁴⁴ Laa Pxoḡ naa pxeelḡ naa zialḡ naa lo guidzliu, per ni tib miech gonḡ grieelod gbig lo naa telḡne niaca miḡne cuedzd me zho; ni zig rnele naa ga, zha ne gbig, naa cueeban zho ḡalḡ dze ne laa guidzliu nitlo. ⁴⁵ Znu rnee lo Xtiidz Dios, zaatne pquiaa grē zha ne biadteed xtiidz me padzeela, rneew: “Laa Dios cseed grēse miech.” Ni lēē miḡn co rac niina; ḡacxe nagonḡ waa, grēse zha ne rquiaadiag miḡne rnee Pxoḡ naa ni rseed zhow, grēse zha co lo naa rlanso zho. ⁴⁶ Zha ne rlanso lo naa, ḡuiabde to togo gonḡlo zho me; ni tib choot ḡard ḡanḡ me, naase nac meḡ ne ziyaḡnḡ me, sac zaatne no me ḡa brie naa zialḡ naa lo to. ⁴⁷ ḡolliladz miḡne ḡni naa lo to nu sca; ḡGrēse zha ne dib zdoo zho gliladz zho cho nac naa, zḡaa zho tib guielḡmban ne ḡdzindraa dze lozh! ⁴⁸ Ne nligaa naa nac guietxtil ne rdeed guielḡmban ga. ⁴⁹ Grē pxozḡol to, zeene sca bio zho grē dan bidz co, nli dow zho guietxtil ne biet gbaa ga, per bdeetew guielḡmban lo zho, sac grēse zho gut. ⁵⁰ Sangue guietxtil ne rne naa lo to, gbaa bieta ni grēse zha ne yquiina zḡaa zho tib guielḡmban ne ḡdzind dze lozh. ⁵¹ Xcuerp naa nac guietxtil ne biet gbaa, miḡne rdeed guielḡmban ga; grēse zha ne ḡow guietxtil co, zḡaa zho tib guielḡmban ne ḡdzind dze lozh. Lēēw ḡded naa zeena grieelelo yḡaa grēse miech lo guidzliu rii stib guielḡmban.

⁵² Psilo grē zha Israel co stib, quianeelsa zho, rnee zho:

—ḡZha nacte squi rnee meḡn qui? ḡZootne rnee me none dioow ne xcuerp me!

⁵³ —ḡneli naa lo to ḡanle —rēb me—, telḡne ḡowde to xcuerp Mḡui ne pxeelḡ Dios, ni ḡuiede to xchen me, yḡaade to stib guielḡmban co. ⁵⁴ Sangue zha ne ḡow xcuerp naa, ni ḡuie zho xchen naa, ib zḡaa zho guielḡmban ndzon ne ḡdzind dze lozh ga, ni naa cueeban zho ḡalḡ dze ne laa guidzliu nitlo; ⁵⁵ sac xcuerp naa nac miḡne mazdraa rquiin ḡow miech, ni xchen naa nac miḡne mazdraa rquiin ḡuie zho. ⁵⁶ Grēse zha ne row xcuerp naa, ni rie zho xchen naa, mbannie zho naa, niicleḡaa naaw mbannie naa zho. ⁵⁷ Meḡn mban nac Pxoḡ naa, meḡn ne pxeelḡ naa, me nac meḡn rneedz guielḡmban lo naa; ni scaqueḡaa zha ne ḡow xcuerp naa, naa ḡded guielḡmban lo zho. ⁵⁸ Naa nac guietxtil ne nlipaa biet gbaa. Grēse zha ne ḡow guietxtil rii, zḡaa zho guielḡmban; led yed zho ḡuet zig gut grē pxozḡol to, zha ne sca dow guietxtil co.

⁵⁹ Lēē grē miḡn rii bnee Jesús zeene pseed me miech leḡn yadoo win ne zob Capernaum.

Diidz ne rdeed guielḡmban

⁶⁰ Nzian grē zha ne rzēnie Jesús, zeene bin zho grē miḡne bnee me ga, rneechaa zho: —Zha ḡnandoxtaa nac grē diidz ne rnee me i. ḡCho ḡnē dieḡn pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëe guic to bin to mine rne naa ga? ⁶² ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? ⁶³ Espíritu Sant rneedz guielmban lo to, telne guiend espíritu peet nond xcuerp to, sac bëelse naca. Ni grë diidz ne bne naa lo to, lëew nac Espíritu, ni lëew gneedz tib guielmban ne gdziñd dze lozh lo to; ⁶⁴ sinque to, bii no zla to rliladzd cho nac naa.

Sca rëb me sac desde psilo bzënie zho me, rienle me cho nac zha ne ib rliladzd me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëeb zho xnëz naa, telne niaca mine cuedzd Pxoz naa zho.

⁶⁶ Nzian zha ne rzënie me, hor co laa zho bzozit lo me, bzëniedraa zho me. ⁶⁷ Dzigo bnee me lo no gza tsiipchop no ne nac no xpëëdscuel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdziñd dze lozh. ⁶⁹ Laa no bliladzle cho nac luu, laa no gocndionle ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

⁷¹ Zeene sca rëb me, lëele Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

7

Rliladzd menlidz Jesús cho nac me

¹ Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëe lo me, racladz zho gut zho me. ² Laa zeene bdziñ dze ne run zha Israel lni ne rzhixcuuaa zho grë yu guizh, ni rbëz zho lena; ³ rëbchaa zha bets me lo me:

—¿Pe nacne ib rried luu nu? Brie zho, güey dib xtan zha Judé, zeena ye grë zha ne racnie luu ga gan grëtaa ncuaane run luu. ⁴ Sac gon, zha ne racladz gunbeyraa miech zho, grë ncuaane rac zho, rund zhow ngueets zhlian zigne run luu. Rac luu name run luu grë milagr nroob, beena zaatne gan nzian miecha.

⁵⁻⁶ Sca rnee zho lo me, sac niicle zha rliladzd cho nac me; dzigo rëbchaa me:

—Grieeod ga naa niina, sac gard gdziñ dze co; zhaa nac to, zac tsie to zeene gacladztaa to. ⁷ Tel to, rlëened miech to; sangue naa rlëenie zho naa, sac rne naa lo zho pe nac grë guielntseeb ne run zho. ⁸ Goltsie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga. ¹⁰ Per loxaque brie zho zie zho, yeque me brie zie me; lëëraasi ngueetsse bdziñ me.

¹¹ Grë zha Israel ne rlëe lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.” ¹³ Per zhlianse rzodiidz zho rzeet zho me, sac rdzieb zho grë zha Israel ne rlëe lo me.

¹⁴ Goc chop tson ngbidz ne noyac lni, tibaque zeene laa me bzëeb len yadoo nroob ne zob lad guiedz ga, psilo me pseed me grë zha Israel ne no len yadoo ga. ¹⁵ Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

¹⁶ Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa. ¹⁷ Telne yquiabladz to gun to mine rnabey me, ga guien to dien pe nli xtiidz Dios rseed naa miech, te mine riab guic naaw ye. ¹⁸ Sac grë zha ne rnee grë mine riab guicse zho, laa zho runa zeena gacnziiu zho lo miech; sangue zha ne rioxco

glu ne non men ne pxeel zho, zha cosi niapse diidzli rnee zho, rund zho ne yquidie zho miech. ¹⁹ Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

²⁰ Pquiab be grë miech co, rëb zho:

—jMendzable i gon noguitnie guic luu! ¿Chozhe racladz gut luu?

²¹ Rëbchaa me:

—Tib vuel, loxaque gon to beenguiac naa tib men rzacne dze ne rdziiladz to lo dziin, na grëga to squitaa rac lo naa. ²² Ni to gon, no hor par gun to mine rnabey ley run to dziin dze co; zig nac zeene rio tib mëed bey (niicle ne rirole pxozgol to bey co, zeene laa ley biaan). ²³ ¿Gase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiac naa tib miech dze co? ²⁴ Golguien ganle, nonguield ne lega gdziibdoj to tib miech. Goltsoxco golttsienal mine nac diidzli.

¿Cho nac Jesús?

²⁵ Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho? ²⁶ Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Men ne zëeble diidz ga guiaad lo guidzliu? ²⁷ Per gacda men qui. Tel men quiw, rdziuunbey ne me, ndion ne cho zha nac me; sangue Men ne zëeble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli.

²⁹ Sangue naa runbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

³¹ Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. jTsodraa zha ne gun grëtaa milagr ne run mel

³² Bin zha farisé nozeet grë miech co Jesús, dzigo bnediidaque zho grë zho pxoz ne rnabey, pxeel zho bla zhaguiib zie zienaaz me. ³³ Bdziñ grë zhaguiib co, rëbchaa me lo zho:

—jGolxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa. ³⁴ Zguib to naa, per gdzieldraa to naa, ni grielod gdziñ to zaatne guia naa.

³⁵ Grë zha ne ndxie ga, zeene bin zho sca rëb me, rzee zdo zho.

—¿Pa nac zhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieseed me, grë zha ne no stib ladz ben. ³⁶ ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

³⁷ Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdo, rzac zho zig nac zeene rnab zhis zho, guiaad zho lo naa, naa gded nis ne guie zho. ³⁸ Sac grëse zha ne dib zdo gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdo zho, pale tib guiubee nroob; nis co gdeed tib guielmban cub lo zho.

³⁹ Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

⁴⁰ Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëë men qui ga no guiaad antes ne glanso Men ne nacle diidz cxeel Dios ga.

⁴¹ Rrieequia zla zha ne rnee:

—¡Lëda! ¡Lëëgazh me i! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grë zha co grieequia Men ne cxeel Dios ga?

⁴² Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

⁴³ Zhaase zhaase rnee zho; lel psilo zho nodildiidz zho dien cho nac me. ⁴⁴ Brieequia bla zho gocladz naaz me, per ni tib zho wbigd nzhen zho me.

⁴⁵ Grë zhaguib ne zienaaz me ga, scase zho laa zho bdziñ. Zeene gon grë pxoz rnabey co, grë zha farisé co choot bdzinnied zho, rëbchaa zho:

—¿Pe nac dzigo ne ziaadniede to me?

⁴⁶ Pquiab zho rëb zho:

—¡Wlaltaa gard dzian no tib men ne scataa ndzon rnee!

⁴⁷ Rëbchaa zha farisé:

—¿Pe nlipaa rnee to! ¿Yelaque to dzigo beengüet me? ⁴⁸ ¿Pe rwide to, niicle zhiwxtis new, niicle now, ni tib choot rliladz ne me nac Men ne zëëble diidz cxeel Dios ga? ⁴⁹ Grë zha nxen ne rliladz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

⁵⁰ Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

⁵¹ —Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzigora gac guielwxtis.

⁵² Pquiab zho rëb zho:

—¿Zootne ye luu lëë nacgza grë zha Galilé ne rleyne me? ¿Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

⁵³ Blozh ga, grëse zho laa zho wbi, tib tib zho zeyse zho lidz zho.

8

Tib wnaa ro nëz

¹ Ga brie Jesús güey me zaatne rnee zho Gui Oliv.

² Zeene biini liu co, silgaw laa me bdziñ len yadoo co stib. Nzian miech ne goclo lo me ga, nacte bzob me psilo me pseed me zho. ³ Laa me noseed grë miech co, zeene bdziñ bla maistr ley, ni zla zha farisé, bdzinnie zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bgaa nonie me stib mgui. ⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedque no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grielo tsiezo zho me lo wxtis. Per zeene bin me sca rëb zho pquitsrunga me liu, psilo me con mzhugnia me noquiaa me lo liu.

⁷ Ran zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedque me. ¡Lëëraasi, zha ne rien ni tib dol rapd, zha co csilo gdeedque me!

⁸ Blozh ga biire pquitsrun me, psilo me stib noquiaa me lo liu. ⁹ Zeene bin zho sca rëb me, mazd mine been zho laa zho brie ga, sac bien zho miech ngoopdol nac zho. Zha ne

nacpaa zha gol lo zho bner, blozh ga zo zo brieë zho grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grë zha ne scataa bиаad-zo luu nu? ¿Ni tib zho lëë beenquizhd luu xtol luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuane gunctal xtol luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho sorieł ni lo ncow, sac naa gziini lo zho zeena ygaa zho tib guiełmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho:

—¿Cho gliladz xtiidz luu! ¿Lëëque luu rnee cho nac luu!

¹⁴ Pquiab me rëb me:

—Niicle ne naaque rne dien cho nac naa, per diidzli nac mine rne naa. Rieñ naa pa nëz zial naa, pa nëzga za naa; sangue to gon peet riende to, ¹⁵ gacxe waa, rcaadzdoł to naa ncuane ni nacd naa; ncuane rcaadzdoł to naa, niapse guic to riaba. Tel naa, zig nac niina noyund naa guiełwxtis ¹⁶ per zeene gdziñ dze co, tib tib miech mine been zho min co glu dien pe nac mine tsieguial zho; sac Pxoz naa men ne nacie naa, me gnë zha gun naa guiełwxtis. ¹⁷ ¿Pe nacie riladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho. ¹⁸ Zig nac niina, naa nac tib zha ne rne cho nac naa, laa stib zho nac Pxoz naa men ne pxeel naa; sac gon ye me rnee ganle cho nac naa.

¹⁹ Pquiab zho rëb zho:

—¿Yo Pxoz luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesan miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grieelod gdziñ to zaatne guia naa

²¹ Bded ga, biire Jesús rëb me:

—Laa naa guia nagon. Squiguib to naa, per lëëque lo xtol to i nitlo to, sac zaatne guia naa grieelod gdziñ to ga.

²² Grë zha Israel ne ndxie lo me ga, rneechaa zho:

—¿Pe goon lëëque me naye gut me? Zha nacie squi rnee me goon grieelod gdziñ ne zaatne guey me.

²³ —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii. ²⁴ Gane ni naa lo to lëëque lo xtol to i nitlo to. Ne nligaa, telne gliladzde to ne naa nac men ne nac naa, ible lëëque lo xtol to nitlo to.

²⁵ —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. ²⁶ Ndal grë ncuane zac glisqui naa lo to nu niina, ni ndal ncuane racladz naa gne naa lo to, per laa naa noyund mine rnabeyse men ne pxeel naa; ni men co nac men ne rnee diidzli.

²⁷ Per ib riend zho ne Dios ga rzeet me lo zho. ²⁸ Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiaayun naa; sinque mine pseed me naa, min co rne naa lo to. ²⁹ Dios pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

Zha ne nac xpëed Dios

³⁰ Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga. ³¹ Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa. ³² Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

³³ Pquiab zho rëb zho:

—jNgundziin ye! jTel no, zha xtiipaa Abraham nac no, wlalaa gard gac no ngundziin lo miech! jPe lo dzigo laa no, ne rnee luu laa xtiidz luu csilaa no?

³⁴ Dzigo rëbchaa me:

—Golquiaadiaga ganle: zha ne tibaque noyunctal xtol, rriequiacxe waa tib ngundziin nac zho lo dol ga, sac lëew rnabey zho. ³⁵ Ni zha ne nac ngundziin lëe, zig run miech nëz rii, grielod xoon zho lo men ne rree zho; sangue zha ne nac mëed, choot lo ngadood zho. ³⁶ Gacxe waa, tel csilaa Xpëed Dios to, dzigosi choot lo ngadoodraa to. ³⁷ Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa. ³⁸ Laa naa rne grë mine blu Pxoza naa lo naa, zeene no naa lo me; sangue to gon, laa to zienal mine rnabey men ne nac pxoz to.

³⁹ Pquiab zho rëb zho:

—jNi Abraham gon nac pxoz no!

—jNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me. ⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. jTel Abraham led squid been Abraham! ⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—jLed-xe mëed ro nëzd no waa! Tibaque men ne nac pxoz no, ni lëe men co nac Dios.

⁴² Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa. ⁴³ Ib rioguide to zha nac grë mine rne naa, ib riende tow, sacne ib nëde to yquiaadiag tow. ⁴⁴ Golgacnan sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuaae run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie. ⁴⁵ jMin co nagon, niicle diidzli nac grë mine rne naa lo to, per ib rliladzde tow! ⁴⁶ Ni tib to choot grielod gnë laa naa noquidie, sac niapse diidzli rne naa. jPe nac dzigo rliladzde to mine rne naa? ⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

⁴⁸ Horco pquiab zho rëb zho lo me:

—jPsioog ro luu men Samar ngoopdol! jNlique mine rnee no ga nagon, ne mendox noguitnie luu!

⁴⁹ —Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoza naa; laa to gon lel rsanwin to naa. ⁵⁰ Noguibd naa dien zha guiaanon naa, per Dios gon racladz me ne sca gaca; ni mesi nan me pe run me. ⁵¹ Gneli naa lo to ganle: jGrëse zha ne gzoob xtiaz naa, gdziind dze ne guet zho!

⁵² Pquiab zho rëb zho:

—jPer nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. jZha nac dzigo rnee luu, zha ne gzoob xtiidz luu, gdziind dze guet zho? ⁵³ jPe mazdraa dzigo nac luu lo pxozgol ne Abraham, lo grëga zha ne biadteed xtiidz Dios ga? jCho rzac luu nac luu?

⁵⁴ Rëbchaa me:

—Telne lëew naa noyunnon naa, nlid mine rne naa dzigo. Per na gon, Pxoza naa, men ne nac Dios ne rnee to rliladz to, me rlu ganle ne nli men non nac naa. ⁵⁵ Tel naa

runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to. ⁵⁶ Pxo^zgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

⁵⁷ Zeene bin zho sca rëb me, rëbchaa zho:

—¿Gon luu Abraham ye? ¿Ni chooptsii iz name rapd luu! ¿Zha dzigo gon luu Abraham!

⁵⁸ —Gneli naa lo to ganle —rëb me—, notaque naa; nole naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brie me len yadoo, gondraa zho me.

9

Biac tib mgui ne rold lo

¹ Zieded Jesús tib lugar co, gon me tib mgui ne rcow lo, scale nac lo men co zeene gol me. ² Dzigo bnabdiidz xpëedscuel Jesús rëb zho:

—Maestro, ¿bay zha nacne squi golnie men qui guie^lnë qui? ¿Pe no pe xto^l mew, te xto^l xmengol mew ye?

³ —Lëda —rëb Jesús—, led por xto^ld zhow; sinque squi gol me, zeena zeene laa me guiac, ga gan miech ganle zha nactaa grë ncuaane run Dios. ⁴ Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin. ⁵ Laga bii no naa lo guidzliu rii, naa nac zig tib biini ne rziini lo grë miech rii.

⁶ Blozhse sca bnee me, ptsuc me lo liu, bzhixcuaa me niip ben, dzigo bdëeb mew zhits guidlo mgui ne rcow lo ga; ⁷ blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

⁸ Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëe rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhal rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Men ne rnee zho lë Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

¹² —¿Yo men co niina na? —rëb zho.

—Dieenda —rëb me—, nand naa dien yo me.

¹³ Dzigo güey zho güeynie zho me lo grë zha ne nac zha farisé; ¹⁴ sac lëetse dze ne rdziiladz zho lo dziin, lëetse dze co sca beenguiac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui?

Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

¹⁸ Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xnias me. ¹⁹ Bdzin grop mengol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop mengol co—. Ni nli rold lo me zeene gol me; ²¹ per ndiond no dien zha biaca ne laa me ran niina, niicle ndiondga no dien pe no cho beenguiaca. Benque zha gol-le nac me, mazd lo me glnabdiidz, mezhah gnë dien zha biac lo me.

²²⁻²³ Sca rëb grop mengol co, sac rdzieb zho griee zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëëb zho yadoo.

²⁴ Wbiire zho bredz zho men ne biac lo ga, rëb zho:

—Bien ganle Dios zobwi, bnë diidzli lo no; sac tel no ndion no cholze miech ngoopdol nac men co.

²⁵ —Dieenda —rëb me—. Nand naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiac Jesús lo me. ²⁷ Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

²⁸ Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no. ²⁹ Sac tel Moisés, ndion no nli Dios pxeel Moisés, per mgui co ni ndiond no dien pa brie me.

³⁰ Pquiab me rëb me:

—¿Ncuane gzeegaa zdoo ne i runbeydaque to cho nac me, ni ron to me beenguiac lo naa! ³¹ Ndion ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli men nroob nac me, ni run zho mine rnabey me. ³² Stiba, waltaa gard dzion ne cho zha beenguiac lo tib miech ne znu gol rold lo. ³³ Telne niaca mine nacdied Dios men co, nriee lod me niunguiac me lo naa.

³⁴ —¿Psioog ro luu! —rëb zho lo me—. ¡lb racladz no guiaad tib ngoopdol ni guidseed no!

Horco wbig zho, blee zho me ga.

Zha ne rold lo

³⁵ Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliladz luu men ne nac Xpëed Dios?

³⁶ Pquiab me rëb me:

—Bzhiguiel bnë lo naa dien cho nac men co, zeena gliladz naa me.

³⁷ —Gonle luu me —rëb Jesús—. Naa gon nac men co, lëë me nu nozodiidznie luu niina.

³⁸ Dzigo pquitsgzhib me lo Jesús, ni rëb me:

—Dib zdoo naa rliladz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapd dol; sac zha ne rzac miech peet riend, laa zho tsa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëë ye lo no rold?

⁴¹ Dzigo pquiab me rëb me lo zho:

—Tel niaca mine nlipaa zha ne rold lo nac to, griee lod gni naa rap to dol. Per na, ne masaque rzac to roltraa lo to, gane grëse ncuane quiayun to xtol to noyaca, to zëëba.

10

Mëcwxiił ni zha ne rquianap ma

¹ Ni rëb Jesús:

—Golquiaadiaga ganle: grëse zha rded stib nëz zeene rzëëb zho len lidz mëcwxiił, laa ne ted zho nëz ro puert, gase rlu ngbaan ga nac zho; ² sac tel men ne noyan maw, nëz ro puert nëz co rzëëb me. ³ Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdziñ lo me; dzigo rbedz me ma, rneelë me ma tib tib ma, laa me rbee ma ga. ⁴ Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me. ⁵ Rienałd ma zhits stib miech, zeene ran ma zho znuse rzhooñ ma; sac runbeyd ma tsi zho.

⁶ Grë zha ne ndxie lo me ga, ib biend zho zha nac godiidz co; ⁷ dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiił ga. ⁸ Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psacsi zho par grieelo cuan zho; ni grëse mëcwxiił ne nacpaa xpëcwxiił naa, güeynałd ma zhits zho. ⁹ Sangue naa, laa naa nile lo to ganle: Naa nac zig ro Puert, zaatne rded mëcwxiił ga. Grëse zha ne gbig lo naa, zlaa zho, peet lo tsoxtseebdraa zho; pale grë mëcwxiił ne zozëëb zoriee ro lidz, ni rdziel ma guizh nguia, guizh ndzon row ma. ¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdziñd dze lozh.

¹¹ 'Naa nac Baxtor ne nquialadzpaа xpëcwxiił. Sac zha ne nquialadzpaа xpëcwxiił, rquiad zdoо zho xquielmban zho, rsilaa zho ma lo guielxtseeb ne notaa ma. ¹² Per tel noyac-wree zha ne noyan ma, rquiad zdoо zho ma, zigne ran zho palo ziaad tib coyot ntseeb, ndxieque mëcwxiił ga laa zho rzhooñ; sac led chend zho ma, led zhad nac xbaxtor ma. Zeene rdziñ coyot, nëzrii nëzrec rtsieets coyot ma, nogaa ma rgaa lo coyot. ¹³ Rzhooñ zho, sac dimise nonie guic zho, peet liaadz nod zho ma. ¹⁴⁻¹⁵ Naa nac Baxtor ne nquialadz xpëcwxiił. Zigne runbey Pxoз naa naa ni runbey naa me, sca runbey naa grëse xpëcwxiił naa, niicle magaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶ 'No spalal xpëcwxiił naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

¹⁷ 'Men ne nac Pxoз naa, rleynie me naa sac laa naa rbeeladz xquielmban naa; per ible zriebaan naa. ¹⁸ Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grë zha Israel ne ndxie ga, zeene bin zho sca rnee me, laa zho goc chop dii stib. ²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rołd lo?

Rnee Jesús Xpëed Dios nac me

²² Len mëë ne rac nała, len dze co noyac tib lni Jerusalén, lni ne run zho rsoladz zho dze ne glopaa psilo quiaquiiñ yadoo. Ye Jesús bdziñ Jerusalén len dze co. ²³ Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón; ²⁴ zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdziñ dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

²⁵ Pquiab Jesús rëb me:

—Blactaale zine naaw lo to, per rliladzde tow. Stiba, pe zhidaa milagr ne ziañ to run naa, gase rlu ganle cho nac naa; sac Dios men ne nac Pxoз naa, men co racnieñ naa run

naaw. ²⁶ Ib riladzde tow, sacne led yede to ngab lo naa. ²⁷ Tel zha ne ngab lo naaw, runbey zho naa; niicle naagaaw runbey naa zho, ni zhits naa rzënal zho. ²⁸ Grëse zho, rded naa tib guielmban ne gdzind dze lozh lo zho, ni gdzind dze nitlo zho. Choot grieelod ctiche zho lo naa, ²⁹ sac men nroob nac Pxoaz naa men ne pxeel zho lo naa; choot grieelod cuee zho lадznia me. ³⁰ Ni tibaque nac no grop no me.

³¹ Zeene bin grë zha rnabey co sca rëb me, psilo zho ptop zho quie nan zho ngoquie zho me. ³² Dzigo rëbchaa me lo zho:

—Lo grëtaa milagr ne quiyacnien Pxoaz naa naa quiayun naa lo to. Golnë dien, ¿pa min rlisqui to ne laa to racladz gneedzquie to naa?

³³ Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quiaguitnie luu Dios! ¿Tib miech bense name nac luu, ni rnee luu laa luu nac Dios!

³⁴ Dzigo rëbchaa me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rëb me dios nac zho! ³⁵ Ni ndion ne ganle, grëse mine rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, ³⁶ ¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii? ³⁷ Telne run naa milagr ne rlu Dios pxeel naa, ib gliladzde to naa. ³⁸ Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

³⁹ Horco gocladz zho stib naaz zho me, per znuse brie me nia zho. ⁴⁰ Dzigo brie me ga güey me ro guiubee Jordán, zaatne bio Juan pchoobnis Juan miech; ga blëz me palal dze. ⁴¹ Nzian miech ne güey lo me ga, rnee zho:

—Nli beend Juan ni tib milagr nroob, per grëse mine bnee me zeene bzeet me men rii, zigne bneese me laaw norieequia niina.

⁴² Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

11

Gut Lazh

¹ Len dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. ² (Lëë Marí rii pchoob tiblo nceit nex ni Jesús, ni pcuiidz mew con guitsguic me.) ³ Dzigo pxeel grop wnaa co diidz lo Jesús, gacnan me laa Lazh rzacnë, sac nan zho rleyniedox me Lazh.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho, ⁶ per ib biobladz me; lel blëz me schop ngbidz zaatne no me ga. ⁷ Dzigoraa në me lo no:

—Laa ne guio nëz xtan men Judé stib.

⁸ Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne; ¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazh nixguesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixgues Lazh, dzigo rdzieets no lo me:

—Telne raaguesle me, zac-wen me sca.

Ib biend no ne gutle Lazh, gane sca rnee me. ¹⁴ Dzigoraa clar bnee me lo no, në me:

—Laa Lazh gutle. ¹⁵ Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nöz lo me ga niina sca.

¹⁶ Laa Mazh, zha ne rnee zho “Mëëdgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rree Jerusalén, maase grol hor run zho nöz rdzin zho Betain. Nzian grë zha Jerusalén rdzin riequiaabdiuzh zho Marí grop Mart, riechoobladz zho zdoo me lo xquielnë me ga.

Dze ne rac tap ngbidz bioliu Lazh, dzigora laa Jesús bdzin.

²⁰ Gon Mart pa lo ziaad Jesús, dzigo brie me biae-xinöz me Jesús; laa Marí biaan ro yu.

²¹ —Jesús —rëb Mart—, telne niaca mine nu no luu segur niete bzian naa; ²² sac nan naa, grëta ncuane rnab luu lo Dios, run me mine rnab luu.

²³ —Peet tsienied guic luu —rëb Jesús—, ible zrieaban bzian luu.

²⁴ Pquiab Mart, rëb Mart:

—Nliw, nappaa naa ible zrieaban me gal dze ne laa guidzliu rii nitlo, zeene grëse mengut, laa zho grieaban.

²⁵ Dzigo rëb Jesús:

—Naa nac men ne rbeeban grë mengut, ni naa nac men ne rdeed guielmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdzin dze ne gban zho stib. ²⁶ Sac grëse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lëë Mart, ne sca gaca?

²⁷ —Rliladz naaw —rëb Mart—. Rliladz naa ne luu nac men ne bzooblo Dios ga, luu nac Xpëed Dios, Men ne zëëble diidz ga cxeel me guiaad lo guidzliu.

²⁸ Blozhse ga, wbire Mart zie Mart zietsedz Mart Marí. Bdzin Mart zhlianse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rëb Mart, brie nguzhoon Marí laa Marí zie nöz co. ³⁰ (Bdzin Marí, laa Jesús bii zo zaatne güeydzieel Mart me ga; gase blöz me, bzëëbd me lad guiedz.)

³¹ Grë men Israel, zha ne ndxie lidz Marí ga ziechoobladz zdoo me, zeene gon zho sca lëëlëd brie me, nalaque zho zhits me; sac nan zho bod ro xpaabzian me ziegoon me.

³² Zigne bdzin me zaatne zo Jesús ga, pquiitzgzhib me lo Jesús.

—Jesús, luu ne nac luu men ne rnabey —rëb me—, telne niaca mine nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grë zha Israel ne bdzin ga, mban rac zho, grëse zho roon, dzigo ye me biab guielnë me. ³⁴ Bnabdiidz me rëb me:

—¿Pa lo pqueets to me?

—Dë ganle —rëb zho—, zeena gan luu pa lo bqueets me.

³⁵ Horco psilo Jesús biin me. ³⁶ Grë zha Israel co, zeene gon zho roon me, rneechaa zho:

—¿Golwi ganle, blactaa nquialadz me Lazh!

³⁷ Laa zla zho rnee:

—Led me name beenguiac lo mgui ne rold lo ga, ¿pe nrieelod zha niun me, zeena niete Lazh?

Brieaban Lazh

³⁸ Zeene laa Jesús bdzin ro baan Lazh, biire biab guielnë me.

Zig nac tib bliee niaa baa co; rna tib quie nroob ntse zaatne rsëëb zho ngutoo; ³⁹ dzigo bnabey Jesús cob zho quie co.

Pquiab Mart, bzian ngutoo co rëb me:

—¿Mazd gdiobda! ¿Nadze rac tap ngbidz gut me, mbanle na rlaa me!

⁴⁰ Dzigo rëbchaa Jesús:

—Led laa naa nile lo luu, telne dib zdoo luu rlladz luu naa, bii zan luu ganle zha nactaa grë ncuuaane ndzon ne run Dios.

⁴¹ Zeene blozh bdozh zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoza naa, xquizh xquieInzaac luu sac rquiaadiag luu mine rne naa. ⁴² Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

⁴³ Dzigo nguiedz bredz me, rëb me:

—jLazh, brieel!

⁴⁴ Zigne sca bnee me, laa ngutoo co brieel ga, scase nrieel lar dib nia me, dib ni me ne, ni nioog stib lë lar lo me. Dzigo rëb Jesús:

—jGolxadz grë lar ne nrieel me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

⁴⁵ Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me. ⁴⁶ Nogaa zho lel güey zho güeyzodiidz zho lo grë zha farisé zha bleeban me Lazh. ⁴⁷ Horco lëäléd pcaalsa grë pxoz ne rnabey, ni grë zha farisé, rëb zho:

—jPe gnë to dien zha gaca? jZha dziuun ne mgui ne rnee zho Jesús ga, sac gon pe zhidaa milagr ne quiayuun me? ⁴⁸ Telne squise csaan ne me, mbe grëse miech sëëb xnëz me; lozh ga, zeene gacnan men rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

⁴⁹ Dzigo pquiab Caifás, men ne nac pxoz nroob len iz co, rëb me lo zho:

—jNi lal nu lëë peet riende to! ⁵⁰ jPe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

⁵¹ Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel, ⁵² ni grëragaa zha ne no dipse lo guidzliu, zeena tipse gac grëse zha ne nac xpëed Dios.

⁵³ Dzigo grëse zha ne nac wxtis ga, laa zho biaan diidz ne ible no yгаа Jesús gut zho me.

⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziin no tib guiedz win lë Efraín, ga bliaaz no grë no me.

⁵⁵ Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse mine rnabey ley par guiaanmbe zho lo xtoj zho. ⁵⁶ Grëse zha ne rdziin, len yadoo no zho rnabdiidzlsa zho dien pe zdziin Jesús lo lni; sac grëse zho racladz gan me.

⁵⁷ Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaaaz me.

12

Pchoob tib wnaa nceit nex guic Jesús

(Mt. 26:6-13; Mr. 14:3-9)

¹ Sxoop ngbidz gdziin dze lni Pascwa, güey Jesús guiedz Betain, zaatne no Lazh, men ne bleeban me ga. ² Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuuaane gowxtsee zho lo mezh, ³ tibaque zeene bzëëb Marí bzëëbnie Marí tib lo nceit nex ne rrieel guiee ne lë nard, tib lo nceit niazha, rgaaw maase grol boté. Zigne bdziin Marí bdëëb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zëbxlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëëb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquuin.

⁶ Sca rnee Judas, per nliid ne rquia zdoo Judas zha ne guiend pe yquuin, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse raclo dimi len bziuud co, zhlianse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets. ⁸ Telne racladz to gun to xyudar zha ne guiend pe yquuin, tibaque ranlsa to grë to zho, zac tsow ygad to lo zho; sangue naa dzin dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grë pxoz rnabey cow, nacne bnediidzaque zho ye Lazh none gut zho; ¹¹ sac por Lazh, nzian grë zha non, laa zho rbig nëz lo Jesús, laa zho rliladz ne nli me nac Men ne zëeble diidz ga cxeel Dios.

Bzëeb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob diidz laa Jesús gdzin ga dze co. Grë miech guizhiu ne bdzin ga zie lni Pascw, ¹³ psilo zho brie zho ziaad-xinëz zho me; tib tib zho nzhen zho tib lë zin. Lo guiebley co, zeene gon zho me, psilo zho nguiedz roptsie zho, rnee zho:

—¡Zha men nroobtaa nac Dios! ¡Zha ndzontaa men rii pxeel Dios ziaad lo ne! ¡Lë men rii gnabey Israel!

¹⁴ Laa Jesús, zobse me lad tib burr yeen, zigne raquiet lo Xtiidz Dios zaatne rnee:

¹⁵ Grëse to men Israel, gdziebde to.

¡Golwi ganle, laa men ne rnabey ladz to ziaad i, zobse me lad tib burr yeen!

¹⁶ Grëse no ne nac no xpëedscuel me, ni tib no biend hor co ne grëse ncuane noyac ga, raquietlew lo Xtiidz Dios; sinque haxta zeyle me gbaa, dzigora psoladz no nzian grë ncuane raquiet lo Xtiidz Dios ga, gonlo no goca; ni bien no Jesús raquiet ga.

¹⁷ Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co. ¹⁸ Ni nzian grë miech co, laa zho blanso ga ziaad-xinëz zho me, sac bin zho zha been me milagr nroob co. ¹⁹ Grë zha farisé, zeene gon zho grë miech guizhiu co, rneechaa zho:

—¡Pe zhidaa grë miech qui racnie men qui! ¡Peraa nadien dziuun ne!

Rguib bla zha Gres Jesús

²⁰ Lad grë miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, ²¹ dzigo bnee zho lo Lip (zha Betsaid nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

²² Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib. ²⁴ Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gaczian zha ne ygab xnëz naa. ²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdzind dze lozh. ²⁶ Zha ne racladz sëeb xnëz naa, none gun zho mine rnabey naa; ni zaatne gdzin naa yeque zho no gdzin ga. Ni grëse zha ne sëeb xnëz naa ni gon zho xtidz naa, zunnon Pxoz naa zho. ²⁷ Mban rac zdoo naa niina. Per lëda ga gun naa, telne guiep naa lo Pxoz naa csilaa me naa lo grëtaa guielne ne no teed naa. ¡Sac par mincopaa zial naa lo guidzliu rii!

²⁸ 'Dios, luu ne nac luu Pxoꝝ naa —rëb me—. Blu lo grë miech rii ganle ne men nroob nac luu.

Dzigo bin zho zëëb tib tsi men co gbaa, rëb me:

—Laaw blule naa, ni niina laa naa gbire gluw stib.

²⁹ Nzian grë miech ne ndxie ga, zeene bin zho tsi men co, bzhaac zho nguꝝiw; zha ne bien led nguzida, rnee zho:

—Xanjɩ Dios ga gon bnee lo me.

³⁰ Dzigo rëbchaa me lo zho:

—Laa to bin ganle laa Pxoꝝ naa bnee, ni por to gon bnee me, zeena gon to tsi me ni gliladz to ne me pxeel naa. ³¹ Laa dze nagon bdziꝝ zeene laa Dios gunquizh naa xtol grëse miech guidzliu rii; lëë dze bdziꝝ zeene laa mendox piche gnabeydraa ma lo guidzliu rii zigne rnabey ma niina. ³² Sac zeene laa naa quia glaa lo cruz, ga cuedz naa grëse miech zeena sëëb zho xnëz naa.

³³ Ga bzeet me zha gut miech me. ³⁴ Grë miech ne ndxie ga, zeene bin zho sca rëb me, rëbchaa zho:

—¿Guet luu ye? Lo Xtiidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵ Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guielcow; sac zha ne rzë lo ncow riend zho palo zie zho. ³⁶ Niina ne rdeeda diidz golliladz cho nac naa, zeena gac to zha ne nlipaa no lo biini.

Blözse sca rëb me laa me biche ga, blulodraa me lo zho. ³⁷ Niicle gonlo zho nzian milagr ne been me, per ib rililadz zho ne nli Dios pxeel me. ³⁸ Ni ib scalegaa no gaca, sac ga brieequia miñe bzeet Isá (tib men ne biadteed xtiidz Dios) zeene znu rëb me: Dios, bui ganle ni tib choot nëd gliladz xtiidz luu, niicle ran zho grëtaa milagr ne run luu.

³⁹ Ni nligaa ib brieelod nliladz zho me; sac zeene pquiaa Isá, znu rëb me:

⁴⁰ Ncow psan Dios lo zho, ni beenndip me zdo zho;

zeena gand zho me, niicle guiendgaa zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús.

⁴² Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo. ⁴³ ¡Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴ Len dze co, tib vuelte nguiedz bnee Jesús, rëb me:

—¿Grëse zha ne rililadz naa, yele Pxoꝝ naa ga rililadz zho! ⁴⁵ ¡Ni zeene rwi zho lo naa, yele men ne pxeel naa ga ran zho! ⁴⁶ Naa nac zig tib biini ne rziini lo miech, ni grëse zha ne dib zdo gliladz cho nac naa, zriee zho lo guielcow ne no zho. ⁴⁷ Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol. ⁴⁸ Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa. ⁴⁹ Sac grëse ncuane pseed naa miech, led guicd naa biaba, sinque Pxoꝝ naa men ne pxeel naa, men co rnabey naa pe nac miñe cseed naa zho. ⁵⁰ Ni nappaa naa, grëse diidz ne rnabey Pxoꝝ naa naa rne naa, lëew rlu zha yгаа miech tib guielmban ndzon ne gdziind dze lozh; gacxe waa, grëse miñe rnabey me gne naa, zigne racladz me scase rne naaw lo to.

13

Rguiib Jesús ni xpëëdscuel me

¹ Guieel ne rsilo lni Pasew; wdze co pcaalsanie Jesús no grëse no ne nac no xpëëdscuel me, laa no nodiowxtsee. Rienle me ne gataa laa dze co bdziꝝ, zeene laa me gbi lo guidzliu

rii gbire me lo Pxo_z me stib. Grëse zha ne ngab lo me, rley_{nie} me zho; ne nligaa rley_{nie} me zho haxta bdeed me xquie_lmban me psilaa me zho. ²⁻⁴ Rie_n me grëtaa ncuaa_ne no, ladznia me psan Pxo_z mew; lo Pxo_z me brie_e me ziaad me lo guidzliu, ni lo Pxo_z me gdzi_n me niina ne laa me gbi lo guidzliu.

Laa no zioob no no mezh, tibaque ze_en_e guso me blee me lar ne mbix me, bdzi_nle_n me tib lë lar nool. Par hor co, laa mendox pqui_il-le Judas, zhin Simón Iscariot, parne tsi_eto Judas me. ⁵ Dzigo bla_at me nis tib le_n bandej laa me psilo nogui_ib me ni grë zha ne nacgza no, zigse rlozh rgu_iib me ni tib zho scase scase rcu_iidz mew con lar ne ndxie le_n me ga. ⁶ Ze_en_e laa me zie qui_ib me ni Simón Pedr, rëb_{ch}aa Simón lo me:

—jLëda i gon! ¿Pe nacne le_l luu qui_ib ni naa?

⁷ Pqui_ab me rëb me:

—Grieelod guie_n luu niina, pe nacne qui_ib naa ni luu; haxta tedraa nu dzigo gan_{le} guie_n luuw.

⁸ —jNend scaw! —rëb Pedr—. ¿Per naasi gon gnedzd naa diidz qui_ib luu ni naa!

Dzigo rëb_{ch}aa me:

—Grieelod sca ygab luu xnëz naa, tel_ne siguiel_d luu qui_ib naa ni luu.

⁹ Horco pqui_ab Simón, rëb Simón:

—Bzhiguiel_l sca, niinagazh bdi_ib ni naa, per led loxaque nidse naa, sinque dib nia naa, dib guic naa bdi_ib.

¹⁰ Dzigo rëb_{ch}aa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rien_{le} me cho tsi_eto me.

¹² Blozhse bdi_ib me ni no, wbiire wbix me xab co me, bzob me lo mezh; dzigo në me lo no:

—¿Pe bie_n to na pe nacne znu bdi_ib naa ni to? ¹³ Gol_wi gan_{le}: To lëe, Maestro rnee to lo naa, ni rnee to naa nac me_n rnabey; ni nonguiel_a gon, sac ne nligaa scaw. ¹⁴ Gol_gan_l sca, niicle ne maistr naa, niicle ne naa nac me_n ne rnabey, per laa naa bdeed zig tib ngundzi_in win bdi_ib naa ni to. Nana sca, scaque gol_gac lo samiech to. ¹⁵ Laa naa blule lo to zha gu_n to, nana sca gol_tsienal_l min_l co. ¹⁶ Gneli naa lo to gan_{le}, lo grë zha ne nac ngundzi_in, tsod zha ne nonraa lo zha ne rnabey zho; scaque grë zha ne rie mandad, tsod zha ne nonraa lo zha ne rxeel_l zho. ¹⁷ Laa to nan_lew nasca. Gacxe waa, tel_ne tsienal_l to wseed rii, zaacse gac lo xquie_lmban to.

¹⁸ 'Gol_quiaadiag gan_{le}, grëse mi_ne none naa nu, led par grëde tow. Naa bzooblo to, nan_ween naa zha nac to tib tib to, ni nan_ween naa zha rnee lo Xtiidz Dios, rneew: “Lëëque tib zha ne rownie naa, grieequia tsielo naa ladznia zha ne gut naa.” ¹⁹ Laaw rnegazh naa lo to niina, ze_en_a ze_en_e gaca, gliladz to gan_{le} ne nli naa nac me_n ne rne naa nac naa. ²⁰ Ni gol_gona gan_{le}, grëse zha ne ycaania Espiritu Sant, me_n ne cxel_l naa, naale ga nocaania zho; ni zha ne rcaania naa, ye_le me_n ne pxeel_l naa ga rcaania zho.

*Rëb Jesús ne Judas nac zha ne tsi_eto me
(Mt. 26:20-25; Mr. 14:17-21; Lc. 22:21-23)*

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to gan_{le}, lëëque tib to gon tsielo naa ladznia zha ne gut naa.

²² Ze_en_e bdzion no sca rnee me, psilo no rwilolsa no, rien_d no die_n cho nac zha ne rzeet me ga.

²³ Cuepaa me, ga zoob naa (rley_{nie} me naa niicle ne raguiel_d naaw); ²⁴ dzigo blunia Pedr lo naa, gnabdiidz naa lo me die_n cho nac zha ne rzeet me ga. ²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë quietxtil, ni lo zha ne gan_l luu gded naa quietxtil co, lëe zho ga.

Dzigo bzhēn me tib lē guietxtil, blozhse bloobie me guietxtil co, laa me bdeeda lo Judas. ²⁷ Zigne bnaaz Judas guietxtil co, laa mendox bzëëb zdoo Judas. Dzigo rëbchaa Jesús lo Judas:

—Mīne no guic luu guṅ luu, na zeen nawdzegazh beena.

²⁸⁻³⁰ Zigne blozh dow Judas guietxtil co, lëëléd brieē Judas ley; pcowle liuw.

Lo grē no ne ziobnie no me lo mezh ga, ni tib no biēnd pe nacne sca rēb me lo Judas. No zho nan bod no pe ncuaane rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grē zha ne guiēnd pe yquiin; sac Judas nac zha ne ngotsow bziuud win ne no dimi.

³¹ Gonse Jesús laa Judas brieē ley, dzigo nēchaa me lo no:

—Niina nagon bdzin dze zeene glu ganle zha nroobtaa guiēndzon ne rap Mgui ne pxeel Dios, ni ga glu ganle pa lotaa nac guiēndzon ne rap Dios. ³² Ni scaque Dios, zlu me ganle pa lotaa nac guiēndzon ne rap Mgui ne pxeel me ga. ³³ Xin yeena, jzhile cuēz naa lo to nu! Squiguib to naa, per zigne rep naa lo grē zha Israel co, laaw rneque naa lo to niina: Grieelod sēnal to zaatne ga naa. ³⁴ Gane laa naa rsan tib diidz cub rij, ni laa naa rnabey to guṅ tow: Tib tib to, golleynie zha ne nacgrē to, golgantsi zho. Zigne rleynie naa to, sca golleynie zho. ³⁵ Zeene gan miech, ne nligaa dib zdoo to rleynie to samiech to, dzigo zien zho xpēēdscuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rēb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sēnal luu niinagazh; per ib laa luu no guiaadnal.

³⁷ Pquiab Pedr, rēb Pedr:

—¿Per pe nacne grieelod sēnal naa zhits luu niina? ¿Sēnal naa zhits luu gon, niicxe maase gut zho naa waa!

³⁸ Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuēdz tsonle vuelt rēb luu runbeyd luu naa.

14

Niapse por Jesús gdzin miech lo Dios

¹ Tsode to zhgab, tsode to guiēlnē. Tiblique golgun guic to, zigne dib zdoo to riladz to Dios, scaque dib zdoo to golliladz cho nac naa. ² Golgona ganle: Zaatne nac lidz Pxo naa, ndaldoo zaatne cuēz miech no ga, tel niaca mīne guiēnd zaatne cuēz to, nile naaw lo to na. Gacxe waa, niina laa naa ga, gzhixcuaa naa zaatne cuēz to ga. ³ Ni zeene lozh gzhixcuaa naa zaatne cuēz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne. ⁴ Laa to nanle nasca pa lo ga naa, ni nanlegaa to nēz ne.

⁵ Pquiab Mazh rēb Mazh lo me:

—Maestro, pelel nēz na gacndion no, ni per ni zaatne tsie luu ndiond no.

⁶ Dzigo rëbchaa Jesús:

—Naa nac nēz co, naa rseed miech mīne nac diidzli, ni naa rded tib guiēlmban ndzon ne ib gdzind dze lozh. Lo grēse miech, zha ne gliladz cho nac naa, zha co gdzin lo Pxo naa; guiēndraa stib mod ne gdzin zho lo me. ⁷ Telne runbey to naa, dzigo runbeya que to Pxo naa. Ni runbeylegaa to me, sac tibaque ran to me.

⁸ Dzigo rëbchaa Lip lo me:

—Bzhiguiel mazd blu Pxo luu lo no. Totsaque dzian no me, lëëlew ga dzigo.

⁹ Pquiab Jesús, rēb me:

—Blactaale dze ga name Lip no naa lo to, ni gardaque ye gunbey luu naa. ¿Grēse zha ne ran naa, lëëque Pxo naa ga ran zho! ¿Zha nac dzigo ne racladz luu glu naa me lo to?

¹⁰ ¿Niacxe rliładz luu dzigo ne tibaque nac no grop no Pxoꝝ naa? Grēse miñe rseed naa to, led guicd naa riaba; grēse ncuaane ruñ naa, me rnabeya, me ruña sac tibaque nac no grop no me. ¹¹ Golliladz sca ne tibaque nac no grop no Pxoꝝ naa. Tełne gooñ rliładzdgaa tow zigne ree naa lo to nu, siquier lo grē dziin ne nodziuuñ no, ga golgañ gañle ne nli tibaque nac no grop no me.

¹² 'Ne nligaa, gneli naa lo to gañle: Grēse zha ne rliładz cho nac naa, ye zho zuñ zho grē milagr ne ruñ naa, ni haxta nroobraa ncuaane guñ zho; sac teł naa, laa naa no guia zaatne no Pxoꝝ naa. ¹³ Ncuaane gnabtaa to lo Pxoꝝ naa, totsaque glu to ne nli rliładz to naa, zuñ naaw; zeena ga gañ miech gañle me nac meñ ne mazdraa nroob, me nac meñ ne mazdraa non. ¹⁴ Ne nligaa, tełne rnalo to naa, ncuaane gnabtaa to zuñ naaw.

Sxeel Jesús Espíritu Sant

¹⁵ 'Tełne nli rleyne to naa, golgun grē miñe rnabey naa to sca. ¹⁶ Scagaa naa, laa naa gnab lo Pxoꝝ naa cxeel me tib meñ ne tibaque gacnieñ to, tibaque cchoobladz zdoo to; ib gdziñd dze ne csaan me to. ¡Lēē meñ co ga nac Espíritu Sant, meñ ne rlu pa miñ nac diidzli; ni ible sxeel Pxoꝝ naa me! ¹⁷ Zha ne ngabd xnēz naa, grieelod ycaania zho me, sac ranđ zho me niicle runbeyd zho me; sangue to, runbey to me sac me quianap to niina, ni zbēzga me zdoo to.

¹⁸ 'Ib csaanladz naa to, zbire naa guiañ naa lo to stib. ¹⁹ Nli zhilew, zeene gandraa grē miech naa, sangue to goñ bii zañ to naa; sac zriebaana naa, ni scaquegaa to zga to tib guiełmban ndzon ne gdziñd dze lozh. ²⁰ Gañ dze co, zeene gañ to laa naa grieeban, ga gliladz to gañle ne nli tibaque nac no grop no Pxoꝝ naa, zigne tibaque nacie naa to ni naciegaa to naa. ²¹ Zha ne runbey zha nac grē miñe rnabey naa, ni rban zhow zigne naca, ga rlu ne nli rleyne zho naa; ni zigne rleyne zho naa, scaque Pxoꝝ naa zleyne me zho; niicle naagaaw zleyne naa zho, ni zlu naa lo zho gañle cho nac naa.

²² Dzigo pquiab Judas (zhaa Judas Iscariot), rēb Judas lo me:

—¿Pe nac waa lose no glu luu cho nac luu? ¿Tełzhe grēraa miech waa?

²³ Pquiab me rēb me:

—Zha ne ruñ miñe rnabey naa, lo zha co glu naa cho nac naa; sac rlu zho ne nli rleyne zho naa. Ni haxta ziaad no grop no Pxoꝝ naa gbannie no zho; sac zigne rleyne zho naa, scaque zleyne me zho. ²⁴ Sangue zha ne ruñd miñe rnabey naa, ¿zha dieñ glu naa lo zho cho nac naa? Sac rlu rleyne zho naa. Golsoladz gañle: grēse diidz ne ron to rne naa, led guicd naa riaba, xtiidz Pxoꝝ naaw. ²⁵ Laa naa rne grē miñ rii, laga bii zo naa lo to nu, ²⁶ per zeene laa Pxoꝝ naa cxeel Espíritu Sant meñ ne guiaad cchoobladz zdoo to (meñ co guiaad xcuent naa), meñ co lozh cseed to, ni guncsoladz me to grēse miñe bne naa lo to.

²⁷ 'Laa naa guia, per laa naa rsañ tib guiełbley zdoo to, zeena zigne tibliladz rac zdoo naa, scaque tibliladz gac zdoo to. Sac guiełbley ne rnedz naa lo to nu, nacda zig nac guiełbley ne runbey grēraa miech guidzliu rii. Tsođe to zhgab sca, niicle gdziebde to. ²⁸ Laa to binle gañle, laa naa no guia lo Pxoꝝ naa per zbire naa guiañ naa lo to stib. Tełne nli rleyne to naa ine nley golgac, niina ne ron to laa naa guia lo me, sac goñ meñ nroobraa nac me lo naa. ²⁹ Laa naa rne grē miñ rii lo to niina, zeena zeene gaca, ga lozh guieñ to gañle cho nac naa.

³⁰ 'Led nroobdraa sodiidznie naa to, sac ile ziaad mendox, meñ ne rnabey lo guidzliu rii. Peet grieelod guñ mendox naa, ³¹ per ible none gon naa xtiidz Pxoꝝ naa meñ ne pxeel naa, zeena gañ miech gañle ne nli rleyne naa me. ¡Goltsieso nasca, zeena zio ne!

15

Jesús nac zig tib lbë uv

¹ 'Naa nac zig tib zhan lbë uv, laa to nac zhicwa, laa Pxoꝝ naa nac zig tib zha ne quianapa. ² Grēse zhicw lbë co miñe rquiad nex lo, rchug mew; laa grē miñe rquia nex lo, ine rsañmbe me low, rbelaan me low zeena yquiaraa nex low.

³ 'Zig nac to gon, laa Dios psanmbele to sacne ziana_l to grë xtidz naa mine pseed naa to. ⁴ Gbichede to lo naa sca, sinque tibaque golgacnie naa zigne nacnie naa to. Golgan ganle, zig nac tib zhicw lbë uv, peet nex grieelod yquia low telne tibnëzle nixa; scaquegaa to nagon, grieelod gun to grë ncuaane rdziladz naa, telne nacniede to naa. ⁵ Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuaane gun zho zdziladz Diosa; ⁶ sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec. ⁷ Telne tibaque gacnie to naa, ni tibaque tsoxco to grë mine pseed naa to, dzigosi ncuaane gacladztta to golinaba, ni scagaa scaania tow.

⁸ 'Gollu sca ne nli xpëëdsuel naa nac to, golsannon Pxo_z naa, niapse ncuaane rdziladz me min co golgun.

⁹ 'Ne nligaa rley niedox naa to. Golwi ganle, zigne rley nie Pxo_z naa naa, scaque rley nie naa to. Golguien sca tibaque golgun mine rnabey naa. ¹⁰ Sac gon, zha ne gun mine rnabey naa, gzataa dze zley nie naa zho; sac sca rley nie Pxo_z naa naa ne run naa mine rnabey me. ¹¹ Laa naa rzet min rii lo to, zeena guiaad tib guielbley zdoo to. Ne nligaa, zeena guiaad tib guielbley nroob zdoo to; ni naa gnedz guielbley co lo to.

¹² 'Laa naa rnabey to, laa naa rnab lo to: ¡Golley nie samiech to, zigne rley nie naa to! Tel naa, golguien ganle pa lotaa rley nie naa to, ¹³ sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rley nie zho zho.

¹⁴ 'Ni to gon, telne gon to grë mine rne naa lo to, dzigosi nli rley nie to naa. ¹⁵ Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rley nie naa to, sac grëse mine rnabey Pxo_z naa, grëse zigne rnee me, laaw bzodiidzle naa lo to. ¹⁶ Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gun to niapse ncuaane rdziladz Dios; dzigosi ncuaane gnabtaa to lo Pxo_z naa, ne nac to zha ne no xnëz naa, zneedz mew. ¹⁷ Laa naa rso diidz lo to: Golley nie samiech to. ¹⁸ Niicle rlëë zho ran zho to, golsoladz ganle, desde naa squi rlëë zho ran zho. ¹⁹ Rlëë zho ran zho to, sac laa naa bleele to lad zho, ziana_ldraa to ncuaane rley nie zho; laa telne nagon bii nac to zigne nac zho, dzigosi zëëb gley nie zho to. ²⁰ Golsoladz ganle, zeene znu ni naa lo to: ¡Tsod ngundziin ne ndziibsr_{aa} non lo zha ne rnabey zho! Tel naa, pquiana_l miech naa, ¿pe lel to dzigo gandze zho? Nana, zigne brieequiagaa palal zha ne bliladz xtidz naa, scaque zrieequia zha ne yquiaadiag mine gnee to.

²¹ 'Ible squiana_l miech to ne nac to zha ne ngab xnëz naa, sac runbeyd zho Dios men ne pxeel naa. ²² Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho. ²³ Zha ne rlëë ran zho naa, yele Pxo_z naa ga rlëënie zho. ²⁴ Ne nligaa telne niaca mine niand zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëë ran zho no grop no Pxo_z naa. ²⁵ I nagon norieequia mine raquiet lo Xtiidz Dios, zaatne znu rnee: "Peet guie_lntseeb quiayund naa lo zho, per rlëënie zho naa."

²⁶ 'Laa naa nile lo to ganle, ible sxel naa Espí_{ri}tu Sant gacnie to, niapse diidzli rnee me. Lo Pxo_z naa grie_e me guiaad me, me cchoobladz zdoo to, ni me gneedz guie_lbiini lo to lozh guien to cho nac naa. ²⁷ Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdoo to gnalo to naa. ² Sac gon zunxoon zho to, zbee zho to yadoo; ni zdzin dze haxta zut zho to, sac masaque sac zho lëë mine racladz Dios ga noy_un zho. ³ Laa zho gun grë min co, sac niicle Pxo_z naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidz naaw lo to glo, sacne hor co laa naa bii zo

lo to. ⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacгаа ne laa naa ga. ⁶ Lëe gdib mine run to, riab guielnë to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grieelod guiaad men ne guiadchoobladz zdoo to ga. Sangue telne guia naa, dzigo naazhal cxel me. ⁸ Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdzin tib dze zeene laa Dios gun xquielwxtis me. ⁹ ¿Pe nacne nac zho miech ngoopdol? Miech ngoopdol nac zho, sacne riladzd zho cho nac naa. ¹⁰ ¿Zha grielo laa zho lo dol co guiaanwen zho lo Dios? Zrieelow, mincocxe waa nacne bial naa, ni na laa naa guia zaatne zob Pxoza naa, gandraa to naa. ¹¹ ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnëdox ne ygaa mendox, men ne quianabey lo guidzliu rii.

¹² 'Nzianraa ncuane racladz naa sodiidz naa lo to! Per rien naa grieelod tsoquic to zha naca niina. ¹³ Zeene guiaad Espiritu Sant, me gneedz guielbiini lo to guien to grëraa ncuane no gacnan to, ni grëгаа ncuane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxoza naa, min co gnee me. ¹⁴ Ga glu me lo miech ganle ne nli men nroob, men non nac naa. ¹⁵ Rne naa ga glu me, sac grëtaa ncuane rnabey Pxoza naa, yeque naa rnabeya. ¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxoza me.

¹⁹ Bien me racladz no gnabdiidz no lo me, dzigo në me lo no:

—¿Racladz to lëe gacnan to zha nacne znu rne naa? ²⁰ Golquiaadiaga sca ganle: Zeene gdzin dze co, laga noyoon to no to guielnë ne laa naa biche lo to, laa grëraa miech haxta zley zho ne laa naa wbiche lo zho. Nli nroob guielnë ne tso to, per zeene laa to gan naa stib, guielbley nroob ne tso to. ²¹ Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu. ²² Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grieelod ctiche guielbley co lo to.

²³ 'Zeene gal dze co, yquiindraa to pe gnabdiidz to lo naa. Ncuane gnabtaa to, lo Pxoza naa gnab tow, ni zneedz mew, sac xnëz naa ngab to. ²⁴ Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuane rquiin to golnaba lo me, ni ible zneedz mew gon. Nroob guielbley ne tso to hor co. ²⁵ Nzian grë ncuane zine naa lo to, rned naaw clar; per laa dze bdzin zeene grëse ncuane gne naa, clar gne naaw lo to, zig nac zeene gzeta naa Pxoza naa. ²⁶ Ni zig nile naa ga, hor cosi ncuane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuane gnab to lo me, ²⁷ sac ye me rleynie me to. Rleynie me to, sac gon rleynie to naa ni riladz to ne nli lo me brie naa bial naa lo guidzliu. ²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—¿Nasi nagon rien no zha rnee luu! Sac clar rnee luu, rneedraa luu zigne rnee luu glo.

³⁰ Nasi rien no grëse ncuane nan luu, sac zig nac niina pquiindpaa nabdiidz no lo luu. Gacxe waa, nasi nagon riladz no ne nli lo Dios brie luu.

³¹ Pquiab me, në me:

—¿Wen ga telne riladz to niina cho nac naa! ³² Per lëe hor co nagon bdzin; ni niina, grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacnie Pxoza naa naa. ³³ Grëse ncuane bne naa lo to nu, laaw bne naa zeena peet tsienied guic to, benque nanle to ganle tibaque nacnie naa to. Parga nli, laga

no to lo guidzliu rii, nzian grë guielnë ne ted to, per gdziebde to; sac gon naa rnabey, ladznia naa no grëtaa ncuaañe no lo guidzliu.

17

Rnab Jesús gacniën Dios xpëëdsuel me

¹ Blozhse sca në me lo no, blis lo me bui me nëz gbaa.

—Dios, luu ne nac luu Pxoza naa —rëb me—, niina nagon laa dze co bdzin. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu. ² Zigne psan luu grëse miech ladznia naa, ni gdeed naa tib guielmban ndzon ne gdzind dze lozh lo grëse zha ne bneedz luu ngab xnëz naa; scaque niina blu ganle men nroob nac naa. ³ Lëë guielmban co yгаа grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. ⁴ Grëse ncuaañe bnabey luu naa, laaw noyuu naa; ni ga rlu naa lo grë miech rii ganle pa lotaa men nroob nac luu. ⁵ Scagaa luu ne nac luu Pxoza naa, niina ne laa naa glanso lo luu, blu ganle men nroob nac naa; sac desde mazd glo zeene gard tsaа grëtaa ncuaañe no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. ⁷ Zig nac niina, grëse ncuaañe bneedz luu lo naa, nanle zho ne luu bneedza, ⁸ sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni rliladz zho ne luu pxeel naa. ⁹ Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, ¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaañe nacchen naa, chen luuw; ni grësegaa ncuaañe nacchen luu, chen naaw. ¹¹ Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu Pxoza naa, luu ne nac luu tib men ne guien xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. ¹² Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca greequia mine raquiet lo Xtiidz luu.

¹³ Zhilew laa naa glanso zaatne no luu i; per len dze ne blëz naa lo zho nu, nzian grë ncuaañe bne naa lo zho, zeena ye zho tso guielbley nroob ne no naa. ¹⁴ Pseed naa zho mine nac xtiidz luu; per na rlëë grëraa miech ran zho zho, sacne zianaal draa zho grë ncuaañe ndzinlid ne rac lo guidzliu rii. Nac zho zigne nac naa, rleynied naa grë ncuaañ co. ¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuaañe racladz mendox. ¹⁶ Sac niicle zhaw, niicle naaw, choot zionald grë ncuaañe ndzinlid ne rac lo guidzliu rii. ¹⁷ Bzhiguiel sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu. ¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa. ¹⁹ Ni niina, dib zdoo naa laa naa gun mine rnabey luu, zeena ye zho guien zho none dib zdoo zho gun zho mine rnabey luu.

Rnab Jesús por grë zha ne ygabraa xnëz me

²⁰ Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho; ²¹ zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. ²² Laa naa psannon zho zigne psannaque luu naa, ni tipse gac zho zigne tibaque nac ne grop ne. ²³ Zigne nacie luu naa, scaque nacie naa zho. Bzhiguiel gocniën zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. ²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa

guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaa guidzliu.

²⁵ 'Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. ²⁶ Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bnab Jesús lo Dios, laa me brieenie no ga bdieedquia no nöz dan ro psë ne rnee zho Psë Cedrón. Ga no tib zaatne zëeb niapse yag nex, dzigo ga bliiaz no gza no me.

² Judas zha ne pto me ga, wen wen runbey Judas lugar co, sac nzian vuelt ziyenie me no ga. ³ Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzengaa spad. (Lëe grë zha co pxeel grë pxoz rnabey, ni grë zha farisé.) ⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaane ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbiire rzhitsaque zho, grëse zho biab liu. Ye Judas no lad co. ⁷ Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeene rëb me: “Lo grë zha ne bneedz luu lo naa, ni tib zho bnitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.)

¹¹ Zeene gon Jesús, rëbcha me:

—¡Blootsow spad qui Pedr! ¡Bien ganle Pxoza naa rnabey znu teed naa! ¿Niacxe gond naa mine rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdziinnie me lidz men ne lë Anás, pxozdzoop Caifás. Caifás nac pxoz nroob len iz co, ¹⁴ ni me ga rëb lo grë men non lo zha Israel, ne mazd wena tibaque zha ne ygaa guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdzin no ro lidz Anás, loxaque naa brieelo bzëeb nöz ley. ¹⁶ Laa Pedr, zaatne nactaa ro yu par gdzin zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed wnaa co diidz bzëeb Pedr. ¹⁷ Dzigo rëbcha me lo Pedr:

—¿Bod ye luu dzigo lëe nac xpëedscuel men ne bdziinnie zho i?

—Coo, led yed naa —rëb Pedr.

¹⁸ Grë zha ne quia xtsiin men co ni grë menguiib ne ndxie ga, laa zho bzëëgle gui. Grëse zho, laa zho ndxiedzëe lo gui ga, sac rac nal. Ye Pedr bdziñ lo zho ga nodzëe Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nöz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech. ²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngeets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu. ²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuane bne naa.

²² Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

²³ Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëëque lo gui nöz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel men ne blansonie zho i lëe nac luu?

Laane neeli Pedr, lel pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

²⁶ Ye tib zhalidz Malcw, zha ne pchug Pedr diag ga, laa zho zodzëe lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

²⁷ Wbiire Pedr rëb Pedr runbeyd Pedr me, ni lëetaque hor co laa tib gall pcuedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdziñ zho, ni tib zho bzëëbd len yulow, sac racladz zho quiits zho mine rnabey xley lay zho; parne grieelo yquiin zho guielwagw ne row zho lni Pascw co. ²⁹ Nacne brie Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guelntseeb ne noyun me, gane ziaadnie no me! ¡Telne niac me men ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golgunquizh me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grielod ne nose gnabey guet tib miech.

³² Ga briequia mine bnee Jesús, zeene bzeet me ible zut miech me. ³³ Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riw, dzigosi grëse zha ne nacie naa niacntseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible min co nacie bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, briee Pilat ga güeynee Pilat lo grë zha ne bdzinnie me ga, rëb Pilat lo zho:

—Ni tib dol gon rapd men rii. ³⁹ Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa men ne nac zhirey to nu?

⁴⁰ Pquiabbe zho, rëb zho:

—¿Csilaad luu me! ¡Mazd psilaa Barrabás!

Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla menguiib, bdeed dooguid zho Jesús. ² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. ³ Dzigo psilo zho runnguzee zho me, nguedz roptsie zho rnee zho:

—¿Bley na ganle, laa luu nacle zhirey zha Israel!

Ni rgap zho lo me.

⁴ Wbiire Pilat brieequia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguald guet me; laa naa pquieple me rlu ni tib guieintseeb beend me.

⁵ Zeene laa Jesús brieequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëë me nu.

⁶ Grë pxoz ne rnabey, ni grë menguiib ne rquianap yadoo, zeene gon zho me, psilo zho nguedz roptsie zho rnee zho:

—¿None guet me! ¡Bnabey yquia me lo cruz!

Dzigo rëbchaa Pilat:

—¿Goltsienie me sca! ¡To golquiaa me lo cruz! Sangue naa, grieelod yquia naa me lo cruz; sac laa naa gonle peet guieintseeb beend me.

⁷ Pquiab zho rëb zho:

—¿Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me. ⁹ Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat. ¹⁰ Dzigo rëb Pilat:

—¿Pe nacie rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grielod ne luu gnabey zha gac naa. Mincocxe waa, zhi nac xtol luu, mazdraa nac xtol zha ne biaadlo naa nia luu.

¹² Dzigo gocladz Pilat nsilaa me Jesús, per bzhiguiel d grë zha ne güeysan me ga.

—Telne laa luu csilaa mgui qui gon —rëb zho—, rrieequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grë miech co, bnabey Pilat briece Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.) ¹⁴ Lëe dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵ Psilo zho stib, nguiedz roptsie zho, rnee zho:

—¡Beetgazh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëe men co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús briece ga, rna tib cruz nroob ney me; laa zho zienie me. Bdziñnie zho me ro guiedz, zaatne rnee zho “Gui Beerguic Ngutoo”; ¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga. ²¹ Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Mine pquia naa, laaw pquiale ga. Ni sca none guiaana.

²³ Laa grë menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaannie zho tib tib zho. Laa lar ne rbix me, tiblagaque naca, ndiibda; ²⁴ dzigo rëbchaa zho:

—Minritaa nagon dziuungrold ne. Mine naca gotsaa dzio new rif, dzigo zha ne grieequia zha co guiaanniew.

Ga briequia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbiix naa, bio zhow rif.” Ni scadaa been gza menguiib co.

²⁵ Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal. ²⁶ Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëe xpëed luu i zo i.

²⁷ Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gon me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

²⁹ Gax lo grë menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me. ³⁰ Zeene bdziñ nziu co ro me, pquiin me niipa, dzigo rëbchaa me: —Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grë zha ne rnabey lo menguietz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgash zho lo cruz dze co; sac racladzd zho scaque quia zho lo cruz zeene laa dze nda co gdziñ.

³² Dzigo pxeel Pilat bla menguiib. Zeene bdziñ zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho. ³³ Zeene bdziñ zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne brieeg ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. ³⁶ Ga briequia mine raquiet lo Xtiidz Dios, zaatne rnee: “Ni tib dzit ne no me quiitsd zho.” ³⁷ Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bqueets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieelo tselit me xcuerp Jesús lo cruz. Ye me xpëedscuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiptap kil tiblo zënex ne raa yaal ne lë mirr ni yaal ne lë áloe. ⁴⁰ Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

⁴¹ Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; ⁴² dzigo nacne gase güeyqueets zho me, sac zhile runfalt sëeb dze nda co, ni baa cose nac mine riaan gax ga.

20

BRIEBAN JESUS

(Mt. 28:1-10; Mr. 16:1-8; Lc. 24:1-12)

¹ Gol dze ne rzobni zhmalá, silgaw, scase bii ncow rnaw, brieeg Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nëz.

² Horco lëelëd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

³ Dzigo lëelëd, brieeg no grop no Pedr, zioso no ro baa. ⁴⁻⁵ Zeene bdziñ naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëebd naa. Laa naa blozhdze bdiixlo len baa, zeene laa Pedr blanso. ⁶ Zigne blanso Pedr bzëeb Pedr len baa, gon Pedr nligaa laa lar co zhoob ga, ⁷ niicle lar ne briel guic mew, laaw zhoobaque ga; ndibëdsew, zhooba tib lad.

⁸ Nacne bzëebaque naa. Zeene gon naa zha zhoob lar co, dzigoraa bliladz naa ne nli brieegan me. ⁹ Sac hor co, bii gard tsoguc naa zha rnee lo Xtiidz Dios; sac ga raquiet ne ible zrieegan me!

Gon Marí Magdal Jesús

(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nêz leñ baa co, ¹² gon me laa chop anjl zob leen co. Dib nquitsbiese rna xab grop anjl co, tib me zob nêz ne bzhoob guic Jesús, stib me zob nêz ne bio ni me; ¹³ dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeyсан zho me.

¹⁴ Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesús!

¹⁵ —¿Pe nacne roon luu? —rëb Jesús—. ¿Cho rguib luu?

Leñ güeynie guic Marí rëb me bod men ne rquianap gaw, dzigo rëbchaa me:

—Bzhiguiel, telne luu biadbee me nu, bnë dien pa lo güeyсан luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëälëd biecw me; dzigora beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús. ¹⁷ Dzigo rëbchaa Jesús:

—¡Xeend luu naa! Sac gard guia naa lo Pxoza naa gbaa. Mine naca, güey güeynie diidz lo grë zha ne bzënal zhits naa; gudz lo zho: Laa naa nole nêz guia naa lo men ne nac Pxoza ne, men ne nac Dios ne rdziuunbey ne.

¹⁸ Horco lëälëd wbi Marí ga, ziaadnie me diidz lo no. Blanso me bzodiidz me zha gon me Jesús, ni nê me lo no zigne rëbse Jesús lo me ga.

Briequia Jesús lo xpëedscuel me

(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëedscuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grë zha Israel ne rlëenie me. Laa no ndxie ga, tibaque zeene briequia me bzo me glowtaa lo no; pquiaabdiuzh me no. ²⁰ Blozhse pquiaabdiuzh me no, dzigo blu me leñ nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdzion no ne nli mew! ²¹ Blozh ga, nê me lo no:

—¡Laa naa rnedz tib guielbley zdoo to, zeena peet tsienied guic to! Zigne pxeel Pxoza naa naa bial naa, scagaa niina laa naa rxel to.

²² Dzigo blub me lo no grëse no.

—Golcaania Espiritu Sant —nê me—. ²³ Ni zeene gon gon to tib miech perdon, scaque Dios zun me zho perdon; laa telne siguield zho gon to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëëdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa leñ nia me zaatne biaaz clav, ni cteed-xug naa ga; ni csëebnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque leñ yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëeb leñ yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no, ²⁷ rëbchaa me lo Mazh:

—Wbig na Mazh, bui leñ nia naa, psëeb mzhugnia luu nu. Dien nia luu nu, psëebnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigora bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rli^ladz niina, lëécxe laa luu gon^lle naa waa. ¡Dichos zha ne gliladz ne nli mban naa, niicle ran^d zho naa!

¿Pe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzion^l no been^l me, led grëda raquiet lo guits rii. ³¹ Miñe pquiase naa nu, laaw pquia naa zeena zeene glab tow, guien^l to gan^lle ni gliladz to: Jesús nac men^l ne biaadsilaa ne lo xtol^l ne, Dios bzooblo me biaad me, ni Xpëéd Dios nac me; sac zha ne dib zdoo gliladz cho nac me, zгаа zho tib guiel^lmban ndzon ne gdziñd dze lozh.

21

Gon^l zho Jesús Galilé

¹ Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (men^l ne nac men^l Caná ga), bets naa Jacob ni schop zha ne nacgza no. ³ Tibaque zeene në Pedr, laa Pedr tsie gooz mel^l. Dzigo rdzieets no:

—Yeque no sca zia guio ne.

Dzigo bziaab no tib len^l barcw win gza no, laa no zio.

Dipse guieel bdzionie no barcw co lo nis, per ni tib mel^l bgaad. ⁴ Laa liu ziaadle lozh guini, zeene bdzion^l no laa tib men^l co zo ro nis, per ni tib no bdziuuñbeyd me. ⁵ Dzigo bnee men^l co lo no, në me:

—Yo to dien^l xin, ¿pe bгаа ma?

Pquiab no rdzieets no lo me:

—Choot ma bгаа.

⁶ Dzigo nëchaa me:

—Golron^l guie^x ne rgaa ma i nëz derech gan^lle, znaaz to ma.

Dzigo bron^l no guie^x co nëz derech. Zeene laa no cueew lo nis, ib lëbd no glis now; ndaldoo mel^l ne biodzë len^a.

⁷ —¡Pedr! —rep naa—. ¡Bina gan^lle, xmaistr ne i gon^l!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis. ⁸ Laa no biaan^l len^l barcw ga; nole bdziñniew zaatne nac ro nis. Maase tapgaltsii metr sca bdioobniu no guie^x co lo nis.

⁹ Zeene brie^e no len^l barcw, bdzion^l no laa gui noyecle, laa tib mel^l zhooble lo gui co, ye guietxtil ne. ¹⁰ Dzigo në Jesús lo no:

—Goltënie bla mel^l ne blozh bnaaz to i nu dien^l.

¹¹ Dzigo güey Pedr bie^p me len^l barcw, güeyxadz me guie^x ne no mel^l ga; dzigo bdoobniu mew bdziñnie mew haxta zaatne nacpaa ro nis. Mel^l tafa, niapse ma mbeew, zeene bgab ma rgaa ma tib gayoo chooptsiiptson^l lo grë ma; niicle scataa nzian ma, per blëb guie^x co, briezda.

¹² Blozh ga, bredz me no, në me:

—¡Goltë na, zeena gowxeren to!

Ni tib no bnabdiidzd lo me dien^l pe nli mew; sac, ¡rien^lpaa no ne nli mew!

¹³ Dzigo wbig me bdiiz me guietxtil co lo no, bzheñ me mel^l ne, bneedz me ma lo no.

¹⁴ Ga bion^l vuel^t brieequia me lo no wlal ne brie^eban me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw gan^lle.

—Pteedlo grë xpëcwxii^l win naa sca —rëb me.

¹⁶ Wbiire me, rëb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiiil naa sca.

¹⁷ Wbiireque me stib rëb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rëb me, mban goc zdoo Pedr; sac gale rac tson vuilt zinabdiidz me lo Pedr, dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiiil naa sca.

¹⁸ Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.

¹⁹ Zeene znu rëb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rëbchaa me:

—¿Dënal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mëdscuel ne scataa rleyne me ga, laa zho nal ga, zha ne zobpaa cue me ga lo xtsee co, zha ne wbigpaa bnabdiidz lo me dien cho nac zha ne tsielo me ladznia zha ne gut me; dzigo rëbchaa Pedr lo me:

²¹ —Telzhe zha rii waa, ¿pe nac mine ted zho?

²² Rëbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dënal zhits naa!

²³ Zeene gocnan grëraa zha ne riladz Jesús sca bnee me, grëse zho tibaque güeynie guic zho gdzindraa dze guet naa. Per led scada, sinque znu naca, rëb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grëse mine pquia naa nu gon, grop lo naa gon naaw, grëse zha ne nacgrë no nappaa zho ganle ne diidzli rne naa.

²⁵ Ndaldooraa grë ncuaane nroob ne been Jesús, tel niaca mine yquiaw grësew, ni ygaad dib lo guidzliu tsotsow grë guits ne yquiaw ga.

MINE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me ² haxta gol dze ne psan me diidz pe nac ncuane gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëë dze co ga zey me gbaa.

³ Nli psacsi miech me, beet zho me, per brieaban me. Ni par glu ganle ne nli brieaban me, dipse len choo ngbidz briequia me lo grë zha ne sca bzooblo me tsienee Xtiidz me. Gzataa zeene rriequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta quiet Espíritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

⁵ —Golsoladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rriequia Espíritu co chobnis to; ni zhile gdziñ dze ne laa min co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

⁷ Dzigo pquiab me rëb me lo zho:

—Dios, men ne nac Pxoze naa, ncuane gun me riegualde to gacnan tow, mese nan dien pa dzew, dien pa horgaaw; sac mese nac men ne grieelo gna. ⁸ Sinque to, zeene laa Espíritu Sant gneedz guielbiini lo to, hor co laa to yгаа poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me. ¹⁰ Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; ¹¹ rëb me lo zho:

—¿Pe nacte squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

¹² Blozh ga dzigo laa zho wbi guic gui co (lëë Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz zho lo dziin. ¹³ Bdziñ zho zaatne rbëz zho, biep zho len yu ne riaan glaa; sac len yu glaa co ga no zho. Ga rbëz Pedr, rbëz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob. ¹⁴ Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gun dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, gogacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lëë min co pquiaa rey David zeene psiaab Espíritu Santa guic me. ¹⁷ Ye Judas gocgza no, ye me nac diidz niun dziin ne nodziun no niina.

¹⁸ 'Ni nligaa laa ne niun me dziin co, lel been me guieñtseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgash me, nëzrii nëzrec bliaal len me. ¹⁹ Min co nacte zeene laa grë zha Jerusalén gocnana, dzigo bleelë zho liu co "Liu Ren".

²⁰ 'Zigne rneque naa ga —rëb Pedr—, ible lo Xtiidz Dios sca zhobnee; ni lëë min co ga raquiet zaatne znu rnee:

Ible ziaandets lidz zho,
ni stib choot gbandraa zaatne bio zho.
Ni rneequew:

Zhaale zha ne guiaannie dziin ne no niun zho.

²¹⁻²² 'Min co nagon, ible nonguiela so tib zha ne guiaan xlugar Judas, gacgza zho no guioxobne no ne nli brieaban Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta goł dze ne laa me zey gbaa, lad co gołgotsaa cue ne tib zha ne so gacgza no.

²³ Dzigo ble zho tib men ne lë José Barsabás (lëëque me ga rnee zho Just), ni stib men ne lë Matí.

²⁴ Blozh ga, bnaab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoos tib tib miech, gane niina laa no rnab lo luu, luu blu dien cho tib zha rii racladz luu so ²⁵ gun dziin ne psaan Judas; sac laa Judas zeyle zaatne rieguial Judas.

²⁶ Blozhse bnaab zho lo Dios, laa grop zha co bio rif. Nacne brieequia men ne lë Matí ga, dzigo dze cotaa laa me gocgza stsiiptib zha poxtl co.

2

Biaad Espíritu Sant

¹ Zeene goc gadz zhmal gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa. ² Laa zho ndxie grë zho, tibaque zeene bio tib bi nroob zhan gbaa, zig nac zeene rrie tib medox, haxta len yu ne ndxie zho ga pquiab; ³ ni brieequia nzian biini, rluw zig nac ludz miech, tibga tibga biini co blëz guic zho grëse zho. ⁴ Horco grëse zho pcaania guielbiini ne bdeed Espíritu Sant, psilo zho rnee zho grë xtiidz stib miech mine rsiaabtaa me guic zho.

⁵ Len dze co nziandoo grë zha Israel ne no stib ladz ben bdzin Jerusalén, grë zha ne bii zienal xley Dios. ⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtiidz zho, per nli rzee zdoos zho. ⁷⁻⁸ Rlozhd gwi zho rnee zho:

—¡Pe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne! ⁹⁻¹⁰ Nu ndxie grë men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men Egipt, haxta grë men ne ziaad nëz África, delant guiedz Ciren; grë men Cret, men Arab, grë zha Israel ne ziaad nëz Roma, grë men Roma, zha ne zienal zhiwseed zha Israel.

¹¹ 'Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne run Dios.

¹² Grëse zho per nli rzee zdoos zho, rdzieldraa zho zha gun zho, rnabdiidzlsa zho rnee zho:

—¿Bay pe i? ¡Ncuaane gard dzian ne!

¹³ Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib lban

¹⁴ Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle.

¹⁵ No bla to quianee rëb to rzuudz no, per led rzuuzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz. ¹⁶ Led rzuuzd no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

¹⁷ Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech;
grë xingan zhow, grë xindzooop zhow, laa zho cteed xtidz naa,
grë zha nguiieg, nzian grë ncuaane glulo lo zho,
grë mengol, nzian grë ncuaane glu mcaal lo me.

¹⁸ Len dze co,

grëse zha ne nguzobdiidz lo naa,
niicle mguiw, niicle wnaaw laa naa cxel zhiEspíritu naa zdoo zho,
dzigo grëse zho cteed xtidz naa.

¹⁹ Nzian grë ncuaane gzee zdoo to glu naa zhan gbaa,
scaque lo guidzliu, zan to ren, zan to bel, zan to grë goxdoo.

²⁰ Zeene zhile gdziñ dze ne guiaad men ne rnabey ne,
laa lo ngbidz ycow, laa mëë gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

²¹ Grëse zha ne dib zdoo gnab lo Dios yquia zdoo me zho,
grëse zha co scaania me zho.

²² 'Grëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoo to; ga blu ganle ne nli Dios nacie me. ²³ Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz. ²⁴ Per bleeban Dios me, psilaa Dios me ladznia guielgut; sac lëbd guielgut ne lëw gnabey lo me.

²⁵ 'Zeene bzeet David Jesús, znu rëb me:

Men ne rnabey naa, ran naa tibaque quianap me naa;
tibaque zo me cue naa nëz derech, ¿pe nac nadien ne lega pe gac naa?

²⁶ Gacxe waa, nley no zdoo naa,
niicle ludz naaw, rleya roolnie naa me.

Ni gane tibliladz rac naa;

²⁷ sac nan naa niicle guet naa,
ib csaand me guiaan naa len baa,
ib gdeete me diidz xin xpëel naa.

Naa nac tib ngundziin lo me, ni rleynie me naa.

²⁸ Me blu lo naa zha grieelo yгаа naa guielmban,
ni tib guielbley nroob ne yгаа naa zeene laa naa gdziñ lo me.

²⁹ 'Bets, bzian, to ne nac to menladz naa, golgona ganle: led mine bdete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpa me bii niaa. ³⁰ Sique mine bded Jesús ga bzeet me, sac gon tib zha ne biadteed xtiidz Dios goc me. Gocnanle me ne lo xtii me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me. ³¹ Dzigo zig nac zeene ranle me grëtaa mine ted Jesús, nacie bzeet me ne ib zrieeban Jesús, rëb me guiaand xcuerp Jesús zaatne rbëz grëraa mengut, niicle xindgaaw.

³² Jesús ga gon bzeet me, sac zig nac Jesús grop lo no bdion no bleeban Dios me, ³³ ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxoz me, laa me pxeel Espíritu Sant lo no; ni niina grëse ncuaane noyan tow, grëse ncuaane noyongaa tow, xtsiin Espíritu Santow. ³⁴ Laa naa rbire rne lo to stib ganle, led mine bdete David ga bzeet David; sac gon, zeene gut David güeysohd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

³⁵ nieeda lozh gnaz naa grëse zha ne rlëë lo luu, csañ naa zho ladhnia luu.”

³⁶ 'Grëse to men wladz, golgona sca ganle: Jesús gon, men ne pquiaa to lo cruz ga, lëë men co nac men ne rnabey. Dios bzo me, ni Dios pxeel me bjaad me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ¿pe nac ncuaane dziuun no?

³⁸ Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espíritu Sant gacnie to. ³⁹ Sac psanle Jesús diidz ne ible sxeel me Espíritu Sant gacnie grëse zha ne cuedz me sëëb xnëz me; zigtaa tow, zigtaa xpëëd tow, zigtagaa grëraa menzita.

⁴⁰ Nzianraa grë ncuaane bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii. ⁴¹ Lo grë zha ne bzoobdiag grë mine pseed me zho dze co, rgaa zho maase tson mil; blozh ga, grëse zho brobnis, laa zho gocgrë grë zha ne riladzle Jesús ga.

Niowse mban zho

⁴² Grëse zha ne riladz Jesús ga, dib zdoo zho zianal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho quietxtil zigne psanse Jesús diidz gun zho. ⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaane rquiin zha ne nacgrë zho; zha ne quianie liu, tel pe grëragaa ncuaane quianie zho, haxta rto zhow, dzigo rguiz zho dimi co lo grë zha ne guieñd pe yquiin.

⁴⁶ Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho quietxtil zigne psan Jesús diidz ga; ine nley, ine ndooladz rbe zho grë zho rquiin zho guielwagw ne runlo zho, ⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëëb xnëz Jesús, laa zho racnzianraa.

3

Biac tib men ne në ni

¹ Tib dze zig rbixwe ngbidza, briece Pedr grop Juan zie zho yadoo nroob ne zob Jerusalén, sac lëë hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezob me ga rnab me gon lo grë zha ne rzëëb yadoo. ³ Laa dze co, zeene gon me laa Pedr grop Juan zieded ga ne laa zho sëëb yadoo, zëëb nia me rnab me gon lo zho. ⁴ Dze rwi zho lo me, tibaque rëb Pedr:

—Lo no bui.

⁵ Dzigo blis lo me bui me lo zho, nan me bod no pe dimi ne gdeed zho lo me. ⁶ Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaane grieelese gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

⁷ Dzigo bzhen Pedr nia derech me bliso Pedr me, hor cogazh laa grop ni me ga bdaan, ⁸ laa me psilo bzë. Rley me laa me bzëëb len yadoo gza me zho, lo guielbley co haxta rias me, ni roolnie me Dios.

⁹ Grë miech ne no len yadoo, zeene gon zho laa me rzële, ni scataa rley me roolnie me Dios, ¹⁰ bzee zdoo zho; sac runbey zho me, nappaa zho rzëd me glo, tibaque ran zho me rzob me zaatne quia Puert Ndzon ga rnab me gon.

¹¹ Zeene laa Pedr grop Juan briece len yadoo nroob co, yequ me nal zhits zho ib rsaand me zho, laa zho bdzin stib nëz cho yadoo co zaatne quia tib nsaap nroob ne rnee zho zhiNsaap Salomón. Nalaque grë miech co, rlozhd gwi zho, rlozhd gzee zdoo zho. ¹² Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoos to, squitaa rwi to lo no, zig nac zeene no bdziuuḡuiac meḡ rii, zig nac zeene por nguzobdiidz no lo Dios gane brieelo psëe no me? ¹³ Golḡacnanḡ ganle led scada; sinque Dios meḡ ne bliladz Abraham, meḡ ne bliladz Isaac, meḡ ne bliladz Jacob, meḡ ne bliladz grëraa xmengol ne, meḡ co blu lo to niina ne nli meḡ nroob nac Xpëed me Jesús. Lëe Jesús co ga gonḡ bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. ¹⁴ Bdeete to diidz nlaa meḡ ne nac meḡ ndzon, meḡ ne peet xtoḡd; leḡ bñab to blaa tib zha ntseeb ne nzëeb ngutoo. ¹⁵ Laa me, pquia to haxta beet to me, ni me nac meḡ ne rdeed guieḡmban. Per bleeban Dios me, ni mban me niina; sac grop lo no bdzionḡ no me.

¹⁶ Ni niina meḡ ne ranḡ to biac nu, niapse por Jesús biac me; led runḡbeyle to me nanḡle to ganle rzëd me glo. Ne dib zdoos no riladz no Jesús, gane brieelo bñab no beenguiac Jesús me.

¹⁷ Grëse to bets, ne nac to meḡladz naa, rgobey naa niicle to ni niicleḡaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dienḡ pe nacne sca beenḡ to. ¹⁸ Laa Dios bneedz diidz beenḡ to grë guieḡntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guieḡnë ne ted Jesús, Meḡ ne nacḡle diidz cxeelḡ Dios guiaad lo guidzliu.

¹⁹ Doḡ nroob ga gonḡ beenḡ to, gacxe nana gonḡ waa golḡsaan xquieḡntseeb to, golḡbig lo Dios; zeena csaḡmbe me to lo xtoḡ to. Me gneedz guieḡbley lo to stib, ²⁰ ni zbiire cxeelḡ me Jesús lo to stib, guiaadsilaa me to. ²¹ Gbaa no me niina, ni ga cuëz me nieeda galḡ dze ne laa Dios blozh bnabey goc grëse ncuaaḡne none gac, zigne bzeetse grë zha ne pxeelḡ me padzeela, biadteed xtiidz me. ²² Zig nac Moisés bzeet me laa Jesús guiaad, rëb me lo grë pxoz gol ne: “Dios meḡ ne rnabey ne, ible znabey me ne lo xtii to griequia tib meḡ ne gac zig nac naa lo to niina. Zeene laa me guiaad, golḡgon xtiidz me; ²³ sac zha ne gond xtiidz me, ib tedsod znitlo zho.” ²⁴ Scaque Samuel, ni grëraa zha ne biadteed xtiidz me, grëse zho bzeetle zho grë ncuaaḡne noyac leḡ dze rii.

²⁵ Grëse to, xmengol to nac grë zha co, ye to ga rëb Dios guḡlay me zeene znu biaanḡ me diidz grop me Abraham, rëb me: “Niapse por tib meḡ ne griequia lo xtii luu, laa naa guḡlay grëse miech ne ndxie ḡdibdoose lo guidzliu.” ²⁶ Ni niina ne laa Dios bleeban Jesús, gloque lo to pxeelḡ me me, guḡlay me to, zeena csaan to xquieḡntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grë miech co, zeene laa bla zha ne nac pxoz bdziḡḡ ga, bdziḡḡnie zho tib zha non ne quianap yadoo co ni zla zha ne nacgrë zha saducë. ²⁻³ Zigne bdziḡḡ zho bnaaz zho Pedr grop Juan, güeysëeb zho zho ladzguib; ni ne bdzele dzew, ga biaanḡ zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse mengut, scaque grieeban zho.

⁴ Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grëse zha non, grëse zha ne rnabey lo menguietz, laa zho pcaalsa.

⁶ Ga bdziḡḡ Anás meḡ ne nac pxoz nroob ne rnabey, ga bdziḡḡ Caifás, bdziḡḡ Juan, bdziḡḡ Lejandr ni grë zha ne nac menḡlidz pxoz ne rnabey ga. ⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golḡnë nadienḡ, ¿cho rnabey to, cho pxeelḡ to ne squi no to?

⁸ Horco laa Espiritu Sant bdeed guieḡbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguietz, grëse to ne nac to zha gol ne non xtiidz. ⁹ Telḡne mine rlisqui to nac ne dienḡ zha bdziuuḡ no meḡ rii ne laa ni me biac, ¹⁰ golḡsiguielḡ golḡquiaadiaga ganle, zeena gacnanḡ tow ni gacnanḡ grëragaa menguietz. Jesús gonḡ, meḡ Nazaret ne bnabey to gut lo cruz ga, meḡ ne bleeban Dios ga, meḡ co beenguiac meḡ rii; ni laa to rangaa me laa me zo lo ne nu. ¹¹ Lëe Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nanḡd zho lëepaa quie co

nac mine rnazdziits yu.” Ni scapaa nagon bzhaac to me. ¹² Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon gre zha wxtis co, scataa peet dzeb nod lo Pedr grop Juan, bzee zdoos zho; sac runbey zho Pedr, runbey zho Juan, nacd zho cho zha ne guey wseed nroob. Ga gon zho, pa lotaa guielbiini ne bгаа Pedr grop Juan ne bzenie zho Jesús.

¹⁴ Peet brieelod nlisqui gre zha co, sac nligaa laa men ne biac ga zo lo zho ga. ¹⁵ Dzigo mazd bnabey zho brie Pedr ley grop me Juan; laa zho biaan bzodiidz zho dien zha gun zho zho, ¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grele menguedz bina. ¹⁷ Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan greeraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —reb zho—, gbiiredraa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, reb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no? ²⁰ Grieelod gon dziuun no mine rnee to i, sac grese ncuane bdzion no, grese ncuane bdzionгаа no ib none gnee now, zeena gacnan grese miecha.

²¹ Dzigo wbiire gre zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr ²² beenguiac me men co, ni choole iz rac sca gacd se me.

Bnab zho lo Dios

²³ Zeene laa Pedr grop Juan bdzin lo gre zha ne nacgre zho, bzodiidz zho grese tel zha reb gre zha rnabey co, zha reb pxoz non co. ²⁴ Gre zha ne nacgre zho ga, zeene bin zhow grese zho psilo zho bnab zho lo Dios, reb zho:

—Dios, luu nac men ro ne rnabey greeraa ncuane no, luu bzaa gbaa, luu bzaa guidzliu, luu bzaa nisdoo, luu bzaa greeraa ncuane no. ²⁵ Padzeela zeene bdeed Espiritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac gre miech ne nacd zha Israel rlene zho Dios?

Racladz zho gun zho ncuane ni grieelod lo zho.

²⁶ Grese zha non ne rnabey gre guiedz,

tipse rac zho laa zho racntseeb lo Dios rlene zho me, ni rlene zho men ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu bиаad rey Herod, bиаad Pons Pilat, pcaalsa zho gre zho menladz no ni gre menzit, tipse bnediiz zho psacsi zho Jesús, men ndzon ne bzooblo luu pxeel luu bиаadgun xtsiin luu lo guidzliu nu. ²⁸ Grese zigne psanle luu diidz, scase been zho. ²⁹ Ni scaque niina, bui ganle zha racladz zho ctseb zho no parne peet gneedraa no; luu nac men ne gocniun no ne nac no zha ne rdziuun xtsiin luu, zeena gdzieebd no cseed no miech xtiidz luu. ³⁰ Laa no rnab lo luu, beenguiac gre men rzacne, been gre milagr nroob, blu gre ncuane gzee zdoos miech; zeena gan zho ganle men nroob, men ndzon nac Xpedd luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grese zho laa zho bgaaraa guielbiini ne bdeed Espiritu Sant lo zho; peet rdziebdraa zho laa zho zieseed miech Xtiidz Dios.

³² Len dze co, grese zha ne riladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquii ncuane rap zho; sinque grese ncuane quianie zho chen gre zho naca. ³³ Gre zha poxtl co, zeene rseed zho miech zha brieaban Jesús, nzian zha ne riladz me; rlupaa ne Dios nacie zho.

³⁴⁻³⁵ Ne nligaa tipse nac zho gre zho, nod zha ne guiab ne guien pe yquii, sac grese zha ne quianie liu, zha ne quianie nzian yu, rto zhow dzigo rdeed zho dimi co rguiz gre zha poxtla lo zha ne rqiina. ³⁶ Sca been tib men ne nacgre zho le José. (Zha xti Leví nac

me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.) ³⁷ Pto me tib lë liun me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lë Ananí, laa tsiel me lë Safir; ye me pto tib lë liun me. Gonlo tsiel me, tel palal dimi ne bdo liu co, bzhenga me zhisa. Zeene laa me ziesan mine biaan ga, lo poxtl, rëb me lëë grë dimi ne bdo liun me ga. ³ Dzigo rëbchaa Pedr lo me:

—Ananí, ¿pe nacne bdeed luu diidz bzëëb mendox zdoo luu? Mendox i gon noquiil luu nan luu yquidiee luu Espiritu Sant, rnee luu lëë grë dimi ne bdo liun luu nu. ⁴ Bien ganle chen luu liu co. Dimi ne bdiizh zhow, chen luuw, niac niun luuw zigne niacldadzaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdiieb zho. ⁶ Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tsiel me bdziñ, ni lalnu güeynied guic me ne laa tsiel me gutle. ⁸ Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liun to nu?

Pquiab wnaa co, rëb me:

—Nliw, lalgui pto now.

⁹ —¿Pa briece pensar qui lo to grop tsiel to? —rëb Pedr—. Ne squi tipse bnee to nan to yquidie to Espiritu Sant; dol nroob i gon been to lo Dios. Laa zha ne güeyqueets tsiel luu blansole ro yu nu, ni niina gon laa zho güeya que luu.

¹⁰ Diidz co blozh briece ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyqueets zho me cue xpaa tsiel me. ¹¹ Grëse zha ne gon sca goc men co grop me, zha ne bingaaw, zigtaa zha ne riladz Jesús a zigtagaa grëraa miecha, per nli bdiieb zho.

¹² Grë zha poxtl co, tiba que rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. ¹³ Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëëb xnëz Jesús, mguisaque wnaasaque laa zho riladz me dib zdoo zho. ¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacne, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimplëse Pedr guiab lad grë men co zeene laa Pedr ted. ¹⁶ Haxta grë guiedz win ne ndxie gax Jerusalén ga, rriece grë miech rdziñnie zho grë men rzacne, no grë men co noguitnie mendox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, ¹⁸ bnabey zho bgaa zho psëëb zho zho ladzguiib stib. ¹⁹ Pcow liu co, guieela bdziñ tib xanj Dios pxal me ro ladzguiib, blee me zho ga; dzigo rëb me lo zho:

²⁰ —Goltsie len yadoo, grëse miech ne ndxie ga golnee lo zho, zeena gacnan zho zha yгаа zho guielmban ndzon ne nodeed Dios niina.

²¹ Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacnie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib.
²² Bdzin zho ro ladzguiib, ni tib choot guiend leen co; rzhitsaque wbire zho güeynie zho diidz, ²³ rëb zho:

—¡Choot guiend leen ladzguiib! Dziits nioga bdzin no, ga zo zha ne quianap; per zeene bzhial ro ladzguiib bziaab no, bdzion no choot guiend leen co.

²⁴ Grë pxoz ne rnabey, ni men ne zo lo menguiib ne rquianap yadoo, zeene bin zhow, rdziendraa zho zha gun zho. ²⁵ Lëëtaaque sca no zho, zeene bdzin tib zho rëb:

—Zha ne gon bloo to ladzguiib ga, laa zho nolaque leen yadoo noseed zho miech.

²⁶ Lëëlëd brieen men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co leen yadoo; sac rdzieb zho ngoquie grë miech co zho. ²⁷ Zeene bdzinne zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¡Pe nace ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoj to no ne no bdziut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no.
³⁰ Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. ³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo doj. Ni Jesús gon, gdeed guieibiini lo grëse men Israel gbiire gbig zho lo Dios stib; zeena gunquizhd me zho xtoj zho.

³² 'Mine rnee no lo to nu diidzliw, nozhal bdziona, ni led loxaque nodsegaa; sinque ye Espíritu Sant men ne rxeel Dios racnie grë zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguiidz; dzigo guso me bnabey me brieen grë zha poxtl co nëz ley, ³⁵ bnee me lo grëraa zha ne ndxie ga, rëb me:

—Grëse to menguiidz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladzttaa to gun to zho. ³⁶ Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. ³⁷ Laa leen iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me. ³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdzin dze ne nitlow. ³⁹ Laa telne nligaa Dios rsiaab guic zho squi rseed zho miech, niacxe zleb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiin zho zho, ni biire pso zho diidz lo zho bgiiredraa zho cseed zho miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa mine pteed grë zha non co zho loxaque ne rililadz zho Jesús. ⁴² Ib psaand zho zhiwseed Jesús, gzobse dze rie zho yadoo ni rieke zho stib yu stib yu, rnee zho lo miech ne nli lëë Men ne zëëble diidz cxeel Dios lo guidzliu ga nac Jesús.

¹ Ni ne len̄ dze co quiayac nzianraa miech ne rzëeb̄ xnëz Jesús, dzigo psilo grë zha Gres rlisqui zho, rnee zho rdioond̄ grë wnaa viud ne nac zha ladz zho zaacse; zeene rgaaz ncuaane row zho, rgaad zho lal mine rgaaz grë wnaa viud ne nac zha Israel.

² Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb̄ zho:

—Gacnan̄ to ganle, grieelodraa ne noque so dzian̄ no dien̄ zha ygaaz ncuaane yquiin to, sac gon̄ nonguiel̄da csaan no mine nac xtsiin̄ no, ib none guioseedraa no miech Xtiidz Dios. ³ Min̄ co nagon̄, mazd golzo gadz zha bgui ne gun̄ dziin̄ co, lëeraasi golguien̄ cho gzo to; golguib̄ zha ne ndzinli, zha ne nixbiini, zha ne nacie Espiritu Sant; ⁴ zeena sca guioob lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb̄, wen sca gaca. Horcogazh psilo zho ble zho zha ne so gun̄ dziin̄ co. Bzo zho tib men̄ lë Lip, tib men̄ lë Prócoro, tib men̄ lë Nicanor, tib men̄ lë Timon, tib men̄ lë Parmen, tib men̄ lë Xteb, rrupaa dib zdoo me riladz me Dios ni nacie Espiritu Sant me; ni tib men̄ Antioquí lë Nic, mazd glo Nic goc tib zha ne bleyniedox grë zhiwseed zha Israel. ⁶ Dzigo güeynie zho gza zha co lo zha ne nac poxtl. Blozhse bñab poxtl lo Dios gacniën̄ me zho, dzigo pxobnia poxtl guic zho, bñab zho lo Dios gdeed me guiel̄biini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb̄ xnëz Jesús, haxta grë men̄ ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne run̄ Xteb, sac tibaque sca dib zdoo me riladz me Jesús, ni nacie Espiritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndil̄diidznie zho Xteb. Brieequie zla zha Israel ne ziaad nëz Ciren, nëz Alejandrí, nëz Cílis, ni nëz Asia, ye zho gocgza zha co rlëe zho lo Xteb. ¹⁰ Gonse zho rlëbd̄ xtiidz zho lo Xteb, sac niapse Espiritu Sant rdeed guiel̄biini lo me, rien̄ me pe rnee me lo zho; ¹¹ dzigo bdiizh zho bla zha ne ptsieets diidz, pquidie zho rëb̄ zho bin zho laa Xteb noneenë Moisés ni rneenë me Dios.

¹² Zeene bin mengüedza, blëe zho; nacne bnabeyaque zha ne rnabey lo mengüedz bgaa Xteb güeyzo zho me lo wxtis. ¹³ Ni güeynie zho bla zha ne lega bnexuu, rëb̄ zho:

—Nliw, rtsidil̄ mgui qui xyadoo ne, rtsidil̄ me xley ne. ¹⁴ Bdzion̄paa no gon̄ quianee me laa Jesús men̄ Nazaret ne quiazeet zho dib i ctsil̄ yadoo rii, ni ctsëe me ley ne psan̄ Moisés lo xmengol ne.

¹⁵ Horco zeene laa grë zha wxtis co ni grëraa zha ne ndxie ga bui lo Xteb, gon̄ zho tib biini nroob ne riab lo me, masaque rlu me zig rlu tib xanjl Dios.

7

¹ Dzigo bnabdiidz men̄ ne nac pxoz nroob ga lo Xteb, rëb̄ me:

—¿Bnë dien̄ pe nli quiayun̄ luu grë ncuaane rnee zho i?

² —Grëse to ne nac to men̄ladz naa —rëb̄ Xteb—, laa naa rzaac to zig bets naa, zig pxozgaa naa. Golsiguieł̄ golquiaadiag chop tson̄ lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb̄ Dios ³ griee me ga, csan̄ me grë men̄lidz me, tsie me nëz ne glutaa Dios lo me.

⁴ Nacne brie me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina. ⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb̄ Dios ib grë zha xpëed̄ me guiaan̄niew. ¡Ni laa me quianied mëed̄ len̄ dze co! ⁶ Rëbgazh Dios lo me, ib zieban grë zha xpëed̄ me ga ladz ben̄ dipse len̄ tap gayoo iz, ga csacsi miech zho gun̄cun̄ zho zho dziin̄. ⁷ “Per ib tedsod sacsi naa zha ne csacsi zho ga”, rëb̄ Dios, “ni ga griee zho glanso zho nu, nu gool̄nie zho naa.”

⁸ Ni parne glu ib zac mine bnee Dios lo Abraham ga, dzigo psan̄ me diidz grëse mëed̄bgui ne grieequia lo xti Abraham none tso tib bey lad zho. Min̄ co nagon̄, zeene

laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

⁹ 'Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José, ¹⁰ psilaa me José lo grëtaa guielnë ne bded José, ni gocnien me José beenbey rey Egipt José. Ib psaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya. ¹¹ Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grë zha ne goc pxozgol ne ga, guiendaa pe gow zho. ¹² Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

¹³ 'Zeene goc chop vuelt ziexi zho zhob Egipt, dzigora gona zho bets zho ga rnabey Egipt; niiclegaa rey cow, hor coraa beenbey me bets José. ¹⁴ Dzigo bnabey José güeyxi zho pxoz me Canaán, güeyxi zho tsieel zho, güeyxi zho xpëed zho. Lo grë zho rgaa zho tsongal tsiin, laa zho bdziin Egipt.

¹⁵⁻¹⁶ 'Sca nacie laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho. ¹⁷ Grë zha ne brieequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaloo goc zho. Laa zeene ziaadyob cuee Dios zho ga zigne rëble me lo Abraham glo, ¹⁸ laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo menladz me. ¹⁹ Psacsi me zho, been me zho zigne gocladztaa me, haxta bnabey me grëse mëedbgui ne ral gandraa zho win parne guet win.

²⁰ 'Len dze copaa nagon gol Moisés, tib mëed niow nac win. Tson mëe bloolan xniaa win win, ²¹ laa zeene brieelodraa ngolan me win, dzigo güeysan me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me; ²² haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaane gungaa wina.

²³ 'Choo iz rap Moisés, zeene biab guic me güeyted me lo menladz me. ²⁴ Dzigo gon me laa tib zha Egipt quiaguin tib zha Israel; nacie bzëëbaque me bla me zho, beet me zha Egipt co.

²⁵ 'Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw. ²⁶ Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho. ²⁷ Dzigo biasaque tib zha ne noquiaaw ga pcheep zho me, ntseeb rac zho rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziuu no? ²⁸ ¿Te racladz luu ye gutaque luu no zigne beet luu zha Egipt co nieeg?"

²⁹ 'Zeene bin Moisés sca rëb zha co, hor co bzhoon me bey me nëz xtan zha Madián. Nëz co ptsieelnia me, ga gop tsieel me chop mëedbgui.

³⁰ 'Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co. ³¹ Bzee zdo me, lëëtaaque laa me zie gbiggax me, zeene bin me tsi Dios rëb Dios lo me: ³² "Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me. ³³ Dzigo bnee Dios stib, rëb me lo me: "Blit lab luu, sac gax lo naa i zo luu. ³⁴ Laa dze nagon bdziin ne laa naa csilaa grë zha Israel ladznia zha Egipt; sac ran naa zha nactaa grë guielnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

³⁵ 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziuu no?" Per me bzo Dios bnabey lo zho, blee me zho Egipt.

³⁶ 'Nzian grë milagr, nzian grë ncuaa_{ne} nroob ne gzee zdoo ne been_u Moisés blee me zho ga; zigtaa len_u guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len_u choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib men_u ne cxeel_u me guiadteed xtiidz me, zigne pxeel_u me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan_u lo ne ga, diidz ne rap guiel_umban. ³⁹ Per ib bind zho xtiidz me, lel_u gocladz zho mbiire ney zho Egipt stib, ⁴⁰ bnabey zho Aarón rëb zho: "Bzaa tib mdio tedner lo no gacnie_u no laa no guioo Egipt stib; sac loxaque biadbee Moisés no ga, na choot nan_ud die_u yo Moisés."

⁴¹ 'Dzigo bzaa zho tib ngon ye_un goc zhimdio zho, haxta beet zho grë ma ne bloogon zho lo mdio co; bleyne zho ncuaa_{ne} bzaania zho. ⁴² Nacne wbin_uladz Dios, psaan me zho; psilo zho bleyne zho grë ncuaa_{ne} ran_u zho zhan gbaa. Been_u zho zigne bzeetse zha ne biadteed xtiidz me padzeela, zeene rëb zho:

Golsoladz gan_ule,

laa ne nleyne to naa dipse len_u choo iz ne bio to grë dan bidz co,

laa ne niut ma ne ngogon to lo naa,

⁴³ lel_u grë mdio ne bzaa to, mdio co bleyne to, lo mdio co pquitsgzhib to.

Mdio ne rnee to Moloc,

zaatne zieetaa to tibaque ney to lidza,

zhmel mdio ne rnee to Renfán, pa csaan to ma.

Min_ucocxe waa, laa naa cuee to ladz to,

gzonëz naa to guey to grë dan ne riaan_u zitraa lo guiedz Babiloin.

⁴⁴ Len_u dze ne sca bio pxozgol ne grë dan bidz co, tib yu larse goc xyadoo zho, ga biotsow quie ne quia xley Dios. Dioszhal blu lo Moisés zha tsaa yu co. ⁴⁵ Goc bla iza, zeene blozh bnitlo Dios grë guiedz ne brin_u nu glo, laa Josué blansonieque yu co. Haxta len_u dze ne goc David rey, bii lëew nac xyadoo zho.

⁴⁶ 'David goc tib rey ne gocnziuu lo Dios, bleyne Dios me, dzigo gocladz me nzaa me tib yadoo nroob zaatne mbëzlo zho Dios. ⁴⁷ Per brieelod nzaa mew, Salomónraa goc rey ne bzaaw. ⁴⁸ Nli laa yadoo co baa, per tel_u Dios, men_u nroob nac me, led yed me cuëz len_u grë yu ne rzaa miech. ⁴⁹ Zigne zhobneeque lo Xtiidz me, zeene znu rëb me:

Gbaa nac zaatne zoob naa,

laa lo guidzliu nac zaatne rzo ni naa.

¿Zha nadien_u nac yu ne nan_u to gzaa to cuëz naa?

¿Pa nadien_u guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad bzaa guidzliu?

⁵¹ 'Golgona sca gan_ule —rëb Xteb—, zigne been_uaque grë pxozgol to ga padzeela, scadaaque gon_u quiayun_u to niina. Miech nad, miech ntseeb zdoo nac to; ib ronde to min_ue rnee Espíritu Sant. ⁵² Tel_u pxozgol to, nëlte gon_udze zho grë zha ne pxeel_u Dios biadnee xtiidz me; haxta beet zho grë zha ne bzeet ne laa Dios cxeel_u tib men_u peet xtold ne bzooblo me guiaad lo guidzliu. Ni niina ne laa Dios pxeel_u men_u co, scasaque been_u to, ptsidil_u to me, bnabey to bgaa me beet to me. ⁵³ Tibaque squi quia to quiaguiits to Xley Dios; xanjlpaa me biaadsan_ua lo to, ni run_ude to min_ue rnabeya.

Beet zho Xteb

⁵⁴ Zeene bin zho sca rëb Xteb, blëeye zho haxta rowye ro zho rwi zho lo me. ⁵⁵ Laa me, ne nacie Espíritu Sant me, zeene blis lo me bui me nëz gbaa, gon_u me lo guiel_undzon ne no Dios, gon_upaa me laa Jesús zo cue Dios nëz derech. ⁵⁶ Dzigo bnee me, rëb me:

—Ran_upaa naa niina gon_u nzhialse gbaa, laa men_u ne pxeel_u Dios biaad lo guidzliu ga, laa me zo cue Dios.

⁵⁷ Min_ue been_u zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. ⁵⁸ Zha ne goc textigw

ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespíritu naa.

⁶⁰ Dzigo pquitsgzhíb me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquieinë me.

Len dze co, psilo zha ne sca rlëenie zha ne rliladz Jesús, ptsidił zho grëse zha ne rliladz me; dipse len guiedz Jerusalén pquianał zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén. ³ Ntseeb rac Saul, rzac me tebaa zha gnitlogazh me grëse zha ne rliladz Jesús. Stib yu stib yu zie me, riebezhoo me zho lidz zho, mgui wnaasaque rey me riesëëb me zho ladzguiib.

Bdzin Xtiidz Jesús nëz Samar

⁴ Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

⁵ Zig nac Lip, zeene bdzin me tib guiedz nëz Samar, psilo me bnee me Xtiidz Jesús lo grë miech co. ⁶ Ndal zho rquiaadiag mine rnee me, rzee zdoo zho ran zho grëtaa milagr ne run me. ⁷ Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguiac me zho. ⁸ Grëse miech ne no guiedz co, rley zho.

⁹⁻¹¹ Ga no tib men ne rool diidz dox, lë Simón. Ye me rzee zdoo miech grë ncuane run me. Nzianle iz sca noquidie me zho, grëse menguedz runbey me, haxta niats rac me rnee me guien draa cho zig me. Grëse zho, haxta grë zha non rbig lo me, rzac zho lëë poder ne rap Dios ga nacnie me.

¹² Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. ¹³ Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal me zhits Lip, rzee zdoo me ran me grëtaa milagr nroob ne run Dios.

¹⁴ Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. ¹⁵ Laa zho zie gnab zho lo Dios ygaa grë zha ne bliladzle Jesús ga guielbiini chen Espíritu Sant; ¹⁶ sac zeene bliladz zho Jesús, loxaque brobnisse zho, gard ygaa zho guielbiini co. ¹⁷ Bdzin zho pxobnia zho guic grë men co, bnab zho lo Dios; dzigo grëse men co laa me bgaa guielbiini ne rdeed Espíritu Sant.

¹⁸ Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi, ¹⁹ rëb me:

—Gołneedz poder qui lo naa; zeena ye naa zha ne cxobniataa naa guic ygaa zho guielbiini ne rdeed Espíritu Sant.

²⁰ Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i! ²¹ Ni lalnu rieguiald luu gun luu dziin rii, ni gdzindgaa dze gun luuw; sac mbed zdoo luu, zienied guic luu gun luu mine rnabey Dios. ²² Blee zhgab yozh qui guic luu, bnab lo Dios zeena togo squia zdoo me luu, gunquizhd me luu dol ne squi bza zdoo luu i; ²³ sac rlu niapse guiełntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

—Golgun guieInzaac, golnab lo Dios yquia zdo me naa, zeena ygaad naa grë guieInëdox ne rnee to i.

²⁵ Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

Bzodiidznie Lip tib men Etiopí

²⁶ Laa Lip no Samar ga, tib dze brieequia tib xanjI Dios lo Lip, rëb me tsie Lip nëz ne rriee Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí.

²⁸ Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios mine pquiaa Isá, men ne biadteed xtiidz Dios padzeela.

²⁹ Dzigo bnabey Espíritu Sant Lip tsie Lip yгаа carret co lo Lip. ³⁰ Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

³¹ —Rien naaw —rëb me—, rquiuin tib zha ne gnë lo naa dien zha naca.

Dzigo bredz me Lip biep Lip len carret co, güeysob Lip cue me.

³² Znu rnee zaatne nolab me ga:

Zigne racse mëcwxiiI yeen zeene rnaaz zho ma rut zho ma, scadaa ndooladz goc me,

peet been me zeene laa zho zienie me.

Ni zigne roptsied ma zeene rtsiib zho ma,

scaque ni tib diidz ptsired me lo zho.

³³ Niicle ne gon zho scataa ndooladz me,

per psacsi zho me.

¡Pa lotaa bdzin guieIntseeb ne been grë menladz me!

Sac gon, ptiche zho xquieImban me lo guidzliu.

³⁴ Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded min rii, te stib zhow ye?

³⁵ Dzigo rëb Lip lo me Jesús raquiet ga, ni bnee Lip grëraa mine nac zhiwseed Jesús.

³⁶ Laa zho no nëz, tibaque zeene bdzin zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguiel pchoobnisgazh naa.

³⁷ [—Zaca —rëb Lip—, totsaque dib zdo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me. ³⁹ Blozhse ga, laa Espíritu Sant blis Lip gondraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdzin me guiedz Cesarea.

9

Gon Saul Jesús

¹ Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo men ne nac pxoz nroob, ² bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tisesan zho ladzguiib Jerusalén.

³ Laa Saul bio nëz, laa Saul zie. Zhile gdziñ me guiedz Damasc, tibaque zeene briequia ti biinidoo zhan gbaa biab zaatne zie me ga. Grołtaa lo biinidoo co biaan me, biabgazh me liu. ⁴ Liu nix me, bin me zëeb ti tsi men co rnee lo me:

—Saul, Saul, ¿pe nacne quianał luu naa?

⁵ —Been guiełnzaac —rëb me—, bnë dieñ cho luu.

Dzigo pquiab men co, rëb me:

—Naa nac Jesús men ne squi quiatsidił luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dieñ, ¿pe racladz luu gun naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac mine no gun luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi men co ron zho zëeb, per choot rand zho.

⁸ Laa Saul guche ga. Zeene laa me pxal lo me gwi me randraa me, ļlaa lo me pcowle! Zha ne ziegzale me ga bzheñ nia me bdziñ me Damasc. ⁹ Tson dze sca brieelod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne riladz Jesús lë Ananí; dzigo gon me Jesús, bredz Jesús me. Pquiab me, ¹¹ dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz men Tars ne lë Saul. Zeene quiazodiidznie me naa, ¹² blu naa lo me laa tib zha lë Ananí bdziñ rxobnia guic me, zeena gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuane noyun me Jerusalén, notsidił me grë zha ne riladz luu. ¹⁴ Haxta pxoz nroob ne rnabey bdeed diidzbey gnaaz me grëse zha ne no nëz rii.

¹⁵ —Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me miech xtudz naa, me gneew lo grë zha rnabey, ni lo grëгаа zha Israel. ¹⁶ Na naa glu lo me ganle zha nac grë guiełnë ne gan me, zeene laa me quiaayunle xtsin naa.

¹⁷ Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne briequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guiełbiini ne rneedz Espiritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuuan co brie lo me. Horcogazh laa me brobnis. ¹⁹ Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne riladz Jesús Damasc ga, dzigo brie me ²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëë men qui ga name scataa ntseeb rac Jerusalén, notsidił me grë zha ne riladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëë men ne zëëble diidz cxeel Dios lo guidzliu ga, nac Jesús. Grë zha Israel ne no ga, riendraa zho dieñ pe gliladz zho.

²³ Goc bla dze no me ga, laa grë zha Israel ne no ga blëë lo me; bnediidz zho rëb zho laa zho gut me. ²⁴ Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew, ²⁵ nacne gol ti pcow liu pcaalsa grë zha ne bliladz mine bnee me, bloo zho me ti leñ chicuid nroob, bzoob zho

doow dzigo blit zho me cho biedz nroob ne sca ndze igo guiedz co. Sca bdeeda diidz brieeme ga.

Bdzin Saul Jerusalén

²⁶ Zeene bdzin Saul Jerusalén gocladz me ndzin me lo grë zha ne rliladz Jesús ga, per lel bdieb zho zeene gon zho me, sac rliladz zho ne nli yelee me bzëëb xnëz Jesús. ²⁷ Dzigo güeynie Bernabé me lo grë zha ne nac poxtl, bzodiidz Bernabé lo zho zha gon me Jesús zeene no me nëz zie me Damasc, zha rëb Jesús lo me; ni zha bdiebd me bnee me lo grë miech cho nac Jesús, len dze ne blëz me Damasc. ²⁸ Dzigoraa pcaania zho me. Laa zho gogza me, zaatne zietaa zho zieseed zho miech, ib rdiebd me rnee me cho nac Jesús.

²⁹ Brieequia bla zha Israel ne rnee xtiidz zha Gres bdiidiidznie zho me. Zhisaque goca, laa zho gocladz niut zho me. ³⁰ Zeene gocnan grë zha ne rliladz Jesús gaw, dzigo güeyan zho me guiedz Cesarea; ga brieeme laa me zie nëz Tars, zaatne nac ladz me.

³¹ Len dze co, grëse miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guie|x|tseeb nodraa zho; zigse zie dze rioguicraa zho zha nac Xtiidz Dios. Grëse zho rioxco zho mban zho zigne rnabey me, tibaque nacie Espíritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne rliladz Jesús

³² Len ngbidz coque, zie ziaad Pedr rieted me lo grëse zha ne rliladz Jesús. Nacne güeyted me lo grë zha ne no Lida. ³³ Guiedz co, beenbey me ti mgui lë Ené, gogle xon iz nix mgui co, ib gacd së me sac dipse me gutoo. ³⁴ Dzigo rëbchaa Pedr lo me:

—jEné, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. ³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne rliladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guie|nd| pe yquiin, run me xyudar zho. ³⁷ Lega nacle blanguidz me, laa me gut.

Zha ne rliladz Jesús ga, laa zho noxco die|n| zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho, ³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdzinie zha co diidz, zienalgazh Pedr zhits zho. Bdzin zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me. ⁴⁰ Dzigo bnabey Pedr brieeme zho ley grëse zho, laa me biaan ga, pquitsgzhil me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzihal, zeene gon me laa Pedr zo ga, laa me bzobli. ⁴¹ Bzhen Pedr nia me, bliso Pedr me, dzigo bredz Pedr grë zha ne rliladz Jesús ga, ni grë wnaa viud co; gon zho laa me brieebanle.

⁴² Dipse lad guiedz co bzhoob diidz sca brieeban wnaa co; grë zha ne bina, ndal zho bliladz Jesús dib zdo zho.

⁴³ Nzianlaa dze biaan Pedr ga, blëz me lidz Simón ti men ne rcuudz grë guid ma.

10

Güeyzodiidznie Pedr Cornel

¹ Guiedz Cesarea, ga no ti men lë Cornel, rnabey me lo ti partid menguiib lë partid Italian. ² Zigtaa mew, zigtaa grë menlidz mew, dib zdo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grë zha ne guie|nd| pe yquiin.

³ Tib dze, bdzele dzew tibaque zeene gon me laa ti xanj|l| Dios bdzin zaatne zo me, bredzlë anjl co me. ⁴ Dze rwi me lo anjl co, rdiebd me laa me pquiab. Dzigo rëbchaa anjl co lo me:

—Gocnañ ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. ⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. ⁶ Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios. ⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lëëtaaque hor co laa Pedr biepe nëz glaa guic yu ne rbëz me ga. Rcaabedz me, dzigo laga noyaclo ncuaane gow me laa me biepe guic yu co ziezodiidznie me Dios. ¹¹ Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdziñ lo me. ¹² Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. ¹³ Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rëb me:

—¡Min cogaa nagon grieelod! Wlaltaa gard gow naa grë ma beed qui.

¹⁵ Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

¹⁶ Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

¹⁷ Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbëz me ga, ¹⁸ rnabdiidz zho me.

¹⁹ Zhgab co no Pedr, zeene rëb Espíritu Sant lo Pedr:

—Laa tson zha bgui gon ziaadguib luu. ²⁰ Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

²¹ Dzigo laa Pedr biet ga, bdziñ me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

²² Pquiab zho rëb zho:

—Laa no ziaad xmandad Cornel, ti men ne rnabey lo mennguiib Cesarea. Laa me pxeel no ziaad-xi no luu, sac ti xanj Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grëse zha Israel rleynie zho me.

²³ Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús zienal zhits me.

²⁴ Dze ne rac chop ngbidz brieë zho Jop, laa zho bdziñ Cesarea. Laa Cornel bredzle grë menlidz me, grë zha ne ndzieeldiiz me; ndal nac zha ne ndxienie me lidz me, quiambëz me Pedr. ²⁵ Zeene laa Pedr bdziñ, brieë me güeydzieelo me Pedr, pquiitsgzhib me lo Pedr nan me niun me Pedr zigne riegän me Dios. ²⁶ Dzigo bliso Pedr me, rëb Pedr lo me:

—¡Guso i, nodne yquiitsgzhib luu lo naa! Bien ganle samiechaque luu nac naa.

²⁷ Dzigo laa mennguiib co guso ga. Nozodiidz zho laa zho bzëëb len yu. Zeene bdziñ zho zaatne ndxie grë miech co, ²⁸ psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho. ²⁹ Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golnë dien pe nacne bredz to naa.

³⁰ Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me, ³¹ në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. ³² Gacxe waa, laa naa zialnie diidz

lo luu: pxeel bla zha ne tsie guiedz Jop tsiexi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.”³³ Sca nagon në men co lo naa, nacne bnabey naa biaad-xi zho luu; ni xquizhгаа luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

³⁴ Dzigo rëbchaa Pedr:

—¡Naraa rien naa, led yed Dios cue miech dien cho nac zha Israel, cho nacгаа zha zit!³⁵ Sinque grëse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho.³⁶⁻³⁷ Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaane no). Zig nac dib Judé, desde ne psilo Juan pseed me miech Galilé, laa zho gocnana.³⁸ Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdo me miech, grë zha ne nosacsi mendox psilaa me zho ladzna ma; sacne nli Dios nacnie me.³⁹ No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz,⁴⁰ per zeene goc tson ngbidza laa Dios bleeban me, ni bneedz Dios diidz biire bdzian no me.⁴¹ Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdioownie no me, bdionie no me,⁴² ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana.⁴³ Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espíritu Sant lo zho.⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdo zho gon zho ye grë menzit rgaa guielbiini ne rdeed Espíritu Sant.⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnisgazhd ne zha rii? Laa ne bdzianle ganle zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne riladzle Jesús zha ne no Judé, bin zho sca bliladz gza menzit co Xtiidz Dios.² Dzigo zeene laa Pedr bdzin Jerusalén güey bla zho güeytildiidznie zho Pedr,³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëëb zhan gbaa, nzhidoo gzatap squina laaw ziaad nëz lo naa.⁶ Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe.⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”⁸ Dzigo pquiab naa rep naa: “Min cogaa nagon grieelod, wlaltaa gard gow naa grë ma beed qui.”⁹ Nëchaa me lo naa: “Grë ncuaane beenlayle Dios, nodne gnee luuw ncuaan beed.”

¹⁰ Tson vuilt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

¹¹ Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa.¹² Ni laa Espíritu Sant bneeque lo naa, no

ganal naa zhits zho, niicle ne zhazit nac zho; nacne biana naa. Ye gza xoop zha ne zialnie naa nu bzë bio no.

¹³ 'Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanj Dios, rëb anjl co lo me cxeel me bla zha ne tsie Jop tsiexi zho naa ¹⁴ zeena gane naa lo me zha grieelo csilaa Dios me lo dol grë menlidz me.

¹⁵ Laa naa psilo quiane lo me grë menlidz me, zeene grëse zho laa zho pcaania Espiritu Sant, ni bgaa zho grë guielbiini ne rdeed me zigne bgaaque new. ¹⁶ Ga nagon psoladz naa xtiidz Jesús men ne rnabey ne, zeene znu në me lo ne: "Nli nisse pchoobnis Juan miech, sangue to zгаа to guielbiini ne rneedz Espiritu Sant." ¹⁷ Sca nagon pcaania zho Espiritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

¹⁸ Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieelo gbig zho lo Dios, gdeed me ti guielmban ndzon ne gdziind dze lozh lo zho.

Bliladz zha Antioquí Xtiidz Dios

¹⁹ Zeene sca pquiana naa zho grë zha ne rliladz Jesús len dze ne beet zho Xteb ga, nëzrii nëzrec bliaa naa zho. No zho bdzin haxta Fenicia, no zho bdzin Chipr, nogaa zho bdzin nëz Antioquí. Zaatne bdziintaa zho bnee zho cho nac Jesús, per loxaque lo grë menladz zho bnee zhow. ²⁰ Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. ²¹ Ni ne nacie Dios zho, ndal grë miech co bzëeb xnëz Jesús.

²² Grë zha ne no Jerusalén, zeene gocnan zhow pxeelaque zho Bernabé güey Antioquí. ²³ Zeene bdzin Bernabé Antioquí, rley me gon me scataa quiaunlay Dios grë miech co; dzigo pso me diidz lo zho ib csaand zho zhiwseed Jesús.

²⁴ Ti men dib zdoo rliladz Dios nac Bernabé, nacie Espiritu Sant me, ti miech wen nac me; gane zeene laa me bdzin ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdzinnie me Saul Antioquí. ²⁶ Dipse ti len iz blëz zho ga grop zho, blozh pseed zho grë zha ne bliladz Jesús. Ga gloopa psilo ne laa grë zha ne rliladz Jesús brieelë CRISTIAN.

²⁷ Len iz co blalaa zha ne noteed xtiidz Dios no Jerusalén. Dzigo brie zho ga güey zho Antioquí. ²⁸ Lad co no tib men lë Agab, psiaab Espiritu Sant guic me bnee me laa ti gbin dox gan miech nëz Israel. (Ni nligaa scase goca, lëë gbin co biaad len iz ne zobnabey men ne lë Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacne bnediiz zho grë zho, tel palalaa ncuane rgaa lo zho tib tib zho gdeed zhow gaclo ti gon cxeel zho lo zha Judé. ³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliladz Jesús nëz Judé.

12

Bio Pedr ladzguiib

¹ Len dze co psilo rey Herod notsidil me grë zha ne rliladz Jesús. ² Bnabey me bgaa Jacob bets Juan, beet zho Jacob lo spad.

³ Zeene gon Herod rley grë zha ne rnabey lo menguedz Israel ran zho zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac lni Pascw. ⁴ Laa Pedr no ladzguiib, bnabey me bzo xon nëz menguiib quianap Pedr. Quiambëz me tedse lni co, laa me cuee Pedr gan grë menguedz zha csacsi me Pedr.

⁵ Grë zha ne rliladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacnien me Pedr.

⁶ Nacle diidz pa dze cuee Herod Pedr. Wdze ne guiini liu co, laa Pedr nixguesse len ladzguiib; tib ga caden zob ti nia me, tibga menguiib tib nëz cue me, ni zhaaque zo zla

zha ne quianap ro ladzguiib. ⁷ Tibaque zeene biab ti biinidoo len ladzguiib, laa ti xanj Dios bdziñ ga. Bdziñ me, pcaannia me cue Pedr, pcuaan me Pedr, rëb me:

—¡Na zeen guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr; ⁸ dzigo rëbchaan anjl co lo Pedr:

—¡Pxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaan anjl co:

—¡Wbix xab luu na, zeen dënal zhits naa!

⁹ Nalše Pedr zhits anjl co laa Pedr brieeg ga. Riend Pedr ne nli nosilaa anjl co Pedr, masaque rzac me nonixquieel mew. ¹⁰ Bded zho chop len yu zaatne ndxie menguiib ne quianap, laa zho bdziñ zaatne quia puert guiib ne rriee ro nëz. Zigne bdziñ zho, zhal puert co bzhiala; laa zho brieeg. Bzënie anjl co Pedr spalal, zeene gol zho zaatne rdedlsa nëz co, dzigo laa anjl co psan Pedr ga.

¹¹ Dzigoraa bien Pedr led nonixquieel Pedr, nli Dios pxeel xanj me güeysilaa Pedr ladznia Herod, zeena gleyd zha Israel nian zho grë guielnë ne nded Pedr.

¹² Dzigo laa Pedr zie nëz lidz Marí, xniaa Juan Marcw; lëëtaque hor co nzian zho ndxie ga quianab zho lo Dios. ¹³ Zeene bdziñ Pedr pcaannia Pedr ro yu. Brieeg ti ndzooop ne quia dziin ga lë Rode, zieso ndzooop dien chow.

¹⁴ Zeene beenbey ndzooop co tsi Pedr, rley ndzooop. Lo guielbley co niicle pxaldaque ndzooop ro yu, rias ndzooop zienie ndzooop diidz lo grë zha ne ndxie ga; rëb ndzooop laa Pedr bdziñ ro yu ga. ¹⁵ Per bliladzd zhow.

—¡Dieen pe rool luu! —rëb zho—. ¡Ncuaane gliladzd ne rnee luu!

—¡Coo, nli lëë mew! —rnee ndzooop—, laa me zo ga.

—¡Led meda, —rnee zho—, bod anjl ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdo zho gon zho nli Pedra, laa Pedr zo ga. ¹⁷ Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanj Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieeg ga.

¹⁸ Zeene biini liu, grë menguiib ne pquianap Pedr len ladzguiib ga, rdzieldraa zho zha gun zho; sac ib biend zho dien yo Pedr. ¹⁹ Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieeg Judé zey me Cesarea.

Dow mziog Herod

²⁰ Len dze co, pcaalsa menguiiedz Tir ni menguiiedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuaane rquuin zho, grë guiedz ne rnabey me ga rriew.

²¹ Dzigo bzo Herod ti dze ne tsie zho tsiezodiidznie zho me. Zeene gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co. ²² Goc palo quianee me, psilo zho rleynie zho me, nguiedz roptsie zho rnee zho:

—¡Led miechdraa i gon! ¡Ti diosle i nac men qui quianee lo ne!

²³ Laa me bii quianeeque, zeene biet tib xanj Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. ²⁴ Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

²⁵ Jerusalén ga no Bernabé grop Saul len dze co; zeene bialše xtsiin zho, laa zho brieegue ga laa zho zie nëz Antioquí zienie zho Juan Marcw.

13

¹ Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mgui lë Simón ne

rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espiritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnaab zho lo Dios gacniën me zho; bnee zho lo zho, laa zho zie.

Güey Saul Chipr grop me Bernabé

⁴ Ga brieë Bernabé grop Saul zienie Espiritu Sant zho bdziñ zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo). ⁵ Ye Juan Marcw zienie zho gun xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë len xyadoo men Israel ne no ga, güeyseed zho miech Xtiidz Dios. ⁶ Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ Guiedz co ga no ti men lë Sergio Paul, men co zob rnabey guidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz gacnan me zha nac Xtiidz Dios; dzigo rnabey me gocredz Bernabé grop Saul. ⁸ Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lë Saul), ni ne nacie Espiritu Sant Pabl ¹⁰ rëb Pabl lo me:

—¡Biche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios? ¹¹ Gon ganle, ¡laa Dios csiaabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

¹² Zeene gon men rnabey co sca pcow lo Barjesús, hor co bliladz me Xtiidz Dios, bzee zdo me gon me scataa poder ne ziaadnie zhiwseed Dios.

Bdziñ zho guiedz Antioquí

¹³ Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziñ zho guiedz Perg laa zho brieë len barcw, ga ptso Juan lo zho, laa Juan zey nëz Jerusalén; ¹⁴ laa zho bio nëz zie zho nëz xtan zha Pisid, bdziñ zho sti guiedz lë Antioquí.

Zeene gol dze ne rdziiladz miech lo dziin, güey zho xyadoo zha Israel. ¹⁵ Blozhse bded zha ne blab lo guits ne pquiaa Moisés, ni blab zho mine pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ Dios ne riladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me. ¹⁸ Dipse len choo iz ne bio zho grë dan bidz ne bded zho ga, pxcw me grëtaa xquientseeb zho. ¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. ²⁰ Ni dipse len tap gayoo rol iz, me bzooblo grë zha ne bzo rnabey lo zho; lëë lultm zha ne bzo me ga rnabey lo zho goc profet Samuel. ²¹ Blozh ga, laa zho bnaab so ti rey gnabey lo zho, nacie bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín.

²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David mine gnabey naa.” ²³ Ni lo xtii David co nagon briequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmengol no padzeela.

²⁴ Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquieintseeb zho gnab zho perdon lo Dios, zeena chobnis zho. ²⁵ Laa zeene zhile gdziñ dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguiald naa.”

²⁶ Gulgacnan sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grëse ne. ²⁷ Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. ²⁸ Niicle ne gon zho peet xtold me, niicle ne briequiad dol ne pquiaqui zho me, per bguib zho bdeeda diidz bnabey Pilat gut me.

²⁹ Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. ³⁰ Per bleeban Dios me. ³¹ Grë zha ne güeynal zhits me zeene brie me Galilé bdziñ me Jerusalén, nzian zho gon me; ni niina grëse zho laa zho quianee lo miech ganle cho nac me.

³² Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela. ³³ Lëë Jesús ga raquiet lo Salm brop, zaatne rnee: “Xpëed naa nac luu. Desde nadze laa zho gunbey ne Xpëed naa nac luu.” ³⁴ Ni bzeetle Dios ne laa me cueeban Jesús, bzeetle Dios xiñ xcuerp me len baa; min co ga raquiet lo Xtiidz me, zaatne rnee: “Zunlay naa luu, zigne bnese naa lo David gun naa.” ³⁵ Laa stib lo Salm ne pquiaa David rnee: “Gdeete luu diidz xiñ xcuerp naa len baa.” ³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me. ³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ ¡Grëse to bets, gulgacnan sca ganle! ¡Jesús nac men ne rsilaa miech lo dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine waltaa brielod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

⁴⁰ ¡Golguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grëse to ne rzhidznie to mine nac diidzli,
bii zan to ganle laa naa gun ti milagr nroob ne gzee zdoo to;
per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bnab grë miech co lo zho, siguiel zho quiet sti zhmal co biire tsie zho tsieseed zho zho. ⁴³ Zeene brie zho len yadoo co, nzian grë zha Israel, nzian grë zha stib guiedz zha ne rliladzle Dios zienal zhits zho. Nëz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. ⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzlid nac mine rseed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo riegual yquiaadiag Xtiidz Dios ne nac to zha Israel. Per ne squi run to guieintseeb nëde to ycaania tow par ygaa to guieimban ndzon ne rneedz Dios; na laa no guioseed grë zhazit. ⁴⁷ Ni scalegaa rnabey Dios gaca, sac znu rnee me:
Laa naa bzole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu; zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús. ⁴⁹ Dipse dan co, gocnan miech Xtiidz Dios.

⁵⁰ Grë zha Israel ne rlëe lo Pabl ga, psilo zho pquuil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidił zho Pabl grop Bernabé, guñcxoon zho zho dan co. ⁵¹ Zeene bin Pabla grop Bernabé, par glu ne nonguield sca been zha co zho, beenmbe zho grë yudie co ni zho laa zho brieeg ga, laa zho zie nëz Icon. ⁵² Grë zha ne bliladz Jesús ga, nguieel rac zho, rdeed Espiritu Sant guielbiini lo zho.

14

Bdzin Pabl Icon grop me Bernabé

¹ Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. ² Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé. ³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, grol zho racnie grë zha Israel ne rlëe ga, zgrol zho racnie grop zha poxtl co. ⁵ Zha ne rlëe ga, zigtaa zha Israela zigtagaa zha guiedz cow, bnediizd zho grë zho wxtis laa zho tsie tsiedeedquie zho Pabl grop Bernabé. ⁶⁻⁷ Zeene bin Pabla grop Bernabé, mazd laa zho brieeg ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga gon zho ti mgui në ni, waltaa lo xquielmban me ib gard së me; sac scale në ni me zeene gol me. ⁹ Zeene gon Pabl dze zob me rquiaadiag me mine nonee Pabl lo grë miech co, dzigo dzeque bui Pabl lo me, gon Pabl dib zdoos me rliladz me nli zrieelo gunguiac Dios me; ¹⁰ dzigo nguiedz bnee Pabl lo me, rëb Pabl:

—jBeennli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë. ¹¹ Zeene gon grë miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgan me ne!

¹² jMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. ¹³ Ro guiedz co ga zob xyadoo zhimdio zho Júpiter, dzigo brieeg pxoz ne no yadoo co grë me miech lad guiedz, zienie zho ngon, zienie zho guiee, nan zho gut zho ngon co cogon zho ma lo Pabl grop Bernabé. ¹⁴ Zeene bien Pabla grop Bernabé wbinladz guic zho. Ptsiez zho xab zho, bzëeb zho lad grë miech co, nguiedz rnee zho lo zho:

¹⁵ —jNdzinli golgac! jPe nacne squi rac to? jGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuaane no gbaaw, ncuaane no lo guidzliuw, ncuaane no lo nisdoow, me bzaaw grësew. ¹⁶ Niicle ne glo bdeed me diidz been miech grë ncuaane gocladzta zho, ¹⁷ per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guiebley lo ne.

¹⁸ Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

¹⁹ Len̄ dze co, blalaa zha Israel ne ziaad n̄z Antioquí ni n̄z Icon bdziñ Listr ga. Psilo zho bloo zho diidz lo gr̄e miech co gocntseeb zho lo Pabl; güey gr̄e miech co bdeedquie zho Pabl.

Masaque bzhaac zho gutle Pabl, bdozni zho me güeyron̄ zho me tiblād ro guiedz. ²⁰ Gr̄e zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me n̄z len̄ guiedz. Biini liu, pcaa me n̄z grop me Bernabé laa zho zie n̄z Derb.

²¹ Bdziñ zho Derb, psilo zho bnee zho Xtiidz Dios lo gr̄e miech co; ndal gr̄e zha ne bliladza. Blozh ga, laa zho wbi ga biire güeyted zho n̄z Listr, güeyted zho Icon, ni güeyted zho Antioquí, ²² güeynee zho lo gr̄e zha ne rliladz Jesús ga, pchoobladz zho zdoo zho, pso zho diidz lo zho, niicle nroob guiñe ne noded zho per none tibaque gac guic zho tsienal̄ zho Xtiidz Dios; sac ible sca nzian ncuane ted zho laga gdziñ dze ne gdziñ zho zaatne rnabey Dios.

²³ Tib tib guiedz co, bzose zho gr̄e zha ne so gnabey lo gr̄e zha ne rliladz Jesús ga; rlozhse rcuan zho gr̄e zho zho ni rzodiidznie zho Dios, dzigo laa zho rsan̄ zha co ladznia me yquianap me zho.

Bdziñ Pabl grop Bernabé n̄z Siria stib

²⁴ N̄z no Pabl grop Bernabé bded zho dib xtan zha Pisid, bzëëb zho xtan zha Panfil, bdziñ zho guiedz Perg. ²⁵ Blozhse bnee zho Xtiidz Dios lo gr̄e miech co, dzigo laa zho brieeg ga, bdziñ zho guiedz Atalia. ²⁶ Atalia ga bzëëb zho barcw bdziñ zho sti guiedz ne lë Antioquí, gataa laa zho psiaal̄ viaj co. Guiedz coque ga brieeg zho grop zho güey zho gr̄e guiedz co güeynee zho Xtiidz Dios lo miech; zeene sca bñab gr̄e zha ne rliladzle Jesús ga lo Dios gacniñ me zho tsiegun̄ zho xtsiñ me.

²⁷ Zigne bdziñ zho Antioquí ga, bnabey zho pcaalsa gr̄ese zha ne rliladz Jesús, bzodiidz zho lo gr̄e miech co gr̄ese zha gocniñ Dios zho güeygun̄ zho xtsiñ me, ni zha rquia zdoo Dios zha ne nacd zha Israel rbedz me zho ye zho rzëëb xn̄z me.

²⁸ Xtselaa bio Pabl ga grop me Bernabé, blëz zho lo gr̄e zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdziñ bla zha ne ziaad n̄z Judé, psilo zho noseed zho gr̄e zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol̄ zho.

² Zeene gon̄ Pabl sca noseed zha co miech, nacne bdiñdiidznieque Pabl zho grop Pabl Bernabé. Dzigo mazd bñediidz gr̄e zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo gr̄e zha ne rnabey lo zha ne no ga, dien̄ pe guiab zho.

³ Nacne brieeg zho zie zho. N̄z no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho gr̄ese zha nobedz Dios gr̄e zha ne nacdraa zha Israel, rsaan zho gr̄e zhiwseed xmen̄gol zho laa zho rliladz Jesús. Rley gr̄e miech co ron zhow. Sca bio zho n̄z, laa zho bdziñ Jerusalén.

⁴ Zeene bdziñ zho Jerusalén, pcaalsa gr̄e zha poxtl, gr̄e zha ne rliladz Jesús ga, ni gr̄e zha ne rnabey lo zho. Dzigo ga bzodiidz Pabl grop Bernabé gr̄ese zha gocnie Dios zho, zeene güeyted zho gr̄e dan co güeynee zho Xtiidz me lo miech. ⁵ Min̄ co quianee zho zeene guso bla zha ne glo goc farisé rëb zho, gr̄e zha ne nacd zha Israel zeene laa zho rliladz Jesús ib none tso zho bey, ni none gun̄ zho gr̄ese mine rnabey Xley Moisés. ⁶ Dzigo nacne bnabey gr̄e zha poxtl co ni gr̄e zha rnabey co, ycaalsa zho stib dien̄ zhapaa gaca, pe nonguiela tso gr̄e zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho:

—Gr̄ese to bets, gol̄quiaadiag mine gne naa lo to nu gan̄le. Led rsoladz to, zeene griin̄paa psilo quiagaaz Xtiidz Jesús lo miech, ible Dios bzooblo naa pxeel̄ me naa gaseed naa gr̄e zha ne nacdraa zha Israel gliladz zho me. ⁸ Ni megaa ne run̄bey me zdoo tib tib

miech, laa me blu ganle, niicle ne zha zit nac zho laa me pcaania zho; pxeel me Espíritu Sant nacnie zho, zigne pxeelaque Espíritu Sant nacnie ne. ⁹ Gotsaa gwi ne ganle, led yed Dios rbe dien cho nac zha Israel cho nacгаа zha zit; zigtaa zhaw, zigtagaa new, laa me pcaania ne porne dib zdoos ne bliladz ne me. ¹⁰ ¿Zha nac dzigo ne racladz to gnabey to grë zha co gun zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brielod niuna zigne naca! ¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuane rdziuun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zaatne güeynee zho Xtiidz me lo grë miech co. ¹³ Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. ¹⁴ Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me. ¹⁵ Ga nagon goca zigne zhobneese lo Xtiidz me, mine pquiaa grë zha ne pxeel me padzeela, rneew:

¹⁶ Tedse nu ganle,

laa naa cuedz grëse miech ne ygab lo naa;
grë zha xtii David zha ne bzozit, laa zho gbig stib.

¹⁷ Horco grëse zha zit, laa zho gon ganle cho nac naa,
zeena grieelo sëëb zho xnëz naa.

¹⁸ Znu nac xtiidz Dios, ni padzeelale bzeet me ne laa me gun min co.

¹⁹ Min co nagon grë zha zit ne rliladzle Jesús, ib nonguielda ga gnabey ne zho gun zho mine nac xley ne. ²⁰ Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tseel zho; niicle wnaagaaw, nodne tsonie zho mgui ne nacd tseel zho. ²¹ Niicle mazd padzeelaw, tibaque quiayon miech gun zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliladz Jesús ga. ²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rliladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴ Niina ne gocndion no laa bla zha ne nacgrë no nu baaad lo to i, baaadcots zho guic to dien peraa no gun to. Gacnan to ganle led nod pxeel zho, ²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

²⁸ Lo godiidz ne bdziuun no, laa no bdzianle nonguielda ne dien peraa gnabey no to gun to, ni niiclegaa Espíritu Sant scaque rnee me. Rquiind ne peraa gun to, lëëlew ga totsaque tsoxco to ²⁹ gowde to xpëel grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tseel zho; niiclegaa wnaaw, nodne tsonie zho mgui ne nacd tseel zho. Min rii nagon nac mine no tsoxco to.

‘Guiaanne Dios to sca.’

³⁰ Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne rliladz Jesús, dzigo bdeed zho guits co lo zho. ³¹ Zeene gocnan grë zha co zha rnee low, rley zho sacne pchoobladza zdoos zho. ³² Blozhse ga,

psilo Judas grop Silas pseed zho grē miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

³³ Xtselaa blēz Silas ga grop Judas, laa zeene goł dze ne laa zho grie gbiire zho nēz Jerusalén stib, ine güeyzonēz grē zha co zho, rdeed zho xquizh lo zho. ³⁴ [Laa zho nole nēz, tibaque zeene rēb Silas laa Silas guiaanaque ga spalal dze.] ³⁵ Laa Pabl grop Bernabé ible laa zho biaan ga been zho xyudar grē zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rēb me lo Bernabé laa zho gbiire tsie grē guiedz ne güeynee zho Xtiidz Dios lo miech ga, par gacnan zho dien yo grē zha co. ³⁷ Dzigo gocladz Bernabé ye Juan Marcw nienie zho; ³⁸ per bzhiguielđ Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynalđ Juan nlozh nsiaał zho lo dziin co.

³⁹ Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nēz grop Bernabé Juan bzēeb zho barcw zie zho nēz lo guidzliu win ne no lo nisdoo lē Chipr; ⁴⁰ laa Pabl goc grop Silas. Blozhse bnab grē zha co lo Dios gacnieñ me Pabl grop Silas, laa zho brie ga ⁴¹ güeyted zho grē guiedz ne ndxie nēz xtan zha Siria, grē guiedz ne ndxie nēz Cilis, güeynee zho lo grē miech ne rliladz Jesús nēz co, güeychoobladz zho zdo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lē Timoté, ti men Israel ne rliladze Jesús nac xniaa me, laa pxoz me nac men Gres.

² Grēse zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl. ³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grē zha Israel ne no nēz co.

⁴ Laa me zienal zhits Pabl. Guiedz ne rdedtaa zho rnee zho lo grē zha ne rliladz Jesús ga, tsoxco zho gun zho grē mine pso zha poxtl ga diidz, grē zho zha rnabey ne no Jerusalén. ⁵ Zeene ron grē zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grē guiedz ne ndxie nēz Asia ga. ⁷ Zeene bdziñ zho zaatne rsilo xtan zha Misia gocladz zho nie zho nēz xtan zha Bitin, scaque bdeete Espíritu Sant diidz nie zho nēz co. ⁸ Dzigo tibbdeed zho dib xtan Misia bdziñ zho ti guiedz ne ndxie ro nisdoo lē Troas.

⁹ Guieel co blulo ti mgui Macedon lo Pabl, rnab me gun Pabl guiełnzaac tsie Pabl nēz co, tsiegun Pabl xyudar grē miech co.

¹⁰ Nacne hor cogazh bzhixcuaa no, sac bien no ible Dios racladz guio no nēz co guionee no Xtiidz me lo miech.

¹¹ Dzigo brie no ga bziaab no ti len barcw bdziñ no ti lo guidzliu win ne no lo nisdoo lē Samotras. Biini liu brie no ga bdziñ no Neápolis, ga bliaaz no wdze co. ¹² Biini sti liu co brie no Neápolis bziani no bdziñ no Filip. Lē guiedz co riaan zaatne rsilo xtan zha Macedon, niapse men Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa men wnaa ndxie ga, dzigo psilo no bnee no lo zho cho nac Jesús. ¹⁴ Lad co no ti wnaa Tiatar lē Lidia, rto me grē lar nizhnie nlaan mine nac lar niazh; ye me dib zdo me rliladz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grē menlidz me; blozh ga, bredz me no guiobiaaz no lidz me, něchaa me lo no:

—Telne rzac to nli dib zdoo naa rleyne naa Dios, goltë sca cuëz to lidz naa.
Rzoobguic me lo no, nacne biobiazaque no lidz me.

Bio Pabl ladzguiib grop Silas

¹⁶ Tib dze, lëëtaque zio no zaatne riozodiidznie no Dios, bdieelo no ti ndzooop nguieg noguitnie mendox. Zëëb diidz grëse tel pe r nabdiidz miech lo ndzooop, rnee mendox cow; nroob dimi ne riab nia zha ne rnabey ndzooop. ¹⁷ Na| ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyun gza mgui rii! jLaa zho ziadseed to zeena gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo mendox ne noguitnie ndzooop ga, rëb me:

—Jesús nacne naa, ni laa naa rnabey luu gon niinagazh psaan ndzooop qui.

Zigne sca rëb Pabl laa mendox co bzhooon.

¹⁹ Gza zha ne rnabey ndzooop ga, zeene gon zho rundraa ndzooop guielnsin co gdziniaa ndzooop dimi, bnaaazaque zho Pabl grop Silas güeyzo zho zho lo wxtis, rëb zho:

²⁰⁻²¹ —jGolwi ganle pe nac ncuaane noyun grop zha Israel rii lad guiedz nu! jNogodil zho miech, laa zho quiaseed miech ncuaane nonguieldraa dziuun ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brie xab zho grop zho bdeed bar zho zho, nroob bdiin zho zho. ²³ Blozhse bdiin zho zho laa zho psëëb zho ladzguiib, bnabey zho men ne quianap ladzguiib ga tibaque yquianap me zho, sac tel laa zho xoon me tsietizha. ²⁴ Zeene bin men co sca rëb zho, güeyaque me güeysëëb me zho stib lena mine riaan caanraa, ga psëëb me ni zho lad chop lë yag nroob.

²⁵ Wdze co, zig grol guieela laa Pabl grop Silas bii noyoolnie Dios, ni rnab zho lo me gacnie me zho. Grëse zha ne no ladzguiib ga, ron zho sca no Pabl grop Silas. ²⁶ Tibaque zeene bni ti zhodox, psiniw dib nacse ladzguiib co, grëse ro ladzguiib co bzhial, guuib ne no nia grë zha ne no ga, wbi|a.

²⁷ Lëëled brie mcaallo men ne quianap ga, zeene gon me grëse ro ladzguiib co zonial, masaque güeynie guic me bzhooonle grë zha ne no ga, bdoaque me spad ne ney me laa me zie gut me me. ²⁸ Horco broptsie Pabl lo me, rëb Pabl:

—jGute luu luu! jGrë no ndxie no, choot bzhioond!

²⁹ Lëëled bnab me biini, bzëëb nguzhooon me len ladzguiib, masaque rzhidz me dzeb pquiitsgzhib me lo Pabl grop Silas. ³⁰ Blee me zho ga, rëb me lo zho:

—Golnë lo naa, jpe nac mine gun naa zeena csilaa Dios naa lo grëtaa xtol naa?

³¹ —Dib zdoo luu bliladz Jesús, men rnabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

³² Dzigo güeynie me zho lidz me, bnee zho Xtiidz Dios lo me grë menlidz me. ³³ Guieel co no me bdiib me zhits zho, zaatne brëë bar ne bloobar zho zho; blozhse ga, laa me brobnis grë menlidz me. ³⁴ Bnabey me goclo ti guielwagw downie me zho, rley me, niicle grëgaa menlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas. ³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca grie to, peet tsieniedraa guic to.

³⁷ Dzigo rëbchaa Pabl lo zha ne bdiin diidz ga:

—jZha ndzielguictaa zhiwxtis to gon! Squi ndxie menguiedz bdiin zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhliaanse grie no. jLëda ga gon! jGoltsie golguiab lo zho, lëëzhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdieb zho; ³⁹ lëälëd güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnaab zho lo zho siguiel zho mazd gbi zho guiedz co.

⁴⁰ Ga briece zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne riladz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho briece guiedz co.

17

Güey Pabl Tesalónica grop me Silas

¹ Briece Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdiin zho guiedz Tesalónica. Lad guiedz co zob ti xyadoo zha Israel, ² dzigo güey Pabl güeynee me Xtiidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhal, gzobse dze ne rdziiladz miech lo dziin güey Pabl güeyzodiidznie Pabl grë zha co, ³ bzeet me lo zho grë zaatne raquiet grëtaa ncuaane ted men ne cxeel Dios lo guidzliu ga, ni zha grieaban me; ni blu me lo zho gacnañ zho ganle lëë men co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole mine rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëë zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëeb zho lidz Jasón nañ zho niebee zho Pabl ga grop Silas, ngo zho zho ladznie grë miech co.

⁶ Zeene gon zho bgaad grop zha co lo zho, bnaazaque zho Jasón ni zla zha ne riladz Jesús, bdoobniu zho zho bdzinnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nul!

⁷ Ni Jasónpaa rdeed zaatne rbëz zho. Racladzdraa zho gun zho mine rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë menguiedz ne pcaalsa ga, zeene bin zho sca rnee grë zha co, riendraa zho zha gun zho. ⁹ Mine been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxina laa grë zha ne riladz Jesús ga bleese Pabl ga grop me Silas, pxeel zho zho nëz Beré. Zigne bdiin zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho mine rnee Pabl grop Silas, gzobse dze rlab zho lo Xtiidz Dios rwi zho dieñ pe nli mine rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³ Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquiil zho grë miech co glëënie zho Pabl. ¹⁴⁻¹⁵ Dzigo lëälëd briece bla zha ne riladz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Leñ dze ne no Pabl Aten

¹⁶ Laga quiambëz Pabl gdziñ Silas grop Timoté güey me güeyted me lad guiedz co, wbiñladz guic me gon me led zhid grë mdio ne riegana grë miech co. ¹⁷ Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne riladzle Dios. Gzobse dze rie me leñ guiedz rienee me lo grë miech ne rdziñ ga. ¹⁸ Tib dze bdzieelo me bla zha rac ne zienal zhiwseed ti men lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieaban Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; ¹⁹ dzigo rëb zho lo Pabl:

—Bzhiguiel mazd, së luu guio ne lozh sodiidz luu lo no dien zha nac wseed ne ziaadnie luu, ²⁰ sac wlalaa gard dzion no grë ncuane rnee luu i.

²¹ No zho liaadz gacnan zho pe rnee Pabl, sac sca nac grë zha Aten, niiclegaa grë zha ne quiadziñ ga, rdziladz zho rded-dze zho rzodiidz zho dien zha nac grë diidz cub ne griiñ ron zho.

²² Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to men Aten, ran naa ne nligaa rioxco to rleynie to grë men ne rzac to nac Dios; ²³ sac len dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnan sca ganle, Dios ne runbeyde to ga, runbey naa me ni lëë zhiwseed me none naa lo miech len dze rii.

²⁴ 'Dios co bzaa guidzliu, me bzaa grëtaa ncuane no lo guidzliu; gacd ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu. ²⁵ Niicle rquiindgaa me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuane rquiin ne. ²⁶ Lo tib nëzaque miech ne bzaa me ga, bnabey me briequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. ²⁷ Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne, ²⁸ sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëëw ga bnee bla menladz to, zha rac ne znu rëb: “Xtii Dios nac ne.”

²⁹ Gase na ganle gotsaa gwi ne, conquë xti Dios name nac ne, pe nac dzigo gliladz ne lëë Dios ga nac grë cho mdio or, cho mdio plat, cho mdio quie ne riab guic miech rzaa zho; ³⁰ ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuane bliladz zho ga gbig zho lo me, mese gleynie zho; ³¹ sac laa me bzole tib dze ne gacredz grëse miech lo me ygaa zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëë men co ga gon bleeban me.

³² Zeene bin zho bzeet Pabl no ti men ne brieegan, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëëz zho lo xcodiidz Pabl, laa Pabl wbi lo zho ga. ³⁴ Briequia blalaa zha Aten bliladz Jesús, lëë tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl quiedz Corint

¹ Brie Pabl Aten bdziñ me quiedz Corint. ² Ga beenbey me ti men Pont lë Aquil, ti zha xti zha Israel nac Aquil. Roma no me glo, wriiñ bdziñ me Corint ga grop tseele me; sac bnabey rey Claud brie grëse zha Israel ne no Roma. ³ Dzigo güey Pabl blëz Pabl lo zho ga, sac ye zho rzhixcuuaa grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha quiedz cow rnee me lo zho tso guic zho gliladz zho Jesús. ⁵ Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. ⁶ Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me riladz me Dios. ⁸ Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—;Gdziebd luu! ;Ib ycuëëzd luu lo dziin ne noyuu luu i, bnee xtidz naa lo grë miech qui! Ndal grë miech rii no sëëb xnëz naa. ¹⁰ Peet tsienied guic luu, choot grielod lega pe guu luu sac naa quianaap luu.

¹¹ Nacne blëz Pabl ga stib iz grol, pseed me grë miech co Xtiidz Dios.

¹² Laa zeene bzob men ne lë Galiön zobnabey me xtan Acay, grë zha Israel ne no Corint ga bnediidz zho grë zho bnaaz zho Pabl güeyzo zho me lo Galiön ¹³ rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod mine ni nacdraa ley.

¹⁴ Laa Pabl zie gnee, zeene pquiab Galiön rëb me lo grë zha co:

—Telne niaca mine no pe ti falt, pe ti guielntseeb ne quiayuu me, dzigosi naa raguial guu guielwxtis. ¹⁵ Per telne laa to ziaadnie me nu porne rdziladzde to mine quiaseed me miech, rdziladzde to tel cho rzeet me, sac led scad nac xley to, tsow golgan dien pe guu to. Nodaque xtil to guic naa.

¹⁶ Bleega Galiön zho nëz ley.

¹⁷ Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galiön bdiu zho me, per peet rëbd Galiön.

Biire bdziu Pabl guiedz Antioquí

¹⁸ Goc spalal dze no Pabl Corint ga, dzigo bnee me lo grë zha ne riladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco Pabl guu me tel pe nac ncuaane rëb me lo Dios guu me, dzigo zeene bdziu zho Cencré bnabey me liu liu ptsiib guic me.

¹⁹ Cencré bzëëb zho barcw stib, zie zho nëz Efés. Bdziu zho Efés, güey Pabl xyadoo grë zha Israel ne no ga güeynee me Xtiidz Dios lo zho. ²⁰ Dzigo bnaab zho mbëz me lo zho ga ti blalaa dze, per brieelod mbëz me ²¹ sac laa guic me no gdziinniob me Jerusalén yгаа me lni ne ziaadyob len dze co, rëb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea. ²² Cesarea brieë me barcw, laa me zie nëz Jerusalén. Bdziu me güeyquiaabdiuzh me grë zha ne riladz Jesús ga; biireraa me ga bdziu me Antioquí.

²³ Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne riladz Jesús ga dib zdoo zho gleynie zho Dios.

²⁴ Len dze co bdziu ti men xtii zha Israel guiedz Efés, ti men Alejandríw lë me Apol. Ti zha rac nac me, rien me zha gnee me Xtiidz Dios lo miech. ²⁵⁻²⁶ Güey me xyadoo zha Israel ne no ga, nguieel rac me, peet dzeb guien lo me psilo me nonee me lo zho grëse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne riladz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeel zho lo zha ne no nëz co zaacse ycaania zho me. Zeene bdziu me nëz co, pseed me grë zha co. Rley zho blozh gocnan zho cho nac Jesús; ²⁸ sac squi ndxie miech rsioog me ro grë zha Israel, rnee me lo zho lëële men ne quiambëz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

19

Biire güey Pabl Efés

¹ Len dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nëz xtan zha Galás, laa me bdziñ ga. Ga bdzieel me blalaa zha ne rliladz Jesús,

² dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Guieibiini ye? Gard gon dzion no rdeed Espíritu Sant guieibiini.

Dzigo rëbchaa Pabl:

³ —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guieintseeb, laa zho sëeb xnëz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Min co bin zho nacne brobnis zho stib zigne psan Jesús diidz. ⁶ Zeene laa Pabl pxobnia guic zho bnab me gdeed Espíritu Sant guieibiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnan miech. ⁷ Lo gza zho rgaa zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. ⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nacne bleextsoque me grë zha ne rliladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰ Dipse len chop iz blëz me ga pseed me grë zha co; nacne grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios. ¹¹ Bdeed Dios diidz been me grë milagr nroob ne rzee zdoo miech; ¹² sac haxta lar ne rzëse nia me, lar ne rbixse me rzhoob lad men ne rzacne laa zho riac, niicle grëgaa mendox ne noguitnie miecha, rzhoon ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelt, nan zho na ye zho cuedz lë Jesús gacnien me zho guncxoon zho mendox; bdziñ zho zaatne guncxoon zho ma, rëb zho:

—¿Zig zobwi Jesús ne rzeet Pabl, laa no rnabey to golrieegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias men ne noguitnie mendox co, bnaaz me gza zha co bdiñ me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli men non, men rnabey nac Jesús.

¹⁸ Haxta ye grë zha ne rliladzle Jesús, hor co laa zho bleero pe nac grë ncuane ndzinlid ne bliladz zho glo. ¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga grësew. Zeene biobey palal gocnon grëtaa guits co, biirew zig chooptsii mil pes plat. ²⁰ Ga blu poder ne nacie Xtiidz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén griee me tsie me Roma. ²² Nacne ptedner me Timoté grop Rast (zha ne noyun xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³ Len̄ dze co brieequia palal zha Efés ptsidiḷ zho zha ne rliladz Xtiidz Dios. ²⁴ Guiedz co no ti men̄ ne rundziin guiib plat lë Demetr, rzaa me grë yadoo yeen̄ zig niaada xyadoo xnaxnazh zho Dian; nroob dimi ne rial̄ me grë me zha ne runnie me dziin co; ²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien̄ naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun̄ ne? ²⁷ Golguien̄ ganle noxtseeb guiabdraa xtsiin̄ ne, ni nan̄wen to ganle lëë xtimi ne nu. Ni tebaa min̄cosegaaw, min̄e mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

²⁸ Zeene gon̄ grë zha co sca rëb Demetr, rlëë zho, roptsie zho rgo zho xviv Dian. ²⁹ Wdzeepaaw grëse menguiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoobniu zho zho bdzin̄nie zho zho ro yulow.

³⁰ Nacne gocladz Pabl nie me nienee me lo grë miech co, per psaand grë zha ne rliladz Jesús ga. ³¹ Haxta bla zha wxtis ne ndzieeldiidz Pabl, pxeel̄ zho diidz lo me tsied me.

³² Zhaase zhaase rnee grë miech co ndxie zho ro yulow ga, no zho haxta ni rien̄d pe nacne zie zho ga. ³³ Blalaa zha Israel, zeene gon̄ zho scataa rac grë miech co, bdoob zho zhicw ti men̄ lë Lejandr gocladz zho nee me chop lan̄ xtiidz zho. Laa men̄ co blis nia me parne cuedze zho gnee me; ³⁴ zeene gon̄ zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men̄ ndzondoo nac Dian! ¡Men̄ ndzon nac xnaxnazh ne!

Zig chop hor bre zho ga sca roptsie zho.

³⁵ Dzigo brieë men̄ ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Gol̄gona ganle, grëse miech lo guidzliu nan̄ zho guiedz rii zob nazhnazh Dian, nan̄ wen zho gbaa biet me zob me nu; ³⁶ tsod zha ne guiab led scada. ¿Pe nac nadien̄ ne squitaa rac to? Gol̄guien̄ ganle nonguiel̄da i squi lëëlëd dieen̄ pe rzhixcuua to. ³⁷ Gol̄wi ganle, laa to ziaad-zo grop zha rii nu, ¿pe nadien̄ been̄ zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. ³⁸ Nana, tel̄ne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guiel̄wxtis, ni zogaa zha ne yquiaadiaga. ¡Ga glisqui zho pe run̄ tib, pe rungaa stib! ³⁹ Laa tel̄ne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien̄ zha niaca. ⁴⁰ Sac gon̄ ne squi been̄ to nadze, noxtseeb glisqui zha Romaw lo ne; ni pe nadien̄ dzieets ne tel̄ne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nëz Macedon ni nëz Gres

¹ Zeene laa ruid co blëz, dzigo bredz Pabl grëse zha ne rliladz Jesús, bnee me lo zho zaacse gac zho. Blozhse bnee me lo zho, laa me brieë ga zie me nëz xtan zha Macedon; ² güeynee me lo grë zha ne rliladz Jesús nëz co, pso me diidz lo zho zaacse gac zho. Nëz co brieë me bzin̄ me nëz Gres. Ga blëz me tson̄ mëë.

³ Laa zeene laa me gbi ga tsie me nëz Siria, laa me ziele sëëb me barcw zeene gocnan̄ me laa zha Israel ne no ga bnediidz pa tsietin̄ zho me, nacne güeydaque me barcw, mazd bio me nëz güeyted me nëz Macedon.

⁴ Blalaa zha ne bzënal̄ biogza no me, bzë ti men̄ Beré lë Sópater xingan ti men̄ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni Trófimo. ⁵ Gol̄ no Filip laa zho bner, per biaan̄ no diidz Troas cuëz zho no; ⁶ laa no bliaaz ga, ga bdieed no lni Pascw. Zeene bded lni co laa no bziaab barcw,

laa no brieë ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

⁷ Zeene goļ dze dmingw, bio no yu ne rcaalsa zha ne rliladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga gun grë zha ne rliladz me. Laa no ndxie grë no, dzigo psilo Pabl pseed me no; nzian ncuaane nonee me lo zho sac guini liu co laa me griee ga; goļ groļ guieela rsiaaldaqe me. ⁸⁻⁹ Nzian nac biini ne noquia len yu co; zaatne nac ro ventan ga zob ti niib lë Tic. Wdzeelaaw rsiaaldaqe Pabl, tibaque bzhen mcaal niib co, wbix niib ga biab niib nëz ley; ni glaaw, len yu ne riaan glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziñ me lo niib bdeedz me niib.

—jGdziebde to! —rëb me—. jZrieëban niib!

jNi nligaaw brieëban niib! ¹¹⁻¹² Grëse zho per nli rley zho. Blozh ga bdzieep no glaa stib bdziñ no len yu co, dzigora bdiiz Pabl quietxtil pquiiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

Bdziñ Pabl Milet

¹³ Lban co psiaal Pabl, laa me wbi ga laa me zie nëz Ason nzeni me; laa no bziaab barcw bdiednieer no lo me. Bdziñ no Ason ga bliaaz no me zigne biaan no diidz. ¹⁴ Zeene blanso me lo no, laa no bziaab barcw gza no me bdziñ no guiedz Mitilen. ¹⁵ Biini liu brieë no Mitilen, bdieed no gax Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigora bdziñ no Milet.

¹⁶ Biotieete no Efés, sac laa guic Pabl no gdziñniob me Jerusalén, zeena ygaa me lni Pentecostés. ¹⁷ Nacne zigne bdziñ no Milet pxeel me diidz Efés bredz me grë zha ne zo lo zha ne rliladz Jesús ga. ¹⁸ Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyūn naa xtsiin Jesús men ne rnabey ne. Wlal ne psilo ziyal naa nëz Asia nu, ¹⁹ blactaa biin naa lo grë mine bdeed naa, blactaa lo guielxtseeb ne ziyo naa, tibaque quianaļ grë zha Israel quin zho naa. ²⁰ Per gon to ganle, tibaque bioxco naa bialseed naa to mine nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. ²¹ Grëse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grëse zho bnee naa lo zho none csaan zho xquielntseeb zho dib zdoo zho gnalo zho Jesús, zeena gbig zho lo Dios.

²² Scaque niina ne laa Espiritu Sant rnabey ga naa Jerusalén, nand naa dien peraa nac ncuaane gdzieelo naa ga; ²³ per nanpaa naa ible zgo zho naa ladzguuib, ible sacsi zho naa, sac guiedz ne gdziintaa naa min co rnee Espiritu Sant teed naa. ²⁴ Lo guielxtseeb co no naa per rquiad zdoo naa xquielmban naa; mine nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaal naa dziin ne bzo Jesús naa nu quiayūn naa. ²⁵ Rien naa lo grë to ne nac to zha ne bialseed naa gocnan to zha nac xnëz Dios, gandraa to lo naa lo guidzliu rii. ²⁶⁻²⁷ Laa naa pseedle to grëse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga. ²⁸ Golguien sca, jgolquianap to, ni scagaa golquianap grë zha ne zo to lo! jGolwi ganle xnëz Dios no zho, haxta lo cruz gut Xpëed me bdiizh me xtoļ zho! Ni stiba, jib Espiritu Sant bzo to yquianap to zho zigne rquianap baxtor xpëcwxiil zho!

²⁹ jNsin goļso! Sac rienle naa zeene laa naa gbiche lo to, ib zrieëquia grë zha ne guiaad guiaadquidie to, zguib zho zha gnitlo zho to zigne run grë coyot mëcwxiil. ³⁰ Haxta lad to, zrieëquia bla zha ntseeb ne ctsëë Xtiidz Dios, squiil zho to tsienal to zhiwseed zho. ³¹ Gacxe waa laa naa rne lo to, jnsin goļso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. ³² Dios nac men ne gacniēn to, laa naa rsan to ladzna me grëse to; Xtiidz Ndzon me mine rnee ganle zha nquialadztaa me to, lëew lozh quix biini to dib zdoo to gnalo to me, zeena ygaa to zaatne gneedz me cuëz to grë to zha ne nora xnëz me.

³³ 'Wlaltaa ib rzobladd naa dimi, ib rzobladd naa lar, guiep naa tebaa zha yquianie naa grë ncuuan co. ³⁴ Len dze ne blëz naa lo to, gon to ganle niapse nia naa bdzinia naa ncuane pquuin naa, ncuane pquingaa grë zha ne bzënie naa. ³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guiend pe yquuin. Ib rianladz naa xtiidz Jesús men ne rnabey ne, zeene znu bnee me: "Mazdraa nroob guielbley ne rgaa zha ne rgad, lëdle zha ne rad."

³⁶ Zeene blozh bnee Pabl lo zho, laa me pquitsgzhib ga grë me zho bzodiidznie zho Dios. ³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me. ³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëëb me barcw.

21

Biire güey Pabl Jerusalén

¹ Blozhse bzhieen no nia grë zha Efés co, laa no bziaab barcw, laa no zio bdziñ no ti lo guidzliu win ne no lo nisdoo co lë Cos. Biini liu brie no ga bdziñ no lo sti guidzliu win co lë Rodas. Rodas brie no bdziñ no guiedz Pátara. ² Guiedz Pátara, ga bziaab no ti barcw ne zie nëz xtan zha Fenicia. ³ Zeene zieded barcw co ngali zaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdziñ no guiedz Tir, xtan zha Siria, ga blëz barcw co biet grë yo ne neya.

⁴ Zigne bdziñ no ga bdzieet no barcw bziaab no lad guiedz co, biodziel no grë zha ne riladz Jesús ga; bliaaaze no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brie ga, grëse zha ne riladz Jesús grë tsiel zho grë xpëed zho biaadzonëz zho no ro nis co; dzigo lo yuzh co ga pquitsgzhib no grë no, bzodiidznie no Dios.

⁶ Blozhse bzhieen no nia zho, laa zho wbi ga.

⁷ Brie no Tir bdziñ no guiedz Tolemaid, ga bio no bioquiaabdiuzh no grë zha ne riladz Jesús ga, bliaaz no lo zho tib dze. ⁸ Biini liu brie no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lë Lip co ga gogza sxoops zha ne bzo been xyudar zha poxtl. ⁹ Quianie me tap ndzoope ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnan miech.

¹⁰ Nzianle dze goc no no lidz Lip, zeene blanso ti men ne ziaad nëz Judé lë Agab, biadquiaabdiuzh me no. (Ye me rnee tel pe nac mine racladz Dios gacnan miech.) ¹¹ Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me:

—Znu gon rnee Espíritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

¹² Grë zha ne riladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. ¹³ Pquiabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnë to naa i gon squi rac to!

¹⁴ Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsoo csaan ne, Diostaa nan dien zha gaca.

¹⁵ Bdedse ga bzhixcuua no laa no brie ga, laa no zio nëz Jerusalén; ¹⁶ blalaa zha ne riladz Jesús Cesarea ga bzënal zhits no, bzënie zho ti men Chipr lë Mnasón. Izle riladz me Jesús, lidz me biobiaaz no zeene bdziñ no Jerusalén.

¹⁷ Grë zha ne riladz Jesús Jerusalén, rley zho zeene gon zho laa no bdziñ, blëzlo zho no.

¹⁸ Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne riladz Jesús Jerusalén ga, ndxie ga. ¹⁹ Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocnie Dios me güeyseed

me grë miech stib guiedz. ²⁰ Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho mine rnabey Xley Moisés. ²¹ Grë zha ne no nu bin zho laa luu güeyseed grë men wladz ne no guiedz zit, nac diidz blu luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grë zhiwseed xmengol ne. ²² ¿Zha ganle dziuun ne? Sac zeene gon zho laa luu blanso, ible ziaadguib zho luu. ²³ No tap bets ne nu ziaadyoble gun zho mine bnee zho lo Dios; mine gaca güey ²⁴ güeynie zho yadoo, golgun grë mine rnabey ley, bdiizh ctsiib guic to gza to; zeena ga gan grë zha rii ganle nlid grë mine rnee miech luu ga.

²⁵ 'Sangue grë miech stib guiedz zha ne rililadz Jesús, laa no pxeelle diidz lo zho zigne bzodiidz ne nu: grë ma ne rut miech rgogon zho lo zhimdio zho, gowd zho bëel co; grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeygun zho mine rnabey ley; blozh ga güey zho yadoo güeynie zho diidz pa dze gza mine quiayun zho ga, zeena gal dze co laa zho tsienie gon ne gdeed zho tib tib zho. ²⁷ Laa zeene merle gza gadz ngbidz ne quiayun me mine rnabey ley ga gza me zha co, lega naclew gon bla zha Israel ne ziaad nëz Asia laa me no len yadoo. Nacne wbig zho ²⁸ bzhen zho zhicw me, roptsie zho rnee zho:

—¿Grëse to menguedz! ¿Golgun xyudar no gnaaz ne men rii! Sac lëe me ga quianzë quiaseed me zha wladz glëenie zho ladz zho, rnee me lo zho gundraa zho grë mine rnabey ley, gapdraa zho respet yadoo rii; haxta grë zha zit zizëëbnie me nu. ¿Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Tróximo, dzigo rzac zho güeynie me zha co len yadoo.

³⁰ Pe ga bin grë menguedz, grëse zho bdzin wbigbe zho lo Pabl bdoobniu zho me blee zho me len yadoo, zigne blee zho me ga lëeléd psioog zho ro yadoo; psilo zho noguin zho me, nan zho gut zho me.

³¹ Zeene gocnan men ne rnabey lo menguiib ne ndxie ga laa ruid co noyac, ³² lëeléd brienie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdzin, dzigora blëz bdiñ zho me.

³³ Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dien cho nac Pabl, pe quiayun me ne scataa rlëenie zho me. ³⁴ Psilo zho nguedz roptsie zho, zhaase zhaase ncuaane rcaadzdo! zho me. Gonse men rnabey co rlud dien pepaa rlisqui zho, nacne bnabey me grë menguiib co ziesan zho Pabl yu ne rbëzpa zho.

³⁵ Laa grë menguiib co csilo soquianie Pabl lo scaler ne rdzin ro yu co, gataa mazd bzoobyayn zho me, sac ntseeb rac grë miech co; ³⁶ nalbe zho, roptsie zho rnee zho:

—¿Golnitlogazh men qui! ¿Niinagazh golgut me!

³⁷ Laa grë menguiib co csëëble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres? ³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

³⁹ —Led naada —rëb Pabl— men Israel nac naa. Guiedz Tars gol naa, lëe guiedz co nac mine nroobraa lo grë guiedz ne ngab Cilis. Na laa naa rnab lo luu, been guielnzaac bneedz diidz gne naa chop lan xtidz naa lo grë miech qui.

⁴⁰ —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

22

¹—Grëse to men wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle zeena gacnan to quiaayund naa mine rquiaqui to naa.

² Zeene gon zho xtiidz zho rnee me, grëse zho dzese bre zho; dzigo rëb me:

³—Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow. ⁴ Mine been to nu nadze, ye naa blactaa squi ben naa ptsidil naa grë zha ne rliladz Jesús, pquianał naa ygaa zho guet zho; mgui wnaasaque razobdoo naa zho lidz zho rasan naa zho ladzguiib. ⁵ Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndzinne naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga rliladz Jesús, nialnie naa zho Jerusalén nu nded zho caxtigw.

⁶ Min copaa nagon brie naa nu za naa nëz co. Zhile gdzin naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. ⁷ Biabgagh naa liu, ga nix naa bin naa ti tsi men co rnee me lo naa: “Saul, Saul, ¿pe nacne quianał luu naa?” ⁸ “¡Been guiełnzaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiatsidil luu.”

⁹ Grë zha ne zanie naa ga, bdzieb zho gon zho biini co, per biend zho pe rnee men co lo naa. ¹⁰ Dzigo rep naa lo me: “Bzhiguiel bnë dien, ¿pe racladz luu gun naa niina?” Nëchaa me: “Guche i, güey Damasc ga gnë zho ganle pe nac mine no gun luu.”

¹¹ Dzigo bzhen zha ne zanie naa ga nia naa, bdzinne zho naa Damasc; sac lo biinidoo co pcow lo naa. ¹² Ga no ti mgui lë Ananí, zëeb diidz rioxco me grë mine rnabey ley, grëse men wladz ne no ga nanpaa zho ti men wen nac me; ¹³ dzigo biaad me zaatne blëz naa ga, në me lo naa: “Saul, niinagagh gon bets laa luu gbiire gwi stib.” Zigne sca bnee me laa lo naa biac, gongagh naa me. ¹⁴ Dzigo nëchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac mine racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. ¹⁵ Ib laa me bzo luu tsienee luu lo miech mine bzhaac luu ga, mine bin luu ga. ¹⁶ Guso i sca, zeena chobnisgagh luu. Dib zdoo luu bredz Jesús, bnab lo me csaambe me luu lo xtol luu.”

¹⁷ Zeene laa naa blanso Jerusalén nu, tib dze lëëtaque no naa yadoo nozodiidznie naa Dios, ¹⁸ tibaque blulo me lo naa në me: “Na zeena biobladz brie Jerusalem nu, sac ib gliladz grë miech rii mine gnee luu zeene gnee luu xtidz naa lo zho.” ¹⁹ “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rliladz luu, rnabey naa rguin zho zho ni rio zho ladzguiib, ²⁰ niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.” ²¹ Dzigo në me lo naa: “Na zeena pcaaniob nëz brie nu, sac gon laa naa cxel luu stib dan tsienee luu xtidz naa lo grë menzit.”

²² Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡lb rieguialdraa gban men qui! ¡Golnitlogagh me!

²³ Nguiedz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psëeb men rnabey co Pabl len yu co, ni bnabey me grë menguiib co quin zho Pabl, zeena cueero Pabl dien pe nac ncuane been Pabl, zha nac ne scataa rac grë miech co lo Pabl. ²⁵ Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶ Zeene bin zha co sca rëb Pabl, lëälëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

²⁷ Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

²⁸ Rzedz yan men rnabey co rëb me:

—¿Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangué naa, desde gol naa bgab naa lo zha Roma.

²⁹ Grë zhaguiib ne bzo nguïn Pabl ga parne cueero me, lëälëd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguïn zho ti zha Roma.

Bnee Pabl lo wxtis Israel

³⁰ Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanaïd naa ncuane rdziguiend me.

² Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¿Golcap ro zha qui!

³ Dzigo rëbchaa Pabl lo me:

—¿Tebaa squire cap Dios ro luu! ¿Nac luu gon zig ti lidz nguts loxaque nëz zhitssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rëb zho:

—¿Bien ganle lo pxoz nroob i, lo men ne quiayun xtsiin Dios i noquiabro luu!

—Golgun dispensar —rëb Pabl—. Nan naa lëë pxoz nroob i, tel niaca mine nan naaw ne scad naa; sac zhubnee lo Xtiidz Dios: “Gneenëd luu zha ne rnabey ladz luu.”

⁶ Zeene bien Pabl groï zha wxtis co zianaï zhiwseed zha saducé, zgroï zho zianaï zhiwseed zha farisé, dzigo psilo me nguiedz bnee me rëb me lo zho:

—¿Grëse to bets, golgona ganle, zha farisé nac naa, niiclegaa pxoz naaw farisé goc me! ¿Ni porne riladzpaa naa gon zrieeban zha ne ret, min co gane znu zo naa lo to nu!

⁷ Zeene sca rëb Pabl, psilo zho bdildiidz zho. Goc zho chop dii, ⁸ rree zha saducé rnee nlid grieeban zha ne ret, nlid no anjl, nlid no espíritu; laa zha fariséga na rnee zrieeban miech, no anjl ni no espíritu. ⁹ Nguiedz zëëb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¿ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhiih zho Pabl; bnabeyaque me gocredz menguiib güeyxi zho Pabl biire güeyan zho me len yu ne rbëz zho ga.

¹¹ Gol guieel co, blulo Dios lo Pabl rëb me:

—Gdziebd luu, zigne bnee luu xtiaz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsrāa choo zha Israel bnediizd rēb zho gowd zho, ni tib ro peet guied zho haxta gut zho Pabl; telne gund zho mine rnee zho maase csiaabzi Dios zho. ¹⁴ Dzigo güey zho lo pxoz ne rnabey, lo grē zha ne nac zha non lo menguietz, bzodiizd zho mine no guic zho ga, ni rēb zho:

¹⁵ —Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lēēlēd güey win yu ne rbēz menguiib ga güeynie win diizd lo Pabl. ¹⁷ Dzigo bredz Pabl ti zha ne rnabey lo menguiib co, rēb Pabl lo zho:

—Bzhiguiel güeynie mēēd rii lo men ne rnabey to, sac laa win no tsienie ti diizd lo me.

¹⁸ Bzhen men rnabey co nia mēēd co, güeynie me win lo men nroob ne rnabey zho, rēb me:

—Laa naa zialnie mēēd rii nu me, dien pe nac diizd ne ziaadnie win lo luu; Pabl ne no ladzguiib ga bnaab lo naa guialnie naa win.

¹⁹ Dzigo bzhen men rnabey co nia win, güeynie me win stib nēz, bnaabdiizd me lo win dien pe nac diizd ne zienie win lo me. ²⁰ Dzigo rēbchaa win:

—Laa zha Israel gon bnediizd gnab zho cxeel luu pxey naa Pabl lo zhiwxtis zho gzhe, yquiaalo zho gnē zho noraa pe yquiep zho me. ²¹ Bzhiguiel gliladzd luu xtiizd zho, sac ndziibsrāa choo zha ne nacgrē zho rēb zho laa zho tsiesoblan nēz gutgazh zho me zeene laa me ted. Biaan zho diizd grē zho, gowd zho, ni tib ro peet guied zho haxta gut zho me; haxta rēb zho tel laa zho gund min co maase gdzibdee Dios zho. Ible zun zhow, loxaque quiambēzse zho dien pe guiab luu.

²² Blozhse ga dzigo bzonēz me win, ni pso me diizd lo win choot lo gneed win ne laa win güeynie diizd lo me.

Güey Pabl lo gobernador Wech

²³ Lēēlēd bredz men rnabey co chop zha ne zo lo menguiib, rēb me:

—Laa zhaguiib gon none griee naguieel tsie zho Cesarea, na zeen golzo zha ne tsie; none tsie chop gayoo zha ne sēni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none griee zho nu; ²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziinnie zho lo gobernador, rneew:

“¡Diuzh Gobernador Wech!

’Naa nac Claud Lisias, laa naa rxel guits rii lo luu gzodiizd naa ganle zha nacne bnabey naa ziaadsan zho men qui zaatne zob luu i.

²⁷ ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. ²⁸ Gocladz naa niacnan naa dien zha nacne rlēēnie zho me, dzigo bianie naa me lo zhiwxtis zho. ²⁹ Ga gon naa led ncuaane rnaad rlēēnie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguiib. ³⁰ Zeene gocnan naa laa palal zho bnediizd gut zho me, nacne bnabeyaque naa ziaadsan grē menguiib qui me lo luu i. Niiclegaa zha ne rlēēnie mew, laa naa rep lo zho guiaad zho lo luu i, zeena i gnē zho dien zha nacne rlēēnie zho me.

’Lēēd bii gdzieel ne sca dien.”

³¹ Zeene laa liu pcow, zig rlozh xtseew laa grē menguiib co pcaanie Pabl nēz; dib guieel bio zho nēz bdziinnie zho me guiedz Antípatris. ³² Biini liu, loxaque zha ne zob guay ga pcaa nēz zienie zho me Cesarea, laa grēraa menguiib co wbire bdziñ Jerusalén stib.

³³ Zeene bdziñ zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnaabdiizd me lo Pabl dien pa guiedz gol Pabl. Dzigo rēbchaa Pabl lo me, zha Cilis nac Pabl.

³⁵ —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap menguiib Pabl zaatne nac len xyulow Herod.

24

Gocredz Pabl lo gobernador Wech

¹ Zeene goc gaay ngbidza, laa Ananí men ne rnabey lo pxoz bdzin ga, gza me blalaa zha ne nac zha non lo menguiiedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeene laa Pabl bdzin, psilo licenciad co bzeet me grë ncuaane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquiin lo no noyun luu. ³ Rzac zdoo now, tel pa lotaa zo no rsoladz no luu nac luu men ne rnabey no. ⁴ Nli nonguiel da dziunneed no luu, per been ti guielnzaac pquiaadiag ganle pe nac ncuaane rlisqui no quiayun mgui ne zo lo ne nu.

⁵ 'Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren. ⁶ Zeene bgaa me, lëëtaque laa me no len yadoo ro ne zob Jerusalén quiayunnguzee me xyadoo no. Nacne gocladz no gagazh nguizh me falt co zigne rnabey xley no; ⁷ per biaad Lisias grë xmenguiib me ntseeb rac zho biaadla zho me lo no. ⁸ Na nagon zac luuzhal yquiep me, zeena gan luu ganle nli quiayun me grë mine rnee no nu.

⁹ Grë zha Israel ne zianal ga, pquiabbe zho rëb zho nli quiayun me grë min co.

¹⁰ Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

¹¹ 'Na rac tsiipchop ngbidz ga bdzin naa Jerusalén, biagan naa Dios len yadoo nroob ne zob ga (niicle tel niaca mine griee diidz ganle). ¹² Laa naa bia Jerusalén biagan naa Dios, choot biatilnied naa ga; niicle len grëragaa yadoo wina, ro nëzgaaw, wlaltaa noquiild naa miech cho lo gacntseeb zho. ¹³ Grëse mine rquiaqui grë zha qui naa grielod glu zho nliw, sac led ncuaane gocda.

¹⁴ 'Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa quiayun naa dziin lo Dios men ne bliladz pxozgol no; ni scaquegaa, noxco naa grëse mine nac ley. Rliladz naa grëse mine bnee grë zha ne biadteed xtiidz me. ¹⁵ Rliladz naa zdzin dze ne cueeban Dios grëse miech, zigtaa zha wena zigtagaa zha ntseeba, ni haxta zha ye zho rliladz min co. ¹⁶ Ni min copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

¹⁷ 'Nod naa Jerusalén tibaque, blale iz goc no naa ladz menzit; dze ne bdzin naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios. ¹⁸ Min co nagon nacne no naa len yadoo zeene gon grë zha qui naa. Blozhle ben naa grë mine rnabey xley no rdziun no zeene sca riosan no gon, zeene laa bla zha Israel ne no nëz Asia blanso lo naa ga; per choot miech taf ndxienied naa ga, niicle choot noquiildgaa naa. ¹⁹ Zha co nagon rieguial niaad nu, nlisqui zho tel pe ncuaane rzac zho nonguiel noyun naa ga. ²⁰ Zha ne ndxieggaa nu niina, zac gnë zho telne brieequia falt ne rquiaqui zho naa zeene gocredz naa lo wxtis Jerusalén. ²¹ Te goon falt ga naye ben naa, lëe gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdzin dze ne grieeban miech." Scase nagon naca.

²² Nanle gobernador co led ncuaane gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdzin Lisias, dzigo dien zhapaa guiaan xtil zho.

²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. ²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—jLëëlewga na nadien! Na zeene guioba, dzigo naazhal cuedz luu guiaad luu ziodiidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieë guielgobrador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianñziurraa me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobrador, laa me brieë güey me Jerusalén.

² Grë zha pxoz non ni grë zha ne rnabey lo menguiidz Israel, zeene bin zho laa Fest bdziñ Jerusalén lëëled güey zho lo me güeyxob zho xdemand Pabl; ni ³ bnab zho lo me cxeel me Pabl Jerusalén. Laa zho rnab min co sac laa zho bnediidzle, nëz tsiesoblan zho, yquiambëz zho ted Pabl gut zho Pabl. ⁴⁻⁵ Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nëz co dzigo zac tsienal zho zhits me.

⁶ Ndziisraa ti zhmal blëz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl. ⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzdoñ zho me, per loxaque diidzsew, guieñd zha glu zho ne nlipaa goca. ⁸ Dzigo pquiab Pabl rëb Pabl:

—Grëtaa mine rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

⁹ —jPe racladzdga luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap doñ.

Sca rëb me, sac racladz me dien zha guianñziuu me lo grë zha Israel. ¹⁰ Dzigo rëbchaa Pabl:

—jGad naa! jNod pe nac ga naa ga, to rieguial gun guielwxtis rii! Benque nan wen luu ganle peet falt nzëëbd naa lo zha Israel. ¹¹ Tel niaca mine nli ziyun naa pe guieñtseeb ne raguiñ naa guet naa, maase guet naa. Per na nanpaa naa ni ti ncuane rquiaqui zho naa i nliid, jpe nac dzigo cho co naa ladznia zho gut zho naa? Laa naa racladz, mazd goñneedz diidz tibaque ga naa lo zhiwxtis nroob ne, men ne zob Roma.

¹² Dzigo bzodiidz Fest grë me men rac ne nacie me dziin; blozhse ga rëbchaa me lo Pabl:

—Guiend rson sca. jTel lo César racladz luu tsie luu, na maase tsie luu!

Gocredz Pabl lo Agrip

¹³ Zeene goc bla zhmal, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest. ¹⁴ Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, ¹⁵ laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. ¹⁶ Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nliidgaaw; ¹⁷ nacie

biaad zho nu. Zna dze blanso zho, biinigazh liu co bnabey naa gocredz me. ¹⁸ Tibaque ni naa bod no pe ti falt nroob ne rquiaqui zho me, per zeene biaad zho yulow gon naa ¹⁹ lëë gdib tel zha nac grë ncuaane riladz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

²⁰ Zeene gon naa grë ncuaan co rquiaqui zho me nli riend naa zha gun naa, dzigo rep naa lo me, telne racladzga me zac tsie me Jerusalén ga dien zha guiaan lo xtil zho. ²¹ Per bnëd me, lel bnaab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegash gnabey naa gacredz me.

²³ Biini liu, ti lni nroob ne rac laa Agrip ni Berenis bdzin len yu ne rac guielwxtis ga, grë zha non ne rnabey lo menguiib, grë zha non lo menguedz, nal zho zhits me. Dzigo bnabey Fest gocredz Pabl, zeene laa Pabl bdzin ²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëë men rii nagon rlëenedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. ²⁵ Sangue naa gonle naa rapd me falt, par guiab ne rieguial guet me; per laa me bnaab tsie me lo César, na laa naa no cxel me nëz co.

²⁶ Nli riend naa dien pe nac diidz ne cxel naa lo César, ne squi lega ncuaane nlid rquiaqui zho me. Min co nagon bnabey naa gocredz me lo to nu, ni laga laa luu ziaadga nu rey Agrip, bzhiguel pquiaadiag ganle zha rzë xtiidz me; zeena togo zziel naa pe nac diidz ne cxel naa gal dze ne laa me tsie nëz co. ²⁷ Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nlid grë ncuaane rquiaqui grë menladz naa naa. ³ Rley naa sac nan naa nanpaa luu zha nac grë xcostumbr no, grë ncuaane riladz no. jRnab naa lo luu sca, guieete luu yquiaadiag luu grë mine gne naa!

⁴ Grëse zha Israel nan wen zho ganle zha mban naa, sac mëëdlas naa bdzin naa Jerusalén, ga broob naa. ⁵ Nanpaa zho zha farisé goc naa, ni zha farisé nac zha ne rioxcoraa run grëse mine riladz zha Israel. ⁶ Per mazd gon, laa zho rlëë lo naa porne dib zdoo naa riladz naa laa Dios beenle mine psan me diidz lo grë pxozgol no. ⁷ Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. jMasaque rzac zho dol ga quiayun naa riladz naa laaw gocle! ⁸ Haxta to, zeene rzet naa zrieeban miech, rzhidz to ron tow, jpe rzac to naa grielod Dios gun me min co?

⁹ Glo nli ptsidil naa grë zha ne riladz Jesús men Nazaret, masaque rzaac naa lëëw ga quiayun naa. ¹⁰ Pe zhidaa zha ne blo naa ladzguiib Jerusalén, haxta grë pxoz non bneedz diidz ben naa grë min co; ni zeene rnabey zho ret grë zha co, ye naa rded diidz ret zho. ¹¹ Nzian grë yadoo win bia naa, biasacsi naa zho haxta gneenë zho Jesús. Blëenedox naa zho, haxta grë guiedz zit bia naa biaguib naa zho.

¹² Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za. ¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz. ¹⁴ Grëse no biab liu, dzigo bin naa ti tsi men co rnee me xtiidz no, bredz me naa në me: “Saul, Saul, jpe nacne quianal luu naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guuib lots

ne rtseb zho ma riecaanni ma.”¹⁵ Dzigo rep naa: “Been guieInzaac bnë dien cho luu.” Nëchaa men co: “Naa nac Jesús, men ne squi quiatsidiI luu.¹⁶ ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu.¹⁷ Peet tsienied guic luu, naa yquianaap luu, niicle zhaladz luuw niiclegaa zha zita peet grielod gun zho luu. Sac laa naa cxeI luu grë guiedz zit¹⁸ tsienee luu lo miech gacnan zho mine nacpaa diidzli, zeena greee zho lo ncow gbig zho nëz lo biini, greee zho ladznia mendox ygab zho lo Dios. Dib zdoo zho gliladz zho naa zeena gun Dios zho perdon, ni yгаа zho zaatne gdziIn grëse zha ne mbe zdoo.”

¹⁹ Min co nagon rey Agrip nacne bioxco naa ben naa mine në men co lo naa ga.²⁰ Glose Damasc psilo naa bne naa lo miech, ga brie naa bdziIn naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

²¹ Min co nagon nacne rlëënie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa.²² GocnieIn Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela.²³ TeI zha, bzeetle zho ib sacsi miech men ne cxeel Dios ga, ni me gac men ne glopaa grieeban, me gac zig ti biini ne gziini lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

²⁵ —Coo, gobernador Fest —rëb Pabl—, led rzhind guic naa. Niapse mine nac diidzli min co none naa,²⁶ laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nappaa naa nan me nli mine rnee naa, nacda ncuaane goc ngueets zhliian.²⁷ ¡Led nli lëë rey Agrip rililadz luu mine bzeet grë zha ne biadteed xtiidz Dios padzeela? Nappaa naa rililadz luuw.

²⁸ Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—¡Nend zhilew o nrobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag mine none naa nu niina; zeena yгаа to mine bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brie ga.³¹ Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

³² —Niapaa nsilaa ne me —rnee Agrip lo Fest—, telne nabd me tsieppaa me lo César.

27

PxeeI zho Pabl nëz Roma

¹ BdziIn dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo menGUIIB lë Jul, gza Pabl zlalaa zha ne no ladzguiib ga. Lëë Jul co rnabey lo tib dii menGUIIB ne rnee zho “Augusto César”.

² Ye no zionaI zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdziIn guiedz Sidón. Zeene bdziIn no ga, wen goc Jul lo Pabl bdeed me diidz güey Pabl güeyquiaabdiuzh Pabl grë zha ne runbey Pabl ga, grëse zho rleynie zho me blëzlo zho me.

⁴ Ga brie no bdieed no tib ro guidzliu win ne lë Chipr, psaac guidzliu co palal, sac psilo rrie me rtsire me barcw ne zio no ga.⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdziIn no ti guiedz ne ndxie xtan Licia lë Mira;⁶ ga

bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no gree ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzigora a bdzin no gax guiedz Gnid; ib rbëzdaque me, nacne bguib zho dien pa nëz zhi rcaan me, dzigo güeynie zho barcw co nëz Cret. Tib ro guidzliu win co zio no bdieed no Salmon; ⁸ nen bdzin no zaatne rnee zho Buenos Puertos, gaxle ga riaan ti guiedz lë Lasé. ⁹ Nrooble dze goc no no lo nis, len dze co laa mëe na psilole ni zëeb diidz gacd së barcw len mëe co, nacne bnee Pabl lo grë zha ne zienie no ga, ¹⁰ rëb me lo zho:

—Golgon a ganle, telne laa ne gree nu len dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac mine rëb Pabl ga, lel mazdraa bliladz me xtiidz zha ne rsëe barcw ni men ne nac bizhuana. ¹² Stiba, zaatne nac Buenos Puertos ga rapda zaatne zaacse cuëz miech len mëe na, nacne nzian zho rëb mazd gdzin guiedz Fenice, ga zac gbiaaz no gdiipse len mëe na. Ro guidzliu win co riaan Fenice, nligaa zhi rcaan me ga.

¹³ Zeene laa ti me win ne znu ziaadquia psilo brie lo nis co, zootle na nli grieedraa me. Nacne lëëlëd bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow. ¹⁴ Zhisaque goca zeene laa ti me dox ne rnee zho Nordest psilo brie, laa me co psilo rtsire barcw. ¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuane gacda, mazd psaan zho zienie mew nëz ne racladztaa me.

¹⁶ Scale zienie me barcw ne no no ga, biotieed no gax ro guidzliu win ne lë Clauda, ga në në brieelo blis zho grë canó win ne na zhits barcw ga bzëeba nëz len barcw; ¹⁷ dzigo blibdoo zho barcw co zeena gbilda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezhoo mew nëz ro nis, pa tsiesobnagwa lo yuzh.

¹⁸ Zeene biini sti liu co mazdraa rrie me, ni guixoo ne ziaadnie me, nacne blee zho grë yo ne no len barcw blaal zhow lo nis. ¹⁹ Goc bion ngbidz scataa zo guie dox co, bnabeyaque zho blee no grë ncuane runxtsiin zho len barcw blaal now lo nis.

²⁰ Goc bla ngbidza rbëzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. ²¹ Niicle wagw choot rsoladzdraa, dzigo bnee Pabl lo grë zha ne ziogrë no ga, rëb me:

—Tebaa nion to xtiaz naa nagon nzhiguel to nrieed ne Cret, zeena ndzieelod ne grë ncuane nodzian ne nu, niicle nlaaldgaa ne grë yo co lo nis. ²² Per laa ne znule bzhiac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. ²³ Led nanle to ganle, xnëz Dios no naa ni xtsiin me noyun naa, nieewdze pxeel me ti xanj me ²⁴ në lo naa: “Gdziebd luu gon Pabl, peet gacd luu, sac ib none laa luu gdzin lo rey ne zob Roma. Niicle grë zha ne ziadgrëe luu len barcw i peet gacd zho, sac bin me mine rnab luu.” ²⁵ Gane rne naa lo to peet tsienied guic to, nanle naa csaand Dios ne, ible zac mine në anjl co lo naa. ²⁶ Ib tedsod, no pa ti lo guidzliu win ne no lo nis rii tsiezo me rii ne.

²⁷ Zeene goc tsiida ngbidz sca nëzrii nëzrec zienie me no, laa no no lo Nisdo Adriático. Wdze co, zig grol guieela, bien grë zha ne rsëe barcw ga gaxle ti ro guidzliu ga nonie barcw no; ²⁸ dzigo ptiix zho dien palal guiet nis ga, gon zho loxaque gal yas guieta. Bzë zho spalal biire ptiix zhow stib, gale guieta loxaque tsiiptib yas. ²⁹ Gataa laa zho bdzieb rëb zho nend pa tsiecaan barcw lo quie, dzigo psilëe zho lo doo ne zob gza tap guib cruz nroob ne quia nëz zhits barcw, bron zho gza guib co lo nis, zeena tsowga së barcw; rzac zho tebaa laa liu biinile.

³⁰ Grë zha ne run dziin len barcw, gocladz zho nzhoon zho, psilo zho noxadz zho grë canó win ne ney barcw, rquiaalo zho zig nac zeene guib cruz nroob ne ney barcw nëz quia quialit zho csëeb zho len nis. ³¹ Zeene gon Pabla, rëbchaa me lo Jul ni lo grë xmenguiib Jul:

—¡Laa grë zha rii gon racladz xoon! Csaande to, sac telne laa zho xoon nlidraa griequia to lo nis rii.

³² Dzigo pchug grë menguib co doo ne zob grë canó win co, bron zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rëb Pabl:

—¡None gow to! Golwi ganle nale gac tsiin ngbidz ga ni ti lë peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen Pabl ti guietxtil, squi ndxie zho grë zho bdeed me xquizh lo Dios, dzigo beengrol me guietxtil co laa me psilo wagw. ³⁶ Dzigoraa peet güeyniedraa guic zho, ye zho laa zho psilo dow. ³⁷ Lo grë no zig zio no len barcw co rgaa no chop gayoo tsongaltsiimtib.

³⁸ Blozhse bdioow no, dzigo laa zho blee grë zhobxtil ne zie len barcw ga blaal zhow lo nis, zeena gnitnë barcw spalal. ³⁹ Zeene laa liu blozh biini, gon grë zha ne rsëë barcw ga laa ti lë ro guidzliu rlu gax ga, per riend zho dien paw. Natlaa nac ro guidzliu co, rlu zac gdzin barcwa, nacne rëb zho dien pe grieelod gdzinnie zho barcw ga. ⁴⁰ Dzigo pchug zho doo ne zob guiib cruz nroob ne no len nis ga, biaanse guiib co ga. Psilëë zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëë mew gdzina gax ro guidzliu co.

⁴¹ Per ziese zho, lëetse lo yuzh ne zobli len nis co güeytsiba, loxaque güeysëëbguica ga laa nëz zhitsa psilo nobilaque, sac grëse nis ne rias riecaan choo co. ⁴² Dzigotaa laa grë menguiib co gocladz niut grë zha ne zie ga guey ladzguiib, rëb zho nend znuse xoobnis zho xoon zho. ⁴³ Per bdeete men ne rnabey lo zho diidz, sac racladzd me gut zho Pabl. Mazd bnabey me zha ne rac rzhooobnis, zac ner zho xoobnis zho grieequia zho ro nis co; ⁴⁴ laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

28

Blëz zho Malt

¹ Zeene bdzin no ga, dzigoraa gocndion no lëë guidzliu win ne lë Malt ga. ² Grë miech ne no ga pquiadox zdoo zho no, bzëëg zho gui bredz zho no bdzëë no, sac lala rac nal ni scataque bgaa no guie.

³ Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel ne zizhoon lo zhindzëë gui co, pquiaalay ma nia me, quiataque ma ga. ⁴ Grë miech ne no ga, zeene gon zhow rneehaa zho:

—¡Ise nagon rlu, nzëëb men qui ngutoo! Niicle blaa me lo nisdoo, per no guielwxtis ne quianab guet me.

⁵ Znuse bdzib Pabl nia me bron me meel co lo gui. ⁶ Grëse zho rwi quiambëz zho dien pa hor sigui me, te tibaque tsobe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuaane bdioow no.

⁸ Lëëtaaque len dze co laa pxoz me nix rlan xlëë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac. ⁹ Zeene bin grë miech cow, zha ne rzacnëëtaa riaadnie zho zho lo Pabl, runguiac Pabl zho. ¹⁰ Dzigo rleynie zho no, nroob grë ncuaane bgad zho lo no. Zeene gol dze ne laa no wbii ga, scasaque nroob ncuaane yquiin no nëz bneedz zho.

¹¹ Tson mëë bliaaz no lo guidzliu co, dzigo laa no brieë ga bziaab no ti len xbarcw zha Alejandrí, ti barcw ne blëz ga dipse len mëë nal co. Guic barcw co quia chop mdio, mdio ne rnee zho Cástor ni mdio ne rnee zho Pólux. ¹² Bdzin no guiedz Siracús, ga bliaaz no tson ngbidz. ¹³ Siracús brieë no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdzin no guiedz Puteoli, ¹⁴ ga bdzin no lo blalaa zha ne rliladz Jesús. Bnab zho lo no gbiaaz no, nacne bliaaaze no lo zho ga ti zhmal. Garaa brieë no bdzin no Roma.

¹⁵ Grë zha ne rliladzle Jesús Roma, zeene bin zho laa no gdzin ga, brieë zho bиаad-xinëz zho no. Zhis zho biaddzieel no zaatne lë Foro de Apio, szhis zho bиаad zaatne lë

Tres Tabernas. Zeene gon Pabl scataa biaad-xinöz zho no, rley me rdeed me xquizh lo Dios.

Bdzin Pabl Roma

¹⁶ Zeene bdzin no lad guiedz Roma, bdeed zho diidz Pablzhal bguib ti yu ne blöz me grop me menüiib ne quianap me, blood zho me ladzguiib.

¹⁷ Goc tson ngbidz bdzin no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditsd naa. ¹⁸ Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

¹⁹ 'Per zeene gon naa näd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. ²⁰ Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle men ne quiamböz menladz ne ga.

²¹ Dzigo pquiab zho rëb zho lo Pabl:

—jWaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyuu pe guielntseeb. ²² Per na laga laa luu ziaad nu, siguiel luu sodiidz luu lo no dien zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rböz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosa. Dipse dze sca bzodiidznie me zho grë min co.

²⁴ Brieequia bla zha ne bliladz grë mine bnee me ga, ni scaquegaa brieequia zha ne bliladzda. ²⁵ Grë zha ne riold zdoon mine rnee me ga, laa zho psilo noriee, nacne rëb me:

—Ib lëepaa mine nac to i ga nagon bzeet Espiritu Sant, zeene psiaab me guic profet Isá znu rëb Isá ²⁶ lo grë xmengol to:

Niicle peraa gon to, niicle peraa gan to,

per peet guiende to;

²⁷ sac gocntseeb zdoon to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcdgaa to gbig to lo naa zeena csilaa naa to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zeene gon zho sca rëb Pabl mazdraa blëe zho, nodiidiidzlsa zho laa zho zey.]

³⁰ Dipse len chop iz blöz Pabl ga, ga bree me ti len yu ne bio me. Ga rdzin grë miech ne zienee lo me, ³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

GUILTS NE PXEEL PABL LO ZHA ROMA

¡Diuzh to grëse to!

¹ Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

² Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne bиаad padzeela biadteed xtiidz me lo miech, lëew ga raquiet lo guits ne zhobnee Xtiidz me. ³ Lëew ga rnee ganle cho nac Jesús (men ne brieequia lo xtii rey David ne laa me goc miech lo guidzliu; ⁴ sangue Espiritu Sant, pxobnen me ganle Xpëed Dios nac me; min co gane brieegan me).

⁵ Zeene bиаad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. ⁶ Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

⁷ Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoze ne, ni Jesús men ne rnabey, tibaque noxco me to, me nac men ne gacnien to zeena peet zhgab ctsebde to.

⁸⁻⁹ Nanle to nasca ganle xtsiin Dios quiayun naa, dib zdo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacnien me to; ¹⁰ ni tibaque rnab naa telne zneedz me diidz gdzin tib dze ne grieelo guial naa i guialgan naa to. ¹¹ Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espiritu Sant; zeena tiblque gac guic to dziitsraa so to. ¹² Ni scagaa tipse gac ne ziodiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

¹³ Bets, bzian, tel gan to ganle blactaa vult ziyacldz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. ¹⁴ Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienda. ¹⁵ Mincoxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

Poder ne rap Xtiidz Ndzon Dios

¹⁶ Tel naa, ib rtoladz naa gne naa Diidz Ndzon rii lo miech, sac ncuuan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdziina, laa niina laaw quiadz in lo grëraa miech, zeena grëse zho gbig sëeb xnëz Dios. ¹⁷ Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire rianwen zho lo me: totsaque nli dib zdo zho gliladz zho mine nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdo zho rliladz zho mine nac Xtiidz me.”

Xtol miech

¹⁸ Ndionle ne ganle no guielne ro ne csiaab Dios ygaa grëse miech ntseeb, miech ne nëd gac-wen, ni desde gbaa cxeel me guielne ne ygaa zho; sac por xquielntseeb zho rsaand zho gacnan grëraa miech mine nac diidzli.

¹⁹ Grë zha ntseeb, nanle zho zha nac Dios, sac mezhäl blu lo miech zha grieelo gunbey zho me. ²⁰ Niicle ne grieelod ganlo ne Dios, per de lo grëtaa ncuaane bzaa me, grëtaa ncuaane run me, gase rlu ganle cho nac me. ¡Gase rlu ne nli me nac Dios, ni gdzind dze ne lozh xpoder me!

Gacxe waa grë zha ntseeb, ib tedlaad zho lo guielnë ne csiaab me ga; ²¹ sac gon niicle nappaa zho me nac Dios, ni ib rond zho xtiidz me. Nöd zho gunbey zho me zigne rieguiälä, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lëew ga, gun zho ncuaane guiaabtaa guic zho. ²² Niicle ne rzac zho zharien zharac nac zho, per zha nac miech ne quialoozhräa lo xquieln xen; ²³ sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grë mdio ne niaa zigne rlu samiech guidzliu zho, grë mdio ne niaa zigne rlu grë ma ne rsiibe, grë ma ne rzë tap ni, grë ma ne rzëlen lo liu; lel grë ncuaan co ziegan zho laa ne gleynie zho men ne nacpaa Dios.

²⁴ Mincocxe nagon waa, rsaanladz Dios zho laa zho zienäl grë ncuaane ndzinlid ne rzoobladztaa zho. Grë ncuaane ntoladzdox ne run zho, lëëque zha runnguzee zho rguitnie zho xcuerp zho. ²⁵ Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grë ncuaane bzaale Dios, ncuaane psanle me, ncuaan co ziegan zho, lo grë ncuaan co ziequiitsgzhib zho; laa ne yquiitsgzhib zho, gleynie zho men ne nac Dios mban, men ndzon ne psan grëtaa ncuaane no. ¡Diosse rieguiäl gunnon miech, men co rieguiäl tibaque goolnie zho! Sca rieguiälä.

²⁶ Ne sca nagon nac zho, gane psaan Dios zho laa zho run grë guilyozh, ncuaane ngubeeguielto ne rieguiäl draa gun miech. Grë wnaa laa ne gdeed zho diidz gnee tsieel zho lo zho, lel lëëque sawnaa zho rquiangob zho, laa zho zienäl grëraa guilyozh; ²⁷ grëgaa mgui, laa ne gnee zho lo wnaa ne nac tsieel zho zigne biaan no gaca, lel lëëque sabgui zho rzoobladz zho. Ncuaane mbixladz run zho, rquiangob zho lëëque sabgui zho; ni ne sca run zho grë ncuaan co, lëë mine rdziniaa zho nac grë guielguidz yozh ne riaan lad zho; ndzinlidraa rac zho.

²⁸ Scataale nac zho, ni bii rzoliaadz zho gbig zho lo Dios, gane niicle megaa rlozh rsaanladz me zho, laa zho biaan lo grë zhgab yozh ne no guic zho, no zdoo zho, min co ne scataa nac zho. ²⁹ Nroobdoo nac xtol zho, sac:

rsacsixuu zho samiech zho,
 rzoobladz zho ncuaane quianied zho,
 racntseeb zho lo samiech zho,
 në rac zdoo zho ran zho stib noded samiech zho,
 rut zho samiech zho,
 rtsidil zho samiech zho,
 rquidie zho samiech zho,
 rquiadiidzguizh zho samiech zho,
 miech yozh nac zho,
³⁰ rneenë zho samiech zho,
 rquiabro zho lo samiech zho,
 racniats zho lo samiech zho,
 rlu zho ncuaane rapd zho, ncuaane nacd zho;
 rlëënie zho Dios,
 rio zho rbeebey zho grë guielntseeb,
 rond zho xtiidz pxoz zho,
 rond zho xtiidz xniaa zho,
³¹ racladz zho gon zho diidz,
 rund zho mine rnee zho,
 rleynied zho samiech zho,
 rund zho samiech zho perdon,
 rquiad zdoo zho samiech zho.

³² Niicle ne nanpaa zho zha rnabey Dios none gban miech, niicle ne nanpaa zho grëse zha ne run guielntseeb, ib tedsod znitlo zho; ni laa zho bii quiayuna, ni haxta rley zho ran zho cho grëraa zha ne run grë mine run zho.

2

Xquielwxtis Dios

¹ Ib tedsod no to gnë: “¡Zha ntseebtaa miech ne sca run!” ¡Per gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co yгаа zho guielnë ne csiaab Dios, ye zho rieguial min co. ² Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

³ Zha ne sca rlozhd gzee zdoo pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa. ⁴ None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoo zho gban zho zigne rnabey me. ⁵ Telne tibaque squi ndip gac zdoo zho, gond zho mine rnabey me; gacnan zho ganle, quiayunloraa zho grë guielnëdox ne yгаа zho gal dze ne laa me gun guielwxtis. Ni xquielwxtissi me, zigne rieguial gaca sca gun mew.

⁶ Gal dze co, laa me gdeed mine rieguial yгаа tib tib miech tel zha wban zho. ⁷ Grëse zha ne güeynal beennon zho lë me, pxobnen zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdzind dze lozh. ⁸ Sangue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csiaab me.

⁹ Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielnëdox; ¹⁰ sangue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

¹¹⁻¹⁵ Grëse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoo zho, guic zho, nanpaa zho pa min nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbepaa xley Dios, zunquizhaque me zho grë xtol zho; sac niicle ne runbepaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

¹⁶ Zdziñ tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngueets zhliaan been zho; sac sca rnabey Dios gaca, ni min co noseed naa miech.

Zha Israel ni xley Moisés

¹⁷ To ne nac to zha Israel, rzac to zienalpaa to xley Moisés, niats rac to, rzac to tose non lo Dios. ¹⁸ Nanwen to zha racladz Dios gban to, nanpaa to pa min wen sac pseed to xley me. ¹⁹ Min co masaque rzac to to cseed zha ne no lo ncow, grë zha ngoopdol. ²⁰ Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne ndziibraa nixbiini, tose nan mine nacpaa diidzli.

²¹ Nana, tel scataa rien to zha cseed to stib miech, ¡pe nac dzigo rwide to mine run to? Conque to name rnee lo miech cuand zho, ni rlozh ga toque quiaban. ²² Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to grë mdio, ni rio to rieban to yadoo ne zob grë mdio co.

²³ Rlozhd gacniats to rzac to quiayunnon to lë Dios ne nan to ley, ni nande to gon, lel quiaguitnie to lë me ga, sac mbande to zigne nac ley. ²⁴ Mine noyunpaa to i ga gon raquiet lo Xtiidz Dios, zaatne rnee: “Por xtol to, grë zha zit laa zho rneenë Dios.”

²⁵ Tel to, rzac to porne nacse to zha Israel non to lo Dios, per ne squi mbande to zigne nac xley me, nacaque to zigne nac grë zha zit ne runbeyda. ²⁶ Nana, zha zit ne rioxco rban zigne nac xley me, ¿niacxe rieguiald dzigo guiannziuu zho lo Dios? Sannziuu me zho gon. ²⁷ Golgacnan sca ganle, glole zha zit co gon guiannziuu lo Dios, lëdle to ne nappaa to zha racladz Dios gban to, nappaa to mine psan Dios diidz yгаа to, ni rbande to zigne rnabey me.

²⁸ Golgacnan sca ganle, led porne nacdse to zhin zha Israel, porne bio to xbey zho, laa to nziuu lo Dios. ²⁹ Led scada gon, sinque zha ne nli dib zdoo rioxco mine rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoo, dib guic, rban zigne racladz me. Grëse zha ne znu nac, nziuu zho lo Dios, niicle telne rzac to peet nond zho.

3

¹ Nana, ¿pa lugar nadien ne riaannon zha Israel lo grëraa zha stib guiedz? ¿Pa rquiin ne scataa rio zho bey? Zootle lëë lalaquew tel niaca mine niacd zho zha Israel. ² Per led scada, no pe nacne non zho. Sac gon, ible lo zho psan Dios xtiidz me mazd padzeela.

³ Nli ndal zho rond xtiidz me, per led mincod ctsëë me xtiidz me, mine bneele me lo zho. ⁴ Niicxe tel zharaa quiayuntal miech xtol zho, sangue Dios ctsëëd me xtiidz me. Zigne zhobneeque lo Xtiidz me, zaatne rnee: “Mine rnee Dios, diidzli naca; niicle zha ne gacladz, guiend pe ncuane glisqui zho lo me.”

⁵ Sca nac Dios, gacxe waa rnee me grëse zha ne runctal xtol, rieguial yгаа zho guielnë ne cxeel me. Ga nagon, rlu ne mine nac diidzli, min co run me. Nana, ¿pe ziab ne nonguield mine run me ga? ⁶ Mine nonguiel ga gon run me, sac tel gdziguien me grë zha ne runctal xtol, ¿zha nac zhe guielwxtis ne dzigo gun me?

⁷ Nana, nogaa zho gnë, ¿per pe nacne glisqui Dios dol ne rdziun ne, ni tel por lëëw rlu ne diidzli nac mine run me? ⁸ Per telne sca naca, rrieequia dzigo ib none guncal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne rieguial zho.

Grëse miech, ngoopdol nac zho

⁹ Nana, ¿pe zdieets ne dzigo ne nac ne zha Israel, nziuuraa ne lo grëraa miech stib guiedz? ¡Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa zha stib guiedza. ¹⁰ Zigne zhobneeque lo Xtiidz Dios, zaatne rnee: ¡Guiend miech ne zienalpaa mine racladz Dios!

¡Ni tib zho guiend!

¹¹ Guiend zha ne niini guic;

guiend zha ne tsoxco yguib xnëz Dios.

¹² Grëse zho laa zho zie nëz ne nitlo zho;

niapse guieltseeb zienal zho.

¡Guiend zha ne zienal mine racladz Dios!

¡Ni tib zho guiend!

¹³ Ro zhow,

masaque been cuent naca zig nac len grë baa ne noyodz ngutoo;

niapse diidz ne rquidie zho zhoob lo ludz zho.

Grë diidz ne rnee zho,

masaque naca zig nac xvenen grë meel dox;

¹⁴ niapse grë diidz dox, niapse grë diidznë rrieeche ro zho.

¹⁵ Ni zhow,

masaque zombëzlew dien pa tsiegut zho samiech zho;

¹⁶ loxaque guielnë, loxaque guielzi rсан zho zaatne rded zho.

¹⁷ Ib nand zho ne zaacse gbannie zho samiech zho;

¹⁸ per ni Dios rdziebdraa zho.

¹⁹ Gacxe waa nroob nac guielnëdoh ne yгаа grë zha ne runbey ley ni mband zho zigne naca, lel run zho grëtaa guielntseeb zig nac grë mine goquiet nu. Ni niicle grëraa miech ne runbeyd ley, scaque ngoopdol nac zho, ni ro zho guieñd pe guiab zho lo Dios. ²⁰ Golgan sca ganle, grieelod guiaanmbe ne lo Dios, niicle paraa yquia ne gun ne mine rnee ley; sinque par guien ne ganle ne ngoopdol nac ne, gane biaan ley.

Silaa Dios miech zeene gnalo zho me

²¹ Sangue niina, tib ladle biaan ley, laa Dios bneedz stib mod ne guiaanwen ne lo me. Ni lo grëque guits ne ziaad ley, lo grë guits ne pquiaa zha ne biadteed Xtiidz Dios padzeela, ga raquieta. ²² Grëse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

²³ Zigne rne naa ga, grëse ne miech ngoopdol nac ne lo Dios, ni palal rdzieeld gdzin ne lo xquieñdzon me. ²⁴ Per niina laa me blu ganle pa lotaa noxco me ne, gola zdoo me pxeel me Jesús bdiizh grëse xtol ne, laa ne biaanwen lo me. ²⁵ Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiiee xchen bdiizha xcuent ne, lëe men co nac Jesús; gane niina grëse zha ne gnalo men co, zun me zho perdon grëtaa dol ne pxcw me been zho. ²⁶ Ni tib dol rapd me, ni scaque grë zha ne dib zdoo gnalo Jesús, sanmbe me zho lo xtol zho.

²⁷ Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund new, sinque por grëtaa mine bded Jesús. ²⁸ Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho mine rnabey ley.

²⁹ Nana, ¿pe zha Israelse sca ycaania me? ¡Lëda gon! Grëse miech, sca ycaania me zho. ³⁰ Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol ne, totsaque dib zdoo ne gnalo ne Jesús.

³¹ Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoo ne rliladz ne Jesús, rienraa ne pa rquiina.

4

Dib zdoo Abraham bnalo me Dios

¹ Zig nac pxozgoldoo ne Abraham, ¿pe been me ne laa Dios pcaania me? ² ¿Pe por guielwen ne been mew? ¡Lëda! Telne scaw, nrieelo niacniats me (niicle ne nëz lo Dios ni palal rieguiald niacniats me). ³ Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtol.

⁴ Zig nac tib zha ne run dziin, dimi ne razh zho ible rieguial zhow, rate zhow ga. ⁵ Sangue Dios zdoo me ral rcaania me miech, zha ne dib zdoo rnalo me, nacda por pe guielwen ne gun zho par guiab ne laa zho rieguiala. ⁶ Ye rey David bzeet guielbley ro ne rgaa zha ne sca rcaania Dios, ⁷ rëb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtol zho, glisquidraa mew.

⁸ ¡Wen zie zho sac gunquizhdraa me zho grë xtol zho!

⁹ Nana, ¿pe loxaque grë zha ne nose bey zrieelo yгаа guielbley co, te ye grë zha ne nod ye? Nacda por bey, laa ne blozh bzeet ganle niapse ne dib zdoo Abraham bnalo me Dios, min co ne pcaania Dios me zig tib zha ne peet xtol; ¹⁰ sac gon gard pe bey ne tso me zeene pcaania Dios me. ¹¹ Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoo me bnalo me Dios. Mincoxe waa, Abraham nac dad lo grëse zha ne nod bey, ni dib zdoo zho rnalo zho Dios; ni scagaa

Dios, rcaania me zho zig tib zha ne peet xtold. ¹² Ni meque nac dad lo grë zha ne no bey ni dib zdo zho rnalo zho Dios, zigne bnalo me Dios zeene gard tso me bey co.

Zha goc mine bnee Dios lo Abraham

¹³ Psanle Dios diidz lo Abraham ne me guiaannie guidzliu, grë me zha ne grieequiaraa lo xtii me; guiabd ne togo porne been me mine nac xley zha Israela, sinque ne dib zdo me bnalo me Dios. ¹⁴ Nana, tel niaca zha ne gunse mine nac ley, zha cose yгаа min co, rrieequia dzigo zhlëse ga bnalo Abraham Dios, niicle diidz ne psan Dios lo me ga, nondaquew. ¹⁵ Sac nac ley gon, zha ne gunda zigne naca, laa Dios csiaabzi zho; laa zaatne guiendgaa ley, gacd guiab zho cho noguiitsa.

¹⁶ Ne scacxe waa nac ley, gane niina lëese mine no gun ne nac dib zdo ne gnalo ne Dios par yгаа ne mine psanle me diidz ga. Grëse ne yгаа min co, per nacdraaw dien cho zienal ley, cho zienaldgaaw, sac mine nonraa, dib zdo ne gnalo ne Dios zigne bnalo Abraham me. Mincoxe waa, rrieequia Abraham nac pxoz ne grëse ne, ¹⁷ zigne rëb Dios lo Abraham: “Laa naa bzo luu, luu gac dad lo nzian dii miech.” jLëe Dios co nagon bliladz Abraham, me rbeeban grë mengut, ni niicle haxta grë ncuaane guiend, saa mew!

¹⁸ Ndaldox rëb Dios gac lo xtii Abraham, ni bliladz Abraham mine rëb Dios ga. Niicle ne zootle led ncuaane gacda, per me dib zdo me bliladz me ne zaca, ni scagaa bdziñ dze ne laaw goc. ¹⁹ Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mëed. ²⁰ Ib goc chopd guic me niab me bod nlid niac mine bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, ²¹ sac nanpaa me men nroob nac Dios zun me mine psan me diidz ga. ²² Ne sca nagon dib zdo me rnalo me Dios, gane pcaania Dios me zig tib zha ne peet xtold.

²³ Zhobnee lo Xtiidz Dios sca pcaania me Abraham, ni laaw zhobnee zeena gacndion ne ²⁴ ye ne scaania me ne zig tib zha ne peet xtold, totsaque dib zdo ne gnalo ne Jesús, men ndzon ne rnabey ne; ²⁵ men ne gut ga bdiizh me xtol ne, men ne brieeban ga, par glu me nli psanmbe me ne nëz lo Dios.

5

Jesús rsanmbe miech lo dol

¹ Nasi laa ne nacle zig zha ne peet xtold, laa ne biaanwenle lo Dios porne dib zdo ne rnalo ne Jesús, men ndzon ne rnabey ne. ² Sac por grëtaa mine bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

³ Ni scaquegaa nagon none gley ne zeene pe guielnë ne nodzian ne; sac ndion ne ganle, ga cseed ne lëb ne dziits so ne lo mine riladz ne. ⁴ Ni zeene sca dziits so ne, zliladzraa ne dib zdo ne; ni zeene dib zdo ne riladz ne, zacnanpaa ne ib zgaa ne mine riladz ne.

⁵ Ni ndionpaa ne zgaa new, sac blu Dios rleyne me ne, pxeel me Espíritu Sant nacie ne.

⁶ Lëëtaaque zeene rdzieldraa miech zha gun zho par guiaanmbe zho lo dol, hor co laa Dios pxeel Jesús, baaad me gut me bdiizh me xtol ne nac ne miech ngoopdol.

⁷ Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha. ⁸ Sangué Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëed me Jesús, men co bleeladz xquielmban gut me xcuent ne.

⁹⁻¹⁰ Gotsaa gwi ne ganle, zha nactaa guielnë ne bded Jesús psanmbe me ne lo xtol ne, psanwen me ne lo Dios; ni scaque nagon, ible me csilaa ne lo grëtaa guielnëdox ne csiaab Dios yгаа grë miech ntseeb. Ne nligaa, csaand me dzian ne guielnë co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëenie ne Dios, jpe lel na dzigo ne laa ne biaanwenle lo Dios, laa ne biaanle zig tib zha ne peet xtold? ¹¹ Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

Zha nacne biaan dol

¹² Znu gon nacne laa dol biaan: por mine been Adán bind me xtiidz Dios, min co nac ne biana. Ni por lëew pquiaqui laa guielgut bianaque, blozh ga grëse miech laa zho ret, sac grëse zho, tsod zha ne gunctald xtol. ¹³ Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guiendpaa tib ley hor co nlu ne doła. ¹⁴ Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

¹⁵ Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne bиаad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëe men co nac Jesús. ¹⁶ Tibaque nac dol co been Adán, per grëse miech biabzi; sangue Jesús zeene laa me bиаad, grëse ne ne nac ne miech psilaa me ne lo grëtaa xtol ne, psanwen me ne lo Dios. ¹⁷ Dol ne beense Adán ga, min co pquiaqui grëse ne ne nac ne miech, laa ne biaan ladznia guielgut; sangue niina ne bиаad Jesús, zrieelo yгаа ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. ¹⁸ Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús bиаad, pquia zdoo me ne masaque me bdiizh grëse caxtigw ne rioguał ne ga, laa me psanwen ne lo Dios parne grieelo yгаа ne tib guielmban ndzon. ¹⁹ Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

²⁰ Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech. ²¹ Masaque bnabey dol miech, pxeela zho nëz ne nitlo zho; sangue zeene laa Jesús bиаad, psanwen me ne lo Dios, gane niina zha ne gnalotaa Jesús zгаа zho tib guielmban ndzon.

6

Zha ne mbanniele Jesús

¹ Laa ne bdzianle ganle zha noxcotaa Dios ne. Nana, ¿pe zdieets ne dziuunctalraa ne xtol ne zeena tsoxcotaa me ne? ² ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

³ Golgan ganle, zeene laa ne bziaab xnëz Jesús ni brobnis ne, rrieequia gut ne ga zigne gut me. ⁴ Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

⁵ Ni zigne sca rrieequia gut ne zeene gut Jesús, scaquegaa ndionpaa ne zbeeban me ne zigne brieegan me. ⁶ Ndion ne ganle, miech ne goc ne glo zeene scataa bional ne guielntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; ⁷ sac gon, deque bnitlo grë mine goc ne glo, grieelodraa gnabey dol ne.

⁸ Nana, telne scale gutnie ne Jesús, ndionpaa ne ib zbannie ne me.

⁹ Ndion ne ganle brieegan Jesús, ni gdzindraa dze guet me. Griee lodraa pe gun guielgut me.

¹⁰ Tibaque vult gut me bdiizh me xtol grëse miech, sangue niina mban me ni Dios mbannie me. ¹¹ Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

¹² Nana sca, gdeetraa to diidz gnabey dol xcuerp ben to i, tso to gun to grë ncuane ndzinlid ne racladz xcuerp to. ¹³ Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina; ¹⁴ zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to bиаad silaa me to.

Nli nquialadz Dios ne, rnabeydraa ley ne. ¹⁵ Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaane gunctal xtol ne? ¿Lëda ga gon! ¹⁶ Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. ¹⁷ Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. ¹⁸ Ni zeene laa to brieeladzia dol, laa to bgab lo Dios; zeena mine rnabeyle me mincole gun to. ¹⁹ Znu bzet naa grë min rii lo to, zeena guien to zha naca.

Nana sca, zigne scataa bio to ladzia dol been to grëtaa guielyozh, grëtaa guielntseeb, scagaa niina golšan to ladzia Dios, golban zigne rnabey me, zeena lozh guiaanmbe to zigne racladz me. ²⁰ Zeene scataa ngadoo to lo dol, ib wbande to zigne rnabey me.

²¹ ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuaane been to hor co. ²² Sangue niina, ne laa to brieeladzia dol laa to ngab lo Dios, ible ziaanmbe to zigne racladz me ni zгаа to tib guielmban ne gdzind dze lozh.

²³ Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

7

¹ Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

² Zig nac tib mgui ne rtsieelnia, rnabey ley ne mguise gbannie wnaa ne nac tsiel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. ³ Nli nonguielda ga gun wnaa ctsieelnia zho stib mgui laga bii zomban tsiel zho; laa zeene gutle tsiel zho, led dol draaw yguib zho stib zha ne ctsieelnia zho.

⁴ Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëegaaw grielod gnabeya to. Jesús, men ne brieeladzia ga, mele nac tsiel cub to niina. Niinasi, zrieelole gban to zigne racladz Dios; ⁵ sac glo (zeene scataa bdziunctal ne xtol ne, bdziun ne grëtaa ncuaane nonguieldraa niicle ne ndionpaa ne pe nac mine zhobnee lo ley no dziuun ne), niapse grë ncuaane nxeel ne zaatne nitlo ne, ncuaan co bdziun ne. ⁶ Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

Rca dol gac mine rnabey ley

⁷ Nana, ¿pe dzieets ne dzigo por leypaa rdziunctal ne xtol ne? ¿Coo, led scada! Tel naa gon, ib niacnand naa pe nac dol telne guien ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.” ⁸ Zeene gocnan naa zha nac ley, dzigoraan bien naa niapse dol nac mine noyun naa; sac zeene guien ley, rlud pe nac dol.

⁹ Glo zeene riend naa zhapaan nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa. ¹⁰ Nli laa ley biaan zeena guien ne zha grielo ygaa ne guielmban, per lel bluw ne raguial naa nitlo naa sac ngoopdol nac naa. ¹¹ Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëeque ley blu ne ib raguial naa nitlo naa. ¹² Niicle ne scaw, per Dios psana ni rqiin grë mine zhobnee low.

¹³ Nana dzieets ne: conque telne wen nac ley, ¿zha nac dzigo ne lëepaaw rlu ne rioguial ne guet ne? ¿Coo, led scada! Sinque znu naca: dol pteedquie ne ladzia guielgut. Ga rlu ganle zha nactaa dol, sac gon lëeque ley pqiin dol pteedquiew ne lo guielgut. Ga blu ley ganle zha ntseebtaa nac dol. ¹⁴ Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

¹⁵ Tel naa, rien naa pe nacne znu rac naa, niicle ne racladzpa naa gun naa ncuuane nonguiel per neda, lel ncuuane rzoobladd naa min co run naa. ¹⁶ Gre ncuuane run naa, now rienpaa naa nonguielda; haxta guic naa, zdoo naa, rien naa wen ley sinque naa quiaguits mine rnabeya. ¹⁷ Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuuane ndzinlid. ¹⁸ Rien naa miech ngoopdol nac naa, ni palal ncuuane ndzinli gacd gun naa; niicle ne racladz naa gac-wen naa, per rrieeleoda. ¹⁹ Zeene racladz naa gun naa ncuuane rquiin, per rrieeleod gun naaw; laa zeene ni naa gundraa naa ncuuane ndzinlid, lel mincole run naa. ²⁰ Ni ne znu lel gre ncuuane racladd naa, min co run naa, gase rlu ne led naadse quiayun gre ncuuane co; sinque dol quianabey xcuerp naa run naaw. ²¹ Rien naa niicle ne racladzpa naa gun naa ncuuane wen, per lel guielntseeb run naa. ²² Zdoo naa, guic naa, rleynie naa Xley Dios, racladz naa gban naa zigne rnabey me; ²³ per dzigo rtse dol lo naa, rrieeleod gun naa ncuuane nonguiel. Masaque dol rnabey xcuerp naa, racladzda gun naa ncuuane rnabey Dios; sac ngadoo xcuerp naa lo dol.

²⁴ jProbsaxe naa, znutaa nac xcuerp ngoopdol naa nu! ¿Cho samiech ne dien grieelo csilaa naa low; sac ncuuane gnitlo naa min co mazdraa rdziladza?

²⁵ jXquizh Dios pxeel me Jesús biaadsilaa me ne lo dol!

jJesús nac men ne psilaa naa!

(Znu nagon rzac naa: rien naa nonguiel gun naa mine nac Xley Dios, per xcuerp naa lel laaw zienal mine rnabey dol.)

8

None gban miech zigne racladz Espiritu Sant

¹ Laa ne gocndion nasca ganle, zha ne ngab lo Jesús ndziibdoldraa zho, ² sac zha ne ngab xnéz me, laa Espiritu Sant psilaale zho lo dol, laa me psilaale zho ladznia guielgut, laa me bdeedle tib guielmban cub lo zho.

³ Wlaltaa ib brieelod ley nsilaaw ne lo dol, gane mazd laa Dios pxeel Xpëed me biaadsilaa ne. Brieelod ley, sac grese miech laa ne tsienal zho mine rnabey ley, mazdraa zienal zho ncuuane runctal xtol zho. Gane zeene pxeel Dios Xpëed me, goc me miech (lëeraasi ni tib dol beend me), men co gut bdiizh grese xtol ne, dzigo ga laa me psilaa ne ladznia dol.

⁴ Gacxe waa, niinasi zrieelo dziuun ne gre mine rnabey ley, per none gdeed ne diidz guional ne mine rnabey Espiritu Sant, ni lalnu gdeete ne diidz gac mine racladz xcuerp ne nu.

⁵ Grese zha ne mban zigne racladz xcuerp ngoopdol zho, loxaque gre min co rioxco zho; laa zha ne mban zigne racladz Espiritu Sant, mine rnabey Espiritu Sant rioxco zho.

⁶ Zha ne sca rioxco loxaque mine racladz xcuerp ngoopdol zho, néz ne nitlo zho ga zie zho; sangue zha ne rioxco mine racladz Espiritu Sant, laa zho zie néz ne yгаа zho tib guielmban; peet dzeb, peet zhgab ctsebdraa zho. ⁷ Ni stiba, zha ne rioxco loxaque mine racladz xcuerp ngoopdol zho, rlëenie zho Dios ga, sac néd zho gban zho zigne rnabey xley me; ni niicle gacladzгаа zho, grieeleod zho. ⁸ Mincocxe waa, ib rzacd zdoo Dios gre ncuuane run zho.

⁹ Sangue to, mbandraa to zigne racladz xcuerp to, sinque laa to mban zigne racladz Espiritu Sant. Sca mban to, sac Espiritu Sant nacie to. Nanle to ganle zha ne nacie Espiritu Sant, nli xnéz Jesús no zho. ¹⁰ Ni to ne nac to zha ne nole xnéz Jesús, ible zгаа to tib guielmban ndzon, sac laa Dios psilaale to lo dol. Nli zig nac xcuerp to, ncuuane nitlo naca, sac por dol biaan sca no gaca; sangue zhiespírituw, nitloda. ¹¹ Dios bleeban Jesús, ni scagaa telne nli nacie to zhiEspiritu me, meque cueeban to.

¹² Bets, bzian, nodne dziuun ne ncuuane racladz xcuerp ngoopdol ne, zig nac zeene pe nzëeb ne low. ¹³ Sac telne gre ncuuane co tsienal to, ible znitlo to; sangue telne gnab to gacnie Espiritu Sant to csaan tow, dzigo ible zгаа to tib guielmban. ¹⁴ Sac grese zha ne zienal zigne racladz zhiEspiritu Dios, ga rlu ne nlipaa xpëed Dios nac zho.

¹⁵ Golguien ganle, laa Dios bneedz zhiEspíritu me lo to, sac xpëedle me nac to niina. Tsode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: “¡Papá yeen!” ¹⁶ Ni Espiritu coque runquien ne ne nli xpëed me nac ne.

¹⁷ Nana ne laa ne nacle xpëed Dios, scagaa dzigo ye ne ible zгаа ne grëtaa ncuane bdeed me lo Jesús.

Nli zгаа ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

*Guie*ndzon ne naraa guiaad

¹⁸ Guielnë ne dzian ne lo guidzliu rii, loxaque ne ngab ne lo Jesús, led ncuane rnad ga; mazdraa nroobdoo nac lo guielndzon ne naraa dzian ne. ¹⁹ Zig nac grëtaa ncuane bzaa Dios, masaque quiambëznëw gdziñ dze zeene laa grë zha ne nac xpëed Dios yгаа lo guielndzon co; ²⁰⁻²¹ sac gon, gal dze co laa guidzliu guiaanmbe lo grëtaa ncuana paat rquiind, lo grëtaa guielntseeb ne no low niina. Dios bdeed diidz biaan grë ncuana co low, per zeene gal dze co, zeene laa grë zha ne nac xpëed Dios laa lo grëtaa guielntseeb, yew laaw laa.

²² Laga quiambëz grë ncuana co gdziñ dze co, masaque mban raca, rzaca zig rzac tib men wnaa ne quiayal xpëed. ²³ Ni ndion ne ganle, haxta ne, ne nac ne zha ne nacie Espiritu Sant (zeena glu ne ible zгаа ne grëtaa ncuane gneedz me), mban rac ne quiambiaaz ne gdziñ dze co, zeene laa Dios ctsëë xcuerp rii ne ni ycaania me ne zig xpëedpaa me.

²⁴ Ndion ne ible zbee Dios ne lo grëtaa ncuane rac lo guidzliu rii, per nana laa ne quiambiaaz dzianpaa ne gaca. Tib ncuane lëë ranle ne noyac, nod pe nacie yquiambëzraa new, ²⁵ per zeene quiambëz ne tib ncuane naraa gac, dzigo nodne guieed ne, sinque ine tiblifique gac ne yquiambëz new.

²⁶ Ni scagaa zeene lëbdraa ne, riendraa ne zha gun ne, Espiritu Sant nac men ne gacnien ne. Zig nac zeene gzodiidznie ne Dios, tel nesew nand ne zhapaa nonguiel gnee ne lo Dios, dzigo Espiritu Sant runcnee ne grë diidz ne riend ne zha nac. ²⁷ Ni Dios ne nac me men ne nanpaa pe rza zdoo miech, rien me pe rnee Espiritu Sant, sac mine racladz Dios gac min co rnab me.

Tsod ncuane yquiaaqui csaanladz Jesús ne

²⁸ Ndion ne ganle, zha ne nli dib zdoo rleynie Dios, zha ne rioxco gac grë mine racladz me, grëse ncuane rded zho, led lega rdete zhow, sinque no zaatne rquiina lo zho. ²⁹ Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac men nroob. ³⁰ Ni grë zha co, laa me quiabedz zho, quiasilaa me zho lo dol, laa zho noyaanwen lo me; zeena yгаа zho lo guielndzon ne no me.

³¹ ¡Zha nactaa ncuane lëë run Dios! Nana, tel scataa racnie Dios ne, ¿cho nadien grieelo lega pe gun ne? ³² Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

³³ Ible Dios bzooblo ne, gacxe waa, ¡choot rieguiald glisqui gnë lëda nodziun ne! Sac gon, Dioszhal psanmbe ne lo dol. ³⁴ ¡Choot rieguiald ycaadz dol ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguial me nac me men non. Ga no me quianab me lo Dios por ne. ³⁵ ¡Tibaque rleynie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guiendgaa pe gow ne, guiend pe gacwxab ne, o noxtseebгаа ne guet ne, ib guiabd ne togo psaanladz me ne. ¡Tibaque rleynie me ne! ³⁶ Ni zig nac xcuent guielgut, laaw raquetaque lo Xtiidz Dios, zaatne rnee:

Grëse no ne nac no zha ne ngab lo luu,
tibaque noxtseeb no lo guielgut;

masaque rzac miech no zig rzac zho grë mëcwxiiil ne golle guet.

³⁷ Niicxe peraa waa dieed ne, zdziuun ne gan low ni palal csañwinda ne, sac Jesús nacie ne; ni rleyniedox Jesús ne.

³⁸ Nanween naa tsod ncuaane yquiaaqui csaanladz Dios ne:

per ni guielgut,

per ni guielmban,

per ni anjl,

per ni mendox,

per ni grë ncuaane noyac niina, grëgaa ncuaane naraa gaca.

³⁹ Niicle grë ncuaane no glaa zhan gbaaw,

niicle grë ncuaane no guietraa zhan guidzliuw,

niicle grëragaa ncuaane bzaa Diosa.

¡Ni tiba ycada, sac tibaque rleynie Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

9

Ible Dios bzooblo zha Israel

¹⁻³ Bets, bzian, jblactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

⁴ Blactaa quiayacnien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleynie zho me. Nzian grë ncuaane bnee me gdeed me lo zho.

⁵ Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaane no, ni me riegual gacnon gzataa dze. Ible sca rieguala.

⁶ Nana, no zho guiab gocdaque grë mine bnee Dios ga yгаа zha Israel. Per led scada. Sinque lëë min co rgaa zha ne nlipaa rnalo Dios, sac zha co nac zha ne nlipaa nac zha Israel. ⁷ Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëëd pquianie Abraham, per rëb Dios loxaque Isaac gac cuent zig xpëëd Abraham. ⁸ Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblolé me zigne bzooblo me Isaac, zha co ngab lo me. ⁹ Sac zig nac Isaac, ible Dios bnee lo Abraham grop Sar, ne laa Isaac gac mëëd lo zho.

¹⁰⁻¹¹ Ni scasaque xpëëd Isaac. Bdziñ dze, zeene laa Isaac ptsieelnia wnaa ne lë Rebec, dzigo gop Rebec tibnëz mëëdbgui. ¹² Bii zoney Rebec grop mëdyeen co, laa Dios bzooblolé win ne brieelë Jacob rëb me, ne ible Jacob gac zha non lo Esaú, win ne glo gal. ¹³⁻¹⁵ Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëëd co, per ni gard gacnan win zha nac guielntseeb, zha nacgaa guielwen, laa me bzooblolé tib win. Ga nagon, blu Dios ne mese nac men ne riegual rzooblo tel cho zha ne ygab lo me, nacda por pe ncuaane noyun zho.

Nana, ¿pe zdzieets ne guielntseeb ga sca run Dios? ¡Led guielntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” ¹⁶ Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. ¹⁷ Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

¹⁸ Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho. ¹⁹ Nana, no zho gnë: “Telne scaw,

¿pe nac dzigo rlisqui Dios mine run miech, tel mezhall r nabey zha nac zho tib tib zho?"
²⁰ Per nana, ¿cho nac ne par glisqui ne mine run Dios? Zig nac tib guies beñ, niacxe zlisquiw lo meñ ne bzaaw, guiaba: "¿Pe nacne znu bzaa luu naa?" ²¹ Led zha ne run dziin co, zrieelo gzaa zho tib guies zigne gacladztaa zho; tib lë beñ ne xen zho, zac gzaa zhow tib guies niow, o gzaagaa zhow tib guies beelze.

²² Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdziñ dze co. ²³⁻²⁴ Grëgaa zha ne bzooblo me yгаа lo guielndzon ne no me, zigtaa new ne nac ne zha Israel, zigtagaa zha tib guiedza; ible rap me derech bzooblo me ne, sac rquia zdoo me ne. ²⁵ Golsoladz ganle zha bzeet Osé, meñ ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleyne me zho niicle ne rleyne me zho glo. ²⁶ Laa stib lugar bzeet Osé, zha bnee Dios lo zho, rëb me: "Ngabde to lo naa, per zdziñ dze ne laa to gac xpëed naa, ne nac naa Dios nguiamban."

²⁷ Laa Isá stib meñ ne biadteed xtiidz Dios padzeela, zeene bzeet me zha Israel rëb me: "Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; ²⁸ sac ziaadyoble gun Dios xquielwxtis me lo guidzliu, zigne bneele me." ²⁹ Min co ga bzeet Isá mazd glo, rëb me: "Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr."

Zha ne nacd zha Israel laa zho wbig lo Dios

³⁰ Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wlalaa ib bioxcod zho dien zha nsilaa me zho lo dol. ³¹ Laa zha Israel, niicle ne rioxco zho run zho grë mine nabey ley parne csilaa me zho, per ib laad zho lo dol sca. ³² Laad zho, sac zienied guic zho gnalo zho Dios, rzac zho por grë ncuaane gunse zho laa zho laa lo dol. Min cocxe waa, zeene laa Jesús biaad, bzhaac zho me zig tib quie ne rriel ni ne riab ne liu. ³³ Lëe min co ga zhobnee lo Xtiidz Dios, zaatne rnee:

Sxel naa tib meñ lo zha Israel,
 me gac zig tib quie ne griel ni zho;
 sangue zha ne dib zdoo gnalo me,
 tsod dze ne tso zho guielnë, guiab zho pe nacne bnalo zho me.

10

¹ Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

² Parga nli ran naa noxco zho gbig zho lo me; per rund zho mine no gun zho. ³ Ib rienñ zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. ⁴ Sac gon, laa Dios racladz Jesús gnalo zho zeena guiaanmbe zho lo grëse xtol zho; sac Jesússe nac meñ ne brieelo been grëse mine nabey ley.

⁵ Bzeet Moisés rëb me, zha ne gnalo ley ne lëew csilaa zho, none gun zho grëse mine nabeya; ⁶ sangue zha ne gnalo Jesús ne me csilaa zho, nacda dien peraa gun zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rrieequia racladz zho quiet me ga stib); ⁷ o guiaabgaa zho tsie zho zaatne noliu grë ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieebanle). ⁸ Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Min co nac mine noseed no miech, rnee no lo zho: ⁹ Zha ne cueero guiab zho Jesús nac meñ ne nabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol zho. ¹⁰ Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine rliladz ne, dzigo scaania me ne. ¹¹ Rnee lo Xtiidz me: "Zha ne dib zdoo gliladz Jesús, quitnied me zho."

¹² Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaane rap me, zdeed mew lo zha ne gnaba lo me. ¹³ Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

¹⁴⁻¹⁵ Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¿Zha wentaa ziaad zha ne ziaadnie Xtiidz Ndzon Dios!”

¹⁶ Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, mine rne naa.” ¹⁷ Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

¹⁸ Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiayacnan Xtiidz me. ¹⁹ No hor rne naa: ¿Pe ib riennd zha Israel, telne gbigd zho lo me csilaa me zho, laa me csilaa miech stib guiedz? ¿Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet riennd; zeena tednë zdoo zha Israel, togo ziaa zho biini. ²⁰ Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

²¹ Laa zha Israel, blactaa bzëeb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

11

Zha Israel ne wbig lo Dios

¹ Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; ² dzigo led psaanladz Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios ³ grëtaa ncuaane noyun zha Israel, ptsil zho zaatne riegand grë miech me, beet zho grë zha ne pxeel me noteed xtiidz me, ni laa zho quianalacque gut zho Lí. Rzac Lí guiendraa zha ne ron xtiidz me, ⁴ dzigo hor co rëb me lo Lí: “Led tibd luu riaan, no zgadz mil zha ne gard yquitsgzhil lo Baal, naa bzooblo zho ygab zho lo naa.”

⁵ Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. ⁶ Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

⁷ Znu nagon naca: Zha Israel ne bzooblome me, zha cose guiaanwen lo me. Laa los demas zho, lel lozh gacndip zdoo zho, ⁸ zigne zhobneeque lo Xtiidz me, zaatne rnee: “Beenndip Dios zdoo zho, riennd zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo nadze.” ⁹ Mincoque bzeet rey David, zeene rëb me:

Lëëque grë zhilni zho, lëëque grë ncuaane row zho, gac zig len doo ne, len guiex ne tsietsobe zho;

zeena ygaa zho guielnë ne riegual zho.

¹⁰ Guiaan zho zig tib zha ne rold lo,

guiaan zho zig tib zha ne blozh blengw zhits.

Psilaa Dios zha ne nacd zha Israel

¹¹ Grë zha Israel ne sca gocndip zdoo, guiabde to togo laa zho bnitlome ga. ¿Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdoo zho gan zho laa me rcaania zha stib guiedz. ¹² Nana, telne scataa guielnzaac ne bgaa miech stib guiedz ne znu racndip zdoo zha Israel, ¿pe lelgue dzigo zeene laa zho gbiire guiaanwen lo Dios stib? ¿Zha naczhe grëraa guielnzaac ne ygaa miech!

¹³ To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdoo naa rioxco naa run naaw, ¹⁴ zeena togo soobladz palal zha ladz naa ye zho squi gbig lo Dios csilaa me zho lo xtol zho. ¹⁵ ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guielbley nrooba zeene laa me ycaania zha Israel stib! Sac gon, rrieequia grieegan zho ga.

¹⁶ Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa. ¹⁷ Bdzin dze brug palal zhicwa, dzigo ga bguiid zhicw yag oliv dan; lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co. ¹⁸ Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

¹⁹ Nana, nend guiab to: “Per rioguiäl now, gacxe waa no biaan xlugar zhicwa, mine brug ga.”

²⁰ ¡Golgap cuidad gon! Nli lëe biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to. ²¹ Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

²² Golwi ganle zha wentaa Dios, per scagaa rdziladz me gats xtiidz me. Mincocxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

²³ Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! ²⁴ Niicxe to na, nac to zig yag oliv dan, pquia zdoo me to pquid me to zhicw yag oliv wen co, ¡pelel zha Israel dzigo yquiad zdoo me, gbiire yquid me zho lo yag ne nacpaa zho!

Scaania Dios zha Israel ne bzoit lo me ga

²⁵ Bets, bzian, laa naa gni lo to ganle zha nac mine no guic Dios gon me. Niicle ne rien miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa grë miech stib guiedz blozh wbig lo me, ²⁶ hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Siön, ga griee men ne cuee zha Israel lo xquielntseeb zho.

²⁷ Dzigo laa Dios csilaa zho lo grëtaa xtol zho, zigne psanle me diidz lo zho.

²⁸ Len dze rii rlëe zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho. ²⁹ Me bzooblo zho, dzigo ible scaania me zho; sac gon, led yed me ctsëe xtiidz. ³⁰⁻³¹ Glo to nac zha ne ib bind xtiidz Dios, laa niinagaa na zha Israel nëd gon xtiidz me. Per zigne rquia zdoo me to niina, scaquegaa dzin dze ne yquia zdoo me zho. ³² Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

³³ ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¡Cho grieelo guien pe nac mine no guic me gon me, pe nacgaa gon mew? ³⁴ Zigne zhobneeque lo Xtiidz me, zaatne rnee: “¡Choot nand pe no guic Dios gon me! ¡Choot grieelod guiab lo me, znu znu been! ³⁵ Wlaltaa choot gard pe gdeed lo Dios, par guiab ne laa Dios zëeb.” ³⁶ ¡Peet gon nzëëbd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiälä.

12

Golban zigne rdziladz Dios

¹ Bets, bzian, laa to gocnanle ganle pa lotaa nquialadz Dios to. Nana sca, dib nacse to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

² Ib tsienaldraa to grë ncuaañe ndzinlid ne noyac lo guidzliu rii, grëse zhgab ne paat rquiind, golcueuew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

³ Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaañe ni nacde to, sinque golguien cho nac to, zha rnalo to Dios. ⁴⁻⁵ Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

⁶ Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

⁷ zha ne pso me gun ncuaañe yquiin lo grëraa miech, none gun zhow.

Zha ne pso me cseed miech, none min co gun zho;

⁸ zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

⁹ Dib zdoo to golleynie samiech to. Gandzede to grë ncuaañe ntseeb, niapse ncuaañe rquiin goltsienal. ¹⁰ Ine niowse golleynie grë zha ne nacgrë to, gacnguizhde to, quitniede to zho.

¹¹ Nguieel golgac, gacmbechde to, dib zdoo to goltsoxco golgun mine nac xtsiin Dios.

¹² Nley golgac lo guielmban rii, golsoladz ganle zha nactaa grë ncuaañe no gneedz Dios lo to; golxecw lo grë guielnë ne gan to; tibaque golzodiidznie Dios.

¹³ Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

¹⁴ Grë zha ne rtsidil to, laa ne gdzibdee to zho, golnab gunlay Dios zho.

¹⁵ Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

¹⁶ Gacniatsde to. Grë zha ne rzac miech peet nond, goltseelsa zho; guiabde to to nac zha ne racraa. Niowse golbannie zha ne nacgrë to.

¹⁷ Zha ne csacsi to, gunde to ne yeque to csacsi zho. Goltsoxco wen golgac lo grëse miech. ¹⁸ Tilniede to samiech to, goltsoxco tibaque wen golbannie zho. ¹⁹ Golguien, zha ne csacsi to, ib guiabde to ne tozhal ctsire guielnë co, sinque golsana ladznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëeb zho. ²⁰ Gacxe waa, zha ne rlëe lo luu, zeene gan luu mban rac zho rcaabedz zho, mazd bdeed ncuaañe gow zho; gangaa luu mban rac zho rnab zhis zho, bdeed ncuaañe guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho." ²¹ Golguien sca, niapse guielwen golttsienal, zeena sca ycuëz to lo guielntseeb. Gdeete to diidz ne ye to gun guielntseeb.

13

Golgon mine rnabey wxtis

¹ Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. ² Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëeque zha rguib ted zho caxtigw ga. ³ Golgan

ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. ⁴ Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. ⁵ Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nēz lo Diosa ine tiblise no guic to.

⁶ Scaque dimi ne no gdeed to lo zho, goldeeda; sac rquiin dimi co parne grieelo gun zho tel pe nac dziin ne no gun zho. ⁷ Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

Golleynie samiech to

⁸ Grē ncuaane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grēle mine zhobnee lo Xley Dios ga quiayun zho. ⁹ Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga to grē ncuaane quianie zho.

Gacxe waa, zha ne rleynie samiech zigne rleynie zho zho, grēle mine zhobnee lo Xley Dios ga quiayun zho. ¹⁰ Zha ne rleynie samiech, rsacsidraa zho zho; ni min co rnabey Dios. Gacxe waa, grēse ne none gleynie ne samiech ne.

¹¹ Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lēdle zeene psilo rnalo ne me. ¹² Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne. ¹³ None ndzinli gban ne:

dziuund ne guielgonziu,

dziuund ne grē lni yozh,

yquiangobd ne zha ne led tsieeld ne,

dziuund ne grē guielyozh ne racladz xcuerp ne,

dilnied ne samiech,

glēnied ne zho zeene stib noded zho.

¹⁴ Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grē ncuaane ndzinlid ne racladz xcuerp ne.

14

Gzeed zdoo to mine run zha ne nacgrē to

¹ Golcaania zha ne gard tsoguicpaa zha nac Xtiidz Dios. Telne no palal mine rliladz to zhaa rzac zho, glisquide tow lo zho. ² Gzoob ne, no to rzac peet nacda gow to grē lose guielwagw, laa zha ne na gard tsoguicpaa Xtiidz Dios, rzacgaa wena telne scuaan guizhyese gow zho; ³ ga nagon, ni stib ni stib nod pe nacne glisqui dien cho pe row, dien cho pe rowdga; sac gon grēse to, Dios bzooblo to ngab to lo me. ⁴ Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lēew o lēdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

⁵ Scaque, no zho zienal dien pa dzepaa none gleynie zho Dios, nogaa zho rnee zac tel pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. ⁶ Tel pa dzetaa wena, totsaque run zhow par gunnon zho me. Scaquegaa

guie|wagw, wena zha ne gow grëlosew; niicle zha ne ncueegaa ncuaane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

⁷⁻⁸ Sca nagon naca, per led min cod dzieets ne dziuun ne mine gacladztaa ne. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, ladznia me no ne. ⁹ Sac gon, tel Jesús gut me ni brieegan me; gacxe waa, me rnabey ne grëse ne, zigtaa zha mbana zigtagaa zha guta.

¹⁰ Jesús rnabey ne tib tib ne. Gacxe waa, nonguielda glisqui to lo zha ne rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guie|wxtis, grëse ne laa ne none gacredz lo me. ¹¹ Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:
grëse miech, ible squitsgzhib zho lo naa,
cueero zho ne nli naa nac Dios.

¹² Sca nagon gaca, tib tib ne ib laa ne no cueero lo me tel zha wban ne.

Csande to zdoo zha ne nacgrë to

¹³ Nana sca, zha ne sca rund grë mine run to, ible glisquidraa tow lo zho. Golguien, gunde to ncuaane rgobey to yquiaaqui gunctal zho xtol zho, o csaangaa zho Xtiidz Dios.

¹⁴ Tel naa, nanpaa naa led dolda gow ne grë lose guie|wagw; sac niicle Jesús scaque nac xtiidz me. Sangue zha ne rzac dola, mazd gowd zhow; sac tel laa zho gowa, xtol zho ga gunctal zho. ¹⁵ Zig rne naa ga led dolda, per telne xtsiinpa row to tib ncuaane rquiaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuaane yquiaaqui sozit zho lo Dios! Sac gon, blactaa guie|në ne bded Jesús psilaa me zho.

¹⁶ Ib gunde to grë ncuaane yquiaaqui gneenë miech to, niicle ne nanpaa to led dolda. ¹⁷ Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda. ¹⁸ Sca rdziladz Jesús, ni zha ne sca gban, zleynie Dios zho, niiclegaa grë miecha zleynie zho zho.

¹⁹ Goltsoxco sca, gunde to ncuaane codil to grë zha ne nacgrë to; zeena tipse gac to lozh tsoquic to zha racladz Dios gban to. ²⁰ Ib gunde to, ne por tib guie|wagw codil to grë zha ne ngable lo Dios. Zig rnele naa ga, grëlose guie|wagw mbew, peet nacda gow new; sinque mine nonguielda, nagne gow ne mine nanpaa ne yquiaaqui csan ne zdoo stib zho. ²¹ Mincoxe waa, mazd gowde to pe scuaan bëël, guiede to nziu, telne min co yquiaaqui gunctal to xtol zho; ni tel pe grëraa ncuaane nan to tsod zdoo zho, gunde tow.

²² Niicle ncuaane nanpaa to dolda gun tow, niiclegaa nëz lo Diosa led dolda; per mazd gunde tow zeene zo zha ne rzac dola. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

²³ Sangue zha ne racchop guic riend zho dien pe zow zho tib guie|wagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuaane rzactaa zho wend ni gun zhow, xtol zho ga gunctal zho.

15

Golgacnie zha ne nacgrë to

¹⁻² Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuaane tso zdoo zho, ncuaane yquiin lo zho, zeena lozh guien zho zha gnalo zho Dios; led tsode to gun to ncuaane yquiinse lo to.

³ Golgan ganle, niicle Jesús a bguibd me niac ncuaane nquiin lo me. Zigne raquietaque lo Xtiidz Dios, zaatne rnee: “Grëtaa diidznë ne rnee zha ne rlëë lo Dios, grësew pcon zho me.”

⁴ Grëse mine raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne ygaa ne grë mine bzeetle Dios. ⁵ Dios men ne rneedz guie|bley co, men ne racniën ne

guieete ne, me gacnien to niowse gbannie to gre zha ne nacgre to. Golleynie zho zigne rleynie Jesus to, ⁶ zeena grese ne tipse gac ne dzioolnie ne Dios, Pxoz Jesus, men ndzon ne rnabey ne.

Grese miech noyon Xtiidz Ndzon Jesus

⁷ Golguien sca, grese zha ne nacgre to, golcaania zho zigne pcaania Jesus to. Sca golgun, zeena xoobnenraa le Dios.

⁸ Golsoladz ganle, zeene biaad Jesus nroob ncuaane been me lo zha Israel, me biaadgun gretaa mine bzeetle Dios padzeela. Ga blu Jesus grese mine rnee Dios, ib run mew. ⁹ Ni golsoladz ganle, ye gre miech stib guiedz biaadsilaa me, gane niina grese zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,

ni zlu naa lo gre zha stib guiedz ne men non nac luu.

¹⁰ Stib lugar rnee:

To ne nac to miech stib guiedz,

jine nley golgac gre to zha Israel!

¹¹ Ni no stib zaatne rnee:

Grese to ne nac to miech stib guiedz,

¡golleynie Dios! ¡Golsannziuu le me!

¹² Mincoque ga bzeet Isa, zeene znu pquiaa me:

Zrieequia tib men lo xtii Isa;

men co gnabey lo grese miech stib guiedz,

ni me gnalo zho grese zho.

¹³ Mincocxe waa, to ne nac to miech stib guiedz, rnab naa lo Dios (men ne psanle diidz pe nac gre ncuaane ygaa ne ga) gneedz me guielbley lo to, gacnie me to peet zhgab ctsebd to niina ne laa to riladzle me. Rnab naa lo me, gacnien Espíritu Sant to ine gley to yquiambez to gac gre mine psanle me diidz ga.

¹⁴ Bets, bzian, nanle naa zha wen nac to, nacde to zha ne csan zdoo stib zho; rienle to zha racladz Dios gban to, rienle to zha cso to diidz lo gre zha ne nacgre to; ¹⁵ per lo guits rii gon nzian ncuaane rso naa diidz lo to. Guiabde to togo ndox naa lo to, sinque laaw ben naa zeena guiaanladzde tow. ¹⁶ Ne nquialadz Dios naa, laa me bzooblo naa noyun naa xtsiin Jesus, none naa Xtiidz Ndzon me lo gre miech stib guiedz, zeena csanmbe Espíritu Sant zho; lozh ga gded naa zho lo Dios zig tib gon ne gley me ycaania me.

¹⁷ Gacxe waa, tel niina rley naa sac noyacnien Jesus naa noyun naa dziin ne pso Dios naa. ¹⁸ Me noyacnien naa none naa Xtiidz me lo gre zha stib guiedz, zeena gban zho zigne racladz me. Ni laa zho nobig lo me, sac ran zho grese mine rne naa mban naaw zigne naca, ¹⁹ ni ran zho zha racnien Espíritu Sant naa run naa gre milagr, gre ncuaane rzee zdoo zho. Sca nagon none naa Xtiidz Jesus lo zho, brie naa Jerusalen brieequia naa haxta nez xtan zha Ilir. Guiabde to togo rtix naa diidz. ²⁰ Ni laa naa noxco za naa zaatne wlaataa gard gon zho cho nac Jesus, zeena gaseebd naa zaatne ziyele zha ne gueynee Xtiidz me.

²¹ Laa naa zanal zigne zhobnee lo Xtiidz Dios, zaatne rnee: “Gre zha ne wlaataa gard gon cho nac me, zeene gan zho gretaa ncuaane run me, laa zho gunbey me.”

Racladz Pabl tsie Pabl Roma

²² Nzian vuelt gocladz naa nialgan naa to, per ib bdeetew diidz, sac laa naa bia gre dan co biaseed naa miech. ²³ Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa. ²⁴ Laa naa no ga Span, dzigo lee nezle ga teed naa Roma i guialgan naa to. Tib guielbleya lo naa guialquiabdiuuzh naa to, dzigo lozh ga siguiel to gun to xyudar naa grieelo ga naa nez Span.

²⁵ Laa niina, laa naa no ga Jerusalen gasan naa tib gon lo gre zha bets, zha bzian ne no ga; ²⁶ sac gre zha bets, zha bzian, ne no nez Macedon, ni nez Acay, laa zho bnediidz beenlo zho palal dimi cxeel zho yquiuin gre zha prob ne no nez co. ²⁷ Niapse zdoo zho gol ptop zho gon co, sac rzac zdoo zho gretaa mine been zha Jerusalen lo zho; sac gon, zha

co güeynee Xtiidz Ndzon Jesús lo zho. Laa niina, laa zho rxeel palal ncuane rgaa lo zho yquiiin zha Jerusalén.

²⁸ Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga. ²⁹ Rien naa nroob guielnzaac ne gneedz Dios lo to zeene laa naa guial.

³⁰ Bets, bzian, golguien ganle Jesús rnabey ne grë ne; ni rleynie ne zha ne nacgrë ne, sac Espíritu Sant nacnie ne. Gane niina, laa naa rnab lo to, golgotsaa gnab ne lo Dios gacnieu me naa; ³¹ golnab lo me, csilaa me naa ladznia grë zha Israel ne gard guien cho nac Jesús. Golinab lo me, ine gley grë zha bets ne, zha bzian ne, ycaania zho gon ne gasan naa lo zho nu; ³² zeena ine nley no zdoo naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca. ³³ Ni me ne nac me men ne rbee miech lo grëse zhgab, lo grëse guielxtseeb, me gacnieu to. Sca gaca.

16

Bdiuzh

¹ Bets, bzian, len dze rii laa Feb, tib wnaa ne run xtsiin Dios guiedz Cencre, laa me guiaad nëz lo to i. ² Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguel goldeed grë ncuane yquiiin me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

³ Ni rnab naa lo to, golsiguel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tseel me Priscil. Blactaa ziyacnie zho naa zidziuuu no xtsiin Jesús, ⁴ haxta bdedlaa zho niet zho psilaa zho naa lo guielgut. Rzadcox zdoo naa mine been zho ga, niicle grëragaa zha zit ne nacgrë new, rzac zdoo zhow.

⁵ Ni scagaa, grë zha ne rcaalsa lidz zho riegoolnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëe me nac zha Asia ne glopaa bzëeb xnëz Jesús.

⁶ Goldeed zhibdiuzh naa lo Marí, blactaa noyuu me xtsiin Jesús lo to.

⁷ Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguuib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

⁸ Goldeed zhibdiuzh naa lo Ampliat, lëe stib zha ne rdzieel xtidz naa ga; ⁹ lo Urban, rsoladz naa me, tipse bdziuuu no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; ¹⁰ lo Apel, ye me blactaa ncuane bded me blu me ganle ne nli dib zdoo me rnalo me Jesús; lo grë zha ne no lidz Ristob ne.

¹¹ Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne riladzle Jesús; ¹² lo Trifen, lo Trifós, ni lo Pérsida, gza men wnaa rii blactaa noyuu zho xtsiin Jesús.

¹³ Goldeed zhibdiuzh naa lo Ruf, zëeb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëe stib xnia naa ga, blactaa pteedlo me naa. ¹⁴ Goldeed zhibdiuzh naa lo Asínic, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

¹⁵ Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

¹⁶ Grëse to bets, grëse to bzian, golcaania zhibdiuzh naa. Grëse zha ne riladz Jesús nëz rii, laa zho rxeel bdiuzh lo to.

¹⁷ Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

¹⁸ Grë zha co, led xtsiindraa Jesús ga run zho, sinque laa zho noxco ncuane gdeed guxt xcuerp zho. Diidz nex, diidz ndooladz rnee zho; grë miech ne beelze pe riladz, znuse rquidie zho zho. ¹⁹ Sangue to, zëeb diidz ne ib rsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuane yquiin gun to, ni lalnu tsoode to lo guielntseeb. ²⁰ Scagaa Dios men ne rtiche grëse zhgab, grëse dzeb, merle quixdze me Satanás, zeena peet grieelodraa gun ma. Jesús, men ndzon ne rnabey ne, me gacniē to.

²¹ Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

²² (Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús. ²³ Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne rliladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. ²⁴ Jesús men ne rnabey ne, me gacniē to grëse to. Sca gaca.)

²⁵ Laa naa rsan to ladzna Dios, me gacniē to lozh sodziits to lo Xtiidz me, mine none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen. ²⁶ Laa niina, nzian zaatne nogaaz Xtiidz me, zeena grëse zho guien Jesús none gnalo zho, ni mine rnabey me min co no gun zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca. ²⁷ ¡Mese nac Dios, mese nac men ne nlipaa rien! ¡Tibaque sca golgotsaa dzuunnon ne me, grëse ne ne nac ne zha ne ngab lo Jesús! Sca rieguiala.

Pabl

GUILTS NE GLO PXEEL PABL LO ZHA CORINT

¡Diuzh to grëse to! ¹ Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

² Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

³ Dios men ne nac Pxoaz ne, ni Jesús men ne rnabey ne, me gacnien to, me glu lo to ganle pa lotaa noxco me to; zeena peet tsienied guic to.

⁴ Gzataa zeene rzodiidznie naa Dios, rded naa xquizh lo me por grëtaa ncuaane zineedz me lo to, niina ne laa to riladz Jesús. ⁵ Sac gon porne riladz to Jesús, blactaa ziyunlay me lo xquielmban to, noyacnien me to quiayoguicraa to zha nac zhiwseed me, rien to zha gnee tow lo miech. ⁶ Rlu zienal to mine nac Xtiidz Jesús, zigne binse tow, ⁷ gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziñ dze ne guiaad Jesús men ne rnabey ne. ⁸ Ni Dios nac men ne gacnien to tiblque gac to lo Xtiidz Jesús, zeena ni tib falt rapde to gal dze co. ⁹ Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

¹⁰ Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. ¹¹ Sac gon në tib zhalidz Cloé lo naa nodilla to i; ¹² no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. ¹³ Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

¹⁴ ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! ¹⁵ Zeena tsod pe nacne guiab to xnëz naa ngab to, sac naa pchoobnis to. ¹⁶ Ah, ni naaque gon pchoobnis grë menlidz Stef. Bod lëese zha ne pchoobnis naa ga, ¹⁷ sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

Diosse nac men ne rien

¹⁸ Min co nagon noxco naa, maase niicle no grë zha ne rzac ncuaane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. ¹⁹ Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,

niicle rzac zho mazdraa zhooba guic zho,

ni lalnu yquiinda.

²⁰ Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nace grë guielrac ne no lo guidzliu rii. ²¹ ¡Diosse nac men ne rien! Bien me grielod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

²² Zig nac grë zha Israel, grë zha Gres ncuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalga gaca

zigne nac zhiwseed zho, sac laa zho zienal guielrac ne no lo guidzliu rii. ²³ Gacxe waa zeene rnee no lo zho Jesús men ne pquia lo cruz, men cose csilaa miech, rlëë zha Israel ron zhow; laa zha Gres, rzhidznie. ²⁴ Sangué ne, ne nac ne zha ne bredzle Dios bzëëb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. ²⁵ Mine rzac miech paat rquiind ga been Dios, ni nand zho ndziibguicraa nac min co lo grë xquielrac zho; zha ne rzacgaa cholze cho men nsis ga sca gut lo cruz, ni nand zho lëë men co mazdraa ndip lo grëse miech guidzliu.

²⁶ Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho. ²⁷ Per ib laa Dios nobedz grë zha ne rzac miech peet riend, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. ²⁸ Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. ²⁹ Ga rlu me ganle ni tib choot grielod gacniats lo me. ³⁰ Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. ³¹ Gacxe waa choot grielod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuane run me.”

2

Xtiidz Jesús bnee Pabl

¹ Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to. ² Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. ³ Lega gzhe gzhe rac naa, haxta rzhidz naa, rdzieeb naa no naa lo to. ⁴ Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios. ⁵ Sca bne naa lo to, sac laa naa racladz zha ne gbig sëëb xnëz Dios, me gnalo zho, gnalod zho grë mine nac xquielrac miech.

⁶ Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleyne grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuane tibrded naca. ⁷ Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdziin zho lo guielndzon ne no me; gocnand miecha padzeela, per nolew zeene bzaa me guidzliu. ⁸ Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz. ⁹ Zigne zhobneeque lo Xtiidz Dios, zaatne rnee:

Ncuane waltaa gard guien miech,

nac grë mine quianiele Dios gdeed me lo grë zha ne nlipaa gbig lo me gleyne zho me.

Ncuane choot gard gana, ncuane choot gard gona.

¹⁰ Sangué no laa no ndionlew, sac pxeel me zhiEspiritu me blu lo no zha naca, men nan grëse mine no guic me.

¹¹ Zig nasse tib miech, grielod gacnanpaa ne dien pe nac mine no guic zho, pe nacgaa mine rza zdoo zho, loxaque zhiespirituse zho nana; scaque Dios, loxaque zhiEspiritu me nan grëse mine no guic me gun me. ¹² Ni tel no, Espiritu co nacie no (nacie no espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuane nole guic Dios gneedz me lo ne. ¹³ Zeene rzeet no grë guielnzaac co, laa no rneew zigne rneedz zhiEspiritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

¹⁴ Grë zha ne nacnied zhiEspíritu Dios, cholze miech nac zho, grieelod tsoguic zho zha nac grë miñe rlu Espíritu co lo no. Rzac zho ncuaane paat rquiind naca, sac grieelod guien zhow ne zhase. ¹⁵ Sangue zha ne rioguicle zha racladz Espíritu co, rien zho pe nac miñe rlu me.

¹⁶ Ni nligaa zha guien zhow, zigne zhobneeque lo Xtiidz Dios, zaatne rnee: “Choot grieelod gacnan pe nac miñe no guic Dios gun me, choot grieelod glu lo me pe nac miñe no gun me.” Per no, ndion now, sac grë ncuaane nan Jesús, bneedz me diidz lo no ye no gocndiona.

3

Gnalod zho samiech zho

¹ Bets, bzian, ne nligaa gard grielo gne naa lo to zigne rne naa lo grë zha ne rioguicle zha nac miñe racladz zhiEspíritu Dios, sinque tibaque laa naa rne lo to zigne rne naa lo grëraa miech guidzliu, sac rrieequia bii mëdyeen nac to lo zhiwseed Jesús. ² Niapse ncuaane ligase ziseed naa to, laa ne cseed naa to ncuaane ndzielguic. Rrieequia midzse nonedz naa quiaye to, laa ne gow to grë ncuaane row zha gol. Haxta niinagaa gard tsoguic to zha nac grë miñe ndzielguic, ³ sacne laa to bii zienal miñe run miech guidzliu, laa ne gun to miñe racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios! ⁴ Pe i na rree bla to rnee: “Tel no xnëz Pabl no no”, rrieequegaa zla zha ne rnee: “Tel no xnëz Apol no no.” Gase rlu ganle zienalde to miñe racladz Dios, sinque laa to zienal miñe no guic to.

⁵ Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuun no miñe rnabey me no. ⁶ Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. ⁷ Golwi sca ganle Diosse nac men non, sac me pchoob bni co, tel no peet ncuaane nroob bdziuund no, lëë gdib tib bloo bni liu, stib bgaala. ⁸ Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguial zho tib tib zho por dziin ne been zho. ⁹ Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quizaagaa me.

¹⁰ Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha ne nosoquiaw. Tib tib zha ne nosoquia yu co, none guien zho zaacse gzhixcuuaa zhow, tsienal zho zigne nacse xcimienta ga, ¹¹ sac gon nod pe nacne csëëb zho stib cimient, tibaque cimient no, lëë cimient co nac Jesús.

¹² ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa. ¹³ Zeene gdzin dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa. ¹⁴ Zha ne pquiin ncuaane rlëb lo gui, ib tedsod zгаа zho miñe rieguial zho gdeed Dios lo zho; ¹⁵ laa zha ne pquiingaa grë ncuaane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

¹⁶ Golgacnan ganle xyadoo Dios gon nac to, sacne zdoo to rbëz zhiEspíritu me. ¹⁷ Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. ¹⁸ Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho miñe nacpaa guielrac, guielrac ne rneedz Dios. ¹⁹ Sac gon grë guielrac ne no lo guidzliu rii, ncuaane beelze naca nëz lo Dios. Zigne raquietaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zienal zho, ga rlu Dios ganle paat rquiinda.” ²⁰ No stib zaatne rnee: “Nanle Dios grë zhgab ne nonie guic grë zha rac, ncuaane paat rquiinda.” ²¹ Tsode to sca lozhd gacniats to dien cho xnëz miech guidzliu rii no to, golguien ganle grëtaa ncuaane no, laa Dios psana par yquiina lo to. ²² Zig nac guidzliu, guielmban, guielgut, ladznia to now, niicle ncuaane no niinaw, ncuaane naragaa ziaada, chen tow; haxta Pabl,

Apol, Pedr, ib laa no zo nu par dziuun no xyudar to. ²³ Grëse to tibaque xnëz men ne no to, lëë men co nac Jesús, men ne pxeel Dios.

4

Zha rzac zha ne rienee xtiidz Dios

¹ Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela. ² Ni zha ne gon znu run tib dziin, ible none nguzobdiidz gac zho lo men ne rnabey zho. ³ Gacxe waa tel zha rzac to naa, tel zha rzacгаа grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa. ⁴ Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gagual naa. ⁵ Gacxe waa, gunde to ne glöle to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapa naa ne tib tib ne, haxta grë mine rza guic ne, mine no zdoo ne, laaw glu me; grë no ne nodziuun no xtsiin me, dze co laa me gneedz mine riogualpaa no tib tib no.

⁶ Bets, bzian, niina ne nozet naa no lo to nu grop no Apol, quiayunond naa naa, niicle nosanwindгаа naa me. Ga sca ganle golwi, zeena cseed to gban to zigne nac Xtiidz Dios, tsode to lozhd dien cho non, chogaa nond. ⁷ Stiba, ¿cho nadien në lo to ne gunnon to to? Grë ncuaane rap to, grë ncuaane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquelliger to bgaa tow? ⁸ Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

⁹ No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret. ¹⁰ Ne znu quiadziuun no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. ¹¹ Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuun no dziin rdziniaa no ncuaane rquiin no. ¹² Ni rlozh ga rrieque miech rsacsi zho no. Rriequia zha ne rdzibdee no, per rdziuund no gdzibdeequ no zho, sinque mazd rnab no lo Dios gunlay me zho; zha ne rtsidil no, rdziuuncasd no zho. ¹³ Rriequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaane paat rquiindraa, zig rzac zho grë ncuaane nole lo guizh.

¹⁴ Laa naa rzet grë min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleynie naa to, rzaac naa to zig tib xpëed naa. ¹⁵ Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcopaa to zig rioxco tib dad xpëed zho. Zigne rne naa ga, xpëed naa nac to, rriequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús. ¹⁶ Goltsoxco sca, golban zigne mban naa. ¹⁷ Ni ible mincopaa gon laa naa rxel Timoté ziaad lo to i, lëë stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

¹⁸ Rien naa no bla niats ne nac to i, rzac nlidraa gual naa lo to i stib. ¹⁹ Gacnan zho ganle, gneedzse Dios diidz, ible laa naa none gualniob, dzigo bii zdzian ne dien pe nli na nacie zho xpoder Dios, te loxaque rnee zho ye. ²⁰ Sac gon zha ne ngab xnëz Dios, grë mine rnee zho none glu nacie zho xpoder me, nacda loxaque diidzse. ²¹ ¿To nadien zha racladz to? ¿Pe rdziladz to gual naa gualgactox naa lo to i, te mazd wen ye niapse diidz ndooladz, diidz nex gualne naa lo to?

5

Zha ne runctal xtol

¹ Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho.

² ;Yo na ne rzac to grële zhiwseed Dios nan to, gaxle zo to lo me! ;Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

³ Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguial gac zha co: ⁴ Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa. ⁵ Squi ndxie to grë to, golzonëz zha co, golcueegazh zho lo to i, tsie zho tsietsobe zho ladnia mendox, ga tednë xcuerp zho guien zho ganle pe noyun zho; nand new togo zzhixcuaa zho stib, zeena ycaania Jesús zho gal dze ne laa me gbiire guiaad.

⁶ ;Xlëse gon squitaa racniats to rzac to zha mbe nac to, ni randze to zha ne quiayun doldox qui! ;Pe riende to telne glisquide to mine quiayun zho, ib tedsod zrieequiaraa zha ne squi gunctal xtol! ⁷ Zha ne squi nac, masaque nac zho zig nac grë guielguidzdox ne znuse rded; golcueegazh zho sca, zeena ine mbe gac to nëz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nëz lo Dios zig carner yeen ne rgogon zho lo me lni Pascw. ⁸ Golgotsaa gban ne zigne racladz Dios, grëse tel zha wban ne glo, grëse guielyozh, grëse guielntseeb ne bdziun ne, none csaan new grësew. Ndzinli sca golgac, goltsienal mine nac diidzli; none mbe gac to nëz lo Dios, zig quietxtil ne notsd ncobi.

⁹ Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban. ¹⁰ Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tseeld, grë zha ne zienal loxaque gunlo dimi, grë zha ne run guielgbaan, grëgaa zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho. ¹¹ Sinque zha ne bzet naa ga ctsieelsade to, nac zha ne nacle diidz xnëz Dios no zho, ni noque zho quiayunctal zho xtol zho, no zho rquiangob zha ne led tseeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuaane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gowniede to zho. ¹² Tel grëraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. ¹³ Sangue zha ne nacgrë ne, zeene noyun zho tib ncuaane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

6

Zha none gac guielwxtis

¹ Laa to gocnanle ganle, to rieguial glisqui tel pe nac ncuaane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne gbig to lo zha ne nacgrë to, zha csiooglo lo xtil to. ² ;Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? ;Pe nac dzigo grieelod tose csiooglo lo tel pe dil win ne rap to? ³ Haxta grë anjl name, ne gon cobey pe nac grë mine quiayun zho. Gacxe waa, grë dil ne rac lo guielmban rii, ne riogual cobey zha guiooglo low. ⁴ Sca gon gun to, led node to, rnadse pew laa to ziele lo wxtis. ⁵ ;Pe ni tib lë guielto guien lo to? Lo grë to, ;niacxe goon guien zha ne grieelo gnee lo to, cuëz lo xtil to? ⁶ Nazdpaa rdziladz to dil, ;pe i na lëëque zha ne nacgrë to quiadilnie to, ni rlozh ga zieque to zienie to xtil to lo zha ne riladzd Dios? ⁷ Pe riende to tib guieltodoxle i squi no to lëëque to quiadilisa. Mazd golxecw tel cho pe run to.

⁸ Mazdraa gon mbana squi no to rsacsi to miech, ni haxta zha ne nacgrë to rsacsi to.
⁹ Nanle to ganle zha ne squi run guielntseeb, grieelod gdziñ zho zaatne rnabey Dios. Tsieniewguite guic to sca. Golsoladz ganle grëse zha ne run guielyozh:
 zig nac zha ne rquiangob zha ne led tsieeld zho,
 zig nac zha ne rquiangob zha ne nole tsieel,
 zig nac zha ne nac mrazh,
 zig nac zha ne rnalo grë mdio laa ne gnalo zho Dios,
 ni tib zho grieelod gdziñ zaatne rnabey Dios. ¹⁰ Scaque:
 zha ne nac ngbaan,
 zha ne zienie guic loxaque dieñ zha gunlo dimi,
 zha ne nac ngonziu,
 zha ne rzhixcuaa diidzguizh,
 zha ne runguët miech par cuan zho zho;
 ni tib zho ygaad guielnzaac co. ¹¹ Blalaa to bio lo grë dol co glo, sangue niina miech mbele
 nac to nëz lo Dios, laa Jesús ni Espíritu Sant psanle to zig tib zha ne peet xtold, laa me
 psanwenle to nëz lo Dios.

Gunctald zho xtol zho

¹² Nli ndal ncuaane zac gun ne, gunctalda xtol ne, niicle choot rcadgaaw, per led grëda
 rquiin. Tel naa, niicle no ncuaane zrieelo gun naa, per rund naaw; sac racladzd naa guien
 naaw, lozh ga lëew gnabey naa. ¹³ Zëeb diidz rnee zho: “Laa guielwagw biaan par gow
 miecha, scagaa zdoo zho laaw biaan par tsodzëw guielwagw.” Nli scaw, per guiabd ne
 togo por min co lega gowcho ne. Pa rquiin ne lega tedso gow ne, sac gon zigtaa zdoo new,
 zigtagaa guielwagwa, zdziñ dze ne gnitlo Diosa. Guielwagw ga na, sangue grë guielyozh
 nerun miech rquiangob zho zha ne led tsieeld zho, biaan ne par dziuun ne min co,
 sinque laa ne biaan par gban ne zigne rdziladz Dios, sac me rnabey ne. ¹⁴ Tel new nitlod
 ne, sac gon zigne bleeban Dios Jesús con poder ne rap me, scaque zbeeban me ne zeene
 laa dze co gdziñ.

¹⁵ Golgacnan ganle, rrieequia lëe tiblë xcuerp Jesús nu gon nac ne tib tib ne. Nana, ¿pe
 nonguiela ga dzigo gdieel tib lë xcuerp me ga xcuerp tib wnaa ro nëz? ¿Nonguielda gon!
¹⁶ Sac gon zha ne raanie tib wnaa ro nëz, rrieequia tibaque rac zho ga grop zho wnaa co.
 Rnee lo Xtiaz Dios, par me: “Zeene laa mgui racgrop tib wnaa, tibaque miech rac zho ga
 grop zho.” ¹⁷ Scagaa zha ne rzëeb xnëz Jesús, tibaque rac zho grop zho me, zhiEspíritu
 me racnie zho.

¹⁸ Gacxe waa, gunde to guielyozh yquiangob to zha ne led tsieelde to. Lo grë dol ne
 no, min riise nac mine xcuerppaa miech rguitnie zho. Sac gon zha ne run guielyozh co,
 masaque rsanbeed zho zho ga. ¹⁹ Golguien ganle, zha ne nole xnëz Dios, masaque zha nac
 zig tib yadoo zaatne rbëz Espíritu Sant, Espíritu ne rdeed Dios rbannie zho. Led nedraa
 rnabey xcuerp ne, ²⁰ Diosle rnabeya, sac gon bzhiile me ne ni nroob gocnon ne lo me.
 Gacxe waa, zigtaa xcuerp new, zigtaa xpensar new, gotsaa yquiin new par cxobnen ne
 ganle pa lotaa men nroob nac me.

7

Rtsire Pabl lo zhiwnabdiidz zho

¹ Lo guits ne pxeel to lo naa, nzian ncuaane rnabdiidz to, nu ganle laa naa ctsire lo
 wnabdiidz co: nli wena, telne niaca mine grieelow ctsieelniad ne. ² Per parne tsod pe
 yquiaaqui cho gun guielyozh, tsonie zho zha ne led tsieeld zho, mazd wena zigtaa mguiw,
 zigtaa wnaaw ctsieelnia zho, tib tib zho gbanniese zho tsieel zho zigne rieguiala.

³ Zha ne ptsieelniale, zig nac mgui none gnee zho lo tsieel zho zeene racladz me,
 scaquegaa wnaa zeene racladz tsieel zho gnee lo zho none siguiel zho. ⁴ Sac gon wnaa ne
 rtsieelnia, led zhadraa rnabey xcuerp zho, sinque tsieel-le zho rnabeya; scaquegaa mgui
 zeene laa zho rtsieelnia, tsieel-le zho rnabey xcuerp zho. ⁵ Golguien sca, niicle mguiw
 niicle wnaaw nodne yca zho xcuerp zho lo tsieel zho. Laa telne rzacgaa zho none yquiind

zho tsieel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsieel zho, sac gon zha ne grielod cxecw, nend ccheep mendox zho gun zho guilyozh.

⁶ Ne znu rne naa lo to, guiabde to nagon togo rne naa nopaa ctsieelnia to. ⁷ Tel naa, rzac naa wena tebaa grëse to znu ctsieelniad, zigne nac naa; per na ncuaane gacd ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho. ⁸ Zig nac grë zha ne bii tib, grëgaa zha ne gutle tsieel, wena tebaa grielo scase guiaan zho, ⁹ per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

¹⁰ Sangue zha ne ptsieelniale, laa naa rso diidz lo zho csaand zho tsieel zho, ni nacda xtidz naa, sinque ible sca rnabey Dios. ¹¹ Laa tel zha ne guiaabgaa csaan zho tsieel zho, zaca, per lëëraasi grielodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

¹² Nu na ganle laa naa gnegaa chop lan xtidz naa lo zha ne led yed tsieel rliladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne rliladz Xtiidz Dios, per telne riö guic wnaa gbannie wnaa zho, nodne csaan zho wnaa. ¹³ Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho. ¹⁴ Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed. ¹⁵ Nana, telne zhalgaa zha ne rliladz Xtiidz Dios ga, rnab csaanla zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho; ¹⁶ stiba, nand zho dien pe zdziñ dze ne gliladz tsieel zho Xtiidz Dios.

¹⁷ Mine naca tib tib to goltsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieelle zeene rliladz zho xtiidz me, none sca guiaan zho niicle telne rliladz tsieel zho xtiidz me. Grëse zha ne ngab lo me, diidz rii rso naa lo zho. ¹⁸ Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co. ¹⁹ Mine mazdraa non lo me, gban zho zigne rdziladz me, guiendraa ne dien cho no bey, chogaa noda.

²⁰ Zigne rneque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho. ²¹ Zig nac zha ne nac ngundziin lo ben, peet tsienied guic zho guiab zho dien zha griee zho ladznia zha ne rnabey zho; per telne gdeeda diidz, zac tsoxco zho dien zha griee zho lo zha co. ²² Zha ne sca nac ngundziin lo ben zeene bzëeb zho xnëz Dios, guien zho ganle rriequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdga ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho. ²³ Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. ²⁴ Sca nasca gon bets gaca, tib tib to zigne nase to zeene bzëeb to xnëz Dios scase no gban to, ine gleynie to me.

²⁵ Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiend tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdo Dios rbedz me, mine rquiin min co rnee zho. ²⁶ Grë ne ne nac ne zha ne rliladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. ²⁷ Zha bgui ne na ptsieelniale, grielod gni naa guiaantib zho; sca mbannie zho tsieel zho; per tel zha ne gard ctsieelniaw, mazd sobd guic zho ctsieelnia zho. ²⁸ Zha ne racladzpgaa ctsieelnia, zigtaa mguiw zigtaa wnaaw, led dold ga gun zho telne laa zho

ctsieelnia; per gacnan zho ganle, zeene laa zho pcatsieel-le, ib tedsod nroob guielnë ne gan zho por grë mine noyac len dze rii.

²⁹ Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tseel, mazd sac zho zho zig tib zha ne guien tseel. ³⁰ Zha ne quanie dimiw, zha ne no guielbleya, zha ne nogaa guielnëw, gdeete zho diidz yca grë ncuuan co lo zho par gun zho xtsiin me. ³¹ Zha ne bienle runfalte grëtaa ncuane rquiin zho, gdeete zho diidz ctse grë ncuuan co lo zho, sac zigtaa guidzliuw, zigtaa grë ncuane no low, dzin dze ne nitlow.

³² Mine racladz naa peet zhgab ctsed lo to. Golwi ganle, zha bgui ne tib, tiblque zienie guic zho run zho mine rdziladz Dios, mine nac xtsiin me. ³³ Laa zha ne no tseel, grielodraa sca gac zho, sac laa guic zho zienie zha gbannie zho tseel zho, zha grieelo gun zho mine rdziladz me, min co rionieraa guic zho. ³⁴ Scaque grë men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tseel zho, dien zha grieelo gun zho mine rdziladz tseel zho, xco co rioraa zho.

³⁵ Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grieelo zaacse gac to gun to mine rnabey Dios. ³⁶ Zha ne quanie wnaa nguieg, telne rzac zho nonguielda ga scase ted lo xquielnguieg xpëed zho, sinque none ctsieelnia zho, peet nacda, led dol d ga ctsieelnia zho. ³⁷ Laa telne rzacгаа zho, wenraaw ctsieelnia xpëdwnaa zho, ible scale pquiabladz zho guiaan mëed, wenaque ga telne sca rzac zho. ³⁸ Wen ga gun zha ne sca gdeed diidz ctsieelnia xpëdwnaa, per mazdraa wen ga gun zha ne rzac mazd ctsieelnia xpëed.

³⁹ Nana, wnaa ne retгаа tseel, nli zeene mban tseel zho rnabey ley ne tseelse zho gbannie zho; per zeene laa tseel zho ret, zac ctsieelnia zho tel cho stib mgui ne racladz zho, totsaque zha ne noque xnëz Dios. ⁴⁰ Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzse naaw sac rien naa led tibd naa, Espiritu Sant nacie naa.

8

Bëel ne rgogon zho lo mdio

¹ Stib wnabdiidz ne run to ga, dien zha nac guielwagw ne rgogon zho lo grë mdio, pe zrieelo gdioowa, te grieloda ye. Zootle na grële to nan min co; per no hor zeene squi rzac ne grëlew nan ne, lel racniats ne, laa ne gacndooladz ne gnee ne lo grë zha ne nacgrë ne dien zha gun zho parne tsoguicraa zho Xtiidz Dios. ² Zha ne rzac grëlew rac zho, ga rlu zho ganle peet rien d zho. ³ Tel Dios runbey me tib tib miech, nannpaa me cho nac zha ne rleyne me.

⁴ Zhapaa dzigo gaca, ¿pe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegann miech led Diosd ga, tibaque men ne nac Dios no. ⁵ No zho rzac nziandox Dios, nziandox men rnabey no, no me no gbaa, nogaa me no lo guidzliu, ⁶ sangue ne ndion ne ganle tibaque Dios no, lëe men co nac Pxoze ne, me psan grëtaa ncuane no, me psan ne parne dziuunbey ne me. Ni scaqueгаа, tibaque men ne rnabey ne, lëe me ga nac Jesús, me bzaa grëtaa ncuane no, me nac men ne rneedz xquielmban ne. ⁷ Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lëeque zha runctal xtol zho ga sca run zho. ⁸ Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guianziuu lo me.

⁹ Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. ¹⁰ Sac gon, nenda tibliladz to zob to zaatne riegann grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. ¹¹ Zha ne sca gun, niicle ne nli rien zho peet nacd

ncuaane noyun zho ga, per por zha laa zha co gunc̄tal xtōl. Gun̄scade to, gol̄guien gan̄le ye zho ga psilaa Jesús zeene gut me lo cruz; ¹² gacxe waa, tel̄ne sca gun̄ to por to yquiaaqui gun̄ zho tib ncuaane rzac zho nonguield, lole Jesús ga quiayun̄ to falt. ¹³ Min̄ co nagon, tel̄ naa mazd maase gowd naa bëël co, tel̄ne por min̄ co yquiaaqui gunc̄tal naa xtōl tib zha ne nole xnëz Dios; sac lëda ga gun̄ naa gac naa zig tib quie ne griel̄ ni zho.

9

Min̄e rieguial̄ zha ne run̄ xtsiin̄ Dios

¹ Zigne nagon̄ zac gun̄ to grë ncuaane wen ne racladz to, scaquegaa naa, zac gnab naa ncuaane wen ne racladz naa. Tel̄ naa gon̄lo naa Jesús men̄ ne rnabey ne, Dioszhal bzo naa pxeel̄ me naa none naa Xtiidz me. Ne squi ptsëë Dios lo xquiel̄mban to zeene bial̄seed naa to, i rlu gan̄le me nacie naa.

² No zha ne rzac nlid Dios pxeel̄ naa, sangue to nan̄wen to gan̄le me pxeel̄ naa, sac gon̄lo to min̄e ben̄ naa, min̄e blu naa; ni scagaa niina, lo xquiel̄mban to i rlu gan̄le ne nli xtsiin̄ me quiayun̄ naa. ³ Grë zha ne sca rzac nlid Dios pxeel̄ naa, rzac zho peet raguial̄d naa, gacnan̄ zho gan̄le: ⁴ ¡Raguial̄ naaw gon̄! Ni grëragaa zha ne rdziuungza no xtsiin̄ Dios, rioguial̄ no gneedz to ncuaane yquiiin no, gneedz to zaatne gbiaaz no. ⁵ Tel̄ naa, haxta raguial̄ yquianie naa tib men̄ wnaa ne gac tsieel̄ naa, in̄e sën̄ie naa me zigne run̄ grëraa zha ne rdziuungza no dziin̄ rii, zig nac Pedr, zig nacgaa grë zha bets men̄ ne rnabey ne. ⁶ ¿Te loxaque grop no Bernabé naye znu zhaaque no dziuun̄ no stib dziin̄, par gdziniaa no ncuaane dioow no? ⁷ Gol̄gan̄ gan̄le, zig nac zha ne rzëëb lo xtsiin̄ menguiib, ¿niacxe zhaa lo dziin̄ ne rdziniaa zho ncuaane row zho rio zho lo xtsiin̄ menguiib? ¿Zha ne rangaa, niacxe rieguial̄d zho yquiiin zho ncuaane rac zaatne ran zho? ¿Zha ne na rangaa ma, niacxe rieguial̄d zho yquiiin zho ma zigne racladz zho?

⁸ Guiabde to togo bod guicse naa riab min̄e rne naa nu, gol̄gan̄ gan̄le haxta lo ley ne psan̄ Moisés ⁹ no tib zaatne rnee: “Zeene gunc̄cun̄ to xcon to dziin̄ gzëëni ma mzion zhobxtil gacmbew, code to guix ro ma, gol̄saan gow ma min̄e ygaa ro ma.” Gol̄wi gan̄le zha rnee Dios, nana pe nan̄ to ngonse rquia zdoo me. ¹⁰ Lëda gon̄, grëse ne rquia zdoo me ne. Ga rlu me gan̄le, zha ne run̄ xtsiin̄ me, ible rieguial̄ zho ycaa zho min̄e non xtsiin̄ zho. Zig nacaque guiel̄gon, zigtaa zha ne rana, zigtagaa zha ne run̄mbe grë guiel̄nzaac co, ible rieguial̄ zho yquiiin zhow. ¹¹ Tel̄ no, rriequia nazho tib gon̄ i bdziuun̄ no biadseed no to Xtiidz Dios, ¿niacxe rioguial̄d no dzigo gneedz to ncuaane yquiiin no?

¹² Blalaa zha ne nale griin̄ riaadted lo to i, rnabey zho to rdeed to ncuaane rquiiin zho, ¿pe lel̄ no dzigo rioguial̄d gnaba lo to? Mazdraa gon̄ rioguial̄ no gnab now, per haxta lo nadze gard dziuun̄ no min̄ co, notaa nan̄ zha rdziniaa no ncuaane rdioow no; zeena guiaand̄ zdoo to, lozh ga laa to csaan min̄e nac Xtiidz Dios. ¹³ Led nan̄le to gan̄le, grë zha ne run̄ dziin̄ len̄ xyadoo Dios, psan̄ me diidz grë ncuaane nac gon̄, ga xen̄ zho pe yquiiin zho, zig nac zha ne run̄ dziin̄ zaatne nac lo pcoog, lo ncuaane rielogon miech ga, ga rdioob ncuaane row zho. ¹⁴ Ni scaquegaa psan̄ Jesús diidz, zha ne cseed miech Xtiidz me, ib none lo dziin̄ co gdziniaa zho pe yquiiin zho. ¹⁵ Per tel̄ naa gon̄, waltaa peet gard gnab naa lo miech.

Laa naa rzet min̄ rii lo to, per guiabde to togo run̄ naaw parne csilo to pe gneedz to lo naa. Ib zanāld naa min̄ co, sac rley naa znu quiayazhd naa quiayun̄ naa xtsiin̄ Jesús, mazd maase guetgbin naa, lëdle ctiche zho guiel̄bley rii lo naa. ¹⁶ Niicle ne znu quiayazhd naa quiayun̄ naa dziin̄ rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, ¿probsaxe naa tel̄ne gned naaw! ¹⁷ Noyund̄ naaw par dien̄ pe premio ygaa naa, sac zig rne naa ga Dios bzo naa, me rnabey naa quiayun̄ naaw, masaque nacse naa zig tib ngund̄ziin̄. ¹⁸ Par naa, lëële premio nu nac guiel̄bley rii ne znu liga quiaseed naa miech Xtiidz Dios, rnabd naa gneedzpaazho zho ncuaane yquiiin naa niicle ne raguial̄ naa gnab naaw.

Tsoxco zho ygaa zho premio

¹⁹ Stiba mazdragaa wena, znu choot noneedzd ncuuane yquiin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëëb zho xnëz Jesús. ²⁰ Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraa naa ley, per run naa grë ley ne zienal zho, zeena sca grielo yquiabladz zho sëëb zho xnëz Jesús. ²¹ Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuuane rleyniedraa Dios run naa. Laa naa run min co, zeena ye zho sëëb xnëz Jesús. ²² Grë zha ne pense quiayacnan zha nac Xtiidz Dios, zeene no naa lo zho, rund naa gne naa grë ncuuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnan zho zha sëëb zho xnëz Dios. ²³ Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho ygaa lo guielndzon ne zhobnee lo Xtiidz Dios.

²⁴ Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to ygaa tib premio. ²⁵ Grë zha ne sca rio tib lo wguit, par grielo gun zho gan rioxco zho ran zho xcuerp zho, rund zho ncuuane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco ygaa ne tib premio ne gdzind dze nitlo. ²⁶ Gacxe waa, tel naa tibaque noxco naa dien zha xoonraa naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no ygaaw. ²⁷ Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuuane nonguiel min co none guna, led gunda ncuuane racladztaaw. Laa naa run min co zeena gun naa gan, sac gon, guieltodox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

10

Nodne gleynie miech mdio

¹ Bets, bzian, golsoladz ganle zha bzhaac grë pxozgol ne zha ne sca bzënie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. ² Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

³ Grëse zho gon milagr nroob ne been Dios, bnabey me bliaal guietxtil zhan gbaa bdeed me dow zho, ⁴ beencta me nis tib cho quie bdeed me go zho no zho dan bidz co. Lëële Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rhixcuuaa lo grëtaa xliadz miech. ⁵ Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co. ⁶ Gase na ganle gotsaa gwi ne zha bzhaac zho, zeena gzoobladzd ne dziuun ne grë ncuuane ndzinlid ne been zho. ⁷ Golguien gleyniede to mdio, zigne been zho. Rnee lo Xtiidz Dios: “Blozhse dow zho, go zho, laa zho psilo biee lo zhimdio zho.”

⁸ Gotsaa gwi ne ganle, pe guielnë ne bgaa zho zeene briequia bla zho lega bionie wnaa, tib dzeque bnabey Dios gut galptson mil zho. ¡Ni lalnu tsod guic to gun to min co! ⁹ Ib gunglëede to Dios, sac zha, zeene benngulëe zho me, bnabey me briequia grë meel pquiaa maw zho, ndal zho gut. ¹⁰ Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. ¹¹ Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

¹² Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaane gunctal xtol zho. ¹³ Nli no ncuaane rcheep ne gunctal ne xtol ne, per nacda ncuaane griin rien. Pe zhidaa miech ne zieded lo min co. Tsod mine guiab ne ib lebd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnieu ne griee lo griee ne low.

¹⁴ Bets, bzian, golguien sca ib none csaan to grë mdio, gnalodraa tow. ¹⁵ Miech nixbiini nac to, grë mine rne naa lo to nu, nan to ganle ncuaane rquiina. ¹⁶ Golwi ganle, zeene rdioow ne quietxtil, rdio ne vin, rdziuuu ne xtsee ne been Jesús ga, ga rlu tipse nac ne grë ne nacie ne me. ¹⁷ Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grë ne, ni lëe xcuerp Jesús ga. ¹⁸ Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

¹⁹ Zha ne rnologaa mdio, zeene row zho grë ncuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio. ²⁰ Mine racladz naa guien to, zeene sca run grë miech pe rgogon zho lo grë mdio, lo mendox ga rgogon zhow, led lo Diosda. Golguien sca, ib tsiesëebde to lo grë zha ne quiayownie mdio, zeena gacniede to mendox. ²¹ Lëdraaw ga gon gun to, tel rlozhse rquiin to xtsee ne psan Jesús diidz ga dziuuu ne, ni tsieque to tsieque to, tsietow to zaatne rownie zho mendox. ²² ¡Gunscaade to, gunglëede to Dios! ¡Golguien ganle, lebd ne dzian ne xquielblëe me!

Zha gun zha ne riladzle Jesús

²³ Zig rne naa ga: “Nli zac gun ne ncuaane gacladztaa ne, per led grëda nonguiel.” Tel naa, zrieelo gun naa ncuaane gacladztaa naa, per led grëda yquiin par gun naa xyudar grëraa zha bets ne, lozh tsoguc zho Xtiidz Dios; ²⁴ sac gon, ib none dzioxco ne grëraa zha ne nacgrë ne. ²⁵ Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to. ²⁶ Golguien ganle, Dios psan guidzliu, scagaa grëtaa ncuaane no low chen me naca.

²⁷ Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to. ²⁸ Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho. ²⁹ Niicle ne ndionpaa ne led dold ga gun to gow tow, per zha ne gana ga sadol zdoo zho.

Nana gnë to: “¡Pe nac dzigo por stib zho grieelod gun naa mine racladz naa? ³⁰ Tel rded naa xquizh lo Dios zeene pe tib guielwagw ne rquiin naa, ¡pe nac dzigo por mine rzacse stib zho, grieelod gow naaw?” ³¹ Golguien ganle, racda por zha cose; sac grëse ncuaane dziuuu ne, haxta ncuaane dioow new, ncuaane dio new, none zeene nodziuuu new cxobnen ne ganle pa lotaa men nroob nac Dios. ³² Gotsaa guien ne sca ganle dziuuu ne ncuaane yquiaaqui csan ne zdoo stib miech, zigtaa zha Israela, zha stib guiedza, zha ne nolegaa xnëz Dios. ³³ Tel naa, zanaid naa ncuaane gdziladz naa naase, sinque rioxco naa grëtaa ncuaane run naa, run naaw par gacnie naa grëse miech, zeena griee lo tso guic zho gnab zho lo Dios csilaa me zho lo xtol zho.

11

¹ Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

² Bets, bzian, rleynie naa to gon sac tibaque rsoladz to naa, ni rioxco to zianal to grë mine pseed naa to. ³ Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. ⁴ Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. ⁵ Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui. ⁶ Telne racladzdga zho gdze lad guic zho, mazd gnabey zho chug

guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

⁷ Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. ⁸ Gotsaa gwi ne ganle, letxe xcuxtid wnaa waa biaa mgui, sinque xcuxti mgui briea baa wnaa. ⁹ Stiba, zeene psan Dios wnaa, ib laa me psan zho par gacnie zho mgui. ¹⁰ Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grë anjl ne no gbaa zley zho gan zho min co.

¹¹ Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinlsa zho; sac telne guiend wnaa guiend mgui, telne guiendgaa mgui guiend wnaa. ¹² Gotsaa gwi ne ganle, zeene baa wnaa cho mgui briea dzit ne baa wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. ¹³ ;To nadien zha rzac to? ;Pe nli nonguiela gdze lad guic wnaa zeene nonab zho lo Dios, te nonguielda ye? ¹⁴ Golwi ganle ib no gdze guic wnaa, biaanle zho roob guits guic zho parne ctsew lad guic zho; ¹⁵ tel zha, haxta rleynie zhow zeene scataa noola, sangue ne nac ne zha bgui, guietow ga guiool guitsguic ne. ¹⁶ Tel nogaa zha ne rzac led scada, maase gnee zho. Per ible znu gon noseed no miech, ni grëragaa zha ne riladzle Xtiidz Dios, rien zho ne nli scaw.

Zha none gac xtsee ne psan Jesús

¹⁷ Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiayuntal to xtol to. Mincoosi nagon ni lalnu riidz doo naaw. ¹⁸ Ziyon naa gzobtaa zeene rcaalsa to, pe na tsiegald tildiidz to, laa ne tipse gac to lel rlëlsa to. Ni rgobey naa nli scaw. ¹⁹ Rien naa masaque rzac to ible sca none gac to, parne glupaa cho nac zha ne non xtiidz, zeena guianziuu zho lo miech.

²⁰ Led zhixtseedraa Jesús i gon run to. ²¹ Sac ron naa zeene laa to row, masaque lëëlëd rac to row to ncuane zienie to, ib rwide to no zha ne rdzin ga quianied zho nroob ncuane gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuane row to. ²² ;Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquii? I gon rlu to rleyniede to grë zha ne no xnëz Dios. ;Ni palal gon rdziguiend naa ncuane noyun to!

²³ Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëdsuel me, bzhen me tib quietxtil, bdeed me xquizh lo Dios; ²⁴ blozhse bdeed me xquizh, nzian lë been me quietxtil co, bdeed mew lo zho rëb me: “Golquiina, rriequia lëë xcuerp naa nu, sac gon znu gun zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa.”

²⁵ Blozh ga, saque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rriequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

²⁶ Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdzin dze ne laa me guiaad stib.

²⁷ Gacxe waa, zha ne rienewguit guic rquiind zho xtsee co zigne no yquii zhow, dol nroob ga run zho, xcuerp Jesús ga, xchen me ga noguitnie zho. ²⁸ Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquii tow. ²⁹ Sac gon zha ne lega gow quietxtil co, lega guie zho vin co, sac zhow zig beelze pe xtsee; rriequia guielnë ne ygaa zho ga gow zho, guielnë co ga guie zho. ³⁰ Mincoxe waa, blactaa zha ne nacgrë to i quiayaan nsis, nogaa zho rzacnële, haxta nzian zho gutle. ³¹ Telne niaca mine wen wen gwi ne ganle zha nac xtsee co, tsod pe nacne pe guielnë

ne cxeel Dios dzian ne. ³² Ni zeene scagaa rteed me ne tib caxtigw, laaw run me parne tsa ne biini gbiire gbig ne lo me, zeena led yed ne nitlo gal dze ne nitlo grëraa miech ne zian ncuane lo guidzliu rii. ³³ Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquiina. ³⁴ Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho yгаа zho guielnë co.

No spalal mine racladz naa gacnan to, per naa zeene guial naa nëz qui dzigo gne naaw lo to.

12

Guieibiini ne rdeed Espiritu Sant

¹ Bets, bzian, nugaa na ganle laa naa gzet zha nac guieibiini ne rneedz Espiritu Sant, sac racladz naa wen wen guien to zha naca. ² Rsoladz to ganle zeene gard gliladz to Xtiidz Dios, nëzrii nëzrec bio to güeygan to stib stib grë mdio, ncuane ni tib lan diidz rneed; sangue Dios ne rliladz to niina, led scad nac me. ³ Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

⁴ Tib tib zha ne rliladz Jesús, zhaase zhaase nac guieibiini ne rgaa zho, per tibaque men ne rdeeda, lëë men co nac Espiritu Sant. ⁵ Nzian mod zrieelo dziuun ne dziin lo Jesús, per grëse ne me rnabey ne. ⁶ Tib tib ne zhaase zhaase mod ne rlu Dios nacie me ne, per grëse ne me nac men ne rlu zha dziuun ne xtsiin me.

⁷ Guieibiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

⁸ No lo zho rdeed me guieibiini rien zho zha cso zho diidz lo miech, no lo zho rdeed me guieibiini rseed zho grë ncuane gan ni rlu zhow lo miech.

⁹ No lo zho rdeed me guieibiini dib zdoo zho rnalo zho Dios, niicle ncuane mazdraa gan rnab zho lo me, raca.

No lo zho rdeed me guieibiini zeene rnab zho lo Dios, riac grë men rzacnë.

¹⁰ No lo zho rdeed me guieibiini rnab zho lo Dios rac grë milagr,

no lo zho rdeed me guieibiini rteed zho xtiidz Dios lo miech, no lo zho rdeed me guieibiini rien zho cho nac zha ne nlipaa nacie me, cho zhagaa nacie mendox.

No lo zho rdeed me guieibiini rnee zho stib diidz ne gard cseed zho,

no lo zho rdeed me guieibiini rien zho pe rnee zha ne rnee diidz co, dzigo rnee zhow.

¹¹ Grëse guieibiini, Espiritu Sant rdeeda, ni me nan pa mine rneedz me lo ne tib tib ne.

¹² Lo grëse ne ne nac ne zha ne no xnëz Jesús, rrieequia xcuerp me nac ne. Tel cuerp, niicle ne nzian part niaaw, per tibaque naca. ¹³ Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espiritu ne nacie ne, sac tibaque Espiritu bgaa ne zeene brobnis ne.

¹⁴ Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca. ¹⁵ Gacxe waa telne niaca mine rnee ni ne, grielod guiaba porne nacda nia ne, nacda xcuerp ne. ¹⁶ Scaque diag ne, grielod guiaba porne nacda bziaalo ne led yedraaw nac xcuerp ne. ¹⁷ Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne? ¹⁸ Lëëzhe wen led scad psan Dios xcuerp ne, sinque grëse part ne niaaw bzaa mew zigne gocladz me, psanse mew zaatne rquiina tib tiba. ¹⁹ Sac telne tipse niaa grëse part ne nac xcuerp ne, ¿zhazhe rlu ncuane co! ²⁰ Gocda sca, sinque zhaase zhaase nac tib tib part co, per grësew tibaque cuerp naca. ²¹ Gacxe waa grielod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.” ²² Grëse part ne niaa xcuerp ne nose zaatne rquiina, haxta mine mazdraa nda lëë min co rquiinraa.

²³ Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxcoraa ne rdze; ²⁴ sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non. ²⁵ Sca niaa xcuerp ne, grëse part ne niaaw rquiinsaw xcompañera; led yeda rtsolsa. ²⁶ Golwi ganle, zeene në tib part xcuerp ne, grëse part ne niaaraaw zienie në co; scaquegaa zeene rdioon tib part co grësew zienie guielbley co.

²⁷ Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grë to, tib tib part ne niaa cuerp co i nac to, rquiinsa to zha ne nacgrë to. ²⁸ Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzose Dios zho pe nac dziin ne gun zho:

no zho rienee xtiidz me lo miech,
no zho rteed xtiidz me lo miech,
no zho rseed miech xtiidz me,
no zho rnab lo me rac grë milagr nroob,
no zho rnab lo me riac men rzacnë,
no zho rioxco run xyudar grë miech,
no zho rzo rac zho zha rnabey,
nogaa zho rnee grë diidz ne gard cseed zho.

²⁹ Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr. ³⁰ Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co. ³¹ Zhaase zhaase nac guielbiini ne rgaa tib tib zha ne no xnëz me, per goltsoxco yгаа to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

13

Guie|wleynie

¹ Mine mazdraa rquiin gon nac ne gleyne ne samiech ne. Tel niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanj Dios rne naa, ni tel rleynied naa samiech naa, ¿pa dien rquiin rac naa grëtaa diidz co? Rrieequia nac naa ga zig tib lë guiib ne loxaque rzedz.

² Tel niaca mine rteed naa xtiidz Dios lo miech, rien naa pe nac mine naraa cxobnen me, grëse wseed ne no rien naa, ni rleynied naa samiech naa, jpaat rquiinda! Tel dib zdoogaa naa rnalo naa Dios, haxta ncuaane mazdraa ngan rnab naa run mew, ni rleynied naa samiech naa, jpeet nondal

³ Tel quiizgaa naa grë ncuaane quianie naa lo grë zha ne guien pe yquiin, haxta gded naa naa tsec naa, per tel rleynied naa samiech naa, jzhlëse ga gun naa min co!

⁴ Sac gon zha ne nli mban zigne nac guie|wleynie co:

riednied zho samiech zho,
wen rac zho lo samiech zho,
racnëd zdoos zho, niicle ran zho wenraa noded stib miech lo zho,
rund zho ne lëëque zha gunnon zho,

racniatsd zho lo samiech zho,
⁵ rund zho ncuaane coguielnë zho, gunglëëgaa zho samiech zho,
zianald zho ne tebaa lose zho yquiin grë pe cos,

nacd zho zha ne lega zolëë,
rapguie|nëd zho samiech zho,

⁶ ni lalnu riod zdoos zho mine run zha ne rsacsi samiech,
mine rleynie zho nac diidzli.

⁷ Zha ne nli rleynie samiech, ni lalnu peet grieelod yca gleyne zho zho; rquiaadiag zho mine rnee zha co, rzhidznied zho zho; tibaque rquiabladz zho wen grieequia zho, rsaand zho zho, tibaque racnie zho zho.

⁸ Zdzin dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grë guielrac, sangue guielwleynie gdzind dze ne nitlow. ⁹ Niicle ne nogaa ne guielbiini ne rneedz Espíritu Sant, niicle no zha ne rien zha gnee zho Xtiidz Dios lo miech, per palalse nac ncuaañe rien ne niina. ¹⁰ Sangue gal dze ne laa Dios lozh gzhixcuua ne zigne no gac ne, grëse guielbiini ne rdziaap ne niina, paat yquiindraaw.

¹¹ Masaque nac ne niina zig tib mēēdlas. Tel naa, zeene goc naa mēēdlas grëse ncuaañe bne naa, grëse ncuaañe bien naa, grëse ncuaañe pseed naa, grëse ncuaañ co ben naaw zigne run grëraa mēēdlas. Per zeene laa naa broob, laa naa biala biini, grëse ncuaañ co laa naa bienpaa zha naca; laa guielmēēdlas co bded. ¹² Scadaa nagon rziac ne niina, palalse rien ne zha nac Dios, rrieequia rdzianse ne me niina zigne ran ne zhimplē ne lo beelze pe tib lē vidr; per dzin dze laa ne dzianlo me zigne nacpaa me. Palalse ndion ne niina zha nac me, palalse rsilo rdzian ne me, per gal dze co laa ne dziuunbeypaa me zigne runbey me ne niina, nanpaa me zha nac zdoo ne tib tib ne.

¹³ Golgacnan sca ganle, grë guielbiini co dzin dze ne yquiindraaw, sangue ne znu: dib zdoo ne rnalo ne Dios, noniepaa guic ne zac mine rnee me, ni rleynie ne samiech ne, lozhda. Per lo gza tsona nagon, guielwleynie co nac mine gdzind dze ne gdzē.

14

Zha ne rnee stib diidz

¹ Laa to nanle pa min nac mine mazdraa non, jgolleynie samiech to sca! Per scagaa golnab yгаа to guielbiini ne rneedz Espíritu Sant. Zig nac guielbiini ne rgaa zha ne rteed xtiidz Dios lo miech, golnab yгаа to min co zeena sca grieelo cseed to miech xtiidz me.

² Sac tel zha ne rgaa guielbiini rnee zho stib diidz, zeene rnee zho diidz co choot rien dien pew, sac lo Dios ga rnee zho. Tel pe nac mine rnee zho ga, Espíritu Sant rsiaba guic zho, per choot racnand dien zha naca. ³ Sangue zha ne rgaa guielbiini rteed zho xtiidz Dios lo miech, mine rnee zho ga rquiina par tsoguicraa miech zha racladz me, par guien zho pe nonguiel gun zho, ni rchooblada zdoo zho.

⁴ Tib zha ne sca rnee stib diidz, lose zho rquiin guielbiini co, sac zhase rioguicraa zha racladz Dios; sangue zha ne rteed xtiidz me, diidz ne rnee zho rquiina lo grëraa zha ne no xnēz me, grëse zho rioguicraa zha racladz me. ⁵ Wena tebaa grëse to yгаа guielbiini co gnee to stib diidz, per mazdraa gon wena cteed to xtiidz Dios lo miech, cseed to miech xtiidz me; sac min co mazdraa rquiin, lēdle gnee to stib diidz. Zacauegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grëraa zha ne no xnēz Dios. ⁶ Bets, bzian, to gase nadien, tel niaca mine glanso naa lo to i csilo naa gne naa stib diidz, ¿pa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grë mine rien naa, pe nac mine ziaadyob gac, zha nac grë mine zhobnee lo Xtiidz Dios, led grëse min co zien to zha naca, ni squiina lo to grëse to.

⁷ Haxta grë ncuaañe rool miech, zig nac bzie zig nacgaa vihuel, tel csilo zha ne noyoolā tel zhataa gool zhow, ¿zha dien guien miech pa di noyool zho? ⁸ Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacnan menguiib pe nac vis ne quiayun zho? ⁹ Scadaa nagon run to zeene rnee to stib diidz lo miech, ¿zha nadien guien zho pe nonee to? Rrieequia lo mese ga rnee to. ¹⁰ Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. ¹¹ Telne guiaad tib zho lo naa csilo zho gnee zho, ni rien naa pe quianee zho, grieelod guien naa pe racladz zho, guienгаа zho zha rzaac naa.

¹² Nana sca, zha ne rquiabladz yгаа guielbiini ne rneedz Espíritu Sant, gnab zho yгаа zho mine grieelo yquiin lo grëraa zha ne nacgrë zho, zeena grë zho tsoguic zha racladz Dios gban zho. ¹³ Gacxe nagon waa, zha ne rnee stib diidz, none gnab zho gdeed Espíritu Sant guielbiini lo zho guien zho pe nac grë diidz co, parne gnee zhow lo miech; ¹⁴ sac zha ne sca rnee stib diidz, tel so zho gnab zho lo Dios, rien zho pe nonab zho, loxaque zhiespírituse zho quianee ga. ¹⁵ Gacxe waa zeene gnab ne lo Dios, zeene goolniegaa ne

me, zac gnee ne stib diidz, per scagaa none gnee ne diidz ne rien ne, mine riengaa grëraa miech. ¹⁶ Sac gon tel stib diidz nonee ne noyoolnie ne Dios, nodeed ne xquizh lo me, zha dien yquiab grëraa zha ne ndxie ni rien zho pe rnee ne? ¹⁷ Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

¹⁸ Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, ¹⁹ per zeene zo naa zaatne ndxie grë zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, ledle so naa gne naa tsii mil diidz, ncuaane ni tib choot guien.

²⁰ Bets, bzian, golguien sca golsaan guielmëedlas qui. Zacgaa gac to mëedlas per nêz lo guielntseeba, sangue xpensar to golgac zig zha ne biao biinile.

²¹ Gotsaa gwi ne ganle zha nac stib diidz. Zhobnee lo Xtiidz Dios rëb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guien zhow. ²² Gase naganle rlu rquiind stib diidz co par grë zha ne rnalole Dios, sinque laaw rquiin parne grë zha ne nod xnëz me gan zho ganle nli no me. Zha ne nole xnëz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me. ²³ Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lëëtaa mine guiab zho rzhinle guic to sca rac to. ²⁴ Laa telne grëse to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grëtaa mine nonee to, haxta ziaa zho biini zien zho ne nli tib miech ngoopdol nac zho. ²⁵ Zigse quianee to laa zdoos zho lozh yguudz, laa zho ted yquitsgzhib zho gnab zho perdon lo Dios; ga guien zho ganle ne nli nacie me to.

²⁶ Bets, bzian, golguien sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsoguicraa los demas zho zha racladz Dios gban zho. ²⁷ Zeene gnee zho stib diidz, none choptaa zho, tson>tagaa zho gneew. None tibga zho gnee, ni rquiin zole zha ne gnee pe nac diidz co. ²⁸ Laa telne guien zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

²⁹⁻³⁰ Scaque zha ne cteed xtiidz Dios, choptaa zho, tson>tagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grieelo gnee zha co. ³¹ Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacnguielraa zho lo Xtiidz Dios.

³² Zha ne sca rteed xtiidz Dios, none cseed zho gnabey zho zho, cuëz zho nieeda gdzin hor ne gnee zho. ³³ Sac tel Dios, rdziladzd me guiots gnaaz pe cos, rdziladzd me ncuaane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

³⁴ Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios. ³⁵ Ncuaane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. ³⁶ Zaacse sca golgac, golguien ganle grieelod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

³⁷ Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew.

³⁸ Zha ne gliladzgaaw, maase gliladzd zhow.

³⁹ Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz. ⁴⁰ Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

15

Brieëban Jesús

¹ Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa riladz tow.

² Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

³ Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios. ⁴ Gocnan to ganle zeene goc tson ngbidz pqueets zho me laa me brieëban, zigne raquetaquew lo Xtiidz Dios. ⁵ Len dze ne brieëbanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. ⁶ Güey me güeyted me zaatne ndxie ndziibsrää gaay gayoo zha ne nole xnëz me, grëse zho gon me; ndal zha co bii mban niina. ⁷ Bded ga gonaque Santiagw me, ni biire güey me lo zha ne bzënie me ga stib; ⁸ goc palal tiempa, lega naclew haxta lo naa brieëquia me. Tel naa gon, rrieëquia nac naa zig tib mëed ne rzamëed, ⁹ lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëëb xnëz Dios. ¹⁰ Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyuu naa lo mine noyuu grëraa poxtl; per rned naa togo naase quiayuna, sinque me noyacnie naa rrieelo noyuu naaw.

¹¹ Laa naa rzet min rii, per nacda par glu dien cho nroobraa noyuu xtsiin me, sac mine mazdraa non nac ne noseed no miech Xtiidz me; lëew biadseed no to, ni bliladzdgaa tow.

¹² Nana sca, racladz naa gnë to dien zha nacne no bla to i rnee nlid grieëban mengut; led wen wen name gocnan to brieëban Jesús. ¹³ Telne rnee to nlid grieelo grieëban mengut, rrieëquia gon rnee to ga nlid brieëban Jesús. ¹⁴ Nana telne brieëband me, paat rquiind mine dzigo noseed no miech nu, zhlëse znu noteed-xtse ne rnalo ne Dios. ¹⁵⁻¹⁶ Rrieëquia noquidiee no miech, sac gon tibaque rnee no lo zho bleëban Dios Jesús; ni telne nli rrieëband mengut, ye Jesús dzigo bii noliu me niina. ¹⁷ Stiba, telne nlid brieëban me, zhlëse dzigo rnalo to me ycaania me to; telne nlid brieëban me, scase bii zëëb to grë xtol to. ¹⁸ Grë zha ne bliladz me, zha ne nacle mengut niina, lëë bnitlole zho ga dzigo. ¹⁹ Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

²⁰ Per gacnan to sca ganle, j brieëban Jesús! Me nac men ne glopaa brieëban lo grëraa miech guizhiu ne grieëban. ²¹ Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús bиаad, por mine been me grëse mengut laa zho none grieëban. ²² Zigne grëse miech ret porne ziaad zho lo xtií Adán, scaquegaa grëse zha ne gbig lo Jesús, zгаа zho tib guielmban ndzon. ²³ Ible sca none gaca, ndion ne ganle laa Jesús brieëbanle, ni zeene laa me guiaad, grë zha ne no xnëz me laa zho grieëban. ²⁴ Gal dze co laa me lozh gnitlo mendox ni grëraa ma ne nacie ma, dzigo laa me csañ grëse miech ne no xnëz me ladznia Dios men ne nac Pxoze me; dze cotaa nagon laa Dios guñ guielwxtis. ²⁵⁻²⁶ Sac ible Jesús nonabey haxta gdziñ dze co, zeene laa me gnitlo grëse meyozh ne rlëë lo me; zig nac guielgut, lëew nac mine lultm gnitlo me. ²⁷ Zigne zhobneeque lo Xtiidz Dios, ladznia me biaan grëtaa ncuane no; per guiabd ne togo ye Dios no ladznia me, sac gon Dios nac men ne bdeeda lo me. ²⁸ Gacxe waa, zeene gal dze ne laa me sca lozh gnitlo grë zha ne rlëë lo me, Pxoze me nac men ne gnabey lo me; sac gon men co gocnie me been me gan, ni men co nac men ne rnabey.

²⁹ Nana, ne rnee to i nlid rrieëban mengut, ¿pe nac dzigo no zha ne rrobnis xcuent zha ne gutle? ³⁰ Telne niaca mine nlid grieëban mengut, ¿pe nac nadien znu gzataa dze quiabeeladz no no lo grë guielxtseeb? ³¹ Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw. ³² Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nlid grieëban mengut, zhlëse

dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “¡Golgotsaa dioow ne, golgotsaa dio ne, benque guielgutse quiambiaaz ne!”

³³ Per lëda ga gon. Zha ne zienal min co, ib yquiaadiagde to xtiidz zho, zeena gacde to zigne nac zho; zigne zëëbaque diidz: “Telne ndzinlid miech ne ctsieelsa luu, zdzin dze ne gac luu zigne nac zho.” ³⁴ Golquix biini sca, gunctaldraa to xtol to; pe rtoladzde to, golwi ganle no bla to i gard sëëb xnëz Jesús, haxta ni riend zho zhapaa nac Dios.

Zha grieeban mengut

³⁵ Nana, no to gnë: “¿Per zha grieeban mengut? ¿Zhazhe nac cuerp ne grieebannie zho?” ³⁶ ¡Aque nxen wnabdiidz co! ¿Pe rande to zig nac grë midz ne rio liu rac bni, rlozhse rnitlo midz co dzigo laa guizh ne naca ga rlan? ³⁷ Tel rnee to zha nac cuerp ne grieebannie zho, golwi ganle zig nac zhobxtil, zig nac grëragaa midz, ¿pe niacxe zigne nacsew riow liu, scasaque naca rlana? Led zeene laaw rlan, guizhle naca. ³⁸ Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan. ³⁹ Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. ⁴⁰ Grë anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. ⁴¹ Gotsaa gwi ne ganle, zig nac xbiini ngbidz zhaa naca lo xbiini mëë, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna. ⁴² Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieeban. Cuerp ne rdziaap ne niina, ncuaane tib rded naca, sangue cuerp ne grieebannie ne gal dze co, led yedraa min co nitlo. ⁴³ Mban nac cuerp rii, sac rzacnëw, reta; sangue cuerp ne grieebannie ne, tib cuerp ne gdzind dze nitlo gaca. Lega zozhidz cuerp rii, sangue cuerp co tib cuerp ndip ndaan gaca. ⁴⁴ Cuerp ne rdziaap ne niina, tib cuerp ngoopdol naca, sangue cuerp ne grieebannie ne, min co gac tib cuerp ne gban zigne racladzpa Dios. Sac zigne znu no cuerp ne rquiin lo guielmban rii, scaquegaa no mine yquiin stib lo guielmban ne gneedz Dios.

⁴⁵ Golsoladz ganle, rnee lo Xtiidz Dios Adán goc miech ne glopaa biaan ni Dios nac men ne bdeed guielmban lo Adán; sangue Jesús, me rap guielmban, ni zrieelo gdeed me guielmban co lo miech. ⁴⁶ Scaque nagon, glo rgaa ne cuerp ngoopdol ne rdziaap ne niina, dzigora yгаа ne cuerp ne gban zigne racladzpa Dios. ⁴⁷ Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. ⁴⁸ Grëse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieeban laa zho gaple tib cuerp zigne nac xcuerp me. ⁴⁹ Masaque nac ne niina zigne goc Adán, ni scaquegaa zdzin dze ne glu ne zigne rlu Jesús. ⁵⁰ Golgacnan sca ganle, cuerp ne rdziaap ne lo guidzliu rii, grieelod gdzina zaatne rnabey Dios; sac rdzin dze ne rnitlow, grieelod gaca tib cuerp ne guete.

⁵¹ Wen wen golzoobdiag mine gne naa lo to nu ganle, wlaltaa choot gard gacnana: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsë Dios xcuerp ne. ⁵² Znuse gac min co zig nacse zeene riab tib belye; lëë min co gac lultm vult ne ycuudz xanjl Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdzindraa dze nitlo; scagaa grë zha ne bii zomban, hor co laa xcuerp zho gdzëë. ¡Grëse ne dziaap tib cuerp cub! ⁵³ Ible sca none gaca, ib none gdzëë xcuerp ne gaca tib cuerp ne xind, tib cuerp ne gdzindraa dze nitlo. ⁵⁴ Zeene gac min co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey. ⁵⁵ Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?” ⁵⁶ Grieelodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane

rrieelo rsacsi guielgut ne niina, ni por ley rlu pe nac xto| ne. ⁵⁷ ¡Xquizh xquie|nzaac Dios pxeel me Jesús, sac gon por Jesús zrieelo grie ne lадznia guielgut!

⁵⁸ Bets, bzian, ne nac to zha ne rleyne naa, golguien sca tibaque dziits golso lo Xtiidz Dios; zig zie dze goltsoxcoraa golgun xtsiin me, benque nanle to ganle, grēse xtsiin me mine rdziuun ne nacda ncuane zhlēse.

16

Gon ne guey Jerusalén

¹ Laa zig nac gon ne noyacro guey gac xyudar grēraa zha ne no xnēz Jesús Jerusalén, laa naa rso diidz lo to zigne psoque naa diidz lo zha Galás.

² Tel palal run to gan tib len zhmal, lo co golcob mine ral zdoo to gdeed to gac gon co; gzobse dze goltiesana lo zha ne noyunlow. Adel na ganle haxta glansoraa naa i, dzigoraa no to dien zha topa. ³ Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; ⁴ ni tel rquinpagaa ye naa ga, dzigo na maase ga naa ganie naa zho.

⁵ Len dze rii no guic naa gateed naa nēz Macedon, dzigo gale grie naa glanso naa lo to i. ⁶ Nend zbēz naa lo to i palal dze, togo iquegaa teed naa len mēē nal ne ziaad; ni racladz naa zeene gbi naa i, siguiel to gun to xyudar naa tel pa nēz ne no ga naa len dze co. ⁷ Telne zneedz Dios diidz cuēz naa lo to grē len dze co, zbēz naa, sac racladz naa tib guialteed naa lo to i. ⁸⁻⁹ Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbēz naa nu haxta ted lni Pentecostés. Nligaa ndal zha ne no liaadz co, per scagaa ndalaeque zha ne rtsidila.

¹⁰ Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuēzlo me, zeena tsonley zdoo me; golgan ganle, ye me quiayun xtsiin men ne rnabey ne. ¹¹ Golguien csanwinde to me, sinque golgap me respet; zeena zeene glanso me lo naa nēz rii ine nley gac me csoladz me zha biaadted me lo to i. Laa naa quiambēz glanso me nēz rii, gza me zha ne guiaadnalraa zhits me.

¹² Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me grieeloda niina. Rien naa zeene gdeedtaaw diidz, ible ziaad me ziaadgan me to.

¹³ Bets, bzian, nsin golso, tibaque gonallo Dios. Ib ctsēēde to xtiidz to, tibaque goltsoxco tsienal to mine rnabey me. ¹⁴ Ncuane guntaa to, golconie guic to gun tow porne rleyne to Dios, porne rleyniegaa to samiech to.

¹⁵⁻¹⁶ Laa naa rso diidz lo to, niowse gon golgac lo grē zha bets ne, zha ne run xyudar to i; zig nac Stef grē menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nēz Gres i grē menlidz me; ni desde dze co laa me pquiabladz tibaque squi quiayun me xyudar grēraa zha ne no xnēz Jesús. ¹⁷ Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grēle lo to ga gon naa. ¹⁸ Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

¹⁹ Grēse zha ne no xnēz Jesús nēz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grēraa zha ne rcaalsa lidz zho rieseed Xtiidz Dios, grē zho laa zho rxeel bdiuzh lo to. ²⁰ Scagaa grē zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

²¹ Nu laa naa cso schop lan xtudz naa lo to, ni golwi ganle naazhal yquiw: ²² Grēse zha ne gon nēd gleyniepaa Jesús, miech ndziibdeele ga nac zho. ¡Ni ile gon ziaad me! ²³ Mese nac men ne gacien to, me nac men ne no zhixco to, sac ne nligaa rleyne me to.

²⁴ Niicle naaw rleyne naa to, sac gon tibaque nac ne ngab ne lo me. ¡Lēēd bii gdzieel ne sca!
Pabl

BROP GUITS NE PXEEL PABL LO ZHA CORINT

¡Diuzh to grëse to!

¹ Naa nac Pabl, grop no bets ne Timoté, laa no rquia stib guits rii rxeel no guiedz Corint i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

² Dios men ne nac Pxoz ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

³ Bets, bzian, golgotsaa gwi ne ganle, ¡zha ndzontaa Dios, Pxoz Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne ⁴ lo grëtaa guielnë ne rdieed ne. Ni laa me rchoobladz zdoo ne gon, zeena scagaa grëraa zha ne rdzian ne no guielnë, mban rac zho, guio ne guiochoobladz ne zdoo zho zigne rchoobladzaque me zdoo ne.

⁵ Zig nac niina, nroob guielnë ne nodieed no loxaque ne riladz no Jesús, per scaquegaa ib rsaand me no tibaque nochoobladz me zdoo no. ⁶⁻⁷ Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grë guielnë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guielnë ne nodzian no nu niina. Ni me gon nac men ne gacniën to glëb to gan tow.

⁸ Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuaane lëbdraa no lo grë guielnë co, tibaque rdzieets no bod gataa niet no. ⁹ Masaque bzhiaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grëtaa guielnë; sac tel me, haxta men gut rbeeban me.

¹⁰ Ni nligaa blee me no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no, ¹¹ totsaque gacnie to no tibaque gnab to lo me gacniën me no. Zeena, tibaque gac ne grëse ne gdeed ne xquizh lo me.

¹² Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiayacniën me no znu mban no. ¹³ Grë mine rnee no lo guits ne zixeel no lo to, niapse diidzliw, ni mine rgobey no grieelo guien to min co rquiaa no; gane racladz naa gdziñ dze ne guien tow. ¹⁴ Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

¹⁵⁻¹⁶ Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vuelt ne nionley zdoo to. Lozh ga, ine niowse nzonëz to naa nia naa nëz Judé. ¹⁷ Ni pasëë naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow. ¹⁸ Dios zobwi ganle rdziuunscad no. Mine rnee no, rdziuun now.

¹⁹ Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew, ²⁰ ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me. ²¹ Ni lëë Dios co gon nozhixcuaa lo xquielmban ne, laa ne ngab xnëz Jesús niina; me bzooblo no nonee no Xtiidz me. ²² Haxta pxeel me Espiritu Sant zdoo ne, rrieequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneelee me gneedz me lo ne.

²³ Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladzd naa loxaque guialquiago naa to i, lozh ga mban gac to. ²⁴ Guiabde to sca togo bod racladzd no guiaad no. Nli rquiindraa to guidnee no lo to zha gliladz to Dios, sac dib zdoole to rililadz to me; per laa no racladz ine guiaadlonley no zdoo to i. Golguien sca, min co racladz no, racladzd no guiaadloguielnē no to.

2

¹ Min co nagon bend naa ne nial naa, ² sac nonguielda ga coguielnē naa to, ni to nac zha ne rgonley zdoo naa. ³ Ne racladzdaxe naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlansose naa, laa ne ndzio ne guielbley, lel guielnē ndzio ne. Ni nan to ganle, tipse nac guielbley ne rdziaap ne; ĩniacxe zrieelo nley gac to telne ran to mban rac naa?

⁴ Tel gan to ganle zeene pxel naa guits co, ĩne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguielnē naa to; sinque laaw pxel naa, zeena xixcuaaniob lo ncuaane ndzinlid ne noyac i; ni laa naa ben min co sacne rquia zdoo naa to. ⁵ Zeene bin naa zha nac dol ne noyūn zha co i, zig rne naa ga: bio naa guielnē; per rien naa mazdraa nroob bio to guielnē. ⁶ Nana gon, ne squi laa to pteedle zho tib caxtigw, ĩlëlew ga na! ⁷ Golguiaanladz mine been zho ga, golneewen lo zho stib, golchoobladz zdoo zho zeena gacmband zho. Sac telne csaanladz to zho, nend scase lozh guiuu zho lo xquielnē zho. ⁸ Rnab naa lo to, golleynie zho stib, zigne rleynieque to zho glo.

⁹ Ni stiba, laa naa pxel guits co lo to, zeena dien pe zon to diidz gun to mine rne naa lo to ga. ¹⁰ Golguiaanladz mine been zha co sca, tel naa laa naa biaanladzlew. Jesús zobwi ganle laa naa benle zho perdon, zeena gbiire zaacse gac to; ¹¹ ni scagaa gleyd mendox gungüet ma ne. Led nanle to ganle, zombëzle ma dien zha gnitnëz ma ne.

Tibaque noxco Pabl cseed miech Xtiidz Dios

¹² Bded ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niun naa xtsiin me ga. ¹³ Nac diidz ga ndzieelo naa bets ne Tit, per zeene gon naa bdzind me, biotiblidraa guic naa. Nacne brique naa ga bia naa nëz xtan zha Macedon, biaguib naa me.

¹⁴ Per, ĩquizh xquielnzaac Dios! Sac zaatne ziotaa no, Jesús ner lo no, me rlu ganle rdziuun no gan lo grëtaa ncuaane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuaane nex rlaa. ¹⁵ Haxta no, masaque nac no lo Dios zig tib ncuaane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë zha ne ngable xnëz Diosa, zigtagaa lo grë zha ne zie nëz ne nitlow. ¹⁶ Par grë zha ne nole nëz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambëz zho; sangue grë zha ne nole xnëz Dios, rzac zho no zig tib gox nex ne runcsoladz zho guielmban ndzon ne no ygaa zho. ĩNi led choïd zha ne gon grieelo gun dziin rii! ¹⁷ Nu rquiin zha ne dib zdoo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

3

¹ Nana ne znu rne naa, guiab to bod yeque no rdziuun zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuun nond no no, niicle peet diidz rquiindgaa no. ² Led yed no rquiin pe diidz ne dzeey no, to rlu cho nac no. Grëse miech ne gan zha notsëe Dios lo xquielmban to, gase gunbey zho no, ga glu pe nac dziin ne rdziuun no. ³ Gane rrieequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne

nguiamban. Ni pquiindгаа me pe lo guits ne nquiaa mew, sinque laa me pquiaaw zdoо to.

⁴ Ni ndionpaa no nli scaw, sac Dioszhal rluw, ne nac no zha ne ngab lo Jesús. ⁵ Per guiabd ne togo nose rrieelo rdziuuñ grë mine rdziuuñ no, led scada, Dios nac men ne racniën no rdziuuñ now; ⁶ sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, lëë gdib rnabeya guet grëse miech ngoopdoł; sangue Espiritu Sant, laa me rlu zha yгаа zho tib guielmban ndzon.

⁷ Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grë zha ngoopdoł. Biinidoo ne biaan lo Moisés dze co, haxta lëbd lo zha Israel gwi zho lo me, per dzega dzega biuu biini co. ⁸ Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, jmazdraa gon nroob nac guielndzon rii! ⁹ Sac gon, tel scataa blu xquielndzon Dios zeene biaan guet grë zha ngoopdoł; mazdraa dzigo nroob nac guielndzon ne rlu niina. ¹⁰ Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina. ¹¹ Ni stiba, bza dze ne been ley co dziin; sangue xtiidz cub me, gdziñd dze ne gdzëëw. Gacxe waa, mazdraa nac biini ne ziaadniew.

¹² Ni ne ndionaxe no waa gdziñd dze ne gdzëëw, gane tiblque laa no noneew lo miech; ¹³ rdziuuñd no zig been Moisés. Sac tel Moisés, pquia tib lë lar lo me dzigo gond zha Israel zha bñitlo biini ne biaan lo me ga. ¹⁴ Ni rrieequia ye lo grë zha Israel ga sca bdze, gacxe waa, haxta lo nadze riënd zho zha zhobnee lo Xtiidz Dios, mine psan me padzeela. Ible riënd zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho. ¹⁵ Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdoо zho.

¹⁶ Per tel zha ne csaan grë guielntseeb, dib zdoо zho guien zho cho nac Jesús, ible zlit me lar co lo zho; ¹⁷ sac gon, miech ne nacniele zhiEspiritu me, led yedraa zho ngadoo lo ley gol co. Ni ndion ne ganle, meque ga nac Espiritu. ¹⁸ Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspiritu me lo xquielmban ne, zigse zie dze noluraa me zha nactaa guielndzon ne rap me.

4

¹ Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

² Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuaane nacdraa Xtiidz me. Me zobwi ganle niapse diidzli rnee no, niicle grëгаа zha ne rdziuuñbey no, nan zho rquidieed no.

³ No grë zha ne ib nëd tsoguiç zha nac zhiwseed Dios mine nonee no; sac lëëque grë xtoł zho notse lo zho, laa zho zie nëz ne nitlo zho. ⁴ Nëd zho gliladz zhow, sac ible mendox (ma ne nonabey lo guidzliu rii) noyuuñ ncow xquielrien zho; gane riënd zho ycaania zho Xtiidz Ndzon Jesús, men ndzon ne bиаadlu ganle zhapaа nac Dios.

⁵ Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. ⁶ jNe nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga bиаadlu Jesús.

Rsaand Dios zha ne dib zdoо rnalo me

⁷ Ne nlipaa, lega nase no zig nac tib guies yu ne notsow grëtaa ncuaane ndzon ne zieneedz Dios lo no. Gase na ganle rlu, Dios naccheņa grësew, peet nond no loxaque nose.

⁸ Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd. ⁹ Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib. ¹⁰ Zaatne ziotaa no, quiana miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nacie no. ¹¹ Gzataa dze noxtseeb no gut miech no, loxaque ne rdziun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. ¹² Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to. ¹³ Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhobneeque lo Xtiidz me, zaatne rnee: “Bliladz naa mine rnee me, gane rne naaw.” ¹⁴ Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziinne Jesús ne lo me.

¹⁵ Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me. ¹⁶ Mincoxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racnubraa, laaw riaanmberaa nëz lo Dios. ¹⁷ Ni stiba, niicle ne znutaa nodzian no grë guielnë rii, per ncuane tib rded naca, led ncuane rnada; sac gon, zeene laa no lozh dieed grë min rii, mazdraa nroob nac lo guielndzon ne ygaa no, ni mincosi gdzindraa dze lozha. ¹⁸ Gacxe waa, choot rdziuncasd grë ncuane quiazian no lo guidzliu rii, sinque laa guic no nonie ygaa no grëtaa guielbley ne no gbaa. Sac grë ncuane ran ne niina, ncuane tib rded naca; sangue grë ncuane gard dzian ne ga, led yedraa min co nitlo.

5

¹ Ni ndion ne ganle, zeene laa xcuerp rii ne nitlo, laa Dios gneedz stib mine gdzindraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne gbaa. ² Blactaa guielnë ne rdieed ne niina ne rdziaap ne cuerp rii! Gacxe waa, quiambiaaznë ne gdzin dze ne gneedz me stib cuerp co. ³ Sac gon, led niapdse espíritu gdzin ga, sinque none gapa cuerp. ⁴ Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz guet. ⁵ Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacie ne.

⁶ Tel no, min co nagon quiambiaaz no; ndionle no laga mbannie no cuerp rii, grieelod ygaa no min co, grieelod gdziin no zaatne no Jesús. ⁷ Nli rdziand now niina, per dib zdoo no riladz no ib laaw none gac. ⁸ Gacxe waa, haxta nley rac zdoo no quiambiaaz no gdzin dze co; rziaac no tebaa laa no briele len cuerp rii, zeena guiobannie no Jesús. ⁹ Min co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziin no lo mew. ¹⁰ Sac gon, grëse ne zdzin dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga ygaa ne mine guioquia ne tib tib ne.

¹¹ Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

Zaacse golgac lo Dios

¹² Grë mine blozh bne naa nu, zig bnele naa ga: nacda par dziunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho. ¹³ Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziun no. Sangue no, ndionpaa no

riotsd guic no; laa no rdziuuṅ grē miṅ rii, sacne noxco no cseed to Xtiidz me. ¹⁴ Laa no nodziuuṅ dziin rii, sacne rleynie no Jesús, maase tel̄ zhataa rzac miecha.

Ndionṅpaa no Jesús bgaā guielgut ne nioguaḷ ne; scaquegaa, ndionṅ no niina ne laa no bziaab xnēz me, rrieequia gutle no lo grētaa ncuaane ndzinlid ne bdziuuṅ no glo. ¹⁵ Gacxe nagonṅ waa, grēse zha ne rzēēb xnēz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guienṅ zho ganle, me gut bdiizh me xtoḷ zho (ni brieaban me), par yгаа zho tib guielmban ndzon ne gdziṅd dze lozh.

¹⁶ Gotsaa guienṅ sca, zha ne nole xnēz Dios, ziaacd ne zho zig rzac grēraa miech zho, rzac zho peet nond zho. Tel̄ naa glo sca bzhaac naa Jesús, masaque bzob naa cholze miech nac me; sangue niina, ndionṅpaa ne ganle cho nac me. ¹⁷ Sac gonṅ, grēse zha ne ne nlipaa dib zdoo rliadz Jesús, stible miech nac zho. Grēse tel̄ zha goc zho glo, laa miṅ co bdedle. ¡Ncuble nac lo xquielmban zho! ¹⁸ Ni loxaque Diosse gonṅ zrieelo sca gunncub miech. Sac gonṅ, me pxeel̄ Xpēēd me Jesús biaadtizh grēse xtoḷ ne, laa ne biaanwen lo me. Ni scagaa niina, me bzo no znu quiaseed no miech, zeena gacnaṅ zho zha grieelo guiaanwen zho lo me. ¹⁹ Znu gonṅ naca: Laa Dios nodeed diidz niina guiaanwen miech lo me, gunquizhd me zho tel̄ pe nactaa xtoḷ zho, totsaque gliladz zho cho nac Jesús. Miṅ rii nagonṅ bzo me no nonee no lo miech. ²⁰ Golganṅ sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguienṅ ganle, rrieequia gonṅ Dioszhal rso diidz rii lo to. ²¹ Sac gonṅ, Dios bzo Jesús bgaadz me grēse xtoḷ ne, niicle ne ni tib doḷ rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grēse xtoḷ ne, psanwen me ne lo Dios!

6

¹ Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguienṅ golgon miṅe nonee me lo to niina. ² Lo Xtiidz me, no tib zaatne znu zhobnee:

Lēētse lenṅ dze ne nosilaa naa miech, laa to bnaab gacnie naa to.

Lēētse lenṅ dze ne rdeeda diidz gac miṅe quiambēz to, laa grē xliaadz to blanso lo naa. ¡Ni lēē dze co nu nagonṅ bdziṅ! ¡Nadzegazh quiambēz me gbig miech lo me, zeena csilaa me zho!

³ Dziin rii quiadziuuṅ no, choot quiadziuuṅctald xtoḷ miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenē zho Dios. ⁴ Zigtaa ncuaane rdziuuṅ now, zigtaa grēgaa ncuaane nodieed now, rlu no ganle ne nli xtsiinṅ me nodziuuṅ no. Tel̄ pe nactaa grē guielnē ne nodieed no, tel̄ pe nactaa grē xliaadz no, niicle no zaatne rsacsi miech no, per choot rrietede. ⁵ Blactaa zaatne rguinṅ zho no, zaatne rsioogyu zho no, zaatne rriee zho ndal zho racntseeb zho lo no. Blactaa rdib rdzaag no rdziuuṅ no dziin, no zaatne rriee zhimcaalo no dipse guieel, no zaatne retgbin no.

⁶ Ne nligaa rdzioxco no ndzinli mban no, choot rrietede, wen wen rdziuuṅbey no zha nac Xtiidz Dios, sca ranṅ miech ganle ne nli Dios pxeel̄ no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

⁷ Niapse miṅe nac diidzli miṅ co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuuṅ no dziin. ⁸ Choot rsaand miṅe pso Dios no nodziuuṅ no, maase niicle miṅe runtaa miech no. No zaatne runnon zho no, nogaa zaatne rzhidznie zho no; no zaatne rneenē zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech. ⁹ Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. ¹⁰ Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grē guielnzaac ne rgaa miech zeene rnee no lo zho. Rdziaapd no grē ncuaane rap grēraa miech, per ncuaane rdziaap no, nroob nona.

¹¹ Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleyne no to. ¹² Telne rzac to gard gacpaa ne tipse, per led nod naca. Tel no rleyne no to, sinque to gon rien no laglaase rleyne to no. ¹³ Ne nligaa peet rqueets naa lo to, laa naa rne lo to zig rnee tib dad lo mëed. ;Scaquegaa to, golsiguiel zaacse golgac!

Zhaa nac biini lo guielcow

¹⁴ Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. ¹⁵ Sac gon, tel Jesús, ;niacxe tipse nac me grë me mendox? Scaquegaa grë zha ne nole xnëz mew, grieelod tipse gac zho grë zho zha ne no lo dol. ¹⁶ Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sënie naa to.

Naa gliladz to, ni scagaa to, lo naa ygab to.

¹⁷ Gacxe waa, rbiire me rnee me:

;Golriee lad grë zha qui, golbiche lo zho!

Gunde to grë ncuane ndzinlid ne run zho,

golbig lo naa, naa ycaania to.

¹⁸ Naa gac Pxoza to grëse to,

scagaa to, laa to gac xpëed naa.

Lëe xtiidz men ne rnabey to nu.

7

¹ Bets, bzian, gotsaa gwi ne ganle zha nactaa ncuane psan Dios diidz ygaa ne. Gacxe waa, golgotsaa lozh grieë ne lo grë zhgab yozh, lo grë ncuane ndzinlid ne runctal xtol ne. None zigse zie dze dzioxcora ne gban ne zigne rdziladz me.

² Ne nligaa, zaacse golgac golcaania no stib. Tel pe guielne ne noded to, tel zha rzac to, to bguiba; zig nac no, choot noquidiede to, choot nosacside to. ³ Guiabde to togo noquiago naa to nu, laa naa nile ganle dib zdoo no rleyne no to. Len ngbidz ne gbantaa no lo guidzliu rii, ib csaand no to. ⁴ Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoo naa; haxta riats naa ne runbey naa to.

⁵ Wlal ne blanso no Macedon nu, ni tib lë notiblid guic no; lala noxtseeb no lo grë zha ne quiana no, lala nonieque to guic no dien yo to. ⁶ Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, ⁷ blansonie me diidz zaacse pcaania to me. Per nli rley no bdzion ndzinlile mban to, në me bio to guielne grë len dze ne bded ga, ni në me nonie no guic to, quiambëz to tebaa zha ganniob to lo no stib.

⁸ Zeene pxel naa guits co lo to glo, mban goc zdoo naa sac bien naa ib zgoguielnëw to, sangue niina racbandraa zdoo naa; sac rien naa niicle ne bio to guielne tib bla dze, per na laa ncuane co bdedle. ⁹ Gacxe waa rley naa niina, per guiabde to togo rley naa bio to guielne, sinque rley naa gon naa laa to wbiire wbig lo Dios por guielne ne bio to ga. Ni sca nagon racladz Dios gun grë zha ne ngab xnëz me zeene runctal zho xtol zho, gane rienpaa naa led psacsid no to ga. ¹⁰ Zeene Dios rdeed diidz sca rio miech guielne, lo guielne co laa zho rbig lo me rsnmbe me zho lo xtol zho; rsaan zho tel pe nac ncuane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielne co. Laa grëraa guielne ne ran miech, zig nac zha ne nod xnëz Dios, loxaque rlozh runmbana zho, laa zho bii zie nëz ne nitlo zho. ¹¹ Golgan ganle, pa lotaa bzhixcuaa to niina ne bio to guielne co. Haxta baa to biini, bioxco to blee to zha co lo dol ne quiayun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gondzedraa to zho. Niicle ne

gocladz to tebaa i zo naa nedz naa rson dien zha niun to; per tibaque beenquish to zho mine been zho ga. Wen ne sca been to, ga blu to ganle rdziguiende to dol ne been zho.

¹² Ne nligaa tibaque noxco no zaacse gac to. Zeene pxeel no guits co lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to. ¹³ Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grëse to zaacse blëzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina. ¹⁴ Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to. ¹⁵ Rleynie me to, rzac zdo me zeene rsoladz me grëse to ndooladz goc to pcaania to me, ni bin to diidz been to mine bnabey me to. ¹⁶ ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

8

Dib zdo to goldeed gon

¹ Bets, bzian, laa no gzodiidz lo to ganle pa lotaa quiayacnieñ Dios grë zha ne ngab lo Jesús nëz Macedon nu. ² Nli nroob grë guieñe ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuaane rap zho, per nroob gon ne beenlo zho. ³ Laa naa rnew lo to, sac naazhal gona. Ne nligaa, dib zdo zho bleeladz zho grë ncuaane bloogon zho; ncuaane rgaataa lo zho laa zho bdeeda. ⁴ Dzigo bnab zho lo no gdeed no diidz ye xgon zho guey lo grë zha ne nacgrë ne, zha ne guieñd pe yquiin. ⁵ Ni lëdsew ga, bzee zdo no zeene bdzion no blozhse psan zho zho ladznia Dios, laa zho wbig lo no në zho, mine csiaabtaa Dios guic no gnabey no zho, zun zhow. Ni lalnu gon güeynieñd guic no gun zho grëtaa min rii.

⁶ Niina ne bdzion no znutaa biabgan zho nëz rii noyunlo zho gon rii, nacne rdzieets no lo Tit siguiel me guiaad me nëz lo to i stib; zeena lozh gunlo to gon ne bnabeyle me to i quiayunlo to. ⁷ Rdziunbey no to: dib zdo to rnalto to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdo to goltsoxco golgunlow.

⁸ Laa naa bzeta lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grëraa zha ne nacgrë ne, led loxaque diidzsew. ⁹ Golwi ganle, zig nac Jesús pa lotaa noxco me ne. Niicle ne me nacchen grëtaa ncuaane no, per bdeed me diidz goc me zig tib zha ne peet rapd; ga bgaa ne grëtaa guieñzaac ne rap me. Laa me been min co sacne rleynie me ne.

¹⁰ Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to. ¹¹ Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palalaa ncuaane rgaa lo to tib tib to, dib zdo to goldeeda; ¹² sac zeene dib zdo miech rquiabladz zho cogon zho, tel palalaa mine ygaa lo zho, scaania Diosa. Nanle me palal ncuaane rgaa lo tib tib miech, gnabd me ncuaane ni quianied zho.

¹³ Sac nacda ne ygad to grëse ncuaane rap to lo stib zho, lozh ga guiaanmban to; laa zha yquianie grësew. ¹⁴ Led scada. Laa min rii rac, zeena grëse ne lalga ncuaane yquianie ne. Niina ne rgaaw lo to, goldeed palala yquiin grë zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacgaa ncuaane quianiede to. Sca none dziuunlsa ne xyudar zha ne nacgrë ne, zeena zig rne naa ga: lalga ncuaane yquianie ne. ¹⁵ Golsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

Laa Tit guiaad i stib

¹⁶ Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. ¹⁷ Zeene bnab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. ¹⁸ Nêz rii, no tib bets ne, nroob yudar quiayun me nogaaz Xtiidz Dios lo miech; zaatne rcaalsataa zha ne no xnêz Dios nu, grêse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; ¹⁹ ni meque bzooblo zho, sênal zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grê zha ne guiend pe yquiin. Nu rlu ganle pa lotaa men nroob nac Dios, sac me quiayacniën ne ne laa dziin rii noyac. ²⁰ Gza no bets co guio, zeena gzadolzdoo miech guiab zho nend zha lega zhiën no palal gon rii, sac gon nligaa nroob naca. ²¹ Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacre sca guio no gza no.

²² Rdziunbey no stib bets ne nu, rdzian no nli dib zdoo me rleyne me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrê ne.

²³ Tel nand new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grê zha ne ne no nêz rii pxeel zho, dib zdoo zho noxco zho mban zho zigne rdziladz Dios. ²⁴ Golguien sca, gza zho zigne ziaad zho lo to i, niowse golcuêzlo zho. Gollu ganle ne nli dib zdoo to rleyne to zho, zigne rleynieque to naa; zeena gacnan grêraa zha ne nacgrê ne nli mine rnee no zeene rzodiidz no lo zho zha nac to.

9

¹ Nanle naa, rquiindpaa gni naa lo to zha gdeed to gon ne gaclo nu gac xyudar grêraa zha ne nacgrê ne, sac laa to noyunlolew. ² Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nêz Macedon nu, rne naa lo zho: wdibizlaa psilo to nêz Acay i quiayunlo to gon co. Mincoxe waa, zeene bin zhow, nzian zho pquiabladz laa zho bdeeda. ³ Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. ⁴ Sac gon guielto ga grieequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to. ⁵ Min co nagon, ni naa mazd cxel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuaane cogon to, dib zdoo to goldeeda. Golguien zha cogon to. ⁶ Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. ⁷ Tib tib to sca, golcobey palal ncuaane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuaane rgogon zho, rleyne Dios zho. ⁸ Ni me ne nac me men ne rrieelo rneedz grêse ncuaane rquiin, me nac men ne gneedz grêtaa ncuaane yquiin to; ni haxta ziaan mine gdeed to gac xyudar grêraa zha ne nacgrê ne. ⁹ Zigne raquetaque lo Xtiidz me, zaatne rnee:

Zha ne nguzobdiidz lo Dios,

dib zdoo zho rgad zho ncuaane rap zho lo grê zha ne guiend pe yquiin;
ni scagaa sëeb diidz ne miech wen nac zho.

¹⁰ Dios gunlay ncuaane quianie to, ygaaw gdeed to, ni scagaa me gacniën to nroobraa guielnzaac ne yгаа to. Golwi ganle, zha runlay me zha ne ran: Me psan grêse lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

¹¹ Ne nligaa, Dios nac men ne gunnroob ncuaane quianie to, zeena scagaa nrooba cogon to. Golguien ganle, zeene laa no guiosana lo grê zha ne yquiina ga, blactaa gley zho gdeed zho xquizh lo Dios. ¹² Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios. ¹³ Zley zho gan zho grêtaa ncuaane cxeel to yquiin zho; ni

zleyenie zho Dios gan zho ron to mine rnabey Xtiidz Jesús. ¹⁴ Haxta dib zdoo zho gnab zho gacnieñ Dios to, por grëtaa guieñzaac ne gdeed me ga yгаа zho.

¹⁵ ¡Xquizh xquieñzaac Dios, sac gon tel me nroobraa nac guieñzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

10

Rieguial gnabey Pabl lo zha Corint

¹ Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesús, tel niaca mine mezhäl gnee lo to. ² ¡Tebaa gdziñd dze pe yquiaaqui glu naa xquieñdox naa lo to! Zha ne squi rzac lalaque nac no grë no grëraa miech, rnee zho mine run miech, mincoque rdziuun no, ¡tebaa siguiel zho zaacse gac zho, sac racladzd naa tilnie naa zho!

³ Nli miechse nac no, per ib zionald no gacndaan no zigne racndaan grëraa miech guidzliu. ⁴ Sac tel no, choot rnalod grë guiib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guieñtseeb ne racladz mendox gac. ⁵ Con poder rii, zrieelo csioog no ro zha ne squitaa lega rnee, zha ne racndaan nëd zho gacnañ miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús. ⁶ Ni poder co yquiiñ no gnee no lo to lozh guieñ to gban to zigne racladz Jesús; lozh ga, grëragaa zha ne racntseeb, lëëquew yquiiñ no par gacnañ zho ganle zha rieguial gac zho.

⁷ Zha ne rnee i loxaque rzedz yan naa, laglaase ga ran zho, nañd zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guieñ zho ganle cho nac naa. ⁸ Nana no to guiab guieñniatsle nu, sac rlu naa ne naa rnabey lo to. Per nacda guieñniats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nëz ne nitlo to. ⁹ Golgacnañ sca ganle Dios bzo naa, guiabde to togo lega rnese naa par ctseb naa to. ¹⁰ Sac nanle naa no zha ne rnee i: “Gonde to mine rnee meñ qui. Loxaque lo guits ne rxeeñ me squitaa ndox rzë xtiidz me, per loxaque diidza. ¡Zeene zo me lo ne, tib zha yozhsew, per ni rienñd me zha gnee me!” ¹¹ Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

¹² Ib guiabde to, togo ye naa quiayun zigne run zha qui, lëëque lëë zho runniats zho. Tib guieñxen ga, sac gon lëëque zha runnon zho. ¹³ ¡Tel no, choot rdziuunniatsd no ncuane ni nacd no! Ni zeene rnee no cho nac no, per mine bzo Dios no nodziuun no min co rnee no; ni mecxe waa bzo no quiaseed no to.

¹⁴ Ible riogual ne no gnabey lo to, sac gon no glopaa biaad i biadseed no to zha nac Xtiidz Ndzon Jesús; choot noziaabd zaatne rioguald no. ¹⁵ Stiba, rdziladzd no gdaannie no xtsiin stib miech. Laa no bii cseed to lozh tsoguc to zha nac Xtiidz Dios, zeena haxta yele to gun xyudar no ygaazraa Xtiidz me. ¹⁶ Dzigosi nagon laa no guio grëraa guiedz ne ndxie dib nëz qui, guioseed no zho gacnañ zho zha laa zho lo dol; per zig rneque naa ga, guiosaabd no zaatne psilole stib zho, zeena gan miech ganle rdaannied no xtsiin stib zho.

¹⁷ Znu ziaad lo Xtiidz Dios, zaatne rnee: “Zha ne zienie guic xoobneñ lë zho por dziin ne run zho, mazd tsoxco zho xoobneñ lë Dios.” ¹⁸ Sac paat rquiinda ne lëëque ne gunnon ne, mine mazdraa rquiiñ nacne Dioszhal glu zha non nac ne.

11

Nlid Dios pxeel zha qui

¹ Laa naa rnab lo to, ¡golxecw yquiaadiag to mine gne naa nu, niicle tel no mine rzac to rquiind! ² Golgacnañ ganle, zigne rzac Dios to scaque rzaac naa to, ib racladzd naa cho guiaadquidie to. Mine racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleyenie zho, haxta

rdziñ dze ne rtsieelnia zho. ³ Sca none grieequia to lo me; per rdzieeb naa gon nend zha yguib mendox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

⁴ Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetgaa zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. ⁵ Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho. ⁶ Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

⁷ Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. ⁸ To rieguial needz ncuaane nquiin naa, na lel grë zha ne nole xnëz Jesús len dze co, zha co pxeel ncuaane pquiin naa, rriequia bla naa xtimi zho ga. ⁹ Niicle bdziñ dze ne peet guiendraa lo naa, per ni tib lo to ib psodziind naa; lëëtaque len dze co biaad bla zha bets ne zha ne ziaad nëz Macedon, zha co biaadnie ncuaane pquiin naa. Ib peet bnabd naa lo to hor co, ni gdzindgaa dze ne pe gnab naa. ¹⁰ Ni golgacnan ganle, ib tedsod sodiidz naa grë min rii dib nëz Gres i. Ible zun naaw, led yed naa rquidie, sac gon runbey naa zha nac Xtiidz Jesús. ¹¹ Per guiabde to togo rlëënie naa to, racladz naa csan naa to guielto; sac Dios zobwi ganle rleynie naa to. ¹² Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now. ¹³ Sangue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

¹⁴ Ni led ncuaane gzeed zdoo ne ga. Sac ible sca run mendox, no hor rzëëb ma rded ma zig tib xmandad Dios. ¹⁵ Gacxe waa, jzha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per dzziñ dze ne laa zho yгаа guielnëdox ne tsieguial zho, zaatne tsietizh zho grëtaa mine noyun zho i.

Blactaa ncuaane zadeed naa

¹⁶ Laa naa rnab lo to nu stib, golquiaadiag mine gne naa, niicle tel rzë xtidz naa zig rzë xtiidz zha ne rzhinle guic. Nli lega niats gne naa, per golxecw gon tow, sac laa naa gunnon naa zig run grë zha qui. ¹⁷ Led Jesús dnabey znu gne naa, sinque masaque laa naa gun min rii, zig run tib zha ne riotsle guic. ¹⁸ Tel squitaa niats rac zha qui lëëque lëë zho runnon zho, lozhd gool zho lo to dien pe nac ncuaane noyun zho; golquiaadiaggaa mine gne naa nu na ganle:

¹⁹ Conque rzac to name nixbiini to, jzha nac dzigo rdeed to diidz rquiaadiag to ncuaane rnee grë zha yozh qui? ²⁰ jPe ib riende to ganle quianabeyzhoole zho to i, quiasacsi zho to, quiaquidie zho to, quiala zho grë ncuaane rap to, quiasanwin zho to, ya zig zgap zho lo to? ²¹ jHaxta rtoladz naa gon, sac laa ne naa squi nabey to lel zhale squitaa no!

Grë ncuaane riats zho i nac zho, ye naa zrieelo sca gunniats naa naa (znu nagon rac zha ne rzhin guic). ²² jTelne riats zho rnee zho zha Israel nac zho? Yecxe naa waa zha Israel nac naa. jTelne rnee zho lo dii ne bzooblo Dios ga ziaad zho? Ye naa lo dii co zial naa. jTelne rnee zho Abraham nac xmengol zho? Men cocxe waa nac xmengol naa. ²³ jTelne niats rac zho rnee zho xtsiin Jesús quiayun zho? Gacnan zho ganle, naasi xtsiinpaa me quiayun naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guielgut. ²⁴ Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa. ²⁵ Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa len nisdoo; tib vuelt, tib dze tib guieel bzhoobse naa lo nisdoo. ²⁶ Pa lotaa grë dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo

guielgut, zigtaa zaatne nac len guiedza, zaatne nac dana, zaatne nac lo nisdoow, zigtagaa lo grë zha ne laglaase rquiaalo rilladz Jesús. ²⁷ Blactaa rdib rdzaag naa run naa dziin, blactaa guieel ni niip raaguiess naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guiend lar ne piix naa. ²⁸ Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. ²⁹ Zeene ron naa cho tib to racladz guiaan zdoo, mban rac naa zeene rriyelod gane naa lo zho; zeene rongaa naa cho tib to quiayunctal xtol stib zho, ni rriyelod galisqui naaw lo zho, scaque mban rac zdoo naa.

³⁰ Grë mine bne naa nu, nacda guielniats; telne rieguialpaa gunniats naa naa, mazd gzet naa grë mine rlu ganle peet gacd gun naa naase. ³¹⁻³³ Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguib. Per brielod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac PxoZ Jesús, men ne rieguial dziuunnon ne gzataa dze, me zobwi ganle diidzli rne naa.

12

Racniatsd Pabl

¹ Nanle naa nonguielda lëëque ne gunniats ne, per laa naa sodiidz lo to ganle zha nac grë ncuane zinabey Dios zilulo lo naa, ni grëgaa mine zinee me lo naa.

²⁻³ Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespirituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co, ⁴ ga bin naa grë diidz ndzon ne waltaa gard gon miech, ncuane guiend zho zha naca, ni nodgaa diidzbey gne naaw. ⁵ Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase. ⁶ Ni tel gacladzga naa gunniats naa naa por mine blozh bzet naa nu, led guielxend ga gun naa; sac mine nlijaa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

⁷ Ne nligaa ndzondoo nac grë ncuane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa. ⁸ Tsonle vuelt zinab naa lo Dios ctiche me yoob rii; ⁹ biontaa vuelt në me lo naa: “Bui ganle laa naa naciele luu, ni min co nac mine rquinnraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacie zho.” Min co nagon rley naa, sac ne znu nsis rac naa, grëse miech zeene ran zho grëtaa ncuane rrielo run naa, rien zho nli Jesús nacie naa. ¹⁰ Ne nligaa rley naa, sac niicle ne miech gzhe gzhele rac naa, niicle nroob guielnë ne nodeed naa, niicle rbidzgo miech lo naa, rtsidil zho naa, no hor guiend pe yquii naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacie naa.

¹¹ Nligaa lega guielxnenle nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuane csanwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeel zho. ¹² Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuane bneedz Dios diidz blu naa lo to, blactaa grë milagr, blactaa grë ncuane bzee zdoo to gon to. Biod dze ne nieednie naa to. ¹³ Lëëse mine bend naa lo to i, nacie nab naa needz

to pe nquiin naa; sac grëraa zaatne ziyaseed naa miech, zha rneedz ncuaane rquiin naa. ¿Golgun dispensar telne rbinladz guic to min co!

Nonie zha Corint guic Pabl

¹⁴ Laa naa nozhixcuaale par guialgan naa to stib. Nu gac tson vult guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mëed nac to lo naa; ni ndion ne ganle, led mëete riegual gdeed ncuaane yquiin dad, sinque dad none gdeed ncuaane yquiin mëed. ¹⁵ Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdzin to zaatne gneedz Dios cuéz to. Xco co no naa, ib rquiad zdoo naa lozh grë ncuaane rap naa, o lozhgaa naa lo xco co; maase niicle squi zootne laa ne rleynieraa naa to, lel nozozit to lo naa.

¹⁶ Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne riend ne quiaban me ne.” ¹⁷ Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to? ¹⁸ Naa quia bnab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnab zho lo to? Golgacnan ganle nodziuund no min co, sac zigtaa naaw, zigtagaa mew, dib zdoo no nodziuun no dziin rii, choot noquidied miech.

¹⁹ Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grë mine none naa lo to nu, laaw rne naa sacne racladz naa lozh tsoquic to gban to zigne nac Xtiidz Dios. ²⁰ Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne në rac zdoo dien cho stib noded, zha ne nozhixcuaa diidzguizh, zha ne quianeenë, zha ne quiayacniats; nend haxta chop tson diile nac to. ²¹ Tel gan naa sca rac to, mbe gon stoladznie naa to ni haxta siaabguielnë to naa; sac nanle naa ni lalnu rdziladzd Dios grë min co. Zig nac grë zha ne squi padzeelale quiayunctal xtol ni rsaand zho grëtaa quielyozh, grëtaa ncuaane ndzinlid ne bii quiayun zho, mbe gon sigoon zho naa.

13

Rso Pabl diidz

¹ Niina nagon ne gac tson vult guialgan naa to, tel pe nactaa falt ne cho quiayun i, guiaanda scase. Zigne rnee lo Xtiidz Dios: Tel no chop zho, tsongaa zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vult ne rso naa diidz rii lo to. ² Laaw nile naa lo to lultm vult ne bialgan naa to, ni niina laaw rneque naa stib: Grëse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grëse mine quiayun zho ib tedlaad zho, laa naa gunquizh zhow zigne riegual zho. ³ Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. ⁴ Nli nguudz goc me bdeed me diidz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zгаа no tib guielmban ndzon, sacne me nacie no; ni zrieelo gnabey no to sacne rdziaap no xpoder me.

⁵ Nana sca, tozhal golcobey dien zha mban to. Wen wen golcobey dien pe nli dib zdoo to riladz to Jesús. ¿Pe nli mban to zig none gban zha ne riladz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to riladz me? ⁶ Sangue no gon, wen wen ndion no zha mban no, ndionpaa no ne lo Jesús ngab no.

⁷ Tibaque rnab no lo Dios cxobnia me guic to zaacse gban to. Ni guiabde to togo par guianenziuu no lo miech gane noxcopaa no zaacse gac to; sinque laa no rdziuuna parne gban to zigne riegual gban zha ne nli no xnëz Dios. Min co nagon noxco no, niicle tel rzac to lëda nu quiadziuun no. ⁸ Sac tel no, laa no zional gac to miech wen, zha ne zienal mine nac diidzli; choot ziaate par lega gactox no lo to. ⁹ Gacxe waa, tib guielbley nroob

ga lo no, telne zhal to znuse xixcuaa to, gac to zha ne nlipaa dib zdoo rleynie Dios; laa ne yquiambéz to guiaadlisqui no grë ncuane noyun to. Laa no racladz gdzin dze ne gac to zigne rdziladz Dios, ni mincogaa quianab no lo me.

¹⁰ Laa naa rso diidz rii lo to lo guits ne rxel naa nu, sacne racladzd naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacne lozh tsoguc to zhiwseed me; ib racladzd naa yquiaago naa to.

¹¹ Nu ne laa naa csiaa lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

¹²⁻¹³ Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne riladz Jesús nëz rii; laa zho rxeel bdiuzh lo to. Golcaania zhibdiuzh zho.

¹⁴ ¡Dios sca guiaannie to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxco grë zhizhgab to; ni scagaa Espíritu Sant gacnie to tibaque tipse gac to.

Pabl

GUILTS NE PXEEĽ PABL LO ZHA GALÁS

¡Diuzh to grēse to!

¹ Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoona, led miechd pxeel naa, sinque Jesús pxeel naa, me ni Dios Pxoz me, men ne bleeban me.

² Laa naa rxel tib guits rii ziaad lo to zigne no to nēz Galás i, nac to zha ne ngab lo Jesús; rquiaabdiuzh naa to, ni scagaa grē zha rii laa zho rxeel bdiuzh lo to. ³ Dios men ne nac Pxoz ne, ni Jesús men ndzon ne rnabey, me nac men ne tsoxco grē zhizhgab to, zeena peet tsienied guic to. ⁴ Jesús bdeed xquielmban bdiizh me xtol ne, psilaa me no lo grētaa guielntseeb ne no lo guidzliu rii, laaw been me zigne gocladzse Dios men ne nac Pxoz me. ⁵ ¡Gotsaa dziuunnon ne Dios sca, ni gdziind dze ne csaan ne dziuunnon ne me! Sca rieguiala.

⁶ Rzee zdoo naa gon ne gardle gac nroob dze ga, laa to bzoztile lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne rliladz to niina, masaque rzac to na mincogaa csilaa to lo dol. ⁷ Per guienndraa stib wseed ne gon csilaa ne lo dol. Miñe naca zha ne biadseed to i, lega rquidiese zho to, racladz zho ctsēē zho miñe nac Xtiidz Ndzon Jesús.

⁸ Grēse zha ne guiaadnie stiblo wseed miñe pseete no to, ni gnē zho lēē min co csilaa to lo dol; zha ne sca gun, miech ndziibdeele ga nac zho. Tel chotaa sca gun, niicle tel naazhala, tib anjl ne quietgaa gbaaw, ible zdzibdee Dios zho. ⁹ Bnele naaw lo to, ni na laaw rneque naa stib: Tel cho zha ne guiadseed to stiblo wseed miñe pseete no to, ni gnē zho lēē min co csilaa to lo dol, ible zdzibdee Dios zho.

¹⁰ Nana gon ne znu rne naa, no to guiab parne guiannziiuu naa lo miech gane znu rne naa; per golgacnan ganle, quiaguibd naa guiannziiuu naa lo miech, sinque laa naa noxco gon naa miñe rnabey Dios. ¡Sac telne lel ncuaane gleynie miech noxco naa, nlid dzigo xtsiin Jesús ga noyuu naa!

Jesús pxeel Pabl gnee Pabl Xtiidz me

¹¹ Bets, bzian, golgacnan sca ganle: Wseed ne nac Xtiidz Ndzon Jesús, miñe bialseed naa to, led guicd miech biaba. ¹² Paat biad naa nseed miech naaw, sinque Jesús zhal bneedza lo naa.

¹³ Led nanle to ganle, zha nactaa grē miñe beñ naa zeene bii no naa lo zhiwseed zha Israel; ptsidiñ naa grē miech ne no xnēz Jesús, blēēnie naa zho, pquianañ naa nllozh naa zho. ¹⁴ Bzhoob diidz ne naa nac zha ne pseedraa lo grē menladz naa, zha ne tipse biagrēē naa scuel; naa nac zha ne neer lo zho, sac naa run grēse miñe rnabey zhiwseed zha Israel, ni naa rioxcoraa run grēse miñe been grē pxozgol no. Sca nagon goc naa lo zha Israel.

¹⁵ Ible güeynied guic naa, antes ne gal naa laa Dios bzooblole naa gunbey naa Xpēēd me; laa me bleextsole naa, niapse porne nquialadz me naa. Zeene bdziñ dze co ¹⁶ laa me blu me lo naa, bzo me naa ga naa zaatne ndxie grē miech ne nacdraa zha Israel, gaseed naa zho Xtiidz me miñe glu zha laa zho lo dol. Zeene blozh gon naa Xpēēd me, biad naa niaguib naa ne goon dien cho nseed naa, ¹⁷ ni niicle biadgaa naa Jerusalén, nianabdiidz naa lo grē zha ne pxeelle me nonee Xtiidz me; sinque laa naa bia nēz Arab, wbirole naa nēz co, dzigoraa bdziñ naa Damasc stib.

¹⁸ Gocle tson iza dzigoraa bia naa Jerusalén, hor coraa beenbey naa Pedr; blēz naa lo me ga tsiñ ngbidz. ¹⁹ Gaque beenbey naa Jacob bets Jesús, laa grēraa zha ne pxeel Jesús noyuu xtsiin me, ni tib zho gond naa. ²⁰ Dios zobwi ganle diidzli nac grē miñe rne naa nu, led lega rned naaw.

²¹ Zeene brie naa ga, laa naa bia nēz Siria ni nēz Cilis. ²² Grē zha Judé zha ne nole xnēz Jesús, gard gunbey zho naa len dze co. ²³ Diidz ronse zho rnee zla zha ne nacgrē zho:

“Men ne scataa pquianaḽ ne, yele me noseed miech Xtiidz Dios, ni glo scataa gocladz me nitlo mew.” ²⁴ Dzigo rley zho, rdeed zho xquizh lo Dios ne yele naa rililadz Jesús.

2

Rcaania zho Pabl

¹ Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. ² Laa naa bia, sac ib Dios blu lo naa ne no ga naa. Dzigo ga pcaalsa no grë no zha ne zo rnabey lo grë zha ne no xnëz Jesús ga, bzodiidz naa lo zho zha noseed naa grë zha ne nacd zha Israel Diidz Ndzon ne rlu lo zho zha laa zho lo doḽ, ni naa zeena guien zho ganle ne nli rquiin dziin ne benle naa, ni mine quiayungaa naa. ³ Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grë zha Israel. ⁴ Per lo zha ne zioobgza no ga, lad co briequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rililadz Jesús, per nlida; ib blud zho cho nac zho, ngueets bzëëb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuuḽ no mine rnabey ley. ⁵ Per ni palal bdeete no diidz niac mine rnee zho, laa no racladz guiaannie to Xtiidz Ndzon Jesús mine rlu zha laa miech lo doḽ, sac min co nac diidzli.

⁶ Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios) ⁷⁻⁸ ib peet blisquid zho lo naa, niicle peet pseetragaa zho naa. Sinque laa zho gocnaḽ ganle ne ib Dios bzoo naa guḽ naa xtsiin me, gaseed naa grë zha ne nacd zha Israel guien zho zha laa zho lo doḽ; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëëque me bzo naa quiaseed naa grë zha ne nacd zha Israel.

⁹ Gacxe waa, zig nac Pedr, Jacob, Juan, zha ne zo rnabey lo grë zha ne rililadz Jesús ga, laa zho bien ne ible naa bgaa guielnzaac rii, bneedz Dios dziin rii lo naa. Dzigo rley zho haxta bzheḽ zho nia no grop no Bernabé, laa no biaan diidz ne zha tsieseed zha Israel, laa no guioseed grë zha ne nacd zha Israel. ¹⁰ Lëëse mine pso zho diidz lo no, dzioxco no dziuuḽ no xyudar grë zha ne guienḽ pe yquiiḽ; ni nligaa ib nonguiel min co ni laaw noyoxco naa.

Ractox Pabl lo Pedr

¹¹ Laa zeene biaad Pedr Antioquí, dzigo ga nli laa naa goctox lo Pedr, sac ncuaane ndzinlidraa quiayuḽ Pedr. ¹² Glo, grëse zha ne nacd zha Israel zha ne rililadzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdziḽ ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdziḽ ga, sac lëë zha co racladz, grëse zha zit ne rzëëb xnëz Jesús ib none tso zho bey ne rio zha Israel. ¹³ Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. ¹⁴ Nacne zeene gon naa sca zienaldraa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?”

Zha rlaa miech lo doḽ

¹⁵ Goḽquiaadiaga ganle, tel no desde gol no zha Israel nac no, nacd no zigne nac grëraa miech ngoopdoḽ ne nac stib nacion; ible pseed no grë mine nac xley zha Israel. ¹⁶ Sangue niina laa no ndion ganle, niicle mazdraa guḽ miech mine nac ley grieelod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no rililadz no Jesús, nacdä porne dziuuḽ no mine nac ley. Sac gon niicle zha ne tsoxcoraa guḽ zho grë mine nac ley, grieelod guiaanwen zho lo Dios.

¹⁷ Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuunctal no porne rliladz no Jesús, per, ¡led scada gon!
¹⁸ Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun gre mine nac ley. ¹⁹ Sac tel naa, ib brieelod niun naa gre mine rnabey ley, ni zha ne rguiits ley gon ib none guet zho; gane niina masaque rreequia laa naa gutle. Niina ne laa Jesús gut por gre xtol naa, rreequia ye naa gutnie me ga, zeena grieelo gun naa mine rnabey Dios. ²⁰ Led naadraa nu znu mban, Jesúsle nu mbannie naa, ni guielmban ne mban naa niina, lëe min rii bneedz Dios lo naa porne rliladz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa. ²¹ Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnan sca ganle, Jesússe nac men ne csanwen ne lo Dios, gacxe waa nonguielda ga csan ne me tibladd, ni pa lotaa ga pquia zdoo Dios ne.

3

Jesús none gliladz miech

¹ ¡Nadzpaa nxen to nac to zha Galás! ¿Pe goc to, cho biaadgungüet guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz. ² Zhal to golcobey dien, ¿pe ne been to gre mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Diosa ye? ³ Pa lotaa gon rdzin lo xquielnxen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley. ⁴ Pe nlipaa rnee to, ¿pe lega scase nazho gon to gre guielnë ne pteed miech to, zeene psilo bliladz to Xtiidz Jesús? ⁵ ¡Golzhixcuaa guic to! Golguien ganle, laa Dios bneedz zhiEspíritu me lo to, ni laa me noyun gre milagr lo to, per nacda porne run to mine rnabey ley, sinque porne dib zdoo to rliladz to Xtiidz mew, mine biadseed no to.

⁶ Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtold. ⁷ Golgacnan sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham. ⁸ Ni mine nodzian ne niina, ib lo Xtiidzle Dios zhobneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoo gliladz naa zigne rliladz luu naa, zunlay naa zho.” ⁹ Gane grëse zha ne dib zdoo rliladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

¹⁰ Sangue zha ne rnalo ley ne lëew csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee gre zha ne grieelod gun grëse zigne nac ley.” ¡Ni tsod zha ne gon grieelo gun grëse mine rnabey ley! ¹¹ Gase naganle rlu tsod tib zha ne grieelo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co yгаа tib guielmban ndzon.” ¹² Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse mine rnabey ley.”

¹³ Min co nagon, grëse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe gre dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquianga zho tib lo yag.” ¹⁴ Ni por mine sca bded Jesús ga, min co niina grëse miech ne nacd zha Israel, zac yгаа zho grëse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espíritu Sant, Espíritu ne rëb me cxeel me lo gre zha ne dib zdoo gliladz me.

Zha ne nlipaa nac xpëed Abraham

¹⁵ Bets, bzian, laa naa gzet ncuuane rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëë trat co. ¹⁶ Nana gotsaa gwi ne ganle zha been Dios: Psan me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëbd me: “grë zha xtii Abraham”, sinque tibaque men ne bzeet me, ni lëë men co ga nac Jesús.

¹⁷ Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon, grieelod ctsëë ley trat co; zig nac ley, blozhle tap gayoo galptsii iz biaan xtiidz co me zeene laa ley bиаad. ¹⁸ Nana, telne por gun ne mine rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne grieequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtii Abraham, laa me gneedz guielnzaac co lo ne.

¹⁹ Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdzin dze ne laa men ne briequia lo xtii Abraham ga bиаad, men ne bzeet Dios ga zeene psan me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psana lo menguedz Israel. ²⁰ Sangué dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhala biadneew lo Abraham.

¿Pa rquiin ley?

²¹⁻²² Nana gnë to: “¿Zig gocladz dzigo lëë nsiooglo xley Moisés lo trat ne been Dios ga?” ¿Led scada! Sac grieelod ygaa ne guielmban ndzon ne gdziind dze lozh ga, telne gnalo ne ley; ib grieelod ley csanwena ne nëz lo Dios. Telne niaca mine nrieelo ley nsilaaw miech lo dol, nod pe nacne dzigo nxeel Dios Xpëed me, bиаad me biadbee me miech ladznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

²³ Zeene gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdzin dze ne laa me bиаad. ²⁴ Zig tib ngudziaan ne riaannie mëédwin, sca pquiin ley co lo ne, pseeda ne zha gban ne, ni gacnan ne cho nac Jesús, men ne csilaa ne lo dol zeene dib zdoo ne gliladz ne me. ²⁵ Sangué niina ne laa Jesús bиаadle, led ley codraa gnabey ne, ni niicle rquiindragaa pe cseeda ne. ²⁶ Gacxe waa, tel to xpëedle Dios nac to porne dib zdoo to rliladz to Jesús, ²⁷ ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienal gban zho zig racladz me. ²⁸ Mincoxe nagon waa, grëse ne tibaque nac ne niina, guiendraa ne goon cho nac zha Israel, cho nacgaa zha zit; dien cho nac ngundziin, cho nacgaa zha ne rnabey; goon dien cho nonraa pe mguiw te wnaaw ye; sac grëse zha ne naciele Jesús, tibaque nac zho grë zho. ²⁹ Ga nagon, telne ngable to lo Jesús, dzigosi nli zha xtii Abraham nac to, ni zgaa to grë guielnzaac ne bzeet Dios zeene psan me xtiidz me lo Abraham.

4

Zha ne nac xpëed Dios

¹ Golgona ganle, nligaa tib mëédwin lëë, niicle guiaannie win ncuuane rap pxoz win, per lega nacse win zig tib ngundziin win ne run xtsiin pxoz win. Niicle cheñ win grë ncuuan co, per grieelod win gnabey wina. ² Laa win riaan ladznia zha ne ran win, zha ne rseed win dien pe nac ncuuane gun win, laga gdziin dze ne laa win zacle ycaania ncuuane psan pxoz win.

³ Scadaa nagon bzhiac ne glo zeene gard guiaad Jesús, rriequia masaque ngadoo ne lo grë ley co, ni lo grëraa ncuuane rac lo guidzliu rii. ⁴ Laa zeene bdzin dze ne laa Dios pxeel Xpëed me Jesús lo guidzliu (tib wnaa bded por xniaa me, bzoob me diidz been me

grëse zigne rnabey xley zha Israel), ⁵ laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëed lo Dios. ⁶ Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoo ne; gacxe waa niina laa ne rien rnee ne lo me: “¡Papá yeen!” Espíritu co rnee ne Pxoz ne nac me.

⁷ Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne ygaa grë guielnzaac ne rap Dios.

Rnee Pabl rnabeydraa ley

⁸ Bets, bzian, golsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuane nac zhimdio to hor co, rdib rdzag to run to grë mine rzac to rdziladz grë mdio co. ⁹ Nana, laa to runbeyle Dios, mazd gni naa ganle ledaa Dios runbeyle to, ¿pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuane paat rquiind co, gnabeya to? ¹⁰ Rquia to gon run to grë lni, dien pa mëe ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. ¹¹ ¡Rdziebnie naa to gon! ¡Pe nlipaa zhlëse bialseed naa to, ne squi laa to racladz csaan mine bialne naa lo to!

¹² Bets, bzian, laa naa rnab lo to golban zigne mban naa, tel naa niicle ne zha Israel nac naa per zana draa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. ¹³ Led rsoladz to ganle, rzacne naa len dze ne psilo pseed naa to zha laa to lo dol; min co nacre nzianlaa dze blëz naa lo to i. ¹⁴ Niicle ne sca rzacne naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blëzlo to naa pale cho xanjil Dios o Jesús gaa, tel niaca mine mezhal niaadseed to. ¹⁵ ¡Ne nlipagaa rleydax to len dze co! Tel niaca mine niac mbee to bziaalo to, zootle zig mbee tow ngad tow lo naa. ¿Yo grë guielbley co na? ¿Yo ne scataa rleynie to naa len dze co? ¹⁶ Nana, pe rëb to rlëe naa lo to ne znu rne naa mine nacpaa diidzli. ¡Lëda gon!

¹⁷ Golquiaadiaga ganle, grë zha ne gon squi ziadseed to i niina, nli laa zho noxco to per zhaa ncuane no guic zho. Laa zho racladz tebaa zha guiaanladz to naa, csaan to grë mine bialseed naa to, zeena gbig to lo zho. ¹⁸ Rtsidild naa pe nacre cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. ¹⁹ ¡Xin, ne nlipagaa gon rdedne naa ran naa squi rac to! Masaque nac guielne rii lo naa niina, zig tib yoob ne rquia grë men wnaa ne gap mëed. Ni lëe nole naa guielne rii nu nagon, haxta gdziñ dze ne gan naa laa to wbiire wbig lo Jesús stib. ²⁰ Tebaa niaca mine grieelo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuane noyun to.

²¹ Zha ne racladz gnabey xley zha Israel zho, racladz naa gnë zho dien, ¿pe ib rien zho zha zhobnee lo guits ne ziaad Xtiidz Dios ²² zaatne raquiet xingan Abraham? Rneew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsiel me. ²³ Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsiel me ga, laa win gol porne ib Dios rëb ne laa me yquianie win.

²⁴ Lo grop wnaa co, tibga me rlu ganle zha nac grop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho. ²⁵ Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie len dze rii, sac tel grë menguedz Jerusalén, masaque ngundziin nac zho lo ley. ²⁶ Sangue wnaa ne gocpaa tsiel Abraham ga, rrieequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëe xniaa ne ga nac wnaa co.

²⁷ Lëe Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brielod niap mëed, bley niina;
ngueel goc, nguiedz broptsie lo guielbley qui,
luu ne bdziñd dze niacnañ luu zha nac yoob mëed.

Sac gon ndalraa xpëed wnaa ne brieelod niap mëed, lëdle grë xpëed wnaa ne gop mëed.

²⁸ Bets, bzian, golgacnan sca ganle, laa ne nacle niina zig Isaac, xpëed tsielpaa Abraham, wnaa ne gacd yquianie mëed ga; sac tel Isaac, ib Dios psan diidz ne laa Isaac gac mëed lo Abraham. ²⁹ Ni zigne sca blëenie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëë ran zho zionald ne mine rnabey ley, sinque laa ne zional dib zdoo ne riladz ne Jesús. ³⁰ Ni nana, led lo Xtiidzaque Dios zhobnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me grop xpëed me, nonguield ne ye mëed qui guiaannie ncuaane csañ luu lo xpëed tsiel luu.” ³¹ Gacxe nagon waa, tel ne nacd ne zig xpëed wnaa ngundziin co, sinque laa ne nac zig xpëed tsielpaa Abraham.

5

Dziits golso

¹ Peet lo ngadoodraa ne niina, sac gon laa Jesús biaadsilaale ne, sinque to none dziits so zeena ygadoode to lo xley zha Israel. ² Naa nac Pabl, ni naazhal rne lo to nu. Golgona sca ganle, telne laa to gdeed diidz tso to xbey zha Israel, nacdiedraa to Jesús ga dzigo. ³ Ni laaw gneque naa lo to nu stib, grëse zha bgui ne rio bey co, ib none gun zho grëse zigne rnabey ley co. ⁴ Zha ne rzac por gun zho grë mine rnabey xley zha Israel, min co laa Dios csilaa zho lo dol, gacnan zho ganle, lel nozozit zho lo Jesús ga; ygaad zho guieInzaac ne yгаа zha ne gnalo Jesús. ⁵ Sangue tel no, ndionpaa no silaa Dios no lo dol, sacne dib zdoo no riladz no Jesús ni nacie Espiritu Sant no. ⁶ Sac zha ne nli nole xnëz Jesús, peet liaadz nodraa zho bey ne rio zha Israel. Mine noxcora zho nac ne dib zdoo zho gliladz zho Jesús, ni scagaa grieelo gleyne zho samiech zho.

⁷ jEse tow nli! jPex goc to waa? Zaacse name rac to zeene psilo to bliladz to mine nac diidzli. jCho pquil to ne nëdraa to tsienal tow? ⁸ Mine squi nonie guic to i niina, led zhiwseete Dios i, men ne bredz to gree to lадznia ley. ⁹ Golguien sca, adel ye to sac zig rëb diidz ne rnee: “Niipaxe ncobi waa runcsibe ncob guietxtil.” ¹⁰ Per nanpaa naa, ible men ndzon ne rnabey ne men co gacnie to, zeena csaande to mine nac diidzli; ni zha ne squi racladz gunguet to, tel chotaa nac zho ib tedsod siaabzi Dios zho.

¹¹ Bets, sangue naa tel niaca mine nli ye naa quianabey tso grë zha ne riladz Jesús xbey zha Israel zig quianee zha qui, bod goonzhe ni ctsidildraa zha Israel naa dzigo, glëëdraa zho zig rlëëtaa zho niina zeene ron zho rne naa zha nacne biaadguet Jesús lo cruz. ¹² Zha ne squi ziaadnabey tsopaa to bey ne rio zha bgui nëz Israel, jtebaa mazd ladaque zho yгаа zho, niicxe gdib nacle zho waa cueniaal zho, led tsod zho noyunneed zho to! ¹³ Bets, golguien ganle ne ygadoodraaxe to lo ley waa, min co nacne biaadsilaa Jesús to. Per guiabde to togo ne laa me psilaale to, laa to gun ncuaane guiaabtaa guic to. Gunscade to, sinque tib tib to golleynie samiech to, ine golgun ncuaane rquiin grë zha ne nacgrë to; ¹⁴ sac niina totsaque gban to zigne rnabey Dios nu: “Bleyne samiech luu zigne rleyneque luu luu”; lëële grë mine nac ley ga gun to. ¹⁵ Per tel laa ne gleyne to zha ne nacgrë to, lel dil no to, zig run grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. jGunscade to!

Zha ne lega mbanse

¹⁶ Gacxe, laa naa rnab lo to: Goltsoxco golban zigne racladz Espiritu Sant, ni me gacniën to; led tsoode to dien zha gun to grë ncuaane ndzinlid ne racladz xcuerp to. ¹⁷ Sac gon grëse ncuaan co, rleynied Espiritu Santa. Laa xcuerp ne run ncuaane racladz Espiritu Sant, ni ncuaane racladzгаа Espiritu Sant nëd xcuerp ne gac min co. Gunde to mine racladz xcuerp to sca. ¹⁸ Telne gban to zigne rnabey Espiritu Sant, dzigosi nodraa pe nacne ygadoo to lo xley zha Israel.

¹⁹ Ni miech ne sca run grë ncuaane ndzinlid, ib paat ngueetsd zho: rionie zho zha ne led tsiæld zho,

run zho grë ncuane ndzinlid ne racladztaa xcuerp zho,
²⁰ riegan zho grë mdio,
 rnab zho pe sac samiech zho,
 rlëenie zho samiech zho,
 rdilnie zho samiech zho,
 rzac zho adel cho glale tsiel zho,
 rnadse pew laa zho rlëele,
 runctil zho miech,
 rguib zho rtso miech,
 rbeextso zho dien cho zha ne gacnie zho,
²¹ në rac zdoo zho ran zho ncuane quianie stib miech,
 rzudz zho,
 rcaalsa zho zaatne loxaque rowcho zho, ni run zho grë guelyozh.

Grë ncuane co run zho ni grëragaa ncuane ndzinlid ne sca nac. Laa naa rbire rso diidz lo to, gunde to grë ncuane co; sac gon grëse miech ngoopdol ne sca rban, grielod gdzin zho zaatne rnabey Dios.

²² Sangue zha ne zianal mine racladz Espiritu Sant, znu nac zha co:
 rleynie zho samiech zho,
 tibaque nguieel rac zho,
 peet dzeb nonied guic zho,
 rxecw zho, riedniobd zho,
 niowse rnee zho lo samiech zho,
 niapse ncuane wen run zho lo samiech zho,
 run zho mine rnee zho gun zho,
²³ miech ndooladz nac zho,
 zha rnabey xcuerp zho.

Ni telne gban ne zigne nac grëse min rii, ni tib ley noguiitsd ne ga. ²⁴ Grëse miech ne nli xnëzle Jesús no, zieniedraa guic zho gun zho grë ncuane ndzinlid ne bzoobladz zho padzeela, grë ncuane ndzinlid ne racladznë xcuerp zho, sac rien zho paat rquiind ncuane co lo zho. ²⁵ Gacxe nagon waa, telne nli mbannie ne guielmban ne rneedz Espiritu Sant, golgotsaa dzion ne mine rnabey me. ²⁶ Dzigosi gacniatsdraa ne lo samiech ne, tsienaldraa ne dien cho glaraa guiaan, tso ne në gac zdoo ne gan ne grë ncuane rap zho, ncuane racgaa zho.

6

None gacnie ne samiech ne

¹ Bets, bzian, telne gan to laa cho tib zha ne nacgrë to noyun pe tib dol, dzigo to ne nac to zha ne nli paa zianal mine rnabey Espiritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. ² Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

³ Tel zha ne rzac zha non nac zho, ni laa zho peet nond zho; lëëque zha noguitnie zho ga. ⁴ Tib tib to, wen wen golguien dien pe quiayun to, telne ncuane ndzinliw ine golley, per tso de to glëë zdoo to gan to mine run stib zho. ⁵ Sac tib tib ne, psose Dios ne pe nac xtsiin me mine gun ne.

⁶ Grë zha ne noseed Xtiidz Dios, ib none ncuane rgaataa lo zho gdeed zhow yquii zha ne noluw lo zho.

⁷ Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac mine run ne mincoque ctsire me lo ne. ⁸ Zha ne run grë ncuane ndzinlid, lëë mine cueequia zho ga laa zho nitlo. Laa zha ne gun grë mine rnabey Espiritu Sant, lëë mine yгаа zho ga nac tib guielmban ndzon ne gdzind dze lozh. ⁹ Gacxe nagon waa, tibaque gotsaa dzioxco ne dziuun ne ncuane ndzinli, ncuane rquiin, guieete ne; sac telne sca tibaque dzioxco new, zeene gal dze co laa ne yгаа mine guioquia ne. ¹⁰ Zeene gdeedtaaw

diidz sca, golgotsaa dzioxco ne dziuun ne xyudar grëse samiech ne, ni nana zeene zha ne noque xnëz Dios nac zho, mazdraa rieguial dziuun ne xyudar zho.

Rso Pabl diidz

¹¹ ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! ¹² Grë zha ne gon squi racladz tsopaa to bey ne rio zha Israel, laa zho runa zeena glëënie miech zho, zigne rlëënie zho grë zha ne rseed miech ne ib laa Jesús gut lo cruz, psilaa me grëse miech lo dol.

¹³ Nana, niicxe grë zha ne nole bey co, rundaque zho grë mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. ¹⁴ Sangue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grë mine bded Jesús ga, grëtaa ncuaane no lo guidzliu laaw psan naa tib lad; ni niicle naagaa, sca rzac grë miech guidzliu naa. ¹⁵ Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

¹⁶ Grëse to ne nac to zha ne zienal diidz ne rso naa nu, Dios yquia zdoo to, ni me gacnien to ctsebd grë zhgab to; niicle tow ni niicle grëragaa zha ne ngable lo mew.

¹⁷ Bets, bzian, golgacnan sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyun naa.

¹⁸ Jesús men ndzon ne rnabey ne, me tsoxco grë zhizhgab to. Sca gaca.

Pabl

GUILTS NE PXEEĹ PABL LO ZHA
EFÉS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiedz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblrique laa to rliladz Jesús. ² Dios men ne nac Pxoze, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

³ ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús. ⁴ Haxta zeene gard cue guidzliu, bzooblo Dios ne gac ne zha ne gdzin lo me zeene laa ne gliladz Jesús, gac ne tib miech peet xtold, zha ne gban zigne racladz me. ⁵ Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

⁶ Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. ⁷ Ne nligaa nquialadzdoo Dios ne, gane pxeel me Xpëed me bzhiiee xchen psilaa me ne lo grë dol ne ngadoo ne, been me ne perdon grë dol co. ⁸ Ni led loxaque mincodse, sinque haxta bneedz me guielrien lo ne, bdixbiini me ne, ⁹ ni bneedz me diidz gocndion ne pe nac mine no zdoo me, mine mese nan, mine nole me gun me. ¹⁰ Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdzin.

¹¹ Grëse ncuaane bnabeyle Dios no gac, run mew zigne racladz me. Gotsaa gwi ne ganle, glöle bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús. ¹² Ni laa me bzooblo ne, zeena ne ne nac ne zha ne glopaa psilo bnalo Jesús, cxobnen ne lo miech ganle pa lotaa men nroob nac me.

¹³ Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bneelee me glo. ¹⁴ Ne znu pxeel me Espíritu Sant nacie ne, ga rlu ganle ib nli zgaa ne grë mine bneelee me gdeed me lo grë zha ne ngab lo me, ni lëe min co ygaa ne zeene gal dze ne laa me blozh psilaa grë zha ne ygab lo me; zeena grë ne gleynie ne me por squitaa men nroob nac me.

Rnab Pabl guielbiini lo Dios

¹⁵ Zeene gocnan naa ne nlipaa dib zdoo to rliladz to Jesús, ni ne nli nquialadz to grëraa miech ne no xnëz Dios, ¹⁶⁻¹⁷ rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoze ndzon ne. ¹⁸ Rnab naa lo me quixbiini me guic to, guien to ganle zha nactaa grë ncuaane ygaa to ne laa me bredz to, guien to ganle zha ndzontaa, zha nontaa ncuaane gdeed me lo grëse miech ne ngab lo me, ¹⁹ ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me ²⁰ zeene bleeban me Jesús bzoob me me cue me gbaa, zaatne rieguial sob me ne nac me men rnabey, ²¹ bzo me me, me rnabey lo grëse zha ne rnabey, lo grëse zha ne non, ni lo grëragaa ncuaane no; niicle niinaw, niicle len dze ne naragaa guiaada. ²² Grëse ncuaane notaa, laa Dios psana ladznia me, ni bzo Dios me me rnabey lo grëse zha ne no xnëz me. ²³ Sac grëse zha ne no xnëz me rrieequia xcuerp me ga nac zho, gacxe waa grëse zha ne nac cuerp co, zha

none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuaane no lадznia me now.

2

Ne noxco Dios miech gane psilaa me zho

¹ ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol to, masaque nac to lo Dios hor co zig tib zha ne gutle, ² laa to güeynal niapse grë ncuaane ndzinlid ne rac lo guidzliu rii, been to grë mine rnabey ma ne rnabey lo mendox, ma ne rcheep grë zha ne ib nëd gon xtiidz Dios.

³ Grëse ne sca wban ne glo, bional ne ncuaane ndzinlid ne bzoobladztaa ne, bdziuuñ ne ncuaane bdeedtaa guxt xcuerp ngoopdol ne, ncuaane biaabtaa guic ne. Ni ne scataa nac ne, ib bioguial ngaa ne lo guielndox ne cxeel Dios, lo guielne ne noxtseeb grëraa miech niina. ⁴ Per ne nquialadz Dios ne nac ne miech, gane pquia zdoo me ne, ⁵ ni niicle ne rreequia mengutle nac ne ne scataa quiadziiuuñ ne grë dol co, per bleeban me ne; lëe min co ga been me zeene bleeban me Jesús. ¡Laa me psilaa ne lo guielgut co, niapse por mezhah noxco ne! ⁶ Laa me bleeban ne, zeena yгаа ne guiosiobnie ne Jesús zaatne gnabey Jesús. ⁷ Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz me ne, pa lotaa wen me lo ne, sac pxeel me Jesús biaadsilaa ne. ⁸ Golgan ganle, ne wen me mezhah noxco guiaanwen miech lo me, gane rsilaa me ne lo dol zeene laa ne rililadz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, ⁹ racda ne por pe guielwen ne gun zho; zeena gdaannied zho guielwen ne run zho. ¹⁰ Dios nac men ne psan ne, ni niina ne laa ne bziaab xnëz Jesús, laa me bredz ne dziuuñ ne grë guielwen ne racladz me, mine bzooblöle me ne dziuuñ ne.

Grëse zha ne ngab lo Jesús, tipse nac zho

¹¹ Golsoladz ganle miech ngoopdol, miech ne ngabd lo Dios, miech beed, sca lë to lo grë zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). ¹² Len dze co gard ygab to lo Jesús, gard gac to tipse grë to zha Israel, led yede to no lo trat ne biaan Dios grë me zha Israel, nande to grë diidz ne psan me lo zho. Lega laa to mbanse, runbeyde to Dios, ni tib guielnzaac quiambëzde to yгаа to. ¹³ Sangue niina ne laa to bzëeb xnëz Jesús porne bzhiie xchen me psanmbe me to, laa to ngable lo Dios.

¹⁴ Jesús nac men ne psanwen ne grë ne, ptiche me grëtaa ncuaane pca zaacse ndzianlsa ne; zigtaa zha Israela, zigtagaa zha zita, tibaque been me ne lo me niina. ¹⁵⁻¹⁶ Zeene pquia me lo cruz, gataa ptiche me grë ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grë zho, ni psanwen me zho nëz lo Dios.

¹⁷ Jesús nac men ne bиаadnie Xtiidz Ndzon me lo ne grëse ne, gocndion ne zha guiaanwen ne nëz lo Dios, zigtaa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. ¹⁸ Gane niina, niicle zha Israela, niicle zha zita, zrieelo ygab zho lo Dios men ne nac Pxoз ne, zeene laa Espiritu Sant gunquien zho none gbig zho lo me. ¹⁹ Gacxe waa, tel to nacdraa to menzit niina, lole Dios ngab to, lal non to, lal nac to grë to grëraa zha ne ngab lo me. ²⁰ Golguien ganle, grëse ne niina gzoob ne nac ne zig tib yu ne noyaa, yu ne psilo grë zha ne pxeel Dios nonee xtiidz me lo miech niina, grë zha ne pxeelgaa me pteed xtiidz me lo miech padzeela, ni Jesús nac quie ne naaz yu co. ²¹ Grëse zha ne zienal mine rnabey me, rreequia nosoquiaraa zho yu co ga, haxta guirew gaca tib yadoo ne nlipaa mbe nëz lo Dios. ²² Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbëz Espiritu chen Dios.

3

Pabl nac zha ne güeyseed zha zit

¹ Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu niogyu naa nu. ² Nanlaxe to ganle ne wen Dios, laa me bzo naa gun naa dziin rii cseed naa grë menzit. ³ Laa me blu lo naa zha nac grë ncuaane no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. ⁴ Zeene glab tow i, dzigo guien to ganle ne nli nan naa zha nac grë mine gun Jesús, mine mese nan. ⁵ Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grë zha ne pxeel me noteed xtiidz me. ⁶ Ni znu naca: grëse zha zit, zgaa zho guielnzaac ne rëb Dios gdeed me lo grë zha ne ngab lo me, tibaque nac guielnzaac ne ygaa zho grë zho zha Israel. Niicle zha Israela, niicle zha zita, laa Dios quiambëz gdeed me guielnzaac co lo zho, totsaque gliladz zho Xtiidz Ndzon Jesús.

⁷ Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grëtaa poder ne rap me parne grieelo gun naa dziin rii. ⁸ ¡Ncuaane gzee zdoo new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guielnzaac ne gdeed Jesús lo zho. ⁹ Gne naa lo zho gacnan zho ganle zha nactaa grë mine no guic Dios gun me, mine wlaltaa choot gard gacnan; Dios, men ne bzaa grëse ncuaane no. ¹⁰ Nana gnë to: “¿Pe nacie sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios. ¹¹ Sca nac mine no guic me padzeela, ni zeene laa me pxeel Jesús laaw goc. ¹² Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho. ¹³ Laa naa rso diidz lo to sca, niicle ne znutaa quideed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

Nquialadz Jesús miech

¹⁴⁻¹⁵ Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me. ¹⁶ Ni ne squitaa ndzon, ne squitaa ncuaane lozhd nac grëtaa guielnzaac ne rap me, laa naa rnab lo me cxeel me zhiEspíritu me gneedz xfuers to dziits so to. ¹⁷ Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to. ¹⁸ Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuaane grieelo ctiix ne, guiab ne lalnuw. ¹⁹ Niicle ne znu nacda ncuaane grieelo guiab ne znu znu naca, per laa naa rnab lo me zig zie dze guienraa to pa lotaa rlynie Jesús to; zeena glu ganle ne nli nacie Dios to.

²⁰ Ni Diossi gon ne nac me men ne ndzon, mazdraa ncuaane grieelo gneedz me lo ne, lëdle mine riab guic ne rnab ne lo me; ni ncuaane gaca gon, sac me nacie ne. ²¹ Grëse ne ne nac ne zha ne no xnëz Jesús, ¡tibaque golgotsaa gleynie ne me sca, ne squitaa ndzon me! Sca rieguiala.

4

None tipse gac zha ne rliladz Jesús

¹ Zigne rne naa ga, laa naa niogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. ² Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. ³ Wenle na ndxie to niina, ni Espiritu Sant nac men ne gacnien to; zeena tibaque squi tipse gac to. ⁴ Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. ⁵ Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz

ne me; ⁶ tibaque Dios no, me nac Pxoꝝ ne grëse ne, me nac men nroob ne zo lo ne, me racnieñ ne grëse ne, ni me nacie ne.

⁷ Tipse nac ne, per tib tib ne psose Jesús ne pe nac dziin ne grieelo dziuun ne lo me, zigne gola zdoo me. ⁸ Min rii ga raquiet zaatne znu zhobnee lo guits ne ziaad Xtiidz Dios: Blozhse psanwin me grëse zha ne rlëë ran me,

laa me biire zey gbaa stib;

ni psose me tib tib miech pe nac dziin ne grieelo gun zho lo me.

⁹ Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu. ¹⁰ Sac me biet gbaa, ni biire zey me gbaa stib, zeena glu ganle tel pa lotaa zrieelo gdziñ me. ¹¹ Ni mezhal rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,

zha ne rxeel me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rtedlo grë zha ne ngab lo me, ni

zha ne rseed zho zha nac Xtiidz Ndzon me.

¹² Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha gun zho xtsiin me; ¹³ haxta gdziñ dze ne tibaque mine gliladz ne grë ne, grëse ne dziuunbeypaa ne men ne nac Xpëed Dios. Laa ne lozh sodziits, haxta gac ne zig me.

¹⁴ Gacdraa ne zig chol cho mëedlas ne beelze pe riladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne. ¹⁵ Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co). ¹⁶ Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

Guiełmban cub ne rneedz Jesús

¹⁷ Laa naa rso diidz lo to nu, ni golquiaadiaga zig nac zeene men ndzon ne rnabey ne rneew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; ¹⁸ sac tel zha, ncow nac guic zho. Gard ygaa zho guiełmban ndzon ne rdeed Dios, nand zho zha nac guiełmban co sacne ndip zdoo zho. ¹⁹ Laa zho gocnadle, niapse lo grë ncuane ndzinlid no zho, ib rgobeyd zho run zho grëtaa guielyozh ne no. ²⁰ Sangue to gon, ne nac to zha ne no xnëz Jesús niina, led mincod noseed to; ²¹ telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

²² Miech yozh ne goc to glo, grëtaa ncuane ndzinlid, grëtaa guielyozh ne gocladztaa xcuerp to been to, jgolsaana! ²³ None gdzëë lo xquielmban to, zigtaa grë mine no zdoo to, zigtagaa grë mine rza guic to, ²⁴ golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

²⁵ Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

²⁶ Telne glëë to, code to guiełblëë co zdoo to dib dze, sac gon dol ga. ²⁷ Gunde to mine racladz mendox.

²⁸ Zha ne goc ngbaan lëë, cuandraa zho, sinque gun zho dziin gdziniaa zho ncuane yquiin zho, zeena scagaa grieelo gun zho xyudar zha ne guiend pe yquiin.

²⁹ Gneede to diidznë, sinque diidz ne ndzinli, diidz ne yquiin golnee, zeena zha ne gona ine cchoobladza zdoo zho, ine yquiina lo zho. ³⁰ Golguien, gunde to ncuane coguielnë to Espíritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me. ³¹ None csaan to: guiełnaladz, tso to gow gzhiizh zdoo to;

glëëdraa to,
sobzhiandraa to,
coredzdraa to,
gacntseebdraa to, ni
grëragaa guie|ntseeb ne no, gunde tow.

³² Sinqe none:

wen gac to lo samiech to,
gol|quia zdoo samiech to,
golgun| samiech to perdon, zigne been|aque Dios to perdon zeene laa to been|bey Jesús.

5

None glu cho nac zha ne ngab lo Dios

¹ To ne laa to nacle xpëëd Dios ni nquialadz me to, gol|tsoxco gac to zig me. ² Zaacse gol|ban, gol|leynie samiech to zigne rleynie Jesús to, sac gon| tel| me, haxta bleeladz me me gut me xcuent ne, gut me biogon me lo Dios psan|mba me ne lo xto| ne, me goc tib gon ne pcaania Dios.

³ Gol|guien| sca, none glu to ne nli xnëz Dios no to;
gunde to grë guie|yozh ne run| grë zha ne ziena|d zigne nacpaa guie|tsieel,
gunde to grë ncuaane| yozh ne run| miech ndzinlid,
gunde to grë ncuaane| run| grë zha ne ziena| loxaque dien| zha gun|lo dimi.
Gunde to grë ncuaan| co, per ni gzodiidzde tow.

⁴ Gneede to grë diidzguidz,
gneede to grë diidz ne paat rquiind,
gneede to grë diidz ro nëz;
sac gon| rdzieeldraa gnee to grë ncuaan| co; sinque Dios gol|gool|nie, gol|deed xquizh lo me.

⁵ Nan|le to gan|le, grëse:

zha ne ziena|draa zigne nac guie|tsieel,
zha ndzinlid ne run| grëraa guie|yozh,
zha ne mbidz (zha ne rleynieraa dimi, laa ne gleynie zho Dios);
ni tib zho grieelod gdzi|n| zaatne rnabey Jesús grop me Dios.

⁶ Gdeete to diidz lo zha ne gacladz yquidie to gnë zho peet nacd grë min| co, sac gon|, grëcxe min| co waa run| grë zha ne nëd gon xtiidz Dios, lozh ga, lëë min|e tsieguia| zho laa zho yгаа lo guie|zi ne csiaab me. ⁷ Gol|guien| sca, yquiaadiagde to xtiidz grë zha ne sca rnee, per ni ctsieelsade to zho.

⁸ Nli, |lëë?, ndzinlid wban to glo, rrieequia lo ncow ga bio to, gocnie to men|dox; sangue niina ne laa to nacie Jesús men| ne nac biini, rrieequia lo biinile no to. Gol|guiena| sca, zaacse gol|ban, ⁹ sac niina ne laa to nole lo biini, none gac to:

tib miech wen,
tib miech ne ziena| gac min|e nac diidzli,
tib miech ne rnee diidzli.

¹⁰ Gol|tsoxco guien| to zha racladz Dios gban to. ¹¹ Gan|dzede to grë ncuaane| ndzinlid ne run| grë zha ne no lo ncow, sinque gol|lisquiw; ¹² sac grë ncuaane| run| zho ngueets zhliaan, haxta ncuaane| ctoladz ne gnee new. ¹³ Grëse zha ne gbig lo biini co, zien| zho gan|le zha nactaa grë ncuaane| yozh ne noyun| zho; sac gon| tel|ne biiniw, tsod ncuaane| guian|ngueets low. ¹⁴ No tib zaatne znu zhobnee lo Xtiidz Dios, rneew:
Luu ne tibaque guieel no luu, blee mcaal| lo luu;
brieelad grë zha ne squi nole ladznia guie|gut,
zeena| gban luu lo biini ne nac Jesús.

¹⁵ Gol|guien| sca:

Miech nixbiini gol|gac, ndzinli gol|ban; gbande to zig cho| cho grë miech nxen ne run min|e notaa guic.

¹⁶ Cteed zhlëde to xtse to lo ncuaane| paat rquiind, niicle ne niapse grë min| co ziena| grëraa miech len| dze rii.

¹⁷ Gunde to ncuuane paat rquiind ne rza guic to, sinque golguien dien pa minpaa racladz Dios gun to, dzigo goltsoxco min co golgun.

¹⁸ Gzudzde to, sac gon lo guielgonziu run miech ncuuane nonguieldraa; sinque mazd golnab gneedzraa Espiritu Sant guielbiini lo to, zeena ine:

¹⁹ gool to gre salm, gre himno, gre cant ne csiaab Espiritu Sant guic to; dib zdoo to golgoolnie men ndzon ne rnabey.

²⁰ Goldeed xquizh lo Dios men ne nac Pxoze ne, por gretaa ncuuane ran to, ncuuane rded to; golguien ganle lo Jesus ngab to.

Zha none gban zha ne rililadz Jesus

²¹ To ne nac to zha ne ngable lo Jesus, tib tib to golgon mine rnee zha ne nacgre to, zeena glu ganle me nac men non lo to.

²² To ne nac to men wnaa ne ptsieelniale, golgon xtiidz tsiel to, zigne rioxcoque to ron to mine nac xtiidz men ndzon ne rnabey. ²³ Sac ible tsiel to nac men ne no gnabey lo to, zigne Jesus rnabey lo gre zha ne no xnöz me (ni me psilaa zho lo dol, laa zho nac zig xcuerp me). ²⁴ Ni zigne sca ron zho xtiidz me, scaque none gon to mine rnabey tsiel to to.

²⁵ Togaa ne nac to zha bgui ne ptsieelniale, golleynie tsiel to, zigne rleynie Jesus zha ne no xnöz me. Tel me haxta bleeladz me xquielmban me, ²⁶ blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho; ²⁷ zeena gal dze ne laa me ycaania zho, laa zho nacle miech ne rieguial gdzin lo guielndzon ne no me, ni tib dol rapdraa zho, miech mbele nac zho, zig tib le lar nquitsbie ne ni tib pxud neyd. ²⁸ Sca nagon none gun mgui, none gantsi zho tsiel zho zigne rantsi zho xcuerp zho. Mgui ne rantsi tsiel, rrieequia xcuerp zho ga rantsi zho; ²⁹ sac gon, tsod tib zha ne leëque zha csaci xcuerp zho, sinque ran zhow. Ni scadaa nagon rzac Jesus grese miech ne ngab lo me, ³⁰ sac nac zho zig xcuerp me. Ni leë tib le cuerp co nu nac ne.

³¹ Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: "Ib none grieezhaa mgui lo pxoze zho, lo xniaa zho, zeena gbannie zho tsiel zho gac zho zig tibaque miech grop zho." ³² Rgobey naa ngan tsoguc to zha nacle chop miech gac tibaque cuerp; per ga gon rlu ne niicle nzian ne per tibaque cuerp nac ne, ni leë xcuerp Jesus ga. ³³ Mine racladzpaa naa csoladz to nu: to ne nac to men bgui, none gleynie to tsiel to zigne rleynieque to xcuerp to; ni niicle togaa ne nac to men wnaa, none gon to xtiidz tsiel to, cueede to xquielto zho.

6

¹ To ne nac to meed, golgon xtiidz pxoze to, xtiidz xniaa to, sac sca nonguiela, ni scagaa glu ne nli rleynie to Dios. ² Golgan ganle, lo gre xley Dios no tib mine znu rnee: "Bin xtiidz pxoze luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni leew glopaa rnee ganle pe nac mine yгаа zha ne gun mine rnabeya, ³ sac rneew, niowse gac lo xquielmban zho, ni nroob dze ne gban zho lo guidzliu rii.

⁴ Togaa ne nac to men nguzan, gunde to ncuuane yquiaaguieñe to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

⁵ To ne nac to zha ne ngadoo lадznia ben, golgon xtiidz men ne rnabey to. Golguien zha rnabey to, dib zdoo to, goltsoxco golgun xtsiin zho, zig nac zeene xtsiin Jesus ga noyun to. ⁶⁻⁷ Gunde to ne loxaque zeene zose zho lo to, dzigose yquiaalo to gun to dziin zeena guiannziuu to lo zho, sinque ine nguieel golgac golgun xtsiin zho, zig nac zeene xtsiin Jesus ga quia to, ine dib zdoo to quiayun to mine racladz Dios. ⁸ Benque nanle to, zigtaa zha ne ngadoo lадznia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuuane wen ne noyun zho.

⁹ Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib men ne rnabey to

grë to, lëe me ga zob gbaa; ni tel me gon led yed me guiab dien cho rnabey, chogaa run dziin.

None nsin so zha ne rliladz Jesús

¹⁰ Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grëtaa guielrnabey ne rap me, me gneedz grë lose fuerz lo to. ¹¹ Zig nac grë menguiib, ible no grë ncuaane rquiin zho zeene laa zho rie lo dil, scaque to niina nagon, golquiin grë lose fuerz ne bneedz Dios lo to, zeena glëbd mendox gungüet ma to.

¹² Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii.

¹³ Gane nagon none yquiin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

¹⁴ Dziits sca golso:

Dziits golso lo mine nac diidzli, zigne dziits dziits rzhidoo len menguiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuaane racw menguiib lo grë ncuaane gnitlo zho.

¹⁵ Nsin golso zeene laa to tsienee Xtiidz Dios lo miech gacnan zho zha guiaanwen zho lo me, zigne nsinle zo menguiib zeene laa zho no tsie lo dil.

¹⁶ Guiaanladzde to, golnalo Dios, zeena peet grieelod gun grë me yozh co to, zigne rnalo menguiib guiiblag ne rsaac zho lo zha ne nodilnie zho.

¹⁷ Golsoladz ganle laa Dios psilaale to lo guielgut, golsaca zigne rzac menguiib pchog guib ne rzob guic zho, rsilaaw zho lo guielgut. Ni golsac Xtiidz Dios mine rneedz Espíritu Sant lo to, zigne rzac menguiib xquiib zho.

¹⁸ Nsin sca golso, guiablode to. Tibaque golzodiidznie Dios. Golnab lo me mine rsiaab Espíritu Sant guic to, golnab gacniën me grëse zha ne ngab lo me; ni ¹⁹ golnab lo me gacniën me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

²⁰ Ib me bzo naa cteed naa xtiidz rii me lo grë zha zit, ni mincocxe waa rquiaqui znu no grë guib rii nia naa, ngoguiu zho naa nu. Golnab lo me gacniën me naa, gdzieebd naa gne naa ganle cho nac me. ¡Nsin sca golso!

²¹ Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu. ²² Mincopaa ziaad me i, ziaadnie me diidz zha no no nëz rii, zeena ine gley to tsoxcora to mine rliladz to.

²³ Rnab naa lo Dios men ne nac Pxoz ne, ni lo Jesús men ndzon ne rnabey, me gacniën peet zhgab ctsebde to, ine tibaque gliladz to me, ine gleyne to samiech to. ²⁴ Me gunlay to, grëse to ne nac to zha ne nlipaa dib zdoo rleyne Jesús.

Pabl

GUILTS NE PXEEĽ PABL LO ZHA FILIP

¡Diuzh to grëse to!

¹ Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

² Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

³ Zeene rsoladztaa naa to, rded naa xquizh lo Dios; ⁴ ni zeene rzodiidznie naa me, rley naa gon rnab naa lo me gacnie me to; ⁵ sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. ⁶ Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

⁷ Min co racladz naa, ni ib rieguaala sac ne nligaa rley nie naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. ⁸ Dios nan ganle pa lotaa nonie to guic naa, rquianè zdoo naa to, zigne rzacaque Jesús ne.

⁹ Rnab naa lo Dios gacnie me to, zig zie dze gley niera to samiech to, tsabiiniraa to, ¹⁰ zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús; ¹¹ zaacse gban to. Ga glu to ganle lëë min co blu Jesús lo to, zeena sca csanglaa to Dios.

¹² Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. ¹³ Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. ¹⁴ Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

¹⁵ Parga nli no stib dii zha ne psilo noyun dziin co, per laa zho noyuna loxaque par dien zha guianziuu zho, sac në rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech. ¹⁶⁻¹⁷ Lëë zha co nagon rlu ne nli rley nie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianziuu zho, rzac zho na tel mazdraa glaa guiaan zho lo naa, mazdraa lozh coguielnë zho naa ne laa naa znule no ladzguiib. ¹⁸ Per par naa, pex gun naa zho. Tel zha ne zie dib zdoo, zha ne ziedgaa dib zdoo, totsaque ne Xtiidz Jesús quiaseed zho miech; min co nac mine mazdraa rley naa.

¹⁹ Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspíritu Jesús naa. ²⁰ Dib zdoo naa racladz naa, tiblque gac naa lëëb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rotaa nac Jesús; niicle tel niaca por min co yquiaaqui gut miech naa. ²¹ Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guielbley nroob ne yгаа naa. ²² Per tel laga mban naa, nzianraa ncuane grieelo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! ²³ No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, lëdle cuëz naa lo guidzliu rii! ²⁴ Per rien naa ible none cuëz naa, sac rquinpaa to naa.

²⁵ Min̄cocxe nagon̄ waa, rgobey naa zbanraa naa, zeena lozh cseed naa to choobraa to lo Xtiidz Jesús, in̄e nley gac to laa to riladza; ²⁶ ni zeene laa naa gbire guial̄ lo to i, rien̄ naa nroob gley to, zdeed to xquizh lo Jesús porne racnieñ me naa.

²⁷ Per mine rsopaa naa diidz lo to gon̄: Goltsoxco gol̄ban zigne no gban zha ne ngab xn̄éz Jesús, zeena niicle tel̄ne grieelod guial̄ naa, racladz naa gon̄ naa tipse nac to gr̄e to, tibl̄ique dziits zo to lo Xtiidz Dios; ni noxco to dien̄ zha gliladz gr̄eraa miech Jesús, ²⁸ ni lalnu rdziebde to gr̄e zha ne rl̄ë ran̄ to. Ga guien̄ zho gan̄le n̄éz ne nitlo zho zie zho, sangue to ga rlu ne laa Dios psilaale to lo xtol̄ to, ni nacie me to. ²⁹ Sac gon̄, ible none gan̄ to guiel̄n̄e porne no to xn̄éz me, bzooblod Jesús to loxaque par yгаа to guiel̄n̄zaac qui gnalo to me. ³⁰ Niicle tow, niicle naagaaw none dzian̄ ne min̄ co. Gon̄le to gan̄le zha nactaa gr̄e ncuane bdeed naa, ni ziyongaa to gr̄e mine nodeed naa niina.

2

Goc Jesús tib men̄ ndooladz

¹ Nan̄le to gan̄le Jesús rchoobladz zdoo to, me rlu zha gleynie to samiech to, tipse nac to ni Esp̄iritu Sant nacie to; nan̄le to gan̄le none yquia zdoo to samiech to. ² Gacxe nana sca, gol̄conley zdoo naa, in̄e tipse gol̄gac, gol̄leynie gr̄e zha ne nacgr̄e to, tipse gol̄nee, ni tipse gol̄gac tel̄ pa lo dziin̄ ne gn̄ediidz to gun̄ to. ³ Ncuane gun̄ to, guiabde to ne laa to gūna par dien̄ zha csan̄win to stib miech, zeen̄ dien̄ zha guian̄n̄ziuu to; sinque in̄e ndooladz gol̄gac, masaque golt̄sienie guic ne nonraa stib miech lo to. ⁴ Ib yguibde to ne lose to yquii ncuane gun̄ to, sinque gol̄guib dien̄ zha gun̄ to xyudar gr̄eraa miech.

⁵ Golsoladz gan̄le pa lotaa ndooladz goc Jesús len̄ dze ne biaadted me lo guidzliu, scaqueгаа nasca ndooladz gol̄gac. ⁶ Sac tel̄ me:

Niicle ne Dios nac me,
per led min̄cod niab me nried me lo guiel̄ndzon ne no me,

⁷ sinque gr̄ese zigne nac me, laa me psan̄a tib lad,
laa me goc zig tib ngund̄ziin win,
biaad me gol̄ me lo guidzliu rii goc me miech.

Nacle me miech,
⁸ ni bii psan̄win me me lo miech,
haxta bdeed me diidz pquiaa zho me lo cruz,
zig run̄ zho cho gr̄e zha yozh.

⁹ Min̄cocxe waa, psanglaaraa Dios me,
biaan̄ me men̄ ne mazdraa non, men̄ ne mazdraa nroob;

¹⁰ zeena zeene laa me gaquiet,
gr̄ese zha ne no gbaa, gr̄ese zha ne no lo guidzliu,
ni gr̄ese zha ne no n̄éz len̄ guidzliu, laa zho yquiitsgzh̄ib,

¹¹ ni gr̄ese zho laa zho cueero, guiab zho gan̄le ne nli me nac men̄ ne rnabey.
Ga laa zho cxobnen̄ gan̄le, zha men̄ nroobtaa nac Dios, men̄ ne nac Pxoz me.

Zha ne nac biini lo guidzliu rii

¹² Bets, bzian, ne nligaa rleynie naa to. Laa naa rnab lo to (zigne bioxco to bin to xtidz naa zeene bl̄éz naa lo to i, scaqueгаа niina niicle ne zit zo naa, gol̄gon mine rne naa nu), ib gdeete to diidz guiab to ladzn̄ia dol̄ stib, niina ne laa Dios psilaale to; gol̄guien̄ tsieniewguite guic to. ¹³ Ben̄que Dioszhal rsiaab guic to rquiabladz to gun̄ to mine racladz me, ni scagaa me racnieñ to rrieelo run̄ tow.

¹⁴ Ni ncuane rieguial̄ to gun̄ to, in̄e nguieel̄ gol̄gac gol̄gūna, peet glisquide to, ni niicle til̄diidzdgaa to; ¹⁵ zeena tsod pe nacie cho glisqui guiab zho laa to pe falt, pe dol̄ ne quiayun̄. Gollu gan̄le nli xp̄ëdle Dios nac to; zaacse gol̄ban, niicle ne ladaque gr̄e miech ntseeb, miech ncow ne ndxie lo guidzliu rii no to. Gol̄gac zig tib biini lo zho, zigne rziini mel gbaa lo ncow ne nac guieel̄. ¹⁶ Ib csaande to Xtiidz Ndzon Jesús, diidz ne rdeed guiel̄mban, l̄ëw gol̄conie guic to. Sca gol̄gac, zeena gal̄ dze ne laa Jesús guiaad stib, per nli gley naa gan̄ naa led zhl̄ed brie naa bial̄ naa, bial̄seed naa to. ¹⁷ Zig nac niina, tel̄

niaca miñe no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yгаа гуиелблеу. ¹⁸ Golley sca! Zigne no guielbley rii zdoo naa, scaquegaa to golco nley zdoo to, zeena grë ne gley.

Timoté ni Epafrodit

¹⁹ Telne gneedz men ndzon ne rnabey ne diidz, racladz naa cxeelniob naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. ²⁰ Me cxel naa, sac guiend stib zha ne zienie guic zig zienie guic naa, tel led med; sac tel me nonie to guic me. ²¹ Grëraa zho, ncuaane yquiiin lo zho rioxco zho, laa ne tsoxco zho mine nac xtsiin Jesús. ²² Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtiidz Ndzon Jesús. ²³ Ible laa guic naa no cxel naa me lo to i, loxaque gacnanse naa dien zha csan wxtis rii xcuent naa nu. ²⁴ Ni ye naa nend pronaque guialso naa i dien yo to, sac rien naa ible zneedz Dios diidz guial naa.

²⁵⁻²⁶ Ni rgobey naa nonguielaquew cxel naa bets ne Epafrodit guiaad me nöz qui, sac laa me rbanle to, ni no me zhgab bin me laa to gocnan ne laa me bzhaacnë. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacnie me naa lo dziin ne nodziun no. ²⁷ Ni nligaa bzhaacnë me, nzhooc goc me zootle laa me nietle; per pquia zdoo Dios me ni pquiaagaa zdoo Dios naa peet gocd me, sac gon nole naa guielnë, ni tel pe niacaque me mazdraa niac nroob xquielnë naa. ²⁸ Min co nagon laa naa cxelgazh me, zeena gley to gan to lo me stib, ni scagaa niicle naaw zley naa. ²⁹ Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. ³⁰ Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

3

Ncuaane mazdraa non

¹ Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaane yquingaa lo tow: ² jlb cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho. ³ Sangue ne, ndionle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho run zhow, zha co nac zha ne nlipaa no xnëz me. Ne ne nac ne zha ne no xnëz me, Jesús nac men ne rdziunnon ne, sac ndion ne por me laa Dios ycaania ne; rnalod ne grë ncuaane laglaase, ⁴ sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho: ⁵ Xon ngbidz raap naa laa naa birole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa; ⁶ bleyniedox naa grë mine zienal zha Israel, gacxe waa pquianaal naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

⁷ Lëe grë ncuaan co rnalo naa len dze co, sangue niina Jesús rnalo naa, grëse ncuaan co laaw psanle naa tib lad. ⁸ Ni led loxaque psandse naaw tiblاد, sinque grësew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaan co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me. ⁹ Zanaal draa naa gun naa mine rnabey ley par guiaanmbe naa lo dol, sinque laa naa zanaal dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. ¹⁰ Racladz naa guienraa naa zha nac Jesús, ni gaap naa poder ne pquiiin Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz

me xquielmban me; ¹¹ ni scagaa, nanpaa naa ye naa grieeban gal dze ne guiadbeeban me grë zha ne no xnëz me.

Stsëë Jesús xcuerp zha ne ngab lo me

¹² Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa. ¹³ Bets, bzian, gard gun naa gan; per xco co no naa; grëse ncuaane bded laaw biaanladzle naa, laa guic naa zienie ncuaane naraa ziaad. ¹⁴ Masaque rzaac naa niina zig rzac zha ne rie prueb lo corr, rded naa fuerz gdzin naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne rliladz Jesús.

¹⁵ Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. ¹⁶ Ni negaa, grë mine rienle ne zha nac, none gban new.

¹⁷ Bets, bzian, golwi ganle zha mban naa, ni zha mbangaa grë zha ne zienal mine blu no lo to grë to; dzigo sca golban. ¹⁸ Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëe zho ron zho pe nac gut Jesús lo cruz; ¹⁹ ni nëz ne nitlo zho ga zie zho. Laa ne tsienal zho mine rnabey Dios, laa zho zienal grë ncuaane gdeed guxt zdoo zho, ncuaane gdeed guxt xcuerp zho. Loxaque grë ncuaane mbee guielto zienal zho, per zha rlozhd gleynie zhow; niapse grë ncuaan lo guidzliu rii nonie guic zho. ²⁰ Sangue ne, laa ne zional ncuaane ygaa ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey); ²¹ zeena ctsëe me xcuerp beu wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaane no.

4

Rnab Pabl nley gac zha Filip

¹ Bets, bzian, ne nlipaa gon rleyne naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grëtaa xtsiin Jesús mine beu naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

² Rnab naa lo bzian ne Evodia, ni lo bzian ne Sintique glëëlsadraa zho, none tipse gnee zho; sac gon bel zho, xnëz Dios no zho grop zho. ³ Ni luu gon bets, ne nac luu zha ne tibaque quiayacnie naa lo dziin ne quiadziuuu ne, laa naa rnab lo luu bnee lo grop wnaa qui gneewen zho stib, sac gon ye zho blactaa mine bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble len libr ne quia lë grëse miech ne bgaale guielmban ne gdzindraa dze lozh.

⁴ ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley! ⁵ Golguien zaacse golbannie grëse samiech to, zeena haxta gzëeb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

⁶ Tel pe nac grë ncuaane quiaded to, tsoode to zhgab, gdziebde to, sinque golzodiidznie Dios, golsan grësew ladznia me; per led loxaque gnabdse to, sinque golsoladz goldeed xquizh lo me. ⁷ Ni zeene sca csan to grë xliaadz to ladznia me, haxta tibliladz guiaan zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac men ne nacie to; grëraa miech ib guien zho zha nac ne scataa tibliladz rac to.

⁸ Bets, bzian, nu ne laa naa csiaalë guits rii laa naa rnab lo to, min rii golconie guic to: niapse mine nac diidzli,
niapse grë ncuaane nonguiel gac,
niapse grë ncuaane rac zigne nac diidzli,
niapse grë ncuaane mbe,
niapse grë ncuaane gleynie miech,

niapse grë ncuaañe gley miech gon zho,
 niapse grë ncuaañe yquiiñ,
 niapse grë ncuaañe gzee zdoo miech ni gleyñie zho.
 Grë min̄ rii golconie guic to, ni lëew goltsoxco gun̄ to.

⁹ Ni golguien̄ gon̄, grë mine pseed naa to, mine psan̄ naa diidz lo to gun̄ to, grë mine bin to bne naa lo to, mine gon̄ to beñ naa, grë min̄ co goltsienal; zeena scagaa zacnie Dios to ib peet zhgab ctsebdraa to.

Gon ne bdeed zha Filip

¹⁰ Ne nlipaa rded naa xquizh lo men̄ ndzon ne rnabey ne, ni rley naa ne laa to pxeel̄ grë ncuaañe yquiiñ naa stib. Nan̄ naa ne led biaanladzde to naa, sac tibaque noxco to dien̄ zha gun̄ to xyudar naa; sinque bdeedniobda diidz. ¹¹ Rley naa ne laa to psoladz naa, maase niicle nodpaa naa zhgab co dien̄ pa griee pe yquiiñ naa, sac pseedle naa peet zienied guic naa niicle tel̄ zhataa nodeed naa. ¹² Nan̄ naa zha nac guiel̄prob, ni nan̄quegaa naa zha nac zeene quianie ne nroob ncuaañe yquiiñ ne. Pseedle naa rzac zdoo naa mine nodeedtaa naa, niicle zeene biodzë zdoo naaw, zeene rcaabedzga naaw; niicle zeene nroob ncuaañe yquiiñ naa no, zeene peet guiend̄gaa. ¹³ ¡Grësew rrieelo naa, sacne nacnie Jesús naa, me rneedz xfuers naa! ¹⁴ Per wen ga been̄ to, pxeel̄ to ncuaañe pquiiñ naa lëetaque len̄ dze ne peet guiend̄ lo naa.

¹⁵ Zeene brie naa nëz xtan zha Macedon i, len̄ dze ne wriin̄ psilo noseed naa miech Xtiidz Ndzon Jesús ga, tosaque nac zha ne been̄ xyudar naa, been̄lo to gon pxeel̄ to lo naa, porne rleyñie to dziin̄ rii. ¹⁶ Scasaque len̄ dze ne no naa Tesalónica, blalaa vuelt pxeel̄ to pe pquiiñ naa.

¹⁷ Guiabde to togo bod ne dien̄ zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guiel̄nzaac ne ygaa to. ¹⁸ Tel̄ na gon̄, grële ncuaañe yquiiñ naa no, haxta nrooblew nu. Ni ne pxeelaque to Epafrodit biaadsan̄ stib nëza, haxta bdedsole goclow lo naa nu. Grëtaa ncuaañe bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me. ¹⁹ Scagaa niina nagon̄, grëse ncuaañe yquiintaa to, Dios men̄ ndzon ne rililadz ne, me gneedza lo to, porne nligaa dib zdoo to rililadz to Jesús; sac gon̄, nroobdoo grë guiel̄ndzon, grë guiel̄nzaac ne rap Dios. ²⁰ ¡Lëë xDios ne ga, me nac Pxoze ne grëse ne! ¡Gotsaa dziuunnon ne me sca, mesi gdziñd dze ne nitlo xquiel̄ndzon me! Sca rieguiala.

²¹ Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu. ²² Golcaania zhibdiuzh grëse zha ne no nu, zha ne rililadz Jesús; haxta ye grë zha ne rquia dziin̄ lo rey Roma nu, laa zho rxeel̄ zhibdiuzh zho lo to.

²³ Jesús, men̄ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

GUILTS NE PXEEĽ PABL LO ZHA COLÓS

¡Diuzh to grëse to!

¹ Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. ² Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoos to rleynie to Jesús.

Dios men ne nac Pxoos ne, me glu ganle pa lotaa noxco me to, zeena peet dzeb tsonied guic to.

³ Gzobtaa zeene rzodiidznie no Dios, Pxoos Jesús men ndzon ne rnabey ne, rnab no gacnie me to, ni rdeed no xquizh lo me ne squitaa rneedz me guielbiini lo to; ⁴ sac zidzion no ne nlipaa dib zdoos to riladz to cho nac Jesús, ni rleynie to grëse zha ne no xnëz Dios. ⁵ Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac nroob ne yгаа to gbaa.

⁶ Golgacnan sca ganle, Xtiidz Ndzon Jesús, wseed ne riladz to, nzianraa zaatne quiaagaaz, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. ⁷ Lëe min co ga biadseed Epafr to; tib men ne nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. ⁸ Me bzodiidz lo no ne squitaa rneedz Espiritu Sant guielbiini lo to, rleynie to samiech to.

⁹ Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to; ¹⁰ zeena grieelo gban to zigne no gban zha ne no xnëz Jesús, tibaque gun to ncuaane conley to zdoos me; dzigosi grëse ncuaane ndzinli ne gun to, zlupaa ncuaane rquiina, ni zioquicraa to zha nac Dios. ¹¹ Ni rnab no lo me, niapse por poder ne rap me gunndip me zdoos to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to, ¹² ine gley to gdeed to xquizh lo me nac me Pxoos ne, ne squi laa me bzooblo to, psanmbe me to; zeena gdzin to lo biini zaatne yгаа to mine no gdeed me lo grëse miech ne no xnëz me. ¹³ Sac me nac men ne blee ne ladznie mendox, ma ne rnabey lo guielcow, psan me ne ladznie Xpëed me Jesús, men ne rleynie me ga. ¹⁴ Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nëz lo Dios.

Grë ncuaane been Xpëed Dios

¹⁵ Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nacse me scaque nac Xpëed me; ni ladznie Xpëed me no grëtaa ncuaane no. ¹⁶ Zeene bnabey me taa grëtaa ncuaane no gbaa, grëtaa ncuaane no lo guidzliu; Xpëed me bzaaw grësew, zigtaa grë ncuaane rdzian new, zigtagaa grë ncuaane grielod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw. ¹⁷ Nole Jesús zeene baa grë ncuaan co, me naaza, gane tib tiba nosew zaatne rieguiala. ¹⁸ Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieaban; zeena glu ganle me nac men ne mazdraa nroob, me nac men ne mazdraa non; ¹⁹ sac ib Dios bnabey zigne nacse Dios scaque nac me.

²⁰ Niapse por Jesús grëse ncuaane no zigtaa lo guidzliuw, zigtagaa gbaaw, laaw baaanwen lo Dios, ni lëe min co goc zeene sca bzhee xchen Jesús lo cruz. ²¹ Zig nac to, glo zit zo to lo Dios, rriequia rlëenie to me, sac niapse grë ncuaane ndzinlid güeynie guic to been to; ²² sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdzin to zaatne no me. ²³ Per parne grieelo gdzin to ga, none tiblque golgun guic to, goltsienal Xtiidz Ndzon me mine riladz to, ib guiaanladzde to guielnzaac ne no yгаа to,

zigne raquiet lo Diidz Ndzon ne pquiaadiag to ga. Lëë Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

Dios bzo Pabl tsoxco me zha ne ngab lo Dios

²⁴ Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. ²⁵ Ni ible Diosgaa bzo naa noyun naa dziin lo grë miech ne no xnëz me, zig nac to, gocniën me to bzo me naa bne naa grëse zigne nac Xtiidz Ndzon me lo to. ²⁶ Diidz ndzon ne gocnanð grëtaa zha gol ne ziyaadmban wlal ne bre guidzliu, laaw gocnan grë zha ne no xnëz me niina. ²⁷ Ible zha gocladz me gacnan grëtaa guielnzaac ne yгаа zho zeene laa zho gacnan diidz co; haxta to ne nac to zha zit. Ni lëë diidz ndzon co nu: Zha ne nacie Jesús, me gdziinne zho zaatne nac lo guielndzon ne no me.

²⁸ Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. ²⁹ Min co nac dziin ne noxco naa, per led dziin ligada, gane dib nacse guielndaan, dib nacse fuerz ne rneedz me lo naa, noxco naa noyun naaw.

2

¹ Racladz naa gacnan to ganle ne nlipaa tibaque no to guic naa, zigtaa tow, zigtagaa zha Laodicéw, ni grëragaa zha ne gard ganlo naaw. ² Rnab naa lo Dios ib guiaand zdoo to, tipse gac to ine gleynie to grë zha ne nacgrë to, lozhraa tsaa biini xquielrien to guien to ganle zhapaa nac Jesús, sac gon naraa bdeed Dios diidz gunbey miech me. ³ Me nac men ne rap grëse guielrac, grëse guielbiini nroob chen Dios. ⁴ Laa naa rne min rii lo to, zeena choot yquidiede to, niicle paraa ndzielguic rzë xtiidz zho. ⁵ Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblrique nac guic to dib zdoo to rliladz to Jesús.

Tib guielmban cub

⁶ Nana sca, zigne bzëëb to xnëz Jesús gnabey me to, scagaa goltsienal mine rnabey me, ⁷ masaque ladznia me golsan xquielmban to, me glnalo, gollu ganle ne nli dib zdoo to rliladz to me, zigne pseed no to, ni tibaque goldeed xquizh lo Dios.

⁸ Nsin golso: ib gac-wete to lo grë zha ne guiaadnie wseed lo guidzliu rii, grë godiidx ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuaane run grë xmengol zho, grë wseed ne rleynie grë miech lo guidzliu, min co rseed zho miech. ⁹ Sangue ne, ndion ne ganle zigne nac Dios scapaa nac Jesús. ¹⁰ Gacxe waa, to ne nacie to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

¹¹ Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grë dol ne been to glo; ni Jesús nac men ne bloo to bey co. ¹² Ni zeene brobnis to, rrieequia bgueetsnie to me ga ni brieebannie to me, sacne bliladz to poder ro ne rap Dios men ne blische me len baa. ¹³ Glo zha gutle nac to nëz lo Dios, lala por grëtaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guielmban stib. ¹⁴ Ptiche Dios grëse mine riogual ne, sac bdiits ne mine nac xley me; grëse dol co pcaadz me Jesús zeene laa Jesús quia lo cruz. ¹⁵ Ni zeene sca bded Jesús, ga psiaablo me mendox; grë me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

Grë wseed ne paat rquiind

¹⁶ Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grë zhilni zha Israel, runndade to dze ne rquia mëë yeen, runndade to dze ne rdziiladz zha Israel lo dziin. ¹⁷ Grë min co bioxco miech zeene gard guiaad Jesús, per lega gocse ncuaan co zig tib zhimlë guielbiini ne biaadnie Jesús. ¹⁸ Ib gliladzde to

xtiidz grē zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleyne zho grē anjl, rnee zho goon dieen pe ncuane gbaa ne zielulo lo zho, lēeque lēe zho rlozhd gunniats zho por grē zhiwseed zho. ¹⁹ Led yed zho ngab lo Jesús, men ne rnabey lo ne grēse ne ne nac ne zha ne ngab lo me. Tel ne, me racnen ne, tipse noyun me ne, laa ne noyabiiniraa zigne racladz Dios.

²⁰ Zeene sca gut Jesús, gataa bnitlo me grētaa mine nac to glo, gane niina ngadoodraa to lo grē ncuane zienal grēraa miech guidzliu. ¿Pe nac dzigo ne bii zienal to grē min co? ²¹ Zig nac grē mine rnabey zho to, rnee zho: “Nod gon yquiiin to ncuane rii, nod gow to min rii, gacd ygaal to ncuane rii.” ²² Ncuane tib rded nac grē ncuane qui, zig nac guielwagw led ncuane gdiid ga, grēse wseed qui miechse bleebeya. ²³ Parga nli na zootle nixbiini nac grē wseed co, sac rioxco zho dien zha tsiegan zho grē anjl, rac ndooladz zho lo miech, ni rsacsi zho xcuerp zho; per rrieelod grē ncuane co ctsēew xpensar zho, zdo zho, parne gnabey zho xcuerp zho.

3

¹ Golguien ganle, stible guielmban rap to niina, lēe guielmban co bga to zeene brieaban Jesús; gacxe waa, goltsoxco yga to grē guielnzaac ne no gbaa, zaatne zob Jesús cue Dios nēz derech. ² Grē guielnzaac ne no gbaa min co golconie guic to, led grēd ncuane no lo guidzliu rii; ³ sac gon, rrieequia gutle to lo grē ncuane no lo guidzliu rii, laa to mbanniele Jesús, zigne racladz Dios. ⁴ Laa ne rdziaap tib guielmban cub niina, sacne nacie ne Jesús; gal dze ne laa me guiaad stib, laa ne no gdziñ lo me gban ne zaatne nac lo xquielndzon me.

Zha gban zha ne riladz Jesús

⁵ Gacxe nana sca, golsaan grētaa guielntseeb ne run miech lo guidzliu rii: tsoniede to zha ne led tsieelde to, gunde to grē ncuane mbeeguelto, gdeete to diidz gnabey xcuerp to to, gunde to ncuane ndzinlid ne racladz to, ni gacblēde to lo dimi (sac tel scaw, dzigo dimi rsan to xlugar Dios).

⁶ Grē dol rii run grē zha ne nēd gon xtiidz Dios, lozh ga lēe mine tsieguial zho laa zho yga lo guielzi ne csiaab Dios. ⁷ Zig nac to, grē min co been to glo; ⁸ sangue niina, none csaan tow, ni lalnu:

glēeniedraa to samiech to,
sobzhiandraa to,
gundraa to guielntseeb,
gneenēdraa to samiech to,
gneedraa to diidzguidz,
⁹ yquidiedraa to samiech to.

Sac gon, nacdraa to zigne nac to glo, laa to briele lo grētaa mine been to. ¹⁰ Stible nac lo xquielmban to niina: tib miech cuble nac to, ni laa to bii nodzēē haxta que ne gac to zigne racladz Dios men ne psan miech, zeena scagaa lozh gunbey to zha nac me. ¹¹ Zha ne bgaale guielmban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdga; dien cho run xtsiin ben, dien chogaa nac zha rnabey. Mine rquiiinraa niina, nacie grēse zho guien ganle Jesús nac men ne mazdraa non, me none gnalo zho.

¹² Golgan ganle, zha nquialadztaa Dios to, ib laa me ble to gac to miech ne ygab xnēz me. Zaacse sca golban, ne nlipaa dib zdo to: golquia zdo samiech to, niowse golgac lo samiech to, ndooladz golgac lo samiech to, nguudzladz golgac lo samiech to,

guieedniede to samiech to.

¹³ Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon. ¹⁴ Ni mine mazdraa none tsoxco to, golleynie zha ne nacgrë to zigne racladz Dios, zeena tipse gac to; ni scagaa gleynie to grëraa samiech to. ¹⁵ Jesús nac men ne ctiche grëtaa ncuaane ndzinlid ne no zdoo to, zeena niowse gbannie to samiech to. Lëë tib guieinzaac co no yгаа to ne laa Dios bredz to, ni scagaa none gban to, zeena tipse gac to grë to. Golsoladz goldeed xquizh lo me.

¹⁶ Niapse mine nac Xtiidz Jesús golconie guic to, golco zdoo to. Golquin grë guieibiini ne rneedz me lo to, golseed grë zha ne nacgrë to, ni zha ne rxin, golnee lo zho zaacse gac zho. Dib zdoo to goldeed xquizh lo Dios por grëtaa mine run me, ine golgoolnie me grë salm, golgoolnie me grë cant ne rdzioolnie ne me. ¹⁷ Ncuaane guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoз to, niina ne laa to ngable lo Jesús.

¹⁸ To ne nac to men wnaa ne ptsieelniale, golgon xtiidz tsieel to, sac ible sca nonguiel gban miech ne no xnëz Jesús.

¹⁹ To ne nac to men bgui ne ptsieelniale, golleynie tsieel to; gacnchogde to lo me.

²⁰ To ne nac to mëëd, golgon mine rnee pxoz to, mine rnee xniaa to, sac sca rdziladz Dios.

²¹ Togaa ne nac to men nguzan, gunde to ncuaane gunglëë to xpëëd to, zeena csande to zdoo zho.

²² To ne nac to zha ne lega run xtsiin ben lo guidzliu rii, golgun grëse mine rnabey zho to; gunde to zeene zose zho lo to dzigose yquiaalo to gun to dziin, zeena guiannziuu to lo zho; sinque dib zdoo to golgun xtsiin zho, golguien ganle Dios zobwi ran me pe run to. ²³ Grëse dziin ne gun to, ine nguieel golgac golguna, zig nac zeene xtsiinzhal Dios noyun to. ²⁴ Benque nanle to, zgaa to mine gdeed Dios lo grë zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin. ²⁵ Golgon diidz sca, sac zha ne gonda, ib tedsod zdeed Jesús mine tsieguial zho; sac gon, tel me led yed lo me ncuëe miech.

4

¹ Togaa ne nac to zha ne quia miech xtsiin, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

Gnab zho gacniën Dios Pabl

² Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. ³ Golnab lo me gacniën me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu. ⁴ Golnab lo me gneedzraa me guieibiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

⁵ Golquin guieibiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. ⁶ Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

⁷ Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziuungza no me xtsiin men ndzon ne rnabey ne. ⁸ Ga nagon laa naa rxel me, me gnë lo to ganle zha no no nëz rii, ni gnee me lo to zeena cchoobladz me zdoo to. ⁹ Ye menladz to Onésimo guiaadgrop me. Rleynie no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grë ncuaane quiayac nëz rii.

¹⁰ Golcaania zhibdiuzh Ristarc, men ne nioogyunie naa nu, zhibdiuzh Marcw betsyëen Bernabé (laa naa nile lo to ganle, telne laa Marcw guiaadgan to i, niowse golcuëzlo me);

¹¹ ni zhibdiuzh Jesús, tib meṅ ne rneeque zho Just. Lo grë zha Israel ne riladz Jesús, lëëse gza zha rii nac zha ne quiayun xyudar naa quiaseed no miech zha sëëb zho xnëz Dios, ni blactaa zichoobladz zho zdoo naa.

¹² Golcaania zhibdiuzh menladz to Epafra, ye me quiayun xtsiin Jesús nëz rii; tibaque rzodiidznie me Dios rnab me dziits so to lo Xtiiidz Jesús, ni tiblique gac guic to tsoxco to gban to zigne rnabey Dios. ¹³ Nanpaa naa ganle pa lotaa nonie to guic me, grë to zha Laodicé ni zha Hierápolis.

¹⁴ Golcaania zhibdiuzh Demas ne, ni zhibdiuzh Luc meṅ ne run rmed, lëë stib meṅ ne nziuu lo no nu.

¹⁵ Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoonnie zho Dios.

¹⁶ Zeene gon lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho. ¹⁷ Ni golguiab lo Arquip, tsoxco me zaacse gun me dziin ne bdeed Dios lo me i.

¹⁸ Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac meṅ ne gunlay to, me glu lo to ganle pa lotaa noxco me to.

Pabl

GUILTS NE GLO PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, men ndzon ne rnabey, ni lo Dios men ne nac Pxoz ne.

Dios ni Jesús, me glu ganle pa lotaa noxco me to, zeena peet zhgab ctsebbe to.

² Tibaque rdeed no xquizh lo Dios men ne nac Pxoz ne, squitaa rneedz me guielbiini lo to; gzobtaa zeene rzodiidznie no me rzeet no to lo me. ³ Ni zeene rzeet no to lo me, rsoladz no grëtaa dziin ne run to niina ne dib zdoo to rleynie to me, ni zha quialëb to lo grëtaa guielnë ne noyan to, tibaque nonie guic to ne ible zdziñ dze ne laa Jesús guiaad stib.

⁴ Bets, bzian, rleyniedox Dios to, ni ndion ne ganle me bzooblo to ygab to lo me. ⁵ Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espíritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuuñ no xyudar to, sac ne nligaa rleynie no to.

⁶ Scagaa to, pseed to wban to zigne mban no, ni zigne wban men ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espíritu Sant guielbley lo to, ib peet güeynied guic to. ⁷ Grëse zha ne riladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to. ⁸ Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho. ⁹ Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmengol to, grë ncuane nac mdio lo to, laa to bliladz men ne nacpaa Dios ne nguiamban, ni laa to zienal mine rnabey me. ¹⁰ Ni rzodiidz zho zha zienie guic to ne ible zdziñ dze guiet Jesús gbaa guiaad me stib, ni quiambëz to gdziñ dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

2

Zha güeyseed Pabl zho

¹ Bets, bzian, nanle to ganle zeene biaad no lo to i biaad-zhlëd no, brieelo pseed no to. ² Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacie no. ³ Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to. ⁴ Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziuuñ no. Nli nzian zha ne rlëeniew, per laa no bii rdziuuñ dziin co; sac zionald no gac mine rdziladz miech, sinque laa no zional gac mine rdziladz Dios, men ne nan ganle pe rza zdoo ne.

⁵ Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñd no min co. ⁶ Wlaltaa ib bguibd no dien zha niacnon no lo miech, niicle lo tow, niicle lo stibgaa miecha. ⁷ Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie men wnaa xpëdyeen me, nda nda ran me win; scadaa bleynie no to, ⁸ bio no bdzioxco no pseed no to Xtiidz Dios. Ne nlipaa bleynie no to, telne niaca mine niedziña haxta mbeeladz no no niet no por to.

⁹ Bets, bzian, rsoladzaxe to ganle ni lalnu ib psodziind no to; blactaa, dze guieel bdziuuñ no dziin, nozhal bdziniaa ncuane pquiiñ no len dze ne biadseed no to. ¹⁰ Dios

zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuund no ncuaane mbee no diidz ro miech, sinque laa no bdziuun mine rdziladz Dios. ¹¹ Masaque rziac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; ¹² pso no diidz lo to zaacse gac to, gban to zigne no gban zha ne no xnëz Dios, men ne bredz to gdziñ to lo xquielndzon me, zaatne rnabey me.

¹³ Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaane bleebey miech. Ni nligaa Xtiidz Diosa, gacxe waa zha ne riladza zigne rzac tow niina, rhixcuaa lo xquielmban zho. ¹⁴ Per zeene laa to bliladza, laa menladz to psacsi to; bded to zigne bdedaque grë zha Israel ne riladz Jesús, sac tel zhaw psacsi menladz zho zho. ¹⁵ Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho benxoon no. Ncuaane rbinladz Dios run zho, rlëënie zho grëse miech, ¹⁶ rtsidil zho pe nacte nonee no lo grë zhazit zha laa zho lo dol. Loxaque quiayunctalraa zho xtol zho, per, jprobsaxe zho, sac guielndox ne ziaadyob cxeel Dios yгаа zho!

Racladz Pabl tsiegan Pabl zho stib

¹⁷ Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no telpaa zha guiaaddzian no to. ¹⁸ Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëe no niaad. ¹⁹ Guiabde to togo quiayaanladz no to, sac gon to rnalo no conley zdoo no gal dze ne laa Jesús guiaad stib. To glu nli bdziuun no xtsiin me, to glu ne nli riogual no yгаа no premio ne gneedz me. ²⁰ Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziuun no.

3

¹⁻² Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiadziuun no xtsiin Dios, quiaseed no miech Xtiidz Ndzon Jesús.) Laa no pxeel me biaan gan me to, biadchoobladz me zdoo to, biadnee me lo to lozh sodziits to lo Xtiidz Dios; ³ zeena niicle tel pe guielnë ne noyanta to, ib guiaand zdoo to. Nanle to ganle grëse ne ne riladz ne Jesús, ib laa ne no dzian guielnë. ⁴ Led rsoladz to zeene biaad no i, bneegazh no ne ib laa ne no dzian guielnë; ni gon to ganle scase goca.

⁵ Ne nligaa tibaque bionie to guic naa, nacte mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuaane rnabey ma, dzigo zhlëse biadseed no to.

⁶ Laa niina ne laa Timoté blanso nu stib, blansonie me diidz, në me niowse mban to, rleynie to grë zha ne nacgrë to, dib zdoo to riladz to Dios. Ni në me rleynie to no, ye to racladz tebaa zha gan to lo no, zigne rziacaque no.

⁷ Min co nagon, bets, bzian, niicle ne nroob zhgab, nroob guielnë ne nodieed no nu, haxta biaanladz no grë ncuaan co zeene gocndion no dziits zo to lo Xtiidz Dios, mine riladz ne. ⁸ Haxta stib goc zdoo no bdzion no squi tiblque laa to rleynie men ndzon ne rnabey ne; ⁹ ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran ganle pa lotaa rley no. ¹⁰ Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grëraa mine no gacnan to lo Xtiidz me.

¹¹ Dios men ne nac Pxoze ne, ni Jesús men ndzon ne rnabey ne, me gacnien no grieelo guiaaddzian no to. ¹² Jesús gacnien to tsaaraa to biini, zeena gleynieraa to grë zha ne nacgrë to ni grëraa samiech to, zigne rleynie no to. ¹³ Ni rnab no lo me, gacnien me to tiblque gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grë zha ne nactie me.

4

Guielmban ne rdziladz Dios

¹ Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios, ² benque nanle to zhaw, sac lëë min co bnabey Jesús no biadseed no to gun to. ³ Sac gon, laa Dios racladz mbe guiaan to lo me, gunde to guilyozh yquiangob to zha ne led tsieelde to.

⁴ Grë zha bgui, zeene laa zho gnee lo tsieel zho, none niowse ndzinli gac zho; ⁵ gund zho zigne run grëraa miech ne nan zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquiin wnaa. ⁶ Niicle yquiangobde to tsieel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz ganle psole no diidz rii lo to glo, ni na laa no rneequew stib. ⁷ Golguien ganle, bredzdaxe Dios ne waa parne dziuun ne grë guilyozh, sinque laa me bredz ne gban ne zigne racladz me. ⁸ Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidz cholze samiech zhow.

⁹ Laa zig nac guielwleynie, nanle to zha no gleynie to grë zha ne nacgrë to. Rquiind cso no diidz lo to dien zha gun to, sac Dioszhal pseed to zha gleynie to zigtaa zha ne nacgrë tow, zigtagaa grë samiech tow. ¹⁰ Zig nac grë zha bets ne, zha bzian ne, zha ne no xtan zha Macedon, zëëb diidz rleynie to grë zha co. Goltsoxco sca, golleynieraa samiech to.

¹¹ Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuaane yquiin to; ¹² zeena peet gunfalte lo to, ni scagaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

Ib ziaad Jesús stib

¹³ Bets, bzian, nu na ganle laa naa gzodiidz lo to zha gac grë zha ne ret, zha ne ngable lo Dios; zeena tsoode to guielnë zig rzac grë miech ne gard guien gnalo Jesús.

¹⁴ Ne, ne dib zdoo ne riladz ne nli gut Jesús ni bleeban Dios me; scaquegaa none gliladz ne ible zbeeban Dios grëse zha ne dib zdoo riladz Jesús, zeene laa Dios cxeel me guiaad me stib. ¹⁵ Golgacnan sca ganle, znu gon nac xtiidz me: Grëse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grë zha ne gutle. ¹⁶ Zeene laa me quiet gbaa, redz ro ne yquia, zlu zëëb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me quiet gbaa, laa grë zha ne ngab lo me, zha ne gutle, laa zho grieeban. ¹⁷ Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdzindraa dze ne gbiche zho lo me.

¹⁸ Nana sca mine rne naa nu, golsodiidza lo grëse zha ne nacgrë to; zeena conley to zdoo zho.

5

¹ Bets, bzian, nana par gni naa lo to dien pe guidze te guieel guiaad me, choot ndionda. ² Golgacnan ganle, lega nacle zeene gan miech laa me ziaadle, zig nac zeene rzëëb ngbaan yu guieel, ¿cho dien nanaa pa hor sëëb ngbaan? ³ Zeene laa grë miech guiab: “Nasi wen ndxie ne, peet guielxtseeb nodraa”, tibaque zeene guien zho laa dze ne nitlo zho bdzinle, ni gasi grieelodraa cho csilaa zho. Sac zig znuse rnaaz yoob men wnaa ne bdzinle dze gap xpëed; scadaa gdzin dze co.

⁴ Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdzin. ⁵ Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow; ⁶ gacxe nagon waa, niini golso, tsienalde to mine run zha ne zienald guielntseeb; sac nac grë zha co zig nac zha ne nixguies, tibaque guieel no zho. ⁷ Sac tel guieela, guieel raaguies miech, niicle zha ne rzuudzgaaw guieel rzudz zho. ⁸ Sangue ne ne nac ne zha ne niini zo, none guien ne pe nac ncuaane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaane racw

menguuib lo grë ncuane gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsilaaw zho lo guielgut. ⁹ Sac gon bredzdaxe Dios ne waa yгаа ne guielnëdox ne no guiaad, sinque laa me bredz ne csilaa me ne lo guielnë co. Ni lëë min co rac zeene laa ne riladz Jesús. ¹⁰ Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

¹¹ Nana sca, tib tib to goldeed xfuers zha ne nacgrë to, niapse diidz ne gun xyudar zho choobraa zho lo Xtiidz Dios, min co golnee lo zho; zigne quiaayunaque to niina.

Rso Pabl diidz

¹² Bets, bzian, laa no rso diidz lo to: Niowse golgac, niowse golnee lo grë zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to.

¹³ Golguien ganle cho nac zho, golleynie zho, sac gon led lega nacd dziin ne quiaayun zho lo to. Golsoladz sca: ¡Zaacse golban, tilniede to samiech to!

¹⁴ Tel cho zha ne nacgrë to i, rsilo quiaayacgbech, golgactox lo zho, zeena guien zho gun zho dziin. Grë zha ne quiasaan Xtiidz Dios, golnee lo zho zeena gleynie zhow stib; grëгаа zha ne gard tsoguicpaa zha naca, golgun xyudar zho tsoguic zhow; niicle grëragaa zha ne nacgrë tow, ib guieedniede to zho. ¹⁵ Golguien tel pe guielntseeb ne run miech lo to, guiabde to ne scaque gun to zho; sinque mazd goltsoxco tibaque niowse golgac lo grëse miech, niicle lo zha ne nacgrë tow, niicle lo grëragaa miecha.

¹⁶ Tibaque nley golco zdoo to.

¹⁷ Tibaque golzodiidznie Dios.

¹⁸ Goldeed xquizh lo Dios, niicle zeene noyan to guielnëw, zeena nogaa to guielbleya, sac sca racladz me gun grëse zha ne no xnëz Jesús.

¹⁹ Golquiaadiag mine rnee Espíritu Sant lo to, ni golguna.

²⁰ Golquiaadiag mine rnee grë zha ne rnee grë diidz ne rsiaab Dios guic zho; ²¹ wen wen golwi dien pe nac mine rnee zho, dzigo mine rzac to rquinraa lo to, min co golseed.

²² Golbiche lo grëse guielntseeb ne no.

²³ Dios, men ne rtiche grëse dzeb, grëse zhgab, mezhal csanmbe to lo grëtaa guielntseeb; dib nacle to (zhiespíritu tow, xalm tow, xcuerp tow) zeena ni tib dol rapde to gal dze ne laa Jesús men ndzon ne rnabey ne gbiire guiaad stib. ²⁴ Me bredz to, ni mesi run me mine rnee me, gane ndion no ne ib zun me min rii.

²⁵ Grëse to bets, grëse to bzian, laa naa rnab lo to golsiguie! golinab lo Dios gacnieu me no.

²⁶ Golcaania zhibdiuzh no i, ine golxen nia grë zha ne nacgrë to, gollu ne nli rleynie to zho.

²⁷ Men ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

²⁸ Jesús, men ndzon ne rnabey ne, me glu lo to ganle pa lotaa noxco me to.

Pabl

BROP GUILTS NE PXEEL PABL LO ZHA TESALÓNICA

¡Diuzh to grëse to!

¹ Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

² Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

³ Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to rliladz to Xtiidz me, ni rleyneraa to samiech to. ⁴ Zaatne rdziintaa no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdoo to rliladz to me niicle maase rtsidil miech to, niicle maase nroob guielnë ne quiaaded to. ⁵⁻⁶ Nli nroob guielnë noyan to, per scagaa laaw noyan to zeena tsieguial to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

⁷ To ne nac to zha ne quiaaded grë guielnë qui, golgona ganle, gal dze ne quiet Jesús gbaa guiaad me stib, ible zгаа ne descans ne gneedz me. Gal dze co, laa me guietnie grë xanj me, zha ne rapraa poder; ⁸ masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me. ⁹ Grëse zho laa me gnabey guey zho lo guielnëdox, zaatne gdziñdraa dze grieese zho. Lëe bichele zho lo me ga, ib gdziñ dze gan zho lo xquielndzon me, gangaa zho grëtaa poder ne rap me. ¹⁰ Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me mine biadseed no to.

¹¹ Gacxe waa, tibaque laa no quianab lo Dios gacniën me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo gun to grëse ncuaane rquiabladz to, zeena grieequia grëse dziin ne quiaayun to porne rliladz to me. ¹² Zeena sca cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

2

Ziaad Jesús stib

¹ Bets, bzian, ib laa Jesús men ndzon ne rnabey ne no guiaad, ni laa ne gbannie me. ² Zeene gon to laa miech gnë laa dze co bdziñle, niicle gnë zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdiebde to. ³ Ib gdeete to diidz yquidie zho to. Sac gon ansraa ne gdziñ dze co, ib none grieequia grë miech ne gacntseeb lo Dios; lozh ga, laa tib mgui ne nacie menëdox grieequiaque, zacntseeb me lo Dios, per gabil ga nitlo me.

⁴ Lëe zha co ctsidil grëse zhiwseed Dios, grëse ncuaane naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios. ⁵⁻⁶ Per no tib men ne notse lo zho niina, laga gdziñ dze ne laa zho guiaad. Golsoladz ganle, blactaa bzeet naa min rii lo to len dze ne blëz naa i. ⁷ Grëse ncuaane no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho. ⁸ Zeene laa zho guiaad, hor co laa Jesús guiaadaque con grë xquielndzon me, dzigo me ne grieese ro me gloozh me zho, gnitlo me zho.

⁹ Masaque mendox gnabey zha ntseeb co, niapse xpoder ma gap zho, nzian ncuaane glu zho; zun zho grë ncuaane gzee zdoo miech, per led ncuaane nlida. ¹⁰ Zun zho grë ncuaane lozh yquidie zho grë zha ne nole nëz ne nitlo, zha ne ib bzhiguield nliladz mine nac diidzli. Tel niaca mine nliladz zhow, nleynie zhow, nsilaa Dios zho. ¹¹ Saan Dios tsienal zho grë ncuaan co, ni zliladz zhow zig nac zeene diidzliw; ¹² per ib siaabzi Dios zho, sac laa ne gliladz zho mine nac diidzli, lel mazdraa gleynie zho grë guielntseeb.

Zha ne bdedlaale lo dol

¹³ Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiedz me, mine nac diidzli, laa Espiritu Sant csanmbe to lo me. ¹⁴ Min co nagon nacre pxeel me no biadseed no to xtiidz me, guien to zha laa to lo dol; zeena gdziñ to zaatne nac lo xquielndzon Jesús, men ndzon ne rnabey ne. Gacxe waa, zha nziuu nac to lo me.

¹⁵ Golguien sca, dziits golso, ib csaande to grë mine pseed no to len dze ne biaad no i, niicle mine rneegaa no lo to lo guits ne rxeel no. ¹⁶⁻¹⁷ Ni Jesúsaque, men ndzon ne rnabey ne, ni Dios men ne nac Pxoze ne, me gneedz xfuers to dziits so to; zeena grëse mine gnee tow, mine gun tow, wen grieequiaw. Me blu ganle pa lotaa rleynie me ne, laa me bneedz tib guielbley ne gdzind dze lozh lo ne, ni psan me diidz pe nac mine naraa no yгаа ne. Ga rlu ganle pa lotaa noxco me ne, niicle ne rioguald new.

3

¹ Bets, bzian, nu ne laa no csiaalle, laa naa rnab lo to golnab lo Dios gacnien me no, zeena znuse znuse diiz no Xtiedz Ndzon men ne rnabey ne; ni zha ne gontaaw, guien zho ycaania zhow zigne pcaania tow. ² Ni golnab lo me csilaa me no ladznia grë zha ntseeb, zha ne run mine notaa guic; sac gon led grëd miech rliladz Xtiedz Dios.

³ Dios men ndzon ne rnabey, mine rnee me run mew; gacxe waa, ible zacnien me to dziits so to lo Xtiedz me, ni squianap me to tsobede to ladznia mendox. ⁴ Ndion no ne me noyacnien to noyun to grë mine pso no diidz lo to, ni scagaa me gacnien to bii gun tow. ⁵ Me gacnien to grieelo gleynie to samiech to zigne rleynie Dios ne, ni guiuude to lo guielnë, sinque golgac zigne been Jesús.

None gun zho dziin

⁶ Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuaane gow zho, ib ctsieelsade to zho; sac gon pseete no to min co. ⁷ Tel no, gon to ganle zha wban no zeene bliaaz no lo to i; ni sca gon none gban to. Ib bdeddzed no, ⁸ biod dze ne lega ndioow zhlë no xcuun miech, blactaa haxta guieel bdziun no dziin bdziniaa no pe pquiin no; ib psodziind no lo to. ⁹ Niicle ne ib rieguial nab no lo to needz to ncuaane nquiin no, per choot peet bnabd. Mine bdziun no pquiaa no dziin bdziniaa no pe pquiin no, par gan to ganle zha nonguiel gban to. ¹⁰ Led rsoladz to len dze ne bliaaz no i, pso no diidz rii lo to: Zha ne nëd gun dziin, scagaa nodne gow zho. ¹¹ Laa niina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quiaded dze zho; loxaque nëzrii nëzrec no zho rzëeb zho lo grë ncuaane rieguiald zho. ¹² Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuaane yquiin zho.

¹³ Bets, bzian, ib guieete to, tibaque goltsoxco golgun niapse grë ncuaane yquiin lo samiech to.

¹⁴ Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeena sca ctoladz zho. ¹⁵ Per gunde to zho zig run zha ne rlënie samiech, sinque golnee lo zho gac-wen zho; golguien ganle bets to grë to.

¹⁶ Jesús nac men ne rtiche grëse zhgab, grëse guielxtseeb, me cuee to lo grëse zhizhgab to, lo grëse guielxtseeb gzataa dze. Me gacnien to grëse to.

¹⁷ Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëe xletr naa nu.

¹⁸ Jesús meñ ndzon ne rnabey ne, me gacniē to, me glu lo to ganle pa lotaa noxco me to.
Pabl

GUILTS NE GLO PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

² Laa naa rxel guits rii lo luu, rzaac naa luu zig tib xpëed naa ne squi dib zdoo luu rliladz luu Jesús. Dios men ne nac Pxoz ne, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

³ Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, cseetraade zho miech grë zhiwseed zho, sac ncuaane paat rquiinda. ⁴ Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmengol ne. Ncuaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grë guielnzaac ne rgaa grë zha ne rquiabladz dib zdoo rliladz Jesús.

⁵ Laa naa rso diidz rii lo luu, sac racladz naa guiaanmbe zdoo grëse miech qui, guiaanmbe xquielrien zho ni dib zdoo zho gliladz zho Dios; zeena scagaa grieelo gleynie zho samiech zho. ⁶ Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuaane paat rquiind co no zho. ⁷ Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

⁸ Ndionle ne ganle nli wen ley ne psan Dios, per tel niaca mine yquiin miecha zigne psan me yquiina. ⁹⁻¹⁰ Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë:

zha ne racndaan lo Dios,
zha ne rond xtiidz Dios,
zha ntseeb,
zha ngoopdol,
zha ne rzacdraa ne men nroob nac Dios,
zha ne rguitnie lë Dios,
zha ne rut pxoz,
zha ne rut xniaa,
zha ne rut samiech,
zha ne rionie zha ne led tseeld,
zha ne nac mrazh,
zha ne rban samiech rieto zho zho stib nëz,
zha ne rquidie,

zha ne rzeet lë Dios par gliladz miech xtiidz zho, ni nappaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; ¹¹ wseed ne rlu ganle zha laa miech lo dol. Ni lëe wseed co gon pso Dios naa none naa lo miech.

Pquia zdoo Dios Pabl

¹² Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacien me naa ne laaw quiayun naa. ¹³ Ne nligaa rded naa xquizh lo me, sac glo ntseeb goc naa, bneenë naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuaane ben naa, per pquia zdoo me naa; sac len dze co gard gliladz naa cho nac Jesús, lega lo xquieln xen naa ga sca ben naa.

¹⁴ ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me. ¹⁵ Mine rne naa nu niina, diidzliw, ni racladz naa grëse miech gliladz zho ganle, ible laa Jesús

biaad lo guidzliu, biaadsilaa me grëse miech lo xtoꞵ zho; ni naapaa gonꞵ goc tib zha ne mazdraa ngoopdoꞵ. ¹⁶ Gacxe waa pquia zdoo Dios naa, niicle ne scataa miech ngoopdoꞵ naa per psilaa Jesús naa. Ga blu ganꞵ pa lotaa paciens ne rap me; ni ga gwi grëraa miech ganꞵ, zha ne gliladz me, zгаа zho tib guieꞵmban ne gdziꞵnd dze lozh. ¹⁷ ¡Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa leꞵ grëraa izdoo ne ziaada! Sac gonꞵ, me nac meꞵ nroob ne rnabey, meꞵ ne gdziꞵnd dze ne nitlo. Sca rieguiala.

¹⁸ Timoté, xin, laa naa rso diidz lo luu gonꞵ: Tibaque dziits bzo, ib guiaaꞵnd zdoo luu; psoladz ganꞵ scaque nac diidz ne bnee grë zha bets ne zeene psiaab Dios guic zho bzeet zho pe nac grë miꞵe pso Dios luu gonꞵ luu. ¹⁹ Bienꞵ tibaque dib zdoo luu bliladz Jesús, ib guꞵnd luu ncuaaꞵe naꞵ luu ndzinlid, zeena iꞵe mbe xquieꞵrien luu; sac gonꞵ no zha ne niicle rienpaa zho pa miꞵ nac ncuaaꞵe ndzinlid, ni laa zho ruꞵa. ¡Miꞵcocxe waa, grë zha ne sca nac, rsaanga zho miꞵe bliladz zho! ²⁰ Zig nac Himené grop Lejandr, sca beenꞵ zho; per laa zho bzonëzle naa sca tsie zho xnëz menꞵdox telꞵe sca racladz zho; zeena guieꞵn zho ganꞵe nodne gneenë zho Dios.

2

Gac-wnab lo Dios por grë miech

¹ Laa naa rso diidz lo to: Golꞵgieꞵn none gnab to lo Dios por grëse miech ne ndxie lo guidzliu, golꞵnab lo me gunꞵlay me zho, gacnieꞵ me zho; ni golꞵdeed xquizh lo me por grëtaa ncuaaꞵe ruꞵ me. ² None gnab to lo me gacnieꞵ me grëse zha ne nac wxtis, grëse zha ne rnabey, gdeed me guieꞵbiini lo zho zaacse gonꞵ zho guieꞵwxtis, zaacse gnabey zho; zeena tibliladz cue miech, iꞵe gban ne zigne racladz me, sin choot peet glisquid lo ne.

³ Sca nagonꞵ nonguieꞵl dziuunꞵ ne, ni scagaa rdziladz Dios, meꞵ ne pxeelꞵ Jesús biaadsilaa grëse miech lo dolꞵ; ⁴ meꞵ ne racladz grëse miech sëëb xnëz Jesús, gacnaꞵ zho miꞵe nac diidzli. ⁵ Guieꞵn zho ganꞵe ne tibaque Dios no, ni tibaque meꞵ ne zac gdziꞵnnie grëse miech lo me: lëë meꞵ co nac Jesús, meꞵ ne goc miech biaad lo guidzliu; ⁶ sac gonꞵ Jesús nac meꞵ ne bdeed xquieꞵmban, beet zho me, bdiizh me xtoꞵ miech. Miꞵ rii nagonꞵ racladz Dios gacnaꞵ miech leꞵ dze rii. ⁷ Ni laa me pxeelꞵ naa none naaw lo grëse zha ne nacd zha Israel, noseed naa zho grëse miꞵe nac diidzli, zeena guieꞵn zho dib zdoo zho gliladz zho Dios. (Miꞵe rne naa nu diidzliw, rquidieed naa.)

⁸ Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none iꞵe mbe zdoo zho, choot lo zha rlëëd zho, choot zha nodiꞵnied zho. ⁹ Laa grë meꞵ wnaa, racladz naa tsoxco zho zaacse gacwxab zho, niowse, tibliladzse gac zho. Sac grë meꞵ wnaa ne rliladz Dios, par gluniow zho rquiind ne goonꞵ dieꞵ paraa xixcuuaa guitsguic zho, dieꞵ pe quie rbebni, pe or gac xnil zho, gac zhibguiaa zho, pe lar niazh ne gacwgaa zho. ¹⁰ Par gluniow zho, rquiin zaacse gbannie zho samiech zho, zig none gban zha ne nole xnëz Dios. ¹¹ Zig nac leꞵ yadoo, none tibliladzse gac zho, dzese sob zho yquiaadiag zho telꞵ pe nac wseed ne noyac; ¹² gnedzd naa diidz ne zha so cseed miech, o zhagaa gnabey lo mgui. None dzese sob zho, ¹³ sac gonꞵ zeene psanꞵ Dios miech lo guidzliu, glose bzaa me Adán, dzigoraa bzaa me Ev. ¹⁴ Ni stiba, pquidied menꞵdox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xtiidz Dios. ¹⁵ Per silaa Dios wnaa lo xtoꞵ zho, telꞵe dib zdoo zho gliladz zho me, tsoxco zho gban zho zigne racladz me, guieꞵn zho gonꞵ zho miꞵe rieguiala wnaa, gap zho xpëëd zho ni cchoob zho win.

3

Zha ne so lo grë zha ne ngab xnëz Dios

¹ Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gonꞵ zho. Sca zëëb diidz rnee miech; ni nligaaw. ²⁻⁴ Per ga nagonꞵ rquiin: tib zha ne zaacse mban, zha ne mbannie loxaque wnaa ne nacse tsieel zho,

zha ne tibiladz,
 zha ne nixbiini, rien pe run,
 zha ne mbe lo, choot lega gzhidznied zho,
 zha ne ine nley rac, rbézlo zho miech lidz zho;
 zha ne rien zha rseed miech,
 zha ne rquiad lo nziu,
 zha ne rleynied dil,
 zha ne wen zdo,
 zha ne zaacse mbannie samiech,
 zha ne rzonald dimi,
 zha ne zaacse mban lidz,
 zha ne rrieelo rnabey lidz, rnabey xpëed,
 zha ne nguzobdiidz nac xpëed, rbeed mëed xquielto zho.

⁵ Sac tel zha ne rrieelod gnabey lidz, gnabey xpëed; ¿pe lel ne so zho gnabey zho lo grë zha ne no xnëz Dios dzigo grielo zho?

⁶ Niicle tib zha ne griinpaa psilo bliladz Xtiidz Dios grielod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac mendox. ⁷ Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeena tsod lega pe glisqui miech lo zho, sca gleyd mendox gac mine racladz ma.

Zha ne gun yudar len yadoo

⁸⁻¹² Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,
 zha ne rnee niapse diidzli,
 zha ne rleynied guielgonziu,
 zha ne zienald dimi,
 zha ne dib zdo rliiladz grëse mine zhobnee lo Xtiidz Dios (mine rliiladz ne, mine nac diidzli),
 zha ne mbe lo,
 zha ne mbannie wnaa ne nacse tsiel zho,
 zha ne rrieelo rnabey lidz,
 zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me:

tib wnaa ne zaacse mban,
 wnaa ne rleynied diidzguizh,
 wnaa ne rleynied nziu,
 wnaa ne rquidied.

¹³ Sac zha ne zaacse gun dziin co, zianenziuuraa zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliiladz Jesús.

Mine rliiladz zha ne ngab lo Dios

¹⁴ Ib laa guic naa no guialniob naa i, guialgan naa luu; per laa naa rxel diidz rii lo luu,
¹⁵ zeena telne grielod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey mine nac diidzli, ni rlu zho ganle ne nli diidzliw. ¹⁶ Ne nligaa nroobdoo nac wseed ne ziaad lo Xtiidz Dios, mine rliiladz ne, ngan guien miech zha naca. Nu raquiet mine been me:

Goc Jesús miech biaad me lo guidzliu,
 ni blu Espíritu Sant ganle ne nli Xpëedpaa Dios nac me;
 ni gon grë anjl me.

Brieets bliaa Xtiidz me grë guiedz,
 ndaldoo miech ne bliladz ganle cho nac me,
 blozh ga biire zey me lo guielndzon ne no me gbaa.

4

Zha ne rsaan Xtiidz Dios

¹ Ib laa Espíritu Sant rneele ne len dze ne ziaadyob guiaad Jesús stib, ndal grë zha ne riladzle Xtiidz me, laa zho csaana laa zho tsienal grë mine rnee zha ne rquidie, grë mine nac zhiwseed mendox. ² Grë zha ne guiaadnie wseed co, ni lalnu yquiad zdoo zho zeene laa zho yquidie miech. ³ Haxta stsidil zho ctsieelnia miech, znabey zho ycuee ncuaane gow miech; zig nac zeene led Diosd psan ctsieelnia miech, zig nac zeene led med psan grë ncuaane gow zho. Me psana grësew, zeena grëse zha ne ngab xnëz me (zha ne beenbey diidzli), zeene laa zho yquiina gdeed zho xquizh lo me. ⁴ Sac grëse ncuaane psan Dios, wena; zig nac grë ncuaane rac wagw, peet nacda yquiin new, totsaque gdeed ne xquizh lo me zeene laa ne yquiina, ⁵ ni gnab ne gunlay mew; sac zeene rdeed ne xquizh lo me ni rnab ne gunlay mew, rsanmbe mew.

None gun Timoté xtsiin Jesús

⁶ Zeene cseed luu grë zha bets ne, zha bzian ne i, pseed zho grë mine rne naa lo luu nu, tibaque mine nac zhiwseed Dios güeynal; sac sca no gun zha ne squi zo quianap grë zha ne ngab lo Dios. ⁷ Ib yquiaadiagd luu grë cuent gox, grë cuent nxen ne paat rquiind; sinque Xtiidz Dios bioxco, min co bloonie guic luu. ⁸ Gzoob ne zha ne rguit, wguite ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squiina lo ne zigtaa lo guielmban riiw, zigtagaa lo guielmban ne naraa dzian new. ⁹ Ne nligaa sca riegual gun miech, ni grëse zho none tsoxco zhow! ¹⁰ Ni gacxe waa, laa ne quia dien zha gliladz zhow, niicle ne nroob grë guielne ne quiazian ne; sac ible Dios nac men ne rnalo ne, men nguiamban ne rsilaa grëse miech lo dol; sac grëse zha ne dib zdoo riladz me, rsilaa me zho. ¹¹ Bioxco sca pseed zho grë mine rne naa lo luu nu, ni bnee lo zho gun zhow.

¹² Nli lëë tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

¹³ Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoo zho; zeena ine nguieel gac zho. ¹⁴ Ib csaand luu grë guielbiini ne bneedz Dios lo luu i (guielbiini ne bгаа luu zeene psiaab me guic grë zha ne rnabey lo grë zha ne no xnëz me, pxobnia zho guic luu). ¹⁵ Grëse mine rne naa lo luu nu, bioxcow; zeena gan grëraa miech ganle zigse zie dze laa luu quiayabiiniraa lo Xtiidz Dios. ¹⁶ Bien zaacse goc, bien mine nac Xtiidz Dios, min co pseed miech, ib csaand luuw; zeena tedlaa luu lo grëtaa guielne ne no guiaad, ni scagaa haxta grë zha ne rquiaadiagd wseed ne rlu luu ni rban zhow, ye zho zlaa zho lo guielne co.

5

Men wnaa ne gutle tsieel

¹ Grë zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu. ² Scaque grë men wnaa ne nac zhagol, ndooladz bnee lo me, been cuent lo xniaa luu ga zo luu; lo grë wnaa nguiega, ndzinli goc, niowse bnee lo zho, bien ganle rriequia tib bzian luu ga.

³⁻⁶ Grë men wnaa ne gutle tsieel, men ne nlipaa choot rapd, to none cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal loxaque grë ncuaane gdeed guxt xcuerp zho; zha ne sca run, rriequia gutle zho ga. Laa tel men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xniaa zho, sac gon me pchoob zho. Sca nonguiela, ni scagaa rdziladz Dios.

⁷ Pso diidz rii lo grë zha ne nacgrë to i, zeena cseed zho sca gban zho, ni scagaa tsod pe nacne gneenë miech zho. ⁸ Sac zha ne tsoxcod gan zha ne nacgrë zho, ni mine mazdraa telne niicle menlidz zho tsoxcod zho gan zho, rdzieeld dzigo guiab zho laa zho riladz Dios, haxta mazdraa nac xtol zho que tib zha ne gard gliladz me.

⁹⁻¹⁰ Ni stiba, grë men wnaa viud qui zha ne rquiabladz gun pe xtsiin Dios, bien zha ne psale tsongal iz zha co psëeb lo list. Ni wen wen gocnan telne:

bionied me stib mgui zeene bii zomban tsieel me,

zaacse mban me,

zaacse pchoob me xpëed me,

dib zdoo me rbëzlo me miech lidz me,

ndooladz rac me lo grë zha ne no xnëz Jesús,

run me xyudar grë zha ne no lo tib guielnë;

ni run me niapse ncuaane wen ne rquiin lo samiech me.

¹¹⁻¹² Laa grë zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ctsieelnia zho, laa zho ctsieelnia stib. Loxaque gunctal zho xtol zho ga, telne glo rquiabladz zho gun zho xtsiin Dios ni lozh ga laa zho csaanaquew. ¹³ Ni ye nac wnaa nguieg, rdziladz zho rquianzë zho; ni telne peet dziin gund zho, racgbech zho; ni stiba, zeene sca guieud pe gun zho dzigo laa zho rhixcuua diidzguizh, laa zho rzëeb lo grë cuent ne riegualdraa zho. ¹⁴ Gacxe waa, racladz naa grëse wnaa nguieg ne sca ret tsieel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëëniele Xtiidz Jesús, gneenëraa zho zha ne riladza. ¹⁵ Sac gon, blale wnaa ne sca gut tsieel zieriee xnëz Dios, lel laa zho zienal grë mine rnabey mendox.

¹⁶ Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioon me; zeena grë ncuaane runlo to i, zgaaw yquiin grë men ne nlipaa guieud cho gan.

Mine riegual zha ne zo lo zho

¹⁷ Grë zha ne zo rnabey lo grë zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuaane rcaa zho, ible riegual ycaa zho chop lalgaw. ¹⁸ Gotsaa gwi ne ganle zha quia lo Xtiidz Dios, rneew: “Code to guie ro xma to, zeene no ma ye noguiits ma zhobxtil; jgolsaan gow ma!” Laa stib lugar rnee: “Zha ne run dziin, ib none ycaa zho mine non xtsiin zho.”

¹⁹ Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been mine rquiaqui zho me. ²⁰ Telne bind me diidz, bii noyun me dol co, dzigo squi ndxie grë zha ne nacgrë to, goctox lo me; zeena sca gdzieb grëraa zho gunscad zho. ²¹ Zig zobwi Dios, zig zobwi Jesús grë xanj me, laa naa rso diidz lo luu, been mine rne naa lo luu nu. Gdzieebd luu, yquiad zdoo luu, bnee lo zho tel chotaa nac zho.

²² Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend lëetse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun luu ncuaane gunctal xtol luu.

²³ (Gnid naa togo ible grieelodraa guie luu vin, zac guie luu niipyeeena maase poc poc, laa ne guie luu niab nis; zeena glunëdraa zdoo luu.) ²⁴ Sac grë zha ne no lo dol, no dol co znuse rzhobnen; nogaaw, haxta gal dze ne laa zho gacredz lo Dios, dzigora xobnëna.

²⁵ Scaquegaa zha ne run guielwen, no ncuaan co znuse glu; nogaaw, niicle ne rluda niina per ible zdziin dze ne laaw glu.

¹ Grë zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

² Scaquegaa grë zha ne run xtsiin men ne riladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia grë dziin ne noyun zho; sac gon lo tib men ne no xnëz Dios ga, lo tib men ne rleynie zho ga yquiin xtsiin zho.

Grëse mine none naa lo luu nu, pseed grë miech quiw, ni pso diidz lo zho gun zhow. ³ Zrieequia zha ne guiaadnie stib wseed, mine ni nacdraa Xtiidz Jesús; sac zhiwseed Jesús rlu zha gban grë zha ne no xnëz Dios. ⁴⁻⁵ Zha ne sca rlu stib wseed, lega:

tib miech niats ga nac zho,
ible peet riend zho,
runbeyd zho mine nac diidzli,
rdziladz zho rdildiidznie zho miech; ga rlan,
laa miech rdillsa,
laa miech rlëëlsa,
laa miech rbidzgolga; rlozh ga,
rliladzdraa zho pe rnee samiech zho.

Masaque nan zho telne sëëb zho xnëz Dios, nroob dimi ne gunlo zho.

¡Bien ib ctsieelsad luu zha co! ⁶ Parga nli zha ne rzëëb xnëz Dios, zeene rzac zdoo zho mine rzoladztaa Dios lo zho, tib guielnzaac nroob ga rgaa zho. ⁷ Ni sca nonguiëla, sac gon zeene rlanso ne lo guidzliu, peet ransonied ne; ni scaquegaa zeene laa ne gbi, peet grielod güey ne. ⁸ Gacxe waa, none sac zdoo ne ni gley ne totsaque gneedz Dios ncuane gow ne, ni ncuane gacwxab ne. ⁹ Sac grë zha ne rzoobladz xen nroob dimi, no zho rquiil mendox zho run zho ncuane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. ¹⁰ Sac nac dimi, zeene rzoobladzdox miecha, ga rzobni ne laa zho run grë guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielnë ne ziedzin lo zho.

Dib zdoo Timoté gliladz Timoté Dios

¹¹ Sangue luu gon, bien ganle xnëz Dios no luu, guñd luu grë ncuane co. Bioxco zaacse wban, tibaque bioxco gban luu zigne racladz Dios, dib zdoo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdoo luu.

¹² Bleeladz luu been grë dziin ne run zha ne dib zdoo riladz Dios, zigne run zha ne rie lo dil, rbeeladz zho zho. Gon ganle, laa luu nole nëz ne yгаа luu guielmban ne gdziñd dze lozh, ib csaand luu nëz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdoo luu riladz luu Xtiidz Jesús. ¹³ Dios (men ne rdeed xquielmban grëtaa ncuane no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle ¹⁴ laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. ¹⁵ ¡lb laa me no guiaad! Ni Dios cxeel me zeene laa dze co gdziñ. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey. ¹⁶ Mesi ib gdziñd dze guet me, lo biini ne no mew, tsod zha ne glëb gdziñ ga; ni tib miech lo guidzliu rii gard gan me, ni grielodgaa gan zho me. ¡Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

¹⁷ Grë zha ne rapchen, bnee lo zho cseed zho gdaannied zho grë ncuane rap zho, ib gnalod zho grë ncuane co; sac gon ncuane tib rded ga. Dios none gnalo zho, ni mesi rneedz me grëtaa ncuane wen ne rquiin ne. ¹⁸ Gudz lo zho gacmbidzd zho, none gun zho grë ncuane yquiin lo samiech zho, ycad zho ncuane quianie zho, ine gun zho xyudar zha ne peet quianied. ¹⁹ Zha ne sca gun, tib guielnzaac nroob ne yгаа zho; lëë guielnzaac co gan zho len dze ne ziaadraa. ¡Ni haxta zгаа zho tib guielmban ne gdziñd dze lozh!

²⁰ Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz

Dios, niicle ne rnee zha ne ziaadniew zha rac nac zho, per nlid ne diidzli rnee zho. ²¹ Sac gon, blale zha ne ziesaan mine nac diidzli, laa zho zienal wseed co; per riend zho lel znu rziaabnez zho ga.

Dios men ndzon ne rnabey, me noxco luu, me gzhixcuaa lo gre zhizhgab luu. Me gacnieu luu peet tsienied guic luu.

Pabl

BROP GUITS NE PXEEL PABL LO TIMOTÉ

¡Diuzh Timoté!

¹ Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëeb xnëz Jesús.

² Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Minë racladz naa ni rnab naa lo Dios men ne nac Pxoze, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

³ ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zana naa minë rnabey me, zigne bioxcoque grë xmen goldoo naa güeyna zhov.

⁴ Zeene rsoladz naa blactaa roon luu zeene wbi naa i, zoot naa tebaa zha gan niob naa luu stib; zeena tsonley zdoo naa. ⁵ Ni rsoladz naa scataa dib zdoo luu riladz luu Dios; lëëdaaque xnanit luu Loid, ni xnäa luu Eunis, ni nanpaa naa scataque dib zdoo luu riladz luu me.

⁶ Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnaab naa beenlay me luu. ¡Ib csaand luuw! ⁷ Sac gon, laa Dios rneedz zhiEspiritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiiniraa ne. ⁸ Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne riladz naa me. Sinque bloo zdoo luu ne ib laa luu no gan grë guieinë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. ⁹ Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuu ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

¹⁰ Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne yгаа miech tib guielmban ne gdziind dze lozh, none gliladz zho Xtiidz Ndzon me. ¹¹ Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; ¹² mincocxe waa znutaa grë ncuaa ne nodeed naa. Per ni lalnu ib rtoladz naa, sac wen wen nan naa cho nac men ne riladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

¹³ Bien, güeyna grë minë pseed naa luu, sac gon min co nac minë rquiin. Tiblique bliladz Dios, inë bleynie samiech luu zigne no dziuu ne ne nac ne zha ne no xnëz Jesús.

¹⁴ Espiritu Sant men ne nacie ne, me yquiaanap luu, me gacniën luu ib csaand luu zhiwseed Dios, ib csaand luu dziin ne bzo Dios luu gun luu.

¹⁵ Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa. ¹⁶ Sangué Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa; ¹⁷ sinque zigne blanso me lad guiedz Roma nu, pquiaguib me naa haxta bdziel naa lo me. ¹⁸ Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

¹ Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

² Grëse mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. ³ Ib gacband luu zeene noyan luu grë pe guielnë, sinque bioxco been xtsiin Jesús zigne no gon luuw, masaque been cuent xmenguiib me nac luu. ⁴ Sac gon, tib zha ne nac menguiib, grielod sëeb zho pe stib lo cuent ne nacd xtsiin menguiib, sac none nsin so zho gon zho tel pe nac mine rnee men ne rnabey zho. ⁵ Bioxco been mine rnee men ne rnabey ne, zig run zha ne rie tib lo wguit; sac zha co telne tsoxcod zho quit zho zigne nacpaa lo wguit, ycaaniad zho premio. ⁶ Been xtsiin me zigne no gaca, zig run zha ne ran; gon ganle zha ne rioxco ran, zha gloopaa rquiin guielnzaac ne rac zaatne ran zho. ⁷ Mine blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

⁸ Tibaque psoladz ganle cho nac Jesús, zha briequia me lo xtii rey David, ni zha brieaban me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. ⁹ Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu. ¹⁰ Laa naa quiaxecw mine quiaeedtaa naa, zeena grëse zha ne bzooblöle Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdziind dze lozh.

¹¹ Ni znu gon naca:

Telne xnëzle me no ne zeene laa ne guet,
ib zgaa ne guiobannie ne me.

¹² Niicle nroob guielnë dzian ne porne riladz ne me,
scagaa ible dzin ne zaatne gnabeynie me ne;
telne guiab ne runbeyd ne me,
scaquegaa me ziaab me runbeyd me ne.

¹³ Niicle telne riaanladz ne me,
sangue me riaanladz me ne;
mine rnee me run mew, sac mesi rtsëed me xtiidz me.

Tsoxco Timoté grieequia xtsiin Timoté

¹⁴ Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso diidz lo luu, gudz lo zho tilidiidznie draa zho miech grë godiidz ne paat rquiind; led ncuane ndzinlida, loxaque rungueta guic zha ne rquiaadiaga.

¹⁵ Tibaque bioxco zaacse grieequia xtsiin Dios, mine noyan luu, zeena wen grieequia luu zeene laa luu gdziin lo me. Zigne nacse Xtiidz me, sca pseed miecha. ¹⁶ Yquiaadiagd luu grë wseed yozh, ncuane ni lalnu paat rquiind; zha ne ziana wseed co, zig zie dze laa zho rzoitraa lo Dios. ¹⁷ Lega nac zhiwseed zho zig nac grë guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleyne zho, ¹⁸ sac tel zha ziana draa zho mine nac diidzli; rnee zho bleebanle Dios grë mengut. No palal zha ne riladzle Xtiidz Dios, zeene ron zho min co, riendraa zho dien pa mine gliladz zho. ¹⁹ Sangue zha ne nlipaa no xnëz Dios, tsod pe nacne griee zho xnëz me sac lole me ngab zho; zigne zhobneeque lo Xtiidz me zaatne rnee: “Runbey Dios cho nac zha ne nlipaa no xnëz me”; ni rneequew: “Grë zha ne nlipaa ngab xnëz Jesús, none csaan zho grëse guielntseeb.”

²⁰ Zaatne nac lidz tib zha ricw lëe, no grë xtsiin rotie zho mine niaa or, mine niaa plat, ni noquegaa mine niaa yag, mine niaa ben. Mine mazdraa niazh, min co rquiin zho rio ncuane row miech; laa mine beelze niaa, ga rgo zho ncuane row ma. ²¹ Scaquegaa miech, zeene csaan zho grëse ncuane paat rquiind, ible squiin zho lo Dios gon zho xtsiin me mine mazdraa nroob, zigne rquiin grë trast niazh co.

²² Nac lo guielnguieg, ndal grë ncuane ndzinlid rio guic miech run zho, sangue luu gon tsienied grë ncuane co guic luu, bioxco zaacse wban, dib zdoo luu bnalo Dios, ine

bleynie grëse samiech luu, tilnied luu zho; grë zha ne squi nli mbe zdo, rbedz zho Dios, zaacse wbannie zho. ²³ Ib yquiaadiagd luu grë godiidz ne paat rquiind, sac gon loxaque runctila miech.

²⁴ Zha ne squi run xtsiin Dios, nodne tso zho dien pe tiliidz zho; sinque none wen gac zho lo grëse miech. None guien zho zha cseed zho miech; ib guieednied zho miech, ²⁵ ndooladz gac zho gnee zho lo zha ne rlëënie Xtiidz Dios. Ni scagaa Dios cxobnia guic grë zha co, yguudz zdo zho csaan zho grë xquielntseeb zho, gacnan zho mine nac diidzli; ²⁶ zeena tsaa zho biini gree zho ladznia mendox, zaatne ngadoo zho.

3

Len dze ne ziaadyob nitlo guidzliu

¹ Ni none gacnan luu ganle, zeene laa dze ziaadyobpaa nitlo guidzliu, nroob nac guielnë ne gan grë zha ne no xnëz Dios. ² Zrieequia grë zha ne:

gacladz tebaa lose zho yquiin grëtaa ncuaane no,
loxaque dimi gleynie zho,

niats gac zho,

zdaannie zho ncuaane ni rapd zho,

znenë zho Dios,

gond zho xtiidz pxoz zho, xtiidz xniaa zho;

sacd zdo zho mine gun miech lo zho,

laa zho gban zigne notaa guic zho, ib yquiaadiagd zho Xtiidz Dios.

³ Gacnandraa zho pe nac guielwleynie, ib yquiad zdo zho,

loxaque diidz gzhixcuaa zho,

lëbd zho gnabey zho xcuerp zho,

sacsi zho samiech zho,

stsidil zho grëse ncuaane rquiin,

⁴ zgo zho zha ne ndzieeldiidz zho nia zha ne quin zho,

ni lalnu guielto tsod lo zho,

loxaque dien zha gdeed guxt xcuerp zho tso zho, laa ne yguib zho xnëz Dios.

⁵ Squiaalo zho ye zho riladz Dios, per lo grë ncuaane gun zho, ga glu ne riladzd zho me.

Bien, ib ctsieelsad luu grë miech ne sca nac. ⁶ Sac lëë zha ne nacgrë zho ga, rzëëb yu rietsitnie grë wnaa yozh ne zienal ncuaane gdeedtaa guxt xcuerp. ⁷ Tibaque no zho dieen peraa rseed zho, per ib rioguicd zho mine nac diidzli. ⁸ Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co niina, rlëëniedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; ⁹ per gacdaquew xtse, zeene laa diidz guien ganle pe clas miech nac zho, dzigo lëëque grë ncuaane yozh ne run zho cuee xquielto zho; zigne bzhaacaque zha ne sca blëënie Moisés.

Csaand Timoté mine pseed me

¹⁰ Sangue luu, nanle luu ganle zha nac grë mine pseed naa luu. Wen wen nan luu ganle zha mban naa, pe no guic naa gun naa, zha dib zdo naa riladz naa Dios, zha dib zdo naa rleynie naa samiech naa, rieednied naa zho. ¹¹ Nanle luu ganle zha rneedz Dios xfuers naa, rlëëb naa grëtaa mine rteed miech naa, zig been zho naa guiedz Antioquí, guiedz Icon ni Listr, blactaa pquianal zho naa; per tibaque gocnie Dios naa, psilaa me naa lo grëtaa guielxtseeb co. ¹² Ni scagaa naca, grë zha ne rquiabladz gban zigne rnabey Jesús, ible squiana miech zho. ¹³ Per probsaxe grë zha ne sca quiayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa mendox zho.

¹⁴ Sangue luu gon, csaand luu grë mine pseed luu. Nanween luu ganle diidzliw, ni runbeygaa luu cho nac grë zha ne bneew lo luu. ¹⁵ Ni stiba, zigne ziadroob luu psilo quiaseed luu Xtiidz Dios, ni lëëw bdixbiini guic luu gocnan luu ne Jesús none gliladz

miech parne laa zho lo dol. ¹⁶ Dib nacse Xtiidz Dios, Espíritu Sant psiaaba guic zha ne pquiaaw, laaw biaan:

rseeda ne mine nac diidzli,
rsow diidz lo ne guien ne pa lo quiaxin ne,
rseeda ne zaacse gban ne.

¹⁷ Zeena sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquiin, dziin ne rieguial zho gun zho.

4

None gnee Timoté Xtiidz Dios

¹⁻² Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuane been zho, zigtaa zha ne mbana zigtagaa zha ne gutlew, zeene gdzin dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdo zho. Bioxco tibaque pseed zho, ib guieednied luu zho. ³ Sac gon, zdzin dze ne siguiel draa miech yquiaadiag zho mine nac diidzli; sinque laa zho yquiaguib zhaase zhaase dien cho cseed zho tel pe nac ncuane rdziladzse zho yquiaadiag zho. ⁴ Gleyndied zho Xtiidz Dios, laa ne yquiaadiag zho mine nac xtiidz me, lel laa zho tsoxco yquiaadiag zho grë mine nac zhiwseed miech guidzliu. ⁵ Sangue luu gon, nsin bzo gdeete luu diidz gungüet zho luu. Zaacse been grë mine pso Dios luu gun luu, bnee lo miech zha laa zho lo dol; niicle tel pe nactaa guienë ne noded luu, gacmband luu.

⁶ Rien naa ziaadyoble ne laa naa gbi lo guidzliu rii, zhile gdzin dze ne laa zho gut naa. ⁷ Len ngbidz ne wban naa, tibaque dib zdo naa bliladz naa Dios; xtsiin mew, laaw ben naa zigne bnabey me naa, ni laaw psiaalga naa niina. Zigne runda grë menguiib ne rie lo dil, sca bleeladz naa naa ben naa xtsiin me; ⁸ laa na nagon, mine quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rlynie me, grë zha ne dib zdo quiambëz gdzin dze ne guiaad me stib, grëse zha co ygaaw premio co.

Tsienioab Timoté

⁹ Bzhiguiel guiaadniob luu guiaadgan luu naa nu; ¹⁰ sac zig nac Demas, laa me bichele lo naa. Psanaque me naa nu laa me zie nëz Tesalónica; sac mazdraa nonie grë ncuane lo guidzliu rii guic me. Bay zig nac Crescent, laa me briece zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. ¹¹⁻¹² Niicle Tic guien nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nëz rii bzhiguiel guiaadnie luu me; sac rquiin me nu gun me xyudar naa lo xtsiin Dios. ¹³ Ni psoladzpa guiaadnie luu lar ne rbiix naa, mine psan naa guiedz Troas lidz Carp; ni guiaadnie luu grë xquits naa. Ib guiaanladz luu mine nac grë guits nroob ga.

¹⁴ Tel gan luu ganle nzian ncuane nonguiel draa been Lejandr naa, men ne nac wncadzguib ga; per Diostaa nan zha gunquizh me Lejandr grë mine been Lejandr ga. ¹⁵ Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

¹⁶ Zeene glopaa gocredz naa lo wxtis, choot bzëd nriee xfavor naa, grëse zho biche lo naa; rnab naa lo Dios gunquizhd me zho mine been zho, sca psaan zho naa. ¹⁷ Sangue men ndzon ne rnabey ne psand me naa, me pchoobladz zdo naa, haxta bdeeda diidz bnee naa Xtiidz me lo grë zha zit rii. Sca gocniën me naa, gun naa cuent role meedz psilaa me naa; ¹⁸ ni niicle niinagaa, nanle naa ne ib silaa me naa lo grëtaa ncuane racladz miech cteed zho naa, ni me yquiaanap naa haxta gal dze ne laa me gdzinne naa zaatne rnabey me gbaa. ¡Me rieguial guiaannon gzataa dze, niicle nadzew, gzhew, ni grëragaa len izdo ne ziaada!

¹⁹ Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. ²⁰ Gacnan to ganle, laa bets ne Rast biaan Corint, laa Trófimo biaan guiedz Milet, sac rzacnë me. ²¹ Bioxco gon guiaadniob luu, zeena blansole luu nëz rii zeene laa mëë nal sëëb. Pcaania zhibdiuzh Ebul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeel bdiuzh lo luu.

²² Jesús men ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

GUILTS NE PXEEĽ PABL LO TIT

¡Diuzh Tit!

¹ Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnan zho zhapaa nac wseed ne zional ne (wseed ne rnee zha none gbannie miech Dios), ² wseed ne rlu ganle ible laa ne quiambiaaz yгаа ne tib guielmban ne gdziandraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. ³ Ni niina ne laa dze co bdzin, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

⁴ Laa naa rxel guits rii lo luu gon Tit. Rzaac naa luu zig tib xpëed naa, sac nan naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

⁵ Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui. ⁶ Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;

tibaque wnaa ne mbannie zho, men ne nacse tsieel zho,

zaacse quiachoob zho xpëed zho, rliladz mëed Dios (zëëbd diidz pe guielntseeb ne noyun mëed, o rondгаа mëed diidz).

⁷ Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:

zha nlëëguic,

zha ngonziu,

zha nad ron diidz,

zha nguibdil,

zha ne rzonal dimi.

⁸ Sinque none gac zho tib zha ne:

ndzinli nac guic,

ine niowse rdeed zho zaatne rbëz miech ne rdzintaa lidz zho,

rioxco zho run zho niapse ncuaane rquiin lo samiech zho,

zional zho gac niapse mine nac diidzli,

rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

⁹ Ni none tibaque tsienal zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguc zha naca, ni grieelo zho glu zho lo grë zha ne rlëënie Xtiidz Jesús, guien zha co nonguielda ga glëënie zhow. ¹⁰ Sac no ndal grë zha ne nëd gon Xtiidz Jesús niina, ncuaane paat rquiind rseed zho miech, rquidie zho; ni lëepaa zha ne sca run nac zha Israel. ¹¹ Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, ¹² tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin.” ¹³ Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho. ¹⁴ Bnee lo zho yquiaadiandraa zho beelze pe

grë godiidz ne rbeebe y zha Israel, ni niicle y quiaadiagd gaa zho grë mine rnabey zha ne rlëënie Xtiidz Ndzon Jesús.

¹⁵ Golgan ganle, grë miech ne ndzinli nac guic, zha ne mbe xquielrien, ncuaane notaa, mbe naca lo zho; sangue zha ne riladzd Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde xquielrien zho mbed. ¹⁶ Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuaane yquiina.

2

Znu nac Xtiidz Ndzon Jesús

¹ Sangue luu gon, none gnee luu lo grë miech qui zigne nacse Xtiidz Jesús. ² Grë men bgui ne nac zha gol lo to i, bnee lo zho:

tibiladz gac zho,

gund zho ncuaane cuee xquielto zho,

quix zho biini, ncuaane ndzinli tsienal zho gun zho;

tiblique gac zho lo Xtiidz Jesús,

gleynie zho samiech zho, ni

dziits so zho tel pe nactaa grë guielne ne noyan zho.

³ Scaquegaa grë men wnaa ne nac zhagol, bnee lo zho:

gban zho zigne no gban zha ne nole xnëz Dios,

gzhixcuad zho diidzguizh,

gzuzd zho.

None zaacse gac zho, ⁴ zeena zha glu lo grë wnaa nguieg zha gban zho. Cseed zho grë wnaa nguieg:

gan zho tsiel zho,

gan zho xpëed zho,

⁵ gac zho tib wnaa nix biini,

quitnied zho tsiel zho;

zaacse gun zho xtsiin zho,

niowse gac zho, niowse gnee zho,

gon zho xtiidz tsiel zho; zeena tsod pe nacne gneenë miech Xtiidz Dios.

⁶ Ni scaquegaa bnee lo grë zha bgui nguieg, gac zho zha nix biini. ⁷ Luuzhal zaacse been grëse ncuaane no gun luu, zeena ga gwi zho ganle zha none gban zho. Zeene cseed luu zho, ine tibiladz goc, gund luu ne quitnie luu zho. ⁸ Bguib diidz ne gnee luu, zeena choot peet glisquid lo luu; ni scagaa, grë zha ne rlëënie Xtiidz Jesús, stoladz zho zeene gan zho guien pe glisqui zho lo ne.

⁹ Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. ¹⁰ Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

¹¹ Grë diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa; ¹² sac laa me racladz csaan ne grëse guielntseeb, csaan ne grëtaa ncuaane rleynie zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. ¹³ Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne riladz ne, me psilaa ne lo dol. ¹⁴ Sac gon, me bgaadz guielgut ne nioguial ne, me bdiizh grëtaa guielntseeb ne bdziun ne, psanme me ne lo grëtaa ncuaane bdziun ne; gane niina, lo me ngab ne, ni none dzioxco ne gban ne zigne rnabey me.

¹⁵ Grë min rii nagon pseed grë miech qui, bnee lo zho gban zhow. Zeene riegala gdzieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

3

Znu rieguial gban zha ne no xnëz Dios

¹ Beencsoladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadzd zho gun zho grë tel pe ncuane yquiin lo samiech zho.

² Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

³ Sac gon haxta ne, ib peet riend ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuane racladz xcuerp ne, lo grëtaa ncuane ndzinlid ne bley ne bdziuun ne. Niapse guieIntseeb bional ne, në rac zdoo ne rdzian ne ncuane quanie, ncuane run stib miech; zigtaa row rzhiizh zdoo zho gon zho ne, scaque ne, zha ne rdziantaa ne, row rzhiizh zdoo ne bdzian ne zho. ⁴ Per bdzin dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, ⁵ laa me psilaa ne; per guiabd ne togo por pe ncuane wen ne bdziuun new, sinque porne pquia zdoo me new. Psanmbe me ne lo grëtaa xtol ne, rrieequia gol ne ga stib, ni bzhixcuaa Espiritu Sant lo xquielmban ne. ⁶ Niapse por Jesús men ne psilaa ne ga, laa Dios pxeel Espiritu Sant rneedz me grëse guieibiini ne rquiin lo ne. ⁷ Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdziind dze lozh, sac ib sca nac xtiidz me.

⁸ Mine rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne rliladz Dios, tsoxco zho gun zho niapse grë ncuane ndzinli; sac gon, min co nac mine nonguiel, ni mincogaa rquiin lo grëse miech.

⁹ Biche lo zha ne racladz tilidiidznie luu grë ncuane paat rquiind, zig nac grë godiidz dien pe been grë mengol padzeela, dien pe nonguiel tsienal ne ley, te nonguielda ye. Ncuane paat rquiind ga, loxaque runctila miech; ni lalnu rieguiald gaquieta.

¹⁰ Tel cho zha ne rsilo rgodil grë zha ne rliladz Dios, blisquiw lo zho. Bnee lo zho tib, tel gan luu rond zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. ¹¹ Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

¹² Laa naa no cxel tib zha ne guiaad i, yase cxel naa Artem o cxeelgaa naa Tic. Zeene glanso zho i, siguieel luu guiaad luu Nicópolis ga gdieel ne; sac ib ga ni naa cuëz naa len mëe nal ne ziaad nu. ¹³ Laga no luu i, bioxco zaatne grieelotaaw been xyudar Apol grop me licenciad Zenas. Bdeed grë tel pe ncuane yquiin zho nëz; zeena peet gunfalte lo zho, grieelo gdziin zho zaatne no tsie zho. ¹⁴ Grëse zha ne nacgrë ne ne rliladz ne Jesús, none cseed zho gun zho xyudar zha ne no liaadz; glu zho ganle rquiin zho, led zhlëd mban zho.

¹⁵ Grëse zha ne no lo naa nu, laa zho rxee bdiuzh lo luu i. Bzhiguieel bdeed tib zhibdiuzh no lo grëse zha ne rleyne no i; sac ye zho rliladz Jesús.

Guiaannie Dios to sca dien. Peet tsienied guic to, me gacniën to; sac gon me noxco grëse zhizhgab to.

Pabl

GUILTS NE PXEEĽ PABL LO FILEMÓN

¡Diuzh Filemón!

¹ Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús. ² Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

³ Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

⁴ Ib riaanladzd naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. ⁵ Sac ziyonle naa squitaa dib zdo luu rliladz luu Jesús, rleyne luu me, ni scaque rleyne luu grë zha ne ngab lo me. ⁶ Rnab naa lo Dios, grëse mine noseed luu grë zha ne no i, tsoquic zhow, zeena ygaa zho grëse guielnzaac ne rdeed Jesús lo grë zha ne ngab lo me. ⁷ Rley naa gon bets, sac zigtaa naa zigtagaa grëraa zha ne ngab lo Diosa, blactaa ziechoobladz luu, zigonley luu zdo no, rlu luu ganle nli rleyne luu no.

⁸ Niicle ne rieguiala gnabey naa luu mine racladz naa gun luu, sac gon Jesús bzo naa none naa Xtiidz me, ⁹ per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.) ¹⁰ Niina gon ne laa Onésimo glanso lidz luu i stib, bzhiguiel zaacse pcaania me, gon ganle rrieequia mëed nac me lo naa niina, sac nu len ladzguiib nu bne naa Xtiidz Dios lo me, xquizhgaa Dios bliladz mew.

¹¹ Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gun me. ¹² Laa me biire ziaad lo luu i, niowse pcaania me; masaque been cuent naa i zial i. ¹³ Gocladz naa mbëz me lo naa nëz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús. ¹⁴ Per gocladzd naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdo luu gala.

¹⁵ Nli laa Onésimo biche lo luu palal dze; per niina ne laa me glanso lo luu stib, lëe guiaanle me lo luu i. ¹⁶ Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleyne luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

¹⁷ Telne nlipaa rzac luu naa zig tib bets luu, porne tibaque men ne rliladz ne, nana sca been cuent naa i zial i, pcaania me zig nac zeene naa glanso lidz luu. ¹⁸ Ni tel no pe guielqui ne been me lidz luu, tel pe zëëbgaa me lo luu, lo naa bnaba. ¹⁹ Wi ganle, naazhal pquia diidz rii nu: Naa quizha. ¡Zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdziind dze lozh.

²⁰ Sca gon bets gaca, bzhiguiel been guielnzaac co; bloonley zdo naa, bien ganle tibaque lo men ne ngab ne.

²¹ Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. ²² Lëe nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

²³ ¡Dios guiaannie luu sca! Pcaania zhibdiuzh Epaf^r, meⁿ ne nioogyunie naa leⁿ ladzguiib nu loxaque ne rdziuun no xtsiin Jesús. ²⁴ Scaquegaa zla zha ne quiadziuungza no dziin, zig nac Marcw, Ristarc, Demas ni Luc, gza zho laa zho rxeel bdiuzh lo luu.

²⁵ Jesús meⁿ ne rnabey ne, me glu ganle pa lotaa noxco me luu. ¡Me gunlay luu!
Pabl

GUILTS NE BEY LO GRË ZHA ISRAEL

¹ Padzeela, ndal vuilt bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho. ² Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuuaane no, ni men ne bzo me gnabeya grësew. ³ Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne riegual me ne nac me men ne rnabey.

⁴ Ga rlu ganle men nroob nac Jesús, led lega lëd me Xpëed Dios; men nroob nac me lo grë anjl. ⁵ Ni tib lo anjl bneed Dios zigne bnee me lo Jesús, zeene rëb me: “Xpëed naa nac luu. Desde nadze laa zho gunbey ne Xpëed naa nac luu.” Stib vuilt zeene bzeet me Jesús, rëb me: “Xpëed naa nac me, naa nac Pxoz me.” ⁶ Ni zeene biaad Jesús lo guidzliu; men ne nac Xpëedpaa me ga, rëb me: “Grëse xanj naa, none yquitsgzhib zho lo me.”

⁷ Zaatne raquiet anjl, rneew:

Tib mandadse nac zho lo Dios,
pale zigne rzhoon me sca rzhoon zho rie zho zaatne rnabey me zho;
me rnabey rlu zho zigne rlu bel.

⁸ Sangue zaatne raquiet Xpëed me, rneew:

Dios, luu nac men ne zobnabey,
ni gdzind dze ne grie luu;
zeene run luu guielwxtis, zigne rieguala sca run luuw.

⁹ Ni palal rdziguiend luu grë guielntseeb,
niapse ncuuaane ndzinli, ncuuaane nonguiel, min co rleynie luu;
min co gane bzooblo Dios luu, nac luu men ne rnabey,
luu nac men ne mazdraa nroob guielbley bgaa.

¹⁰ Laa stib lugar rnee:

Men rnabey nac luu, luu bzaa guidzliu, luu bzaa gbaa dib nacsew.

¹¹ Nli zdzin dze nitlo grë ncuuan co, grësew zlozha zigne riozh grë lar,

¹² dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëëxab.

Sangue luu, tibaque nac luu,
nacd luu men ne nitlo, nacd luu men ne lozh xquielmban.

¹³ Haxta rëb Dios lo me:

Cue naa nëz derech, nu bzob,
nieeda lozh gnaz naa zha ne rlëe lo luu, csañ naa zho lадznia luu.

Nligaa men nroob nac me lo grë anjl, sac ni tib lo anjl bneescad Dios. ¹⁴ Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielnë ne csaab me.

2

¹ Gacxe nagon waa, gotsaa guien ne ganle ib none dzioxco ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne. ² Sac gon, niicle zeene xanjle Dios biadteed xtiidz me lo miech padzeela, ni gocnona; grëse zha ne güeynalda, pteed Dios zho caxtigw ne riegual zho. ³ ¿Pe lelgue niina dzigo ne Jesússhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; ⁴ niicle Diosgaa, blactaa grë ncuuaane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espiritu Sant lo grë zha ne dib zdoo rnalo Jesús.

Jesús nac men ne grieelo gdziñnie miech lo Dios

⁵ Zig nac lo guidzliu cub ne ndion ne naraa gneedz Dios, psand me ne anjl gnabey low.

⁶ Lo Xtiidz me zhobnee ganle zeene znu rëb David lo me:

¿Cho nac miech ne squitaa noxco luu zho?

Zig nac tib men qui, ¿pe nacne squitaa runnon luu me?

⁷ Tib blase dze psanwin luu me palal lo grë anjl; na laa luu psanglaa me stib, beennon luu me, bzo luu me mele gnabey.

⁸ Grëtaa ncuaane no, laa luu psana lадznia me.

Nli gard gac grë mine bnee David ga, ⁹ per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grëse xtol ne.

¹⁰ Ible sca gocladz Dios, men nroob ne bzaa grëtaa ncuaane no, ible me bdeed diidz scataa grë guielnë ne gon Jesús; gane niina, Jesússe nac men ne grieelo ner lo grëtaa miech guizhiu ne no ygab lo me, gdziñnie Jesús zho lo guielndzon ne no me.

¹¹ Grëse ne ne nac ne zha ne psanmbe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne; ¹² no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu;

ni zeene ycaalsa zho grë zho, tipse dzioolnie no luu.

¹³ Stib vuelt rëb me:

Dios nac men ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

¹⁴ Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque lадznia ma no miech par gritlo ma zho. ¹⁵ Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

¹⁶ Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. ¹⁷ Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; ¹⁸ nroob nac grë guielnë ne bded me, pquiana mendox nquiiil ma me niab me lo dol. Ni ne mezhal bded grë min co, nanpaa me zha rzac zha ne nodeda, gane ible zacnie me zho.

3

Gundipde to zdoo to

¹ Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

² Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel. ³ Per Jesús nac men ne non, sac gon lo me ngab grë miech co, laa Moisés loxaque pquianap me zho. ⁴ Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaane no; ni lëe men co nac Dios. ⁵ Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. ⁶ Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque ine nley gac ne dib zdoo ne yquiambiaaz ne gac grë mine nacle diidz gneedz me lo ne.

⁷ Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

⁸ gundipde to zdoo to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

⁹ Ga raquiet ganle zeene znu rëb Dios:

Ncuaane lëbdraa guic naa been zho,

per dipse len choo iz, blactaa ncuaane gon zho ben naa.

¹⁰ Zeene gon naa scataa nac zho,

laa ne gon zho diidz tsie zho nëz ne rlu naa lo zho, lel zhaa ncuaane run zho;

nacne nli benngulëe zho guic naa.

¹¹ Lo guie|blëe co, bdete naa diidz ndziñ zho zaatne nded naa ndziiladz zho.

¹² Bets, bzian, golguien sca ganle ib gunndipde to zdo to, zeena sozite to lo me ne nac me Dios nguiamban. ¹³ Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaane runctal xtol miech, lozh ga lëew yquiaaqui gacntseeb to lo Dios. ¹⁴ Sac gon, par gdziñ ne zaatne no Jesús, ib none tiblique gac ne, tibaque gnalo ne Dios zigne bnalo ne me zeene psilo bdziuunbey ne me. ¹⁵ Ni nadzegazh none dzioxco ne miñ co. Golsoladz ganle zha rnee lo Xtiidz me:

Telne gon to gnee me lo to nadze,

gunndipde to zdo to,

gunde to zigne been grë zha ne sca gocntseeb lo me ga.

¹⁶ Ni lëe miñ co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me, ¹⁷ beenctal zho xtol zho. Dipse len choo iz ne sca bio zho dan co, bieednie me zho. ¹⁸ Zeene gon me rond zho xtiidz me, nacne bnee me lo zho rëb me gdziñd dze ne gdziñ zho zaatne ndeed me ndziiladz zho. ¹⁹ Ni nligaaw bdziñd zho, grëse zho gut dan co; sac sca beenndip zho zdo zho, ib bliladzd zho mine rnee me.

4

¹ Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzhaac grë zha co. ² Sac zigne nagon nonee Dios lo ne niina dien zha gdziñ ne zaatne gneedz me ga, znuque bnee me lo zho; per zhlëse bin zhow, ib bliladzd zhow dib zdo zho. ³ Sac loxaque zha ne dib zdoose rliladz xtiidz Dios, zha cose zrieelo gdziñ zaatne nacle diidz ga gdeed me gdziiladz zho. Mincocxe waa, zeene gon me bliladzd zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaane no. ⁴ Sac gon rnee lo Xtiidz me: “Xoop ngbidz bzaa me grëtaa ncuaane no, laa zeene gol ngbidz gadz laa me bdziiladz.” ⁵ Niaalew nagon, sinque ne gocntseeb zho lo me gane bdeete me diidz ndziñ zho.

⁶ Grë zha ne glo gocnan xtiidz me ga, brielod ndziñ zho; per zig nac niina, laa me bii quiambëz sëeb grëraa zha ne no sëeb. ⁷ Gacxe waa, laa me biire pso stib dze ne yгаа zho guie|nzaac co. Lëe miñ co ga znu bzeet David, zeene rëb me: “Telne gon to gnee me lo to nadze, gunndipde to zdo to.” Ndaldoole iz sca bzhaac grë zhagol co, dzigoraa znu bzeet David; ⁸ ga nagon rlu no stib lugar ne gdziiladz miech. Nacdraaw zaatne bdziñnie Josué grë zha ne biaan zeene blozh gut grë zha ne gocntseeb ga; sac telne lëele lugar co ga, nsodraa Dios stib dze ne yгаа miech guie|nzaac co. ⁹ Miñ co nagon, ndion ne ible no stib lugar co, ni ga gdziñ grëse zha ne ngab lo Dios. ¹⁰ Grëse zha ne gdziñ ga, gasi laa zho gdziiladz lo grëtaa xtsiñ zho, zigne bdziiladzaque Dios zeene blozh bzaa me grëtaa ncuaane no.

¹¹ Gacxe nana sca, golgotsaa dzioxco ne dziuun ne mine rnabey Dios, zeena gdziñ ne ga; dziuund ne zigne been grë zha wladz ne sca bind xtiidz me. ¹² Sac Dioosi gon, diidz ne rnee me, nona. Zeene rnee me, rien ne grëse mine nac ne. Nan me pe no guic ne, pe rza zdo ne; niicle ncuaane rzac ne mazdraa ngueetsa, nan mew. ¹³ Tsod ncuaane tsongueets lo me. Grëse ncuaane rac, me rana; ni tib tib ne, lo me cueero ne grëse tel zha mban ne.

Lëe pxoz nroob ga nac Jesús

¹⁴ Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëë me ga nac Jesús, men ne nac Xpëed Dios, me none gnalo ne; none tiblrique gac ne. ¹⁵ Sac gon mesi rquia zdoo me ne, csaand me ne zeene zootle laa ne guiabile lo dol, sac tel me gonle me zha nac lo guidzliu rii, gonle me grëtaa mod ne rquiil mendox ne par gunc̄tal ne xtol̄ ne. Bzhaac me zigne rziaacaque ne niina, lëëraasi biabd me lo dol. ¹⁶ Gacxe nagon waa, ine tibililadz golgotsaa gbig ne lo Dios, ndion ne ganle ible squia zdoo me ne, ni ible zacnien me ne zeene rquiinpaa ne gun me xyudar ne, sac ne nligaa noxco me ne.

5

¹⁻³ Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma ne rut zho par guiooglo lo xtol̄ zho, me riesana lo pcoog; ni scaquegaa riesan me mine guiooglo lo xtol̄ me; sac gon, miech guidzliuque nac me. Ye me rzac zigne rzac grëraa miech, gane rien me rquia zdoo me grë zha ne peet rien̄d, grë zha ne mazdraa ngoopdol̄.

⁴ Ni zha ne sca rac pxoz nroob, led zhald zho rzëëb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. ⁵ Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.” ⁶ Ni rëb me: Luu nac pxoz nroob, gdziñd dze ne gdzëë luu, luu gac zig pxoz Melquisedec.

⁷ Zeene bii zo Jesús lo guidzliu rii, tib vult mban rac me zig zet me lo guiel̄në, haxta roon me, nguiedz bnee me bnab me lo Dios csilaa Dios me lo guiel̄gut co; scagaa Dios psilaa Dios me, sac tib men̄ nguzobdiidz nac me. ⁸ Niicle ne Xpëed Dios nac me, per tib men̄ nguzobdiidz goc me, maase min̄copaa pquiaqui nroob guiel̄në ne bded me. ⁹ Ni ne sca bin me diidz been me grëse mine bnabey Dios me, gacxe waa grëse miech ne gban zigne nac xtiidz me, me gdeed tib guiel̄mban ne gdziñdraa dze lozh lo zho; ¹⁰ ni bzo Dios me nac me pxoz nroob niina, zigne gocaque Melquisedec pxoz nroob.

Gacde to zig cho mëdyeen̄

¹¹ Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan̄ gne naa lo to zha naca. ¹² Lo lal dze ne psilo rnalo to Jesús, haxta none tole cseed miech niina, per na gon̄ lel̄ rquiin to dien̄ cho gbiire csilo cseed to stib. Rac mëdyeen̄ to i gon̄, laa ne gow to ncuane row zha brooble lel̄ racladz to tibaque nidz guie to. ¹³ Sac gon̄, mëdyeen̄ rie nidz, ni rien̄d win dien̄ pe nac ncuane ntseeb, pegaa nac ncuane wen. ¹⁴ Sangue grëloraa guiel̄wagw, min̄ co rquiin grë zha gol, ni zha co niinile zho, rien̄ zho pe nac ncuane wen, pegaa nac ncuane ntseeb.

6

¹ Gacxe waa, none tsoxco to gac to tib zha gol. Gund̄e to ne mine pseedse to glo zeene psilo bnalo to Jesús, lo min̄ co ib grieede to. Laa to pseedle ganle:

zha none csaan to guiel̄ntseeb gbig to lo Dios,
zha none gnalo to Dios,

² zha cxobnia to guic stib zho, gnab to lo Dios por zha,
zha nac wrobnis,
zha cueeban Dios grë mengut,
zha gun̄ Dios guiel̄wxtis ne gloozh grëtaa guiel̄ntseeb.

³ Grële min̄ rii nan̄ to. Laa niina tel̄ne zneedz Dios diidz, laa to cseed mine noraa gacnan̄ to.

⁴ Sac gon̄, no ncuane grieelod gac tel̄ne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon̄ zho gol zdoo Dios psilaa me zho, bdeed Espíritu Sant guiel̄biini lo zho, ⁵ bien̄ zho zha wentaa nac xtiidz me, zha grielo sëëb zho zaatne ziaadyob gdziñ zho (zeene glu Dios grë poder ne rap me), ⁶ ni lozh ga csaan zhow,

tsienal zho guielntseeb stib; grieelod nose co guic zho gbiire sëëb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me. ⁷ Zig nac tib lë liu ne rgaa grëse nisguie ne riab, zeene rrieequia grë ncuane ran zho low, runlay Diosa; ⁸ laa telne niapse yag guiets, niapse grë guizh guiets rroob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

⁹ Bets, bzian, laa naa rne min rii lo to, per guiabde to togo mine run to rzet naa. Tel to, rien naa briele to lo grë guielntseeb, lole Dios ngab to niina. ¹⁰ Nanle to ganle, Diossi ncuane rieguial tib tib miech, min co rdeed me lo zho. Grëtaa ncuane noyun to niina ne rleynie to me, grë tel zha rquia zdo to been to xyudar grëraa zha ne no xnëz me, ni noyungaa tow niina; grësew ible guiaanladzd mew. ¹¹ Mine rzoobladz naa, tibaque squi nguieel gac to, zeena scagaa zгаа to grë ncuane nacle diidz gneedz Dios lo to. ¹² Sac dzigosi guieete to, ib gbechde to; masaque laa guic to tsienie ycaania to grëtaa mine bneele me gneedz me lo ne; zigne been grë zha ne nlipaa bnalo me.

Mine rnee Dios run mew

¹³⁻¹⁴ Golsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me gunlay Abraham, ni ndal gun me lo xtii Abraham. Ni lëëque lë me bzeet me, par glu ne ible zun me mine bnee me. ¹⁵ Scagaa Abraham, tiblque bliladz me ne laaw gac; lëë gdib pquiambëz me bdzin dze co.

¹⁶ Zig nac miech, par glu ne zun zho mine rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho. ¹⁷ Scagaa Dios, laa me bzeet lë me sac guiendraa stib men ne mazdraa non lo me. Ga blu me ne ible zun me mine bnee me ga.

¹⁸ Zeene sca rsan Dios diidz, ni rzeet me lë me, choot grieelodraa ctsëë mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz yгаа ne. ¹⁹ Min co nagon, none tiblque gac ne zig tib barcw ne dziits zob lo nis, sac no ncuane naaza len nis; ndion ne ganle, ible dzin ne len yadoo nroob ne zob Jesús. ²⁰ Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzëë me; laa me nac zig goc pxoz Melquisedec.

7

Pxoz nroob ne lë Melquisedec

¹ Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirole Abraham güeyguncxoon me zha ne no grë guiedz ne rlëë lo me, Melquisedec goc pxoz ne güeydzieelo me, beenlay Melquisedec me. ² Dzigo lo grëse ncuane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne run guielwxtis”; ni rneque zho me “rey ne rcuëëz lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”. ³ Ib raquiete dien cho goc pxoz me, dien cho goc xnial me, dien cho gocгаа xmengol me; niicle raquietegaa dien zha blanso me lo guidzliu, dien pe gutгаа me. Ziaad gac me zig Xpëëd Dios, men ne nac zhipxoz nroob ne, men ne gdzind dze gdzëë.

⁴ Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec. ⁵ Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quianie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. ⁶ Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuane co lo me.

b) Me beenlay Abraham; ni laa Abraham biaanniele diidz pe nac mine gdeed Dios lo Abraham. ⁷ Ni ndion ne ganle men nroob nac zha ne runlay.

⁸ c) Grë pxoz ne sca rcaania gon co, rdzin dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

⁹ d) Rrieequia ye grë pxoz ne briequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me. ¹⁰ Sac niicle ne gard gal Leví hor co, per racle Leví cuent ga, sac xpëëdaque Abraham goc Leví.

¹¹ e) Grë pxoz ne briequia lo xtii Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

¹² Zeene sca ptsëe Dios lo dii ne ziaad pxoz, hor co nacne bdzëëque grë xley pxoz. ¹³⁻¹⁴ Ndion ne ganle, Jesús men ne nac pxoz cub niina, lo xtii Judá briequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. ¹⁵ Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, ¹⁶ nacd mew porne ziaad me lo xtii Leví, sinque porne nac me tib men ne gdzind dze lozh xquielmban. ¹⁷ Zigne raquetaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

¹⁸ Gataa laa grë xley pxoz biaan tib lad, sac grëse mine bnabey pxoz hor co run miech, paat pquiinda. ¹⁹ Ni lalnu brieelod nsañwena miech lo Dios; sangue niina, mazdraa wen zio ne, sac ndionpaa ne Jesús nac men ne csañwen ne lo Dios, sac me nac men nroob ne rnalo ne.

²⁰ Dioszhal rëb Jesús gac tib pxoz ne gdzind dze gdzëe, ni haxta bzeet me lë me parne glu ne ctsëed me xtiidz me; ²¹ laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëe luu,

luu gac pxoz nroob zig Melquisedec.

Naa rnew, ni naasi ctsëed naa xtidz naa.

²² Mincoxe waa ndion ne, diidz ne biaannie Dios miech ga gdzind dze ne gdzëew; sac gon, por Jesús laaw noyac. ²³ Glo, ndaldoo zha ne goc pxoz, sac grëse zho miech nac zho, rdzin dze ne laa zho ret, zeene laa tib zho ret laa stib zho rzo. ²⁴ Sangue Jesús, led yed me griee par dien cho stib so, sac mesi gdzind dze ne guet me. ²⁵ Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo dol, ni lëe blaale zho ga. Tibaque laa me gnab lo Dios por zha, sac gdzind dze ne guet me.

²⁶ Jesús nac tib men ne nlipaa mbe, ni tib dol rapd me, ib rdziguiend me guielntseeb; gacxe waa, beennon Dios me, ni lëepaa pxoz nroob co nagon rquiin ne. ²⁷ Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csañmbe me zho lo xtol zho; ni rutaque zho ma ne riogon lo Dios parne guiaanmbe grëraa menguedz; sangue Jesús, tibaque vult bdeed me gon co, ni mezhal goc gon co. ²⁸ Stiba, glo, zha ne rgaa rac pxoz nroob zigne rnabey ley, ye zho runctal zho xtol zho; sangue niina ne laa Dios psañ stib xtiidz me, laa me bzo Jesús nac me zhipxoz nroob ne, mesi tib men mbe nac me, ni gdzind dze ne gdzëe me.

8

Jesúsle nac men ne rteed xtiidz ne

¹ Lo grë mine quiane naa nu, mine racladzpaa naa gacnañ to nac min rii: Jesús nac zhipxoz nroob ne, ni zaatne zob Dios, men nroob ne rnabey, ga zob me. ² Gbaa no me, ga quiyun me dziin zaatne nacpaa yadoo, Dios bzaa yadoo co, led yedraa min co bzaa miech.

³ Ndion ne ganle, zha ne rac pxoz nroob, laa zho rzo, zeena grë ma, grëгаа ncuaane rgogon miech, zha rdeeda lo Dios; scaqueгаа Jesús, ye me bdeed me gon lo Dios. ⁴ Tel niaca mine bii no me lo guidzliu niina, grieelod gac me pxoz nroob, sacne nole pxoz

nroob ne rdeed grë gon co lo Dios, zigne rnabey ley. ⁵ Grë dziin ne run grë zha ne rac pxoz nroob lo guidzliu rii, lega nacsew zig zhimplë grë minë rac gbaa; yadoo ne rio zho lo guidzliu riiw, lega nacsew zig zhimplë yadoo ro ne zob gbaa. Gol̄soladz ganle, zeene laa Moisés gzaa yadoo, rëb Dios lo me: “Zigne gon bluse naa lo luu guic gui ga, sca none gzaa luuw.” ⁶ Gacxe waa, tel̄ Jesús men̄ ne nac zhipxoz nroob ne niina, mazdraa non dziin ne quiayun̄ me; sac gon, zeene pso Dios me gac me pxoz nroob, psan̄ Dios diidz stib zha grieelo ygaa ne grë guiēlnzaac nroob ne gneedz Dios lo ne, ni me gun̄ctsin̄ ne lo Dios.

⁷ Wenraa nac diidz ne psan̄ Dios ga, sac tel̄ne niaca nlëb diidz ne biaan̄ glo ga zeene rëb me zha guiaan̄wen miech lo me, dzigo nod pe nacne mbiire nsān me stib xtiidz me. ⁸ Ni bzeetlegaa me ne laa me csān stib xtiidz me, sac grë zha ne biaan̄nie xtiidz me glo, loxaque been̄ctal zho xtol̄ zho. Min̄ co ga raquiet lo Xtiidz me, zaatne znu rnee: Rnee men̄ ndzon ne rnabey: Zdzīn dze ne gbiire guiaan̄ no diidz grë no zha Israel, ni zha Judá.

⁹ Per gacdraaw zig diidz ne biaan̄ no grë no xmengol zho, zeene rrieequia bzheen̄ naa nia grë zha gol co, blee naa zho lo caxtigw ne noded zho Egipt;

sac ni lalnu güeynal̄d zho diidz ne biaan̄ no ga, nacne niicle naagaaw, psaanladz naa zho.

¹⁰ Zeene gdzīn dze co,

znu nac diidz ne guiaan̄ no grë no zha Israel:

Grëse xley naa, nis nis gacnān zhow,

zig nac zeene haxta len̄ zdoo zho, len̄ guic zho zhobneew.

Dzigosi laa zho gun̄bey naa ne naa nac xDios zho,

ni niicle naagaaw, laa naa gun̄bey zho ne lo naa ngab zho.

¹¹ Dzigosi yquiindraa tso zho gnee zho lo men̄lidz zho, lo men̄ladz zho: “None gun̄bey luu Dios gon.”

Sac len̄ dze co, grëse zho run̄beyle zho naa,

niicle zha ne mazdraa wina, niicle zha ne mazdragaa nona.

¹² Tel̄ pe nactaa xquiēlntseeb zho, zun̄ naa zhow perdon;

gdzīndraa dze csoladz naa grë falt ne been̄ zho lo naa.

¹³ Zeene sca bzeet me ne laa me csān stib xtiidz me, ga rlu ne rquiindraa minë biaan̄ glo ga; sac nac grë ncuaan̄ gox rquiindraaw, laaw nole par nitlow.

9

Yadoo ne no gbaa

¹ Zeene glo biaan̄ Dios diidz ga grë me zha Israel, hor co biaan̄ diidz lo zho zha tsiegan̄ zho me, ni zha tsaa yadoo ne gac zaatne tsiegan̄ zho me. ² Dzigo bzaa zho tib yu mantiad ne goc yadoo co, grol̄taa len̄ yu co pquiaancaan̄ zho tib lar nroob, goc len̄ yu co chop len̄. Tib len̄a, minë riaan̄ nëz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle. ³ Laa stib len̄a, minë riaan̄ nëz zhits lar co, ga nac zaatne Ndadoo; ⁴ ga rzo tib yag ndiaab niapse or lada, dzigo lo co rec yaal; leen̄ coque zhoob tib guin̄ scaque niapse or ndiaab lada. Len̄ guin̄ co no grop lë quie lag ne pquia ley ne pcaania Moisés, ga no bar ne bzhen̄ Aarón, bar ne bdzib ben ga; leen̄ coque no tib guies win niaa niapse or, len̄ guies co no palal maná, quietxtil ne bguiaan̄ Dios grë mengol co. Lëë guin̄ co biaan̄ par csoladz zho zha nac diidz ne biaan̄nie Dios zho. ⁵ Zhits guin̄ co zoli chop anjl ne bzaa zho, masaque rbebel grop anjl co rtsiig me xiil̄ me rtse me zhits guin̄ co, zaatne rliaāl xchen grë ma ne riogon lo Dios, par guiooglo lo xtol̄ menguedz. Par gne naa zha nacraa grë ncuaan̄ co, rneedzraaw diidz nu niina.

⁶ Sca nagon̄ biaa yadoo co, dzigo grë zha ne rac pxoz tibaque rzëëb zho zaatne Nda ga; ga riegun̄ zho dziin ne rnabey ley zho gun̄ zho. ⁷ Laa stib len̄a, zaatne Ndadoo ga, loxaque men̄ ne nacse pxoz nroob rrieelo rzëëb ga, ni tibaque vuilt tib len̄ iz rzëëb zho. Zeene rzëëb zho, rienie zho xchen ma ne rgogon zho par guiooglo lo xtol̄ zho, ni guioogloogaa

lo grë xtol̄ mengüedz, dol̄ ne biend zho been̄ zho. ⁸ Gase na ganle rlu Espíritu Sant lo ne, gacd sēēb grēraa miech zaatne Ndadoo ga, laga bii sca chop len̄ nac yadoo.

⁹ Golgotsaa gwi ne niina na ganle zha naca: Glo, niicle ne scataa riesan̄ zho gon, scataa rut zho ma ne rgogon zho, per brieelod grë ncuaan̄ co nsañmbew zdoos zho; ¹⁰ sac hor co, laa zho güeynal̄ grë ncuaan̄e laglaase, rio zho dien̄ pe zac gow zho, dien̄ pe zac guie zho, dien̄ zha gaz zho, dien̄ zha tsar nia zho par guiaan̄mbe zho. Laa zho been̄ miñ̄ co, sac hor co gard gacncub diidz ne biaann̄ie Dios zho ga. ¹¹ Sangue niina ne laa Jesús biaad, niina ne mele nac pxoz nroob, por me laa miech yгаа grë guiel̄nzaac ne bneele Dios ga. Bdziñ̄ dze laa me bzēēb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), ¹² zeene bzēēb me, bzēēbnied me pe xchen chiv yeen̄, pe xchen ngon yeen̄, zigne been̄ grēraa pxoz nroob; sinque xchenpaa me bzēēbnie me zaatne Ndadoo ga; tibaque vuelt bzēēb me, ni lēē psañ̄mbele me ne lo grētaa xtol̄ ne ga. ¹³ Nana, tel̄ne scataa pquiin̄ zho xchen ngon yeen̄, xchen chiv yeen̄, rio zho rzēēg zho tib vac yeen̄ rliaal̄ xquidie co lad zha ne rap falt, par gbiche dol̄ co guiaan̄mbe zho lo Dios. ¹⁴ ¿Pe lel̄ xchen Jesús dzigo? Mazdraa gon̄ nac xchen me, ible sañ̄mbew ne lo grētaa ncuaan̄e paat rquiind̄ ne bdziun̄ ne glo, niinasi zrieelo dziun̄ ne mine rnabey Dios nguiamban. Sac gon̄, tel̄ Jesús ni tib dol̄ rapd me, ni Espíritu Sant bloo zdoos me bdeed me me goc me tib gon̄ mbe. ¹⁵ Gacxe waa, Jesúsle nac men̄ ne gdziñ̄ie ne lo Dios, niina ne laa Dios psañ̄ stib xtiidz me. Zeene gut me, ga bdiizh me grētaa xtol̄ miech, zigtaa zha ne biaann̄ie diidz glo cow, zigtagaa zha ne nobedz me len̄ dze riiw; niinasi grēse zho zrieelo yгаа zho guiel̄mban ne gdziñ̄ dze lozh ga, zigne nacle xtiidz me.

¹⁶ Gotsaa gwi ne ganle, xtiidz miech, mine rsañ̄ zho par dien̄ zha gac grë ncuaan̄e rap zho zeene laa zho guet, laga bii mban zho grieelod gacnon diidz co; ¹⁷ sinque haxta ret zho, dzigo laa diidz co racnon. ¹⁸ Scaque nagon̄, zeene psañ̄ Dios xtiidz me glo, gutgazh ma ne brieer ren bzhiee dzigora laa diidz co psilo gocnon. ¹⁹ Golgotsaa csoladz ganle, zeene blozh bnee Moisés lo mengüedz zha nac diidz ne psañ̄ Dios ga, laa xchen ngon yeen̄, xchen chiv yeen̄ ndxiembēzle notsa nis; dzigo bzoob me tib lē guits mēcwxiiil rna nizhnie tib guic bar, blozh ga, psēēb mew lo ren co blaal̄ me ren co lo guits ne quia grē diidz co, ni blaal̄ mew lad grēse miech co, ²⁰ ni rēb me lo zho: “Laa ren rii bzhiee, zeena gacnañ̄ to desde nadzetaa laa diidz ne psañ̄ Dios lo to nu csilo gacnon, none gun̄ to mine rnabeya.” ²¹ Blozh ga, blaalaque me ren co gdipse len̄ yadoo, ni blaal̄ mew grēse lad ncuaan̄e racdziin len̄ yadoo.

²² Sca nagon̄ nac ley co, grēse ncuaan̄e no guiaan̄mbe, ib ren rsañ̄mbew; scaque miech, haxta rzhiee xchen ma ne riogon dzigora riooglo lo xtol̄ zho. ²³ Min̄cocxe waa, sca pxiee Moisés xchen ma biaan̄mbe yadoo co ni grë ncuaan̄e racdziin len̄a (nacse yadoo co zig zhimlē yadoo gbaa); sangue yadoo gbaa, ga pquiin̄ ren ne mazdraa non lo xchen ma, ni lēē ren co goc xchen Jesús. ²⁴ Zeene bzēēb Jesús zaatne Ndadoo güeynee me lo Dios por ne, güeyd me len̄ yadoo ne bzaa miech, sinque len̄ yadoo gbaa güey me; sac gon̄, nacse mine no lo guidzliu rii zig zhimlē mine no gbaa. ²⁵ Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuelt güeylogon me me. ²⁶ Tel̄ne ye me niun̄ zig run̄ grēraa pxoz co, pe zhistaale vuelt na ziyet me wlal̄ ne bre guidzliu, jper na, led yed me! Zeene laa dze bdziñ̄, laa me biaad, xchenpaa me bzhiee, ni tibaque vuelt bzhieew psañ̄mbew ne lo dol̄ grēse ne ne nac ne miech. ²⁷ Zigne biaan̄ tibaque vuelt ret miech, lozh ga zeene laa Dios gun̄ guiel̄wxtis, laa zho none gacredz lo me; ²⁸ scaquegaa tibaque vuelt gut Jesús bdiizh me xtol̄ grēse miech; ni dzin̄ ne guiaad me stib, per guiaatraa me par biire quizh me xtol̄ miech, sinque laa me guiaadsilaa grē zha ne quiambēzlo me, zeena gand̄ zho grētaa guiel̄nē ne csiaab Dios.

10

Tibaque vuelt goc Jesús gon

¹ Grë mine rnabey ley run̄ pxoz, lega nacsew zig tib zhimlē grētaa mine been̄ Jesús por ne. Horco niicle gzobse iz rienie grë miech co gon zigne rnabey ley, per brieeloda

nsanmbew zho lo dol. ² Tel niaca mine gon cose nsanmbe zho, dzigo tibtaa vuelt ne niesan zhow lëe niaanmbele zho ga; niicle zhagaaw, nienpaa zho ne laa zho mbele. ³ Per na, gzobse iz zeene laa zho riesan gon co rsoladz zho ne bii no zho lo dol, ⁴ sac gon, grieelod ne xchense ngon yeen, xchense chiv yeen guiaanmbe miech lo dol.

⁵ Mincoxe waa, zeene laa Jesús biaad lo guidzliu, pe led znu rëb me lo Dios: Grë xchen ma, grë ncuane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

⁶ Grë ncuane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

⁷ Gane niina, laa naa zial nu Dios, zeena gun naa mine gnabeytaa luu; zigne zhobneele lo Xtiidz luu gac naa.

⁸ Gotsaa gwi ne ganle, blozhse rëb me racladzdraa Dios tso zho pe ncuane tsielogan zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho); ⁹ dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaannie Dios miech ga psilo noquuin. ¹⁰ Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuelt sca goc me gon co, ni lëe psanmbele me ne ga.

¹¹ Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieloda nsanmbew miech lo dol; ¹² sangue Jesús gon, tibaque vuelt bzhiiee xchen me goc me gon psanmbe me miech lo dol. Laa niina, cue Dios nëz derech ga zob me, ¹³ quiambëz me gdziñ dze zeene grëse zha ne rlëe ran me, laa zho guiaanwin lo me. ¹⁴ Tibaque gon ne bdeed me ga, psanmbegazh me grëse zha ne nodziinne me lo Dios. ¹⁵⁻¹⁶ Ni nligaa scaw, haxta Espíritu Sant, zeene blozh bzeet me zha rëb Dios guiaannie me zha Israel diidz stib, zha nis nis gacnan zho xley Dios, zig nac zeene haxta len zdoo zho, haxta len guic zho zhobneew; ¹⁷ dzigo bzeet me zeene znu rëb Dios: “Tel pe nactaa xquieintseeb zho, tel pe nactaa xtol zho, gdzindraa dze ne csoladz naaw.”

¹⁸ Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

None gbig ne lo Dios

¹⁹ Bets, bzian, glo loxaque men ne nacse pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquieinzaac Jesús, bdeed me me bzhiiee xchen me psanmbe me ne. ²⁰ Zeene sca gut Jesús, rriequia tib nëz cub ga pxal me par gdziñ ne zaatne ygaa ne guielmban; lëe nëz co ga bzhiial zeene sca briez lar ne quia len yadoo ga. ²¹ Ni ne me nac zhipxoz nroob ne no me yadoo gbaa, ²² niinasi zacle gdziñ ne haxta lo Dios. Nana sca, dib zdoo ne golgotsaa gbig ne lo Dios, dib zdoo ne golgotsaa gnalo ne me, benque laa me psanmbele ne lo grëtaa ncuane yozh ne rza zdoo ne, rza guic ne; rriequia bgaz me ne tib nis mbe. ²³ Tiblique sca golgotsaa gac ne, benque ndion ne ganle ible zdziñ dze ne gac mine rliladz ne; sac Dios psan diidz co, ni ndion ne rquidied me.

²⁴ Golgotsaa dzioxco ne cseedlsa ne gleynie ne zha ne nacgrë ne, ni dziuun ne ncuane yquuin lo ne grë ne. ²⁵ Dze ne nacle diidz ycaalsa ne dziolnie ne Dios, ible none ycaalsa ne grëse ne, guionald ne mine run grë zha ne rzozit. None cso ne diidz lo grë zha ne nacgrë ne, conley ne zdoo zho dziits so zho lo mine rliladz ne; xco co none dzio ne niina ne laa dze ne guiaad Jesús ziaadgaxle.

²⁶ Zha ne beenbeyle zha nac diidzli, ni lozh ga xtsiinpaa gunctal zho xtol zho, tsodraa gon ne csanmbe zho lo dol co; ²⁷ lëetaa mine tsieguial zho nac guieinédox ne ygaa zho zeene laa Dios gun guielwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me. ²⁸ Gotsaa gwi ne ganle, niicxe ley ne na pcaania Moisés padzeela ga, zha ne rguuits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho. ²⁹ Nana, ¿pe lelgue zha ne dzigo

quuits mine rnabey Jesús? Mazdraa gon nac guielñe ne yгаа zho, sac noguitnie zho xchen Jesús ga, rzhidznie zho Espíritu Sant ga sca gun zho. Noguitnie zho ren co, ni lëew bzhiee biaanmbe zho lo dol, lëew bzhiee zeene psan Dios stib xtiidz me zha gbig miech lo me; rzhidznie zho Espíritu Sant, ni men co no zhixco zho. ³⁰ Zha ne sca gun, ible nroob guielñe ne yгаа zho; sac ndion ne ganle zha nac xDios ne, me znu rnee: “Naa raguial gun guielwxtis; naa gded mine riegual tib tib miech.” Ni zhobneeque lo Xtiidz me: “Grëse miech, lo me cueero zho grë ncuaane been zho.” ³¹ Ne nligaa ncuaane gdzieb ne ted grë zha ntseeb ne sca guiab lадznia Dios, men nguiamban!

³² Sangue to, golsoladz ganle zha bded to zeene griinpaа psilo bnalo to Jesús, niicle ne scataa nroob guielñe ne gon to, per beenctalde to xtol to. ³³ Blactaa bдziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to. ³⁴ Grë zha ne biab lадzguiib, mbanse rac zdoo to ran to zha rac zho; niicle zeene biaad zha ne biaadla grë ncuaane nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne yгаа to gbaa, ni mincosi gdzind dze ne nitlow. ³⁵ Nana sca, scaque dziits golso; sac telne tibaque gnalo to Dios, ible zгаа to guielnzaac ne gneedz me. ³⁶ Ible guiaand zdoo to, tibaque dziits golso golgun mine rnabey me; zeena yгаа to grë ncuaane bneele me gneedz me lo to. ³⁷ Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

³⁸ Grë zha ne zienal mine nac diidzli, ible zban zho sac rnalo zho naa; laa telne guiaan zdoo zho sozit zho lo naa, ni lalnu gleynied naa zho.

³⁹ Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zгаа ne tib guielmban ne gdzind dze lozh, sacne znu dib zdoo ne rnalo ne me.

11

Zhapaа nac ne dib zdoo ne gnalo ne Dios

¹ Znu nac ne dib zdoo ne gnalo ne Dios. Zha ne dib zdoo rnalo Dios, tiblifique zienie guic zho ne ible zгаа zho mine quiambëz zho gdeed me lo zho; niicle ncuaane gard gan zhow, per rzac zho zig nac zeene ranle zhow. ² Zig nac grë xmengol ne, ne scacxe waa bnalo zho Dios gane bleynie me zho.

³ Scagaa niina, ne dib zdoo ne rnalo ne Dios, gane rliladz ne me bzaa guidzliu ni grëragaa ncuaane no, zeene bnabey me biaaw, niicle ne peet guiend hor co.

⁴ Gotsaa gwi ne ganle lëë bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Caín. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoo me bnalo me Dios.

⁵ Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gonдраа me. Zeene bii zomban me lo guidzliu, blu Dios ne rdziladz Dios zha mban me. ⁶ Sac zha ne rnalod Dios dib zdoo, grielod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

⁷ Zig nac Noé, ne dib zdoo me bnalo me Dios, gane bliladz me xtiidz Dios zeene rëb Dios lo me pe nac ncuaane ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guielñe co. Ni ne sca bnalo me Dios, gane ible zгаа me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

⁸ Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz brie me zie me, niicle ne nanđ me zha nac dan co. ⁹ Ni ne sca rnalo me Dios, gane niicle bдzin me lo liu co, laa me wbanse ga zig tib menzit. Lega nacse len grë yu mantiad bio me grop me Isaac, scaquegaa Jacob; sac ye

grop zha co biaan diidz nacchen liu co. ¹⁰ Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

¹¹ Scaque Sar, wnaa ne goc tsieel Abraham, ne dib zdo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdo me bliladz me ible zun Dios miñe bnee me ga. ¹² Ye Abraham, mengol-le me, men ne yquianiedraa mëed nac me, ni zeene laa Sar gop mëed co, miech guizhiu ne brieequia lo dii co; pale mel ne ndziib gbaa, yuzh ne ndxieгаа ro nisdoo.

¹³ Gza zha ne blozh goquiet nu, gardaque yгаа zho grë miñe bnee Dios gdeed me lo zho, laa zho gut; zeene bii zomban zho lo guidzliu rii, dib zdo zho bnalo zho me gane bliladz zho ne ible zгаа zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib menzit. ¹⁴ Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. ¹⁵ Sac telne niend zho ne scaw, znuse mbire zho ney zho zaatne brie zho ga. ¹⁶ Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne rililadz zho, laa me bzhixcuaale guiedz ne gac ladz zho ga.

¹⁷ Zeene been Dios Abraham prueb dien pe nli rnalo Abraham me, rëb me cogon Abraham xpëed Abraham Isaac; ne dib zdo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon. ¹⁸ Ni laa xtiidz Dios nac ne win gunctal lo xtii me! ¹⁹ Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieeban win stib.

²⁰ Niiclegaa Isaac, ne dib zdo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

²¹ Scaque Jacob, ne dib zdo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

²² Scaque José, ne dib zdo me bnalo me Dios, gane zeene laa me merle guet bzeet me ne ib zdziñ dze grie zha Israel Egipt; haxta psañ me diidz güey zho xtsit me zeene laa zho grie ga.

²³ Zig nac pxoz Moisés, xniaa Moisés, ne dib zdo me bnalo me Dios, gane bloolan me mëed niow yeen co lidz me tson mëe; ib bdziebd me miñe bnabey rey Egipt.

²⁴ Niiclegaa Moisés, ne dib zdo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; ²⁵ laa ne niaan me lidz rey nleynie me grë ncuaane niunctal xtol me, mazd bleeladz me me psacsi zho me grë menladz me. ²⁶ Bien me ne nonguielraaw ted me guielnë zig pteed zho Jesús, lëdle niaannie me grë ncuaane non ne no Egipt; sacne miñe mazdraa nonie guic me nac guielnzaac ne gdeed Dios lo me.

²⁷ Ne sca rnalo me Dios, gane bdziebd me xquieldox rey, tiblque been me guic me brie me Egipt; sac nanpaa me niicle rand me Dios, per Dios nacie me. ²⁸ Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grë ro lidz zho, zeena guete xpëed glo zho wdze co.

²⁹ Grë zha Israel co, ne dib zdo zho bnalo zho Dios gane wbiig lo Nisdoo Nizhnie, bzhial tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut. ³⁰ Ne scaque dib zdo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

³¹ Zig nac Rahab, wnaa ro nëz ne bio guiedz Jericó, ne dib zdo me bnalo me Dios, gane peet god me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

³² Ni noragaa zha ne sca dib zdo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech. ³³ Ne sca dib zdo zho bnalo zho Dios, no zho beenchen grë

guiiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho; ³⁴ no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablolo lo dil ni biire pcaa zho fuerz stib, haxta benxoon zho zha zit ne nodilnie zho. ³⁵ Grë men wnaa, no zho gonlo brieegan menlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieegan. ³⁶ Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; ³⁷ no zho bdeedquie miech zho haxta gut zho, no zho bgaa bloosierr miech zho, no zho bgaa gut zho lo spad. Nogaa zho mbanse rac, pquianguzhoon zho lo miech, nëzrii nëzrec zie zho, mbanse rac zho guiend pe gow zho, guiend xab zho, tib lëse guid mëcwxiil, tib lëse guid chiv nriel zho. ³⁸ Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

³⁹ Ni golgacnan ganle, niicle nli biannziuu zho lo Dios ne sca dib zdoos zho bnalo zho me, per gardaque yгаа zho guielnzaac ne psan me diidz ga yгаа zho; ⁴⁰ sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac miñ co nac mine mazdraa nroob.

12

Choot gbiched lo Jesús

¹ Nziandox grë zha ne sca dib zdoos bnalo Dios. Ni niina, grëse zha co laa zho ndxiewi lo ne; sac rreequia tib lo prueb no ne noquiaa ne corr. Gacxe waa, golgotsaa csaan grë ncuane runctal xtol ne, zeena ycadraaw parne grieelo tiblque dzio ne nëz gdziñ ne zaatne no gdziñ ne. ² Tibaque golgotsaa guionie guic ne laa ne gdziñ lo Jesús ga, men ne zo lo ne grëse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuane mbeeguieto ga zeene sca quia me lo cruz, per ptoladz me.

Ni nligaa, zig nac niina cue Dios nëz derech ga zob me gbaa.

³ Golguien sca, zeene racmban zdoos to, zeene racladz guiaan zdoos to, ib gdeete to diidz; golisoladz ganle, zha pxcw Jesús bded me grëtaa mine pteed grë miech ngoopdol co me. ⁴ Parga nli, në noded to noxco to gunctalde to xtol to, per gard guiab ne yгаа to ne gut miech to. ⁵ Golisoladz ganle zha rnee Dios lo grë zha ne nac xpëed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grë ncuane nonguield, none sac zdoos luuw; niicle zeene gactoxgaa me lo luu, gacmband luu.

⁶ Sac gon zha ne sca rso me diidz lo, ga rlu ne rleynie me zho; zha ne ractoxgaa me lo, ga rlu ne nli xpëed me nac zho.

⁷ Golguien sca, gacbande to tel pe caxtigw ne cteed Dios to. Golgan ganle, niicxe miech na, ractox zho lo xpëed zho zeene rond win diidz. ⁸ Nana, tel ib peet glisquidgaa me lo to, gase dzigo rlu ne led xpëete me nac to; sac gon, zha ne nac xpëed me, rlisqui me zeene rond zho xtiidz me. ⁹ Golisoladz ganle, zeene rac ne mëedlas rlisqui pxoz ne zeene rdziuuñ ne ncuane nonguield; scagaa ne, rien ne ne me rnabey lo ne. Nana, ¿pe lel pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena yгаа ne guielmban. ¹⁰ Gotsaa gwi ne ganle, zig nac pxoz ne, rquia me rlisqui me zeene rdziuuñ ne ncuane nonguield, sac racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdoos, zig me; ni lëe min co nonraa. ¹¹ Parga nli, tsod zha ne gley zeene noded zho caxtigw, sinque në rzac zhow; per zeene rded ga, zha ne rienpaa rquiina haxta wen riaan zdoos zho, sac rseed zho zaacse rban zho.

Nodne gbiche miech lo Dios

¹² Nana sca, telne bdzagle to, golgun ndip nia to, golgun ndip ni to stib, ¹³ zaacse golsë, tib nëz goltso zeena gziaabnëzde to; dzigo scagaa zrieelo gacnie to zha ne lega noyobe.

¹⁴ Goltsoxco niowse golbannie samiech to, ib gunctalde to xtol to; sac zha ne mbed zdoo, grielod gdziñ zho lo Dios. ¹⁵ Tibaque golteedlolsa zha ne nacgrë to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa mine nac zho rzhooobnen, nzian zdoo zha ne rsan zho, rlozh ga grëse zha co runctal xtol. ¹⁶ Ib gunde to grë ncuaane tsod zdoo Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mëëdglo; ¹⁷ ni nanwen to ganle, zeene laa me gocladz nab pxoz me niunlay Dios me zig mëëdglo, brieelodraaw. Dzigoraa rquia zdoo me, haxta roon me rnab me ygaa me guielnzaac co stib, per pe xtsiinraaw.

¹⁸ ¡Golguien sca ganle, nroob nac guielnzaac ne bneedz Dios lo to niina! Led yede to ndziñ pa tib cho gui, zig bdziñ xmengol to cho Gui Sinaí padzeela. Grë xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rriee me; ¹⁹ ni lala nguiedz rcuedz trompet, ni nguiedz zëëb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me. ²⁰ Bdzieb zho bin zho rëb me, zha ne tsep cho gui co none gdeedquie zho zho, gliz lanzgaa zho zho haxta guet zho; scaque grë ma. ²¹ Ncuaane gdziebdoo ne gon zho ga; haxta Moisés rzhidz lo dzeb co.

²² Sangue to, rrieequia haxta Jerusalén, zaatne no Dios nguiamban gbaa bdziñ to, zaatne ndxie grë anjl guizhiu ne roolnie Dios; ²³ zaatne ndxie grë zha ne glopaa bzëëb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtol. ²⁴ Laa to bdziñle lo Jesús, men ne rdzinnie miech lo Dios niina ne laa Dios psan stib xtiidz me; laa to bdziñle zaatne rrieequia bliaal xchen Jesús len yadoo gbaa, lëë ren co mazdraa non lëdle xchen Abel.

²⁵ Min co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¡Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me. ²⁶ Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.” ²⁷ Gase na ganle rlu, lo grëse ncuaane bzaa me zdziñ ne laa me csiniw, dzigo laaw nitlo; lozh ga, guiaan mine gdzindraa dze nitlo; ²⁸ ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. ²⁹ Golguien ganle, tel me ne nac me Dios ne riladz ne, nac me zig nac tib beldox ne peet rdedlaad lo.

13

Golban zigne racladz Dios

¹ Bets, bzian, golleynie grë zha ne nacgrë to, golguien ganle tibaque men ne nac Pxoze to. ² Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanj Dios blëz lidz zho. ³ Golt siegan grë zha ne nioogyu ladzguiib, goltso xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielnë.

⁴ To ne nac to zha ne ptsieelniale, sacde to guieltsieel zig beelze pe wguut, ib yquidiede to tsieel to; sac zha ne yquiangob tib zha ne nonguield tsonie zho o yquiangobgaa zho tib zha ne nole tsieel, ib tedsod zunquizh Dios zho dol co.

⁵ Tsienalde to loxaque dien zha gunlo to dimi; sinque golley totsaque no mine yquiiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.”

⁶ Gacxe waa, nod pe nacne ctseb zhgab ne, none tibaque dzionie guic ne dzieets ne: Dios nac men ne nacie naa, ¡pe nac nadien gdzieeb naa?

¡Peet grieelod gun miech naa!

⁷ Golsoladz zha goc men ne bzo lo to pseed to Xtiidz Dios, ni dib zdoo to golnalo Dios zigne bnalo me Dios.

⁸ Golguien ganle, gdzind dze ne gdzëe Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa. ⁹ Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo mine riladz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho. ¹⁰ Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rriequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grieelod yquiin zho gon co.

¹¹ Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëeg zhow. ¹² Scaque Jesús, zeene bzhiee xchen me psanmbe me miech lo dol; ro guiedz ga güeysacsi zho me gut me. ¹³ Scagaa ne niina, golgotsaa griee ne lo grë ncuaane lo guidzliu rii, golgotsaa cueeladz ne ne guional ne zhits Jesús dzian ne grë guielnë, telne no dzian new. ¹⁴ Benque ndion ne ganle, nacd lo guidzliu rii zaatne gbiaazpaa ne, sinque laa ne zional ygaa ne zaatne naraa gneedz Dios gbiaaz ne.

¹⁵ Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleyne ne Dios, golgotsaa gdeed ne xquizh lo me. Lëe min co gac zig tib gon ne gdeed ne lo me. ¹⁶ Goltsoxco golgun grë ncuaane yquiin lo samiech to, ncuaane rgaa lo to, goldeed palala lo grë zha ne guiend pe yquiin; sac rriequia lëe stib gon ga gdeed to lo Dios, ni mincogaa rleyne me.

¹⁷ Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

¹⁸ Golinab lo Dios gacniën me no tibaque znu dzioxco no dziuun no mine racladz me, me nan ganle mbe zdoo no, mbe xquielrien no. ¹⁹ Ni mine rsopaa naa diidz lo to, golsoladz golinab lo Dios gneedz me diidz gbiire guialniob naa i, guialgan naa to.

²⁰ Jesús nac men ne quianappaa ne, zig rquianap baxtor xpëcwxiiil zho; me gut bzhiee xchen me zeene psan Dios diidz stib zha gdzin miech lo me; ni diidz cosi gdzindraa dze ne gdzëew.

Dios men ne bleeban Jesús, men ne racniën miech peet zhgab rtsebd zho, ²¹ me gneedz guielbiini lo to grielo to gun to mine rnabey me. Jesús sca golnalo, zeena grielo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

²² Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

²³ Racladz naa gacnan to ganle, laa bets ne Timoté briele ladzguiib; telne zlansonioab me lo naa nu, grop no me guiaad lo to i.

²⁴ Golsiguiel goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeei zhibdiuzh zho lo to.

²⁵ Guiaannie Dios to sca. Me glu ganle pa lotaa noxco me to.

GUILTS NE PQUIAA SANTIAGW

¡Diuzh to grëse to!

¹ Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

² Bets, bzian, ndal ncuaane rded ne parne glu dien pe nli dib zdoo ne rnalo ne Dios. Tel pe nactaa ncuaane noded to i, ib gacbande to, sinque golley. ³ Sac gon, zeene squi ran ne grë pe guielnë, ga rseed ne tibliladz rac ne tel petaa noded ne. ⁴ Golseed sca tibliladz golgac. ¡ib guiaand zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdiebd.

⁵ Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸ Lëëraasi dib zdoo ne none gnab new, nodne gacchop guic ne; sac zha ne racchop guic, gdziind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibгаа dze na rliladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹ No zha bets ne, zha bzian ne, quianied zho ncuaane yquiiin zho, par miech peet nond zho; per none gon ine gley zho sac nroob non zho lo Dios. ¹⁰⁻¹¹ Scagaa zha ne rapchen, none ine gley zho niina ne biaanwin zho, sac nëz lo Dios grë ncuaane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuaane rap zho. Masaque nacse zho zig nac guieen grë guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

¹² Dichos zha ne ib rzozite lo Dios niicle no nzian ncuaane rcheep zho gunctal zho xtol zho, per rund zhow; sac zha cosi zгаа zho tib guielmban ne gdziind dze lozh, guielmban ne bneele Dios gdeed me lo grëse zha ne rleynie me. ¹³ Zeene sca no ncuaane rcheep ne gunctal ne xtol ne, guiabd ne togo Dios noquiiil ne gun new; sac gon led yed Dios rzoobladz ncuaane ndzinlid, ni niicle rquiiildгаа me miech gun zhow. ¹⁴⁻¹⁵ Grë ncuaane ndzinlid ne rzoobladz ne, grë ncuaan yozh ne rionie guic ne, min co nac mine rquiiil ne. Lëëw nac mine rcheep ne runctal ne xtol ne, ni ndionle ne ganle, lëë gdib mine gdeed dol lo miech nac guielnëdox ne yгаа zho.

¹⁶ Bets, bzian, gac-wete to sca. ¹⁷ Golguien ganle, ncuaane rquiiin, ncuaane ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdziind dze guiuu, ni tib lë guielcow guien zatne no me. ¹⁸ Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdglo lo me.

Nacda yquiaadiagse miech Xtiidz Dios

¹⁹ Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëële. ²⁰ Sac gon, zeene rlëë ne, grielod gun ne ncuaane rdziladz Dios. ²¹ Golguien sca, golsaan grëtaa ncuaane ndzinlid ne ziyun to, golbiche lo grë guielntseeb ne znutaa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëëw rlu zha laa to lo dol.

²² Per guiabde to togo loxaque yquiaadiagse to Xtiidz Dios lëëlew ga; sinque ib none gban to mine rquiaadiag to, sac tel ib gbande tow lëëque to noquidie to ga. ²³ Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan:

²⁴ Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵ Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

²⁶ Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zienal zho mine rnabey Dios.

²⁷ Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaane ndzinlid ne run grëraa miech.

2

Lëda ga run zha ne rbe

¹ Bets, bzian, gunde to ne ncuëese lo miech ne gnee to, sac zha ne sca run, zha dien guiab zho xnëz Jesús no zho. ²⁻³ Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëëled rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzga luu sob luu, lo liuse i bzob.” ⁴ ¿Pe sca na rac zha ne no xnëz Jesús? Zha ne gon sca run, ga rlu zho niapse guieintseeb no guic zho.

⁵ Lëda ga gon bets, lëda ga gon bzian. Golgacnan ganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena yгаа zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶ laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riego zho to lo wxtis; ⁷ haxta rdzibdee zho Jesús, men ndzon ne nacie to niina.

⁸ Ib none gban ne zigne rnabey Xley Dios, lo xley me zhobnee: “Bleynie samiech luu, zigne rleynie luu luu.” ⁹ Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaguiits to. ¹⁰ Golgacnan ganle, zha ne rguiits tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguiits grëw. ¹¹ Sac tibaque men ne psana grësew. Gacxe waa, tel zha ne zienal mine rnee: “Gute luu samiech luu”, per rguiits zho mine rnee: “Yquiangobd luu zha ne led tsieeld luu”, laa zho beenctal-le xtol zho ga. ¹² Niowse sca golgac, niicle zeene gneegaa tow, niowse golnee; sac gon, dzin dze cxobdol ne dien pe wban ne zigne rnabey Jesús, te wband new ye. ¹³ Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guieinëdox ne cxeel me.

Zha ne rnalo Dios none glu zhow

¹⁴ Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scase laa Dios csilaale ne? ¹⁵ Gzoob ne no zha ne nacgrë to i, yase tib bets tow, tib bziangaa tow, ranlo to guiend xab zho, niicle quianied zho ncuaane gow zho; ¹⁶ ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquiin diidz co? ¹⁷ Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne. ¹⁸ Gacxe waa, zha ne rnalo Dios ni run zho mine rieguial zho, no zho gnë lëda i run zha ne rnee lëëlew ga totsaque gnalo ne Dios. Ni rap zho rson, sac grieelod glu ne rnalo ne me, telne rund ne mine rieguial ne.

¹⁹ Nli wena run zha ne rliladz tibaque Dios no, per grieelod guiab zho lëëlew ga, sac gon zig nac mendox ye ma rliladz tibaque Dios no, per led por mincod laa ma lo guieinë ne cxeel me, sinque haxta rdzieb ma me. ²⁰ Nadzpaa nxen zha ne sca rzac, pe ni lalnu riend zho paat rquiinda guiab zho rliladz zho Dios ni telne rund zho mine rieguial zho. ²¹ Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rëb Dios lo me

tsielogon me xpëed me, güey me zaatne pxeel Dios me. ²² Gotsaa gwi ne ganle, zeene been Abraham mine bnabey Dios me ga, ga blu ne nli rnaló me Dios, ni hor co mazdraa dib zdoo me bnalo me Dios. ²³ Lo Xtíidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtold; zëeb diidz, tib zha ndzieeldiidz Dios goc me.

²⁴ Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli riladz zho me, gun zho mine rnabey me zho. ²⁵ Golsoladz ganle, scaque wnaa ro nëz ne brieelë Rahab, por been me xyudar samiech me, gane pcaania Dios me zig tib zha ne peet xtold; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nëz ne wbiere zho, bgaad zho. ²⁶ Gase na ganle rlu, paat rquiinda guiab ne riladz ne Dios ni tel rund ne mine rieguial ne, nacse ne dzigo zig tib xcuerp ngutoo, tel cuerp cow, ¿pa dien yquiina?

3

Ncuaane run ludz miech

¹ Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

² Grëse ne nzian mod ne rxin ne lo samiech ne. Tel niaca mine no tib zha ne grieelo ycuëez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. ³ Gotsaa gwi ne ganle zig nac guay, con tib lë win guiib ne rgo miech ro ma rrieelo rnabey zho ma, rienie zho ma nëz ne racladztaa zho. ⁴ Scaque barcw, niicle ne nrooba, no hor rrie medox lo nis rcheepa, per con tib lë yag lag win ne rsëë miecha, rrieelo rienie zhow nëz ne racladztaa zho. ⁵ Scapaa nagon nac ludz ne; niicle ne winsew, per nroob guielqui ne runa. ¿Ran to ganle tib bzhi yeense name rzobgui dan! ⁶ Ni tel ludz ne gon, rrieequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne brie gabil naca; ni dipse lo xquielmban miech noxtseeb zho low.

⁷ Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no nisdoo, rnabey zho ma. ⁸ Per guiend zha ne gon grieelo gnabey ludz; ncuaane ntseeb naca, choot grielod gnabeya; masaque laaw no par gnitlow miech, zigne run grë guizh ncuuan. ⁹ Lëew name rquiin ne roolnie ne Dios men ne nac Pxoze ne, ni rlozh ga lëëquew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰ ¿Pe ga nadien, ro ne roolnie ne Dios, ni roque ne rgodee ne samiech ne?

¹¹ Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹² Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

Zha ne nixbiini

¹³ Lo grë zha ne nacgrë to i, tel no zha ne rzac zha nixbiini nac zho, none glu zhow inë zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴ Per tel tibaque në rac zdoo zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csannziuu zho zho. ¹⁵ Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu. ¹⁶ Zeene sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga. ¹⁷ Zha ne nli rap guielbiini ne rdeed Dios, rund zho min co, laa zho zienal:

ndzinlise gban zho,

rleynied zho dil,

rguib zho zaacse rnee zho lo miech,

wen rac zho lo grëse miech,
 rquia zdoo zho samiech zho,
 rund zho cue zho zha ne mazdraa gacnie zho,
 ncuaane run zho dib zdoo zho run zhow,
 niapse ncuaane ndzinli rioxco zho.

¹⁸ Zha ne sca rleynie dil, rioxco zho rnee zho lo miech tipse gac zho, tipse gnee zho; scagaa rdziñ dze ne ran zho zeene laa grë miech co rac tib miech wen.

4

Zha ne rleynie guiełntseeb

¹ Ne squi tibaque rlëëlsa to, tibaque quiadił to, lëë min qui gon riegäl por grë guiełntseeb ne rio guic to. ² Rio to riogui to ncuaane grielod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuaane quianiede to, zeene ran to rriyelod yquianie tow laa to rlëënie zho, haxta rdilnie to zho. Rriyelod yquianie to ncuaane racladz to, sacne rnabde tow lo Dios. ³ Niicle tel rnabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

⁴ ¿Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guiełntseeb? Sac miech ne squitaa rleynie guiełntseeb, lo Dios ga racntseeb zho. ⁵ Golgan ganle, zha rnee lo Xtiidz Dios: “Espíritu Sant, meñ ne pxeel Dios nacie ne, rleynie me ne, ni racladz me zhaa ncuaane gleynie ne laa ne gleynie ne me.”

⁶ Ni tel Dios gon, noxco me ne, ib zacnie me ne griee ne lo guiełntseeb; sca rnee lo Xtiidz me, zaatne rnee: “Zacnieñ Dios grë zha ndooladz, sangue grë zha niats, rdziguiend me zho.”

⁷ Golguien sca, ine ndooladz golgac, golgon mine rnabey Dios. Gdeetraa to diidz yquiił mendox to, sca golgun zeena zhal ma gbiche ma lo to. ⁸ Dib zdoo to golsëeb xnëz Dios, zeena scagaa me zacnie me to. Goltsoxco guiaanmbe to lo grëtaa xtol to, golnab lo me csañmbe me zdoo to, mese gnalo to, gacchopdraa guic to. ⁹ ¿Golguien ganle, ndzinlid i squi mban to! ¿Mban golgac, goltso guiełnë, golgoon, laa ne tso to gzhidz to, laa ne tso to gley to! ¹⁰ ¿Ndooladz golgac lo Dios, zeena cuee me to lo grë ncuaane nac to, csañglaa me to!

¹¹ Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguits zho. Laa ne so zho gacladz zho zha gun guiełwxtis, mazd tsoxco zho gban zho zigne rnabey ley. ¹² Golguien ganle, Dios psan ley, ni mese rieguial gun guiełwxtis, me nan zho cuibdol, chogaa csilaa me; per to nadien, ¿cho nac to par gdziibdol to samiech to?

¹³ Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle. ¹⁴ Ne sca rnee to, ¿pe wen wen nan to dien yo to gzhe widz co! ¿Pe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. ¹⁵ Mazd golguiab: “Telne zneedz Dios diidz gbanraa ne, min rii, min rii dziuun ne.” ¹⁶ Led tsode tibaque guiełniats qui zienie guic to, golguien guiełntseeb ga run zha ne rac niats. ¹⁷ Ni golsoladza ganle: Grëse zha ne nanpaa pe nac ncuaane ndzinli ne no gun zho ni rund zhow, xtol zho ga runctal zho.

5

Zha ricw ne zianał guiełntseeb

¹ ¿Grë zha ne rapchen, zha ne zianał loxaque guiełntseeb, golquiaadiaga ganle! Golgoon, golquiaadan redz niina, sac gon nroob nac guiełnë ne gan to. ² Grë ncuaane beenlo to i, peet nonda, lega naca zig nac grë ncuaane biodzle; grë xab to i, rrieequia ncuaane dowle mxila. ³ Grë guiib or, grë guiib plat ne squitaa quianie to, rrieequia noloozhle biochena; ni scadaa gon nitlo to, masaque gac to zig tib ncuaane riab lo gui.

Laa to beenlo grëtaa dimi qui, rzac to lëew yquuin to len dze ne ziaad, ni nande to gon laa dze ne nitlo to ziaadyoble. ⁴ Lëë grë dimi qui gon zëeb to lo grë zha ne quia xtsiin to, noquidie to zho rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsacsi to zho, laa Dios binlew. ⁵ Lo grëtaa iz ne mban to lo guidzliu rii, loxaque grë ncuaañe gdeed guxt zdoo to, grë ncuaañe gdeed guxt xcuerp to noxco to, ncuaañe yozh ne riaabtaa guic to laa to runa, ib riende to laa dze ne nitlo to ziaadgaxe. ¡Lëë to noyuu xcuent ma ne noro par guet ma! ⁶ Pe zhistaa guielntseeb ne quiaayun to, haxta zha ne peet xtold, zha ne nand glis nia lo miech, rquiaqui to zho ncuaañe rund zho, rnabey to ret zho.

Nodne guieed zha ne rnalo Dios

⁷ Bets, bzian, sangue to gon tiblrique golgac haxta gan to gdziñ dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mëë guie, rquiambëz zho haxta rdziñ dze ne rlaap zho. ⁸ Tiblrique sca golgac. ¡lb guiaand zdoo to, sac gon zhile gdziñ dze ne laa men ndzon ne rnabey ne guiaad stib!

⁹ Ib tsode to guieednie to grë zha ne nacgrë to, zeena gunctalde to xtol to; sac zhile gdziñ dze ne laa men ne no gun guielwxtis guiaad. ¹⁰ Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tiblrique goc zho. ¹¹ Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega rand zhow; sac nquialadz me miech, rquia zdoo me zho. Dichos grë zha ne sca nac.

¹² Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliidgaaw, golguiab: “Nlida”, zeena gunctalde to xtol to; sac gon zha ne runctal xtol, ible zgaa zho guielnë ne csiaab Dios.

¹³ Lo grë to, zha ne no pe tib lo guielnëw, gnab zho lo Dios gacniën me zho. Zha ne no pe tib guielbleya, goolnie zho me. ¹⁴ Zha ne rzacnëgaaw, gnabey zho gacredz bla zha ne zo lo to, zha co quëeb nceit guic zho gnab zho lo Dios guiac zho. ¹⁵ Telne dib zdoo zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beengaa zho lo me sca rzacnë zho, zun me zhow perdon.

¹⁶ Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga golinab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pe rnab zho lo me run mew, niicle ncuaañe mazdraa ngana. ¹⁷ Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz grol ni tib lab nis guie biabd; ¹⁸ haxta bnabrea me lo Dios guiaba stib, dzigora biaba, laa guidzliu biire bdeed guielnzaac.

¹⁹ Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; ²⁰ golgacnan ganle, ladzniale guielgut ga rsilaa zho zho, grëse xtol zha co zun Dios zhow perdon.

Santiagw

GUILTS NE GLO PQUIAA PEDR

Bets, bzian, ¡diuzh to grëse to!

¹ Naa nac Pedr, tib zha ne rxeeļ Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz beņ: zig nac nëz Pont, nëz Galás, nëz Capadós, nëz Asia ni nëz Bitin.

² Dios meņ ne nac Pxoż ne, ible me bzooblo to mazd padzeela, sac nanle me laa to gac xpëed me. Bdziņ dze, zeene laa me pxeel Espíritu Sant bleextso to laa to ngab xnëz me, zeena gban to zigne rnabey me, ni lozh csaņmbe Jesús to; sac ible miņ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

³ Xquizh xquieļnzaac Dios, Pxoż Jesús meņ ndzon ne rnabey ne, sac gon pquia zdoo me ne ptsëe me lo xquieļmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guieļnzaac nroob ne no diidz gneedz me lo ne, ⁴ guieļnzaac cosi ncuaaņe mbe naca, nacda ncuaaņe nitlo, nacda ncuaaņe gdzëelo, ni gbaa ga quianie mew.

⁵ Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guieļnzaac co. Zeene laa dze co gdziņ, zanlo to ganle zeene laa me ycaania to.

⁶ Gacxe waa ine nley golgac. Nli zan to grë pe guieļnë, per ncuaaņe tib rded ga. ⁷ Ib none gan to grë guieļnë, parne ga glu dieņ pe nli dib zdoo to rnalo to Dios. Zig nac guiib or, parne glu dieņ pe nli ora, none teda lo gui; scaquegaa to, none gan to guieļnë parne glu to nli dib zdoo to rnalo to Dios; ni zig nac or, ncuaaņe rnitlo ga. Grëse zha ne tibaque gnalo me, niicle mazdraa guieļnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. ⁸ Me i squitaa rleyne to, me i squitaa rnalo to, niicle ne gonde to me, niicle ne rande to me. Tib guieļbley nrooba lo to, tib guieļbley ndzona, nacda ncuaaņe grieelo gnee to zha naca; ⁹ sac gon, ne squi dib zdoo to rnalo to me, ib scaania me to.

¹⁰ Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dieņ zhapaa gun me. ¹¹ Zeene bdeed zhiEspíritu Jesús guieļbiini lo zho bzeet zho ne ib laa Dios cxeel me, pe nac guieļnë ne ted me, ni pe nac guieļndzon ne guiaadnie me; gocladz zho niacnaņ zho dieņ cho nac meņ co, pa hor gac miņ co. ¹² Nacne blu Dios lo zho gocnaņ zho nacda ncuaaņe gac leņ dze co, sinque haxta nele ygaa dziana. Sanguie niina, nanwen to ganle laa grë miņ co gocle, lëe diidz cub co i gocnaņ to niina, gbaa biet Espíritu Sant bdeed me guieļbiini lo zha ne biadneew lo to. ¡Ncuaaņe ndzona, haxta grë anjl racladz tebaa zha gacnaņraa zho dieņ zha naca!

None gban ne zigne racladz Dios

¹³ Golquix biini xquieļrien to sca. Tiblique golgun guic to ne laa to ygaa grëtaa mine ral zdoo Dios gneedz me lo to, zeene laa Jesús guiaad stib. ¹⁴ Zig grë mëed ne ron xtiidz pxoz, sca nguzobdiidz golgac lo Dios; gundraa to grë ncuaaņ ndzinlid ne been to zeene gard gunbey to me ga. ¹⁵ Goltsoxco golban zigne racladz me, zeena ine mbe guiaaņ to lo dol; sac gon tel me, meņ mbe nac me, nacd me meņ ne rdziguien dol. ¹⁶ Zigne zhobneeque lo Xtiidz me, zaatne rnee: “None guiaaņmbe to lo dol, sac gon meņ mbe nac naa.” ¹⁷ Pxoż to nac me, me rnalo to, nanle to zeene laa me gun guieļwxtis, led yed me cue; mine been tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

¹⁸ Golsoladz me bleet to lo grë wseed ndzinlid ne psan grë xmengol to; nanwen to gozh brieet to ga; per pquiind me ncuaaņe rnitlo zig nac pe dimi or, pe dimi plat; ¹⁹ sinque laa me pquiin xchen ndzon Jesús. Ren ne bzhiee goc zig tib gon, zigne rgogon miech

carner yeen ne mazdraa niow, carner yeen ne mazdraa ndaan parne guiaanwen zho lo Dios. ²⁰ Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me biaad, biaadsanwen me to lo Dios; laa Dios been min co sacne rleynie me to. ²¹ Gacxe waa, zrieelo dib zdoos to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

²² Ni niina ne laa to mban zigne nac Xtiidz Dios, mine nac diidzli, laa zdoos to biaanmbele lo dol; nasi zrieelo gleynie to zha ne nacgré to. Dib zdoos to sca golleynie zho, ²³ golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lëe guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdzind dze nitlo. ²⁴ Zigne zhobneeque low, zaatne rnee:

Grëse ne nac ne miech, dzin dze ne lozh ne,
lega nacse ne zig nac grë guizhye,
grë xquielndaan ne, lega nacsew zig nac guieen guizh co.
Sac tel guizhyew, zeene laaw rbidz, laa guieena rliaaque;

²⁵ sangue Xtiidz Dios, gdzind dze ne nitlow.

Ni lëe diidz co ga gon biadseed zho to, lëew rlu zha laa miech lo grë xtol zho.

2

¹ Nana sca:

gundraa to grë guielntseeb,
yquidiedraa to samiech to,
gundraa to ne laglaase glu to guielwen,
gacned zdoos to gan to cho zha stib noded,
gzhixcuaadraa to diidzguizh.

² Sinque Xtiidz Dios goltsoxco, zeena lozh tsotibli guic to dziits so to low. Zig rzac mëdyeen ne wriin ral, nidzpaar dziladz win guie win; scadaa golsac Xtiidz me, zeena ygaade to grë guielndox ne csiaab me. ³ Laa to gonle ganle zha wentaa zdoos me, Xtiidz me sca goltsoxco.

Jesús nac zig tib quie mban

⁴ Golbig lo Jesús, golgan ganle lëe me nac zig tib quie ne rio squin yu, per tib quie mban. Ib bleynied miech me, sangue Dios, men non, men nziuu nac me lo me. ⁵ Golbig lo me sca, zeena ye to gac quie mban ne tsa xyadoo me. To gac grë pxoz ne nlipaa mbe zdoos, gun to dziin len yadoo co; golban zigne rdziladz Dios, zeena guielmban co gac zig tib gon ne gdeed to lo me, ne nac to zha ne ngab lo Jesús. ⁶ Zigne zhobneeque lo Xtiidz Dios, zaatne znu rnee:

Men ne bzo naa cxel naa Jerusalén,
me gac zig tib quie nroob ne gnaaz dziits xyadoo naa,
ni lëe yadoo co nac grë zha ne ngab lo naa.
Men non nac me, ni grëse zha ne gnalo me, ible csaand naa zho.

⁷ Ne nligaa tib men non nac me lo ne, sangue grë zha ne riladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron zho tib lad zeene quiazaa zho yu,
laaw bron zho sac rzac zho paat rquiinda,
ni niina lëepaaw nac quie ne nlibdziits xcox yu.

⁸ Ni ziaad stib zaatne znu rnee:

Quie co griel ni miech, quie co gron zho.

Grëse zha ne néd gliladz Xtiidz me zaatne rnee cho nac me, scapaa sac zho me, ni ib zhobneeque ne min co yгаа zho.

⁹ Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to brie lo guielcow bzëeb to lo xbiini ndzon me; zeena gnee to lo miech ganle zha nactaa grë ncuane run me. ¹⁰ Glo peet nonde to, sangue niina non to

sac gon lo me ngab to; glo nande to pa lotaa rquia zdo me to, sangue niina rley to ran to ganle squitaa rquia zdo me to.

Tibaque golgun mine racladz Dios

¹¹ Bets, bzian, rleyne naa to. Ndion ne ganle, nacse xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to gre ncuane ndzinlid ne racladz xcuerp to; sac min co rsacsi xalm miech. ¹² Golguien zaacse golgac lo greraa zha ne gard gunbey Dios; niicle ne gneenë zho to niina, sac zho to zig cho gre zha ntseeb, per zeene gan zho ne ndzinli nac gre ncuane run to, haxta zleyne zho Dios gal dze ne laa Jesús guiaadgun guielwxtis.

¹³ Golgon xtiidz grese men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, ¹⁴ zigtagaa gre zha ne nacie me dziina, sac zha run guielwxtis, rdeed zho caxtigw ne rieguial gre zha ntseeb, ni scagaa runnon zho gre miech ne run ncuane rquiin. ¹⁵ Ible laa Dios racladz zaacse gac to, zeena gre zha nxen, gre zha yozh ne riend pe rnee, haxta ni ro zho tsod pe gneenë zho to.

¹⁶ Gollu ne peet lo ngadoodraa to, per guiabde to ne peet lo ngadoodraa to laa to gun gre ncuane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

¹⁷ Zaacse golgac lo gre samiech to, golguien cho lo zo to. Golleyne gre zha ne nacgre to, ndooladz golgac lo Dios, golguien ne men ro nac me; ni scagaa golgon xtiidz gre zha ne nac wxtis nroob.

¹⁸ Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba. ¹⁹ jNley golgac, goldeed xquizh lo Dios, tel porne noyun to mine rnabey me, laa zho rsacsi to! ²⁰ Sac gon, telne nosacsi zho to por xquielntseeb to, niicle paraa cxecw to paat yquiinda; sangue tel rxecw to nosacsi miech to porne noyun to ncuane rdziladz Dios, dzigosi zleyne me to. ²¹ Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielne ne bded me bdiizh me xtol ne. Glo me sca bded, nana negaa ible none sca dieed ne. ²² Tel me ni tib dol beend me, ni tib miech pquidied me. ²³ Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque gresew psan me ladznia Dios, men co gun guielwxtis zigne no gaca.

²⁴ Masaque Jesús bgaadz grese xtol ne, blactaa psacsi zho me pquia me lo cruz bdiizh mew; laa me been min co, zeena grieelo grie ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grese xquielne ne. ²⁵ Glo lega nac to zig nac gre mcwxiiil ne zonziaab, sangue niina mele quianap to. Me nac tib baxtor ne rleyniepaa to.

3

Zha gban zha ne ptsieelniale

¹⁻² Bzian, to ne nac to men wnaa ne ptsieelniale, golgon xtiidz tsiel to. Niicle tel ned zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho. ³ Golguien sca, tsoode to ne goon dien pa xixcuaraa to par gluniow to lo miech; dieen pa xixcuaraa guitsguic to, dieen pe bguiaa or ne yquia diag to, dieen pe gre guiib or tso yan to, tso nia to, dieen pe lar niazh ne gacwraa to. Tsienalde to gre guielniow co, sac gon ncuane laglaase ga; ⁴ sinque none xixcuua zdo to, gac to tib zha tibliladz, tib zha ne ndooladz. Lëe guielniow co nac mine niowraa nëz lo Dios, ni min co gdziind dze nitlo. ⁵ Lëe guielniow co bioxco gre men wnaa ne biaadban padzeela, zha ne brieel lo dol wban zho zigne racladz Dios; tel zha, dib zdo zho bnalo zho Dios, ni bin zho xtiidz tsiel zho. ⁶ Zig nac Sar, sca goc me, bin me xtiidz tsiel me Abraham, haxta reb me masaque Abraham nac men ne rnabey me. Ni scagaa to, telne tsoxco to xixcuua

to, zac to zig goc Sar, dzigosi laa to gac zig xpëed me; haxta ni tsoxtseebde to pe glisqui tsieel to lo to.

⁷ Scaquegaa to bets, ne nac to zha ne ptsieelniale, goltsoxco tsoquic to zha nac tsieel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

⁸ Nana sca, tipse golgac grë to. Ine niowse golleynie zha ne nacgrë to, miech wen, miech ndooladz golgac. ⁹ Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. ¹⁰ Zigne zhobneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho, none tsoxco zho ycuëez zho ro zho, gneenedraa zho, yquidiedraa zho;

¹¹ none csaan zho grëtaa guielntseeb, niapse ncuaan wen tsoxco zho gun zho, yguib zho cuewen miech, niicle zhagaa wen gac zho lo grëse miech.

¹² Sac grë zha ne sca wen rac nëz lo Dios, tibaque quianap me zho, ni rquiaadiag me xtiidz zho tel pe rnab zho lo me; sangue grë zha ntseeb, ni lalnu rdziguiend me ncuaane run zho.

Dichos zha ne mban rded lo samiech

¹³ Golguien sca, ncuaane yquiin golgun; scagaa tsod pe nacne ctsidil miech to. ¹⁴ Laa telne ncuaane yquiinaquegaa noyun to, ni laa miech rtsidil to, jdichos to ga! Ib gdziebde to grë miech guidzliu, niicle peraa gnë zho gun zho to. ¹⁵ Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnal to Jesús; ine niowse golgac, diidz ndooladz golnee lo zho.

¹⁶ Zaacse sca golban, zeena grë zha ne rneenë to porne nac to zha ne no xnëz Jesús, zdiin tib dze ne ctoladz zho, zeene guien zho lega bnexuu zho to. ¹⁷ Wen zie zha ne ran guielnë, telne Dios rnabey gan zhow zeene noyun zho ncuaan wen; lëdle gan zhow por xquielntseeb zho.

¹⁸ Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew; ¹⁹ gane güeyted me zaatne niogyu zhiespíritu grë zha ne wban padzeela, güeynee me lo zho. ²⁰ Lëë grë zha co ib bzhiguield nililadz Xtiidz Dios, niicle ne dipse len dze ne nozaa Noé barcw nroob co pquiambëz Dios niac-wen zho. Nanlaxe to ganle, xonaque nac zha ne bdedlaa lo nis co. ²¹ (Lega rriequia goc nis co zig nis ne rrobnis ne. Zeene rrobnis ne, ga rlu ne laa ne briele lадznia dol, ygaadraa ne guielnëdox ne tsieguial zha ngoopdol, sac gon por mincopaa gut Jesús ni brieaban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsëë me lo xquielmban ne.) ²² Sangue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquiitgzhib zho lo me ni run zho mine rnabey me zho.

4

¹ Golguien ganle, zha nactaa grë guielnë ne bded Jesús bdiizh me xtol ne; nana sca, scaque to gdziebde to golcueeladz to gan to guielnë. Ib rquiin guielnë, sac zha ne no tib lo guielnë, rioguid zho grë ncuaane guntal xtol zho, ² zëëb rguib zho gban zho zigne racladz Dios. ³ Grëtaa ncuaane ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleyne to grë mdio.

⁴ Grë zha co, rien naa rlëë zho ran zho rtsieelsadraa to zho lo grë ncuaane ndzinlid co, gane haxta rneenë zho to. ⁵ Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me mine tsieguial tib tib miech, zigtaa

zha mbana, zigtagaa zha ne gutlew. ⁶ Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nöz lo Dios mban zhiespíritu zho.

Golgacnie zha ne nacgrë to

⁷ Zhile gdzin gdze ne laa grë ncuaane rac lo guidzliu rii nitlo; golquix biini zaacse golban, tibaque golzodiidznie Dios. ⁸ Ine golleynie grë zha ne nacgrë to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoos ne. ⁹ Zha ne guiaad lidz to, goldeed zaatne cuöz zho; ine golcuözlo zho, guieedniede to zho.

¹⁰ Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrë to! Ib ga rquiin guielbiini co bneedz mew lo to.

¹¹ Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiin Dios, ib yquiad zdoos zho none gun zhow dib nacse guielndaan ne rdeed Dios lo zho. Ncuane guntaa to, goltsienie guic to ne laaw gun to par csannon to lë Dios. Ga glu ne xtsiin Jesús quiayun to, men ndzon ne rnabey, men ne gdzind dze gdzë. Sca rieguiala.

¹² Bets, bzian, ne nligaa rleynie naa to. Golsoladz sca, tel pe guielnëta gan to porne no to xnöz Jesús, peet tsienied guic to, sac ib scale no gaca. ¹³ Mazd ine golley; sac gon ye Jesús sca gon guielnë, ni scagaa nroob guielbley ne tso to gal dze ne glu ganle zha nactaa guielndzon ne rap me. ¹⁴ Zeene rgodee miech to, rquiaago zho to loxaque ne no to xnöz Jesús, nley golgac; wen zie to ga, sac gon zhiEspíritu Dios nacie to.

¹⁵ Gueltow sca csaci miech to, telne bgaa to laa to beet, laa to wban, laa to bzëeb lo cuent ne rieguialdraa to, pe stib guelntseeb ne noyunragaa to. ¹⁶ Sangue telne rsaci zho to loxaque ne no to xnöz Jesús, led gueltod ga. Laa ne ctoladz to, goldeed xquizh lo Dios, sac gon tib guielnzaac nroob bgaa to ngab to lo me! ¹⁷ Golgacnan ganle, grëse ne ne nac ne zha ne ngab lo Dios, len dze rii laa ne csilo dzian guielnë. Nana, telne ye zha ne ngab lo me ted guielnë, ¿zha naczhe mine ted grëraa zha ne nëd gliladz Xtiidz me, gal dze ne laa me gun guielwxtis? ¹⁸ Zigne zhobneeque lo Xtiidz me, zaatne rnee: “Niicle zha ne wenle nöz lo Diosa, nroobaque nac guielnë ne ran zho haxta gdzin dze ne ycaania me zho, ¿pe lalgue grë zha ne dzigo racntseeb lo me?” ¹⁹ Gacxe nagon waa, niicle tel pe nactaa guielnë ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

5

Golgon xtiidz zha ne rnabey lo to

¹ Laa niina nagon, laa naa cso choplan diidz lo to, ne nac to zha ne rnabey lo grë zha ne no xnöz Jesús. Ye naa, dziin co nac naa, naa nac tib zha ne gonpaa zha psaci zho Jesús, ni nanpaa naa zгаа naa lo guielndzon ne no me, zaatne rnabey me, gal dze ne laa me guiaad.

² Rso naa diidz lo to gon, zaacse golquianap grë zha ne bgaa to noquianap to. Dib zdoos to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. ³ Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. ⁴ Scagaa, zeene laa men nroob ne quianap ne guiaad, zгаа to lo guielndzon ne gneedz me, lugar co gac tib premio ne gdzind dze lozh lo to.

⁵ To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: “Grë zha niats, rdziguiend Dios zho, sangue grë zha ndooladz, racniën me zho.” ⁶ Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin. ⁷ Tel pe nactaa grë zhizhgab to, grë xliaadz to, ladznia me golsana, sac gon me quianap to, noxco me to.

⁸ ¡Nsin golso lo mendox, sac gon tibaque quiana! ma gnitlo ma ne! Masaque rac ma zig rac grë meedz ne rgobeedz quiaguib ma ne gow. ⁹ Dziits golso gdeete to diidz yquuil ma

to. Tibaque dib zdoo to go¹nalo Dios. Nanle to ganle dipse lo guidzliu, zha ne notaa xnöz me, scaque quiaded zho. ¹⁰Te¹ pe nactaa guie¹ně ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquie¹mban to, gzodziits me to, gun¹tibli me guic to. Me nac men ne bredz ne ygaa ne lo guie¹ndzon ne no me grop me Jesús, guie¹ndzon ne gdzi¹nd dze nitlo. ¹¹Mese nac men ne rnabey grētaa ncuaane no, ni gdzi¹nd dze ne gdzēē me. Nligaa sca nac me.

¹²Laa naa rxe¹l guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guie¹n to ganle pa lotaa noxco Dios to, pa lotaa rleynie me to; zeena tibleque gac to gbichede to lo me.

¹³Grēse zha ne riladz Jesús Babiloin nu, zha ne bzooblo Dios gac xpēēd me zigne bzoobloque me to, laa zho rxeel¹ bdiuzh lo to; scaque Marcw, men ne rzaac naa nu zig tib xpēēd naa, ye me laa me rquiaabdiuzh to. ¹⁴Laa naa rnab lo to, go¹quiaabdiuzh grēse zha ne nacgrē to, ine go¹xen¹ nia zho.

Dios gacnie¹n to peet zhgab ctsebde to, nac to zha ne no xnöz Jesús.

Pedr

BROP GUILTS NE PQUIAA PEDR

Bets, bzian, ¡diuzh to grëse to!

¹ Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnaló men nroob ne zob gbaa, zigne rnalóque no me. Xquizh Jesús men ne rsilaa miech, men ne nac Dios ne rliladz ne, sac gon me gocniën to squi rnaló to me niina; sac mesi mine nonguiel gac, min co run me.

² Zigse zie dze, gołtsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacniënraa me to, parne peet zhgab ctsebe to.

³ Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. ¡Gotsaa gwi ne ganle zha nactaa ncuaañe ro, ncuaañe gzee zdoo ne been me parne gbig ne lo me! ⁴ Ni psañ me diidz pe nac grë ncuaañe ndzon ne gneedz me lo ne. Psañ me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

⁵⁻⁷ Nli laa to rnalole Dios, per parne ygaa to min co, none tsoxco to:

zaacse golban,

gołtsoxco guien to zha nac Dios,

golseed gnabey to xcuerp to,

guieete to,

tibaque gołtsoxco golgun mine racladz Dios,

ine niowse golbannie grë zha ne nacgrë to, golsac zho zig tib menlidz to;

golleynie samiech to.

⁸ Nana, telne tsoxco to znu gban to, dzigosi mazdraa tsoguic to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. ⁹ Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rsoladzd zho zha nactaa lo grë dol ne blee Dios zho.

¹⁰ Bets, bzian, golguien sca, niina ne laa Dios bzooblóle to, laa me bredzle to ngab to lo me, gołtsoxco sca golban, parne guiabde to lo dol stib. ¹¹ Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhial nëz zaatne ted to gdziñ to ga.

¹² Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow. ¹³⁻¹⁴ Laa Jesús men ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; ¹⁵ zeena niicle wbile naa lo guidzliuw, tibaque csoladz tow.

Gonpaa Pedr Jesús

¹⁶ Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me ¹⁷⁻¹⁸ guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: “Lëë Xpëed naa i gon, rleynie naa me, nziuu me lo naa.”

¹⁹ Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiazini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. ²⁰ Per scagaa, racladz naa gacnan to ganle, grieelod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, ²¹ sac gon tel zha co, bneed zho ncuaañe biaabtaa guic zho; sinque laa zho bnee mine bnabey Dios psiaab Espíritu Sant guic zho.

2

*Zha ne rquidie
(Judas 4-13)*

¹ Grë zha ne biadteed Xtiidz Dios padzeela, miñe bnabey me zho min co bnee zho; per briequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zriequia zha ne yquidie lad co. Dzega dzega csilo zho glu zho grë zhiwseed yozh zho, ib guñbeydraa zho meñ ndzon ne rnabey ne, meñ ne psilaa zho lo xtoł zho; per nañd zho zha nactaa guiełnëdox ne ygaa zho, tibaque zeene guieñ zho laa zho nole lo caxtigw co.

² Ndal miech ne greequia tsienal grë ncuaan yozh ne guñ zho, niapse por zha laa grëraa miech csilo gneenë Xtiidz Dios. ³ Zha yozha, laa zho tsienal loxaque dieñ zha guñlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guiełnëdox ne ygaa zho; ⁴ sac Diosi gon, miñe run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me guñquizh zho miñe been zho. ⁵ Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me. ⁶ Scaque leñ dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac miñe tsieguial zho telne csaand zho xquiełntseeb zho. ⁷⁻⁸ Lotse psilaa me, sac bioxco Lot miñe rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guiełyozh noyun zho. ⁹ Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guiełntseeb, ib tedsod zho lo guiełnëdox ne cteed me zho gal dze ne laa me guñ guiełwxtis.

¹⁰ jZig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque grë guiełyozh ne gdeed guxt xcuerp zho. Miech nad, miech niats nac zho, rzhidznie zho miñe rnabey Dios, ni lalnu dzeb guieñd lo zho rdzibdee zho grë meñ non ne no gbaa. ¹¹ Per ni grë anjl, niicle ne zha nroob nac anjl, niicle ne rap anjl poder, per rdziñd anjl lo Dios gdzibdee anjl zho. ¹² Per zha, lo xquiełyozh zho ga, haxta ncuaane rienđ zho zha nac, rdzibdee zho. Lëëdaa grë ma nac zho, tel ma laa ma ralse par ygaa ma nitlo ma; guieñdraa xquiełrien zho, ncuaane racladztaa zho run zho. Per dzziñ dze ne nitlo zho, zigne rnitlodaque grë ma, ¹³ por grëtaa guiełntseeb, grëtaa guiełyozh ne squitaa rley zho run zho haxta zobna ngbidz.

Miech mbixladza, miech ngubeeguiełtow, rquiaalose zho miech wen nac zho zeene riaadsobnie zho to lo zhilni to. ¹⁴ Wnaa ne gantaa zho, pe na gzoobladd zho tsonie zho wnaa co, tibaque quiayunctal zho xtoł zho. Rio zho rquiil zho grë zha ne gard sodziits lo Xtiidz Dios; rienle zho zha gla zho ncuaane rquiin lo zho. Miech ndziibdeele nac zho, ¹⁵ sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëëd meñ ne lë Beor. Tel Balam, haxta miñe nonguełdraa been me par guñ me gan dimi; ¹⁶ per bdziñ tib dze zeene laa Dios blisqui lo me grëtaa ncuaane quiayun me ga. (Bnabey Dios lëëque xpurr Balam bnee, dzigora a bien Balam psaan me xquiełyozh me ga.)

¹⁷ Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. jLaa zho nole guey zho lo guiełcowdoo ne rieguial zho, zaatne gdziñdraa dze gree zho!

¹⁸ Niats rzë xtiidz zho, per ncuaane paat rquiind rnee zho. Miñe mazdraa mban run zho, rio zho lëëque lo grë guiełyozh ne rdeed guxt xcuerp zho rquiil zho grë zha ne pense brie lo dol, rlozh ga rbiire riab zha co lo grë dol co stib. ¹⁹ Rnee zho zac tel zhataa

gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guielyozh ne run zho, lëele grë ncuuan co rnabey lo zho. ²⁰ Tib zha ne sca briele lo grëtaa ncuane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. ²¹ Lëda ga gon, telne gocnanle zho zha racladz Dios gban zho, ni lozh ga csan zho xtiidz me tib lad, gbiire zho tso zho lo grë ncuuan yozh ne been zho glo. Nroobdox caxtigw ne gan zha co, mazd zhi mine ygaa zha ne gocnand zha nac xtiidz me. ²² Zha copaa nagon run mine rnee diidz ne znu rëb: “Nandraaque mëcw, ncuane bdzible ma rbiire ma row maw”; ni stib mine znu rnee: “Ngutszhe, rlozhle raz ma nis mbe, ni rlozh ga riegaaque ma lo nis ben.”

3

¿Zha nacne gard guiaad Jesús?

¹ Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. ² Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

³ Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guielyozh ne gzoobladz zho; ⁴ guiab zho: “¿Pe gliladz ne nazho guiaad Jesús! Telne nli rëb me laa me guiaad, ¿yo me na? Grë xmen gol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

⁵⁻⁶ Squiaalo zho rsoladzd zho zha bnitlole guidzliu tib vult, ni zhagaa nitlo mine no niina. Wen wen nan zho ganle zha bnabey Dios biala guidzliu, me bnabey brieew lo nis, ni masaque lo nis now; mincocxe waa nis bnitlow glo. ⁷ Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielntseeb ted zho caxtigw.

⁸⁻⁹ Zha ne rzac quiayaanladz Jesús diidz ne psan me ga, per led quiayaanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. ¹⁰ Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacesw laaw tsec.

¹¹ Scataa nagon nitlo guidzliu rii, ni grëraa ncuane rdzian ne niina, jgolguien sca golban zigne racladz men ndzon ne rnabey ne, gunctaldraa to xtol to! ¹² Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzinniob dze ne sca gazbel grë ncuane ran ne gbaa, dze ne sca tib guiaalse grë ncuane niaaw. ¹³ Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guielntseeb.

¹⁴ Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me. ¹⁵ Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me, zinee me lo to grë mine none naa nu. ¹⁶ Parga nli no mine rnee me ga, ngan guien ne zha naca; grë zha ne rdziinpaa racladz ctsëë Xtiidz Dios, zeene laa

zho rneew, laa zho rneelew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

¹⁷ Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. ¹⁸ Goltsoxco zig zie dze guienraa to pa lotaa rleynie Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me riegual gunnon miech, zigtaa niinaw, zigtagaa grë izdoo ne ziaadraaw. Sca rieguala.

Pedr

GUILTS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

¹ Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze bиаad me lo guidzliu; grop diag no bdzion no grë mine bnee me, grop lo no bdzion no grë mine been me; sac bdzionpaa no zha rac me, zha rnee me, haxta bzhieen no nia me. ² Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh. Zaatne no Dios men ne nac Pxoze, ga no me; zeene bиаad me lo guidzliu dzigo bdziunbey no me. ³ Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grë ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpëed me. ⁴ Laa naa rnee grë min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

⁵ Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guiend zaatne no me; laa grë dol, masaque naca zig nac guielcow. Ni mincoque gon rnee no lo to. ⁶ Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. ⁷ Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grë ne; ni scagaa, xchen Jesús nac mine csanmbe ne lo grëtaa xtol ne.

⁸ Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne. ⁹ Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sanmbe me ne lo grëtaa guielntseeb ne zidziun ne; sac ible laa Jesús gut par csanmbe me ne. ¹⁰ Telne sca guiab ne rapd ne dol, rriequia dzigo rzoob ne Dios zig tib men ne rquidie; sac tel me, nappaa me grëse ne miech ngoopdol nac ne.

2

¹ Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lëë men co nac Jesús, lo me golbig (tel me ni tib dol rapd me). ² Sac me bded grëtaa guielnë ne riogual ne ndieed ne por grëtaa xtol ne, psanwen me ne lo Dios; me goc zig tib gon ne pcaania Dios gozh grëse xtol ne, ni xtol grëraa miech ne ndxie dibdoose lo guidzliu.

Golleynie samiech to

³ Golgona ganle: Telne run ne grëse mine rnabey Dios, gase rien ne ne nli xnëz me no ne. ⁴ Laa tel zha ne rnee: “Xnëz me no naa”, ni rlozh ga rund zho grë mine rnabey me, rquidie zho ga. ⁵ Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne. ⁶ Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene bиаad me lo guidzliu.

⁷ Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow, ⁸ per rriequia ncuba niina; sac gon zeene bиаad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb nëz lo xbiini Dios.

⁹ Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. ¹⁰ Zha ne rleynie samiech, zha cosi nli lo biini co mban zho, noxtseebd lega tsobe zho, sac rappaa zho pa lo zie zho; ¹¹ sangue zha ne rlëenie

samiech, lo guielcow ga no zho. Masaque nac zho zig zha ne rold lo, niicle zha riend dien pa nöz tsie zho, sac guielcow co quiantse lo zho.

¹² Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to. ¹³ To ne nac to dad, laa naa rxel diidz rii lo to, porne nac to zha ne rliladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rriyelodraa mendox yquiiil ma to. To ne nac to mөөdas, xin yeena laa naa rxel diidz rii lo to, porne nac to zha ne nole xnöz Dios men ne nac Pxoze.

¹⁴ Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquiiil, ¹⁵ golguien, gleyniede to grë ncuaane rap to, gleyniede to grë ncuaan ndzinlid ne rac lo guidzliu rii. Zha ne rleynie grë ncuaan co, nlid rleynie zho Dios men ne nac Pxoze; ¹⁶ sac grëse ncuaane rac lo guidzliu rii (zig nac zha ne zienal ncuaane gdeedguxt xcuerp, zha ne rzoobladz yquianie ncuaane rdziladztaa, zha ne racniats lo samiech), grëse ncuaan co led Diosd rnabeya, sinque lëe mine rzonal grëraa miech lo guidzliu ga. ¹⁷ Ni na tel zig nac guidzliu, zig zie dze laaw quialozh grëw grë ncuaane rleynie miech low; sangue zha ne mban zigne rnabey Dios, laa zho bgaale tib guielmban ne gdzind dze lozh.

Zha ne rlëenie Jesús

¹⁸ Xin yeena, zhile gdzin dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatsidil Xtiidz me; gane ndion no ne laa dze co ziaadgaxle. ¹⁹ Nli ladaque zha ne nacgrë ne briece grë zha co, per nlid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nlid nacgrë zho ne.

²⁰ Sangue to, nacde to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli. ²¹ Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

²² Grë zha ne rnee i nlid lëe Men ne zëeble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca rliladz zho cho nac me, yelee Pxoze me ga rliladz zho. ²³ Sac zha ne rlëenie men ne nac Xpëed Dios, ga rlu ne nlid rliladz zho cho nac Dios; sangue zha ne rxobnen cho nac Xpëed me, zha cosi nli rliladz zho cho nac me. ²⁴ Laa naa rso diidz lo to sca: Goltsienal grë mine pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me. ²⁵ Golsoladz ganle, laa Jesús psanle diidz ne ib zгаа ne tib guielmban ne gdzind dze lozh; lëe guielmban co yгаа grëse zha ne nacie me.

²⁶ Laa naa rzet min rii lo to, sac ne squi no grë zha ne ziaad racladz yquidie to. ²⁷ Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac grëraa ncuaane no gacnan to, ni mesi gon mine nac diidzli min co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

Zha ne nac xpëed Dios

²⁸ Xin yeena, nanle to sca sozite to lo Jesús, sinque tibaque golgacnie me; zeena ine tibililadz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me. ²⁹ Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me mine rieguial zho.

3

¹ Golwi ganle pa lotaa rleynie Dios ne, laa me rneedz diidz laa ne gac mөөd lo me. ¡Ni nligaa tel ne, xpëedle me nac ne! Grëraa miech rliladz zhow, sacne runbeyd zho cho nac me.

² Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. ³ Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaane runctal xtol zho, sac tel Jesús randzed me dol.

⁴ Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho mine rnabey me. ⁵ Per nanle to ganle, laa Jesús baaad lo guidzliu, baaad silaa me miech lo grëtaa xtol zho; ni mesi ni tib dol rapd me. ⁶ Gacxe waa, zha ne nlipaa nacie me, zienal draa zho ncuaane gunctal xtol zho; laa grë zha ne tibaque noyunc tal xtol, gase rlu ne gard guien zho cho nac me, gard gunbey zho me.

⁷ Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdoo, zigne men mbe nac Dios; ⁸ sangue grë zha ne tibaque quiayunc tal xtol, xnëz mendox ga ngab zho; sac tel mendox, desde padzeela tibaque guielntseeb quiayun ma. Ni min co nagon nacne baaadpaa Xpëed Dios lo guidzliu, baaadnitlo me grëtaa ncuaane run ma. ⁹ Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

¹⁰ Nienpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rleynied samiech, led xpëete Dios nac zho; ¹¹ sac gon, desde dze ne psilo bliladz to Xtiidz Dios, bingazh to ib none gleynie ne samiech ne. ¹² Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caín. ¹³ Gacxe waa, bets, bzian, zeene gan to laa grëraa miech rlëenie to, ib tsoode to zhgab guiab to pe nacne sca run zho. ¹⁴ Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rleynied samiech, nëz ne nitlo zho ga zie zho. ¹⁵ Grë zha ne sca rlëenie samiech, rriequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. ¹⁶ Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaane rap zho, gacnie zho samiech zho. ¹⁷ Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiin tib zha ne nacgrë zho, per ib rdeete zho palal pe yquiin zha co. ¿Niacxe na nli rleynie zha co samiech zho ga? ¹⁸ Xin yeena, golgacnan sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

¹⁹ Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me. ²⁰ Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. ²¹ Xin yeena, laa zha ne desde zdoo zho nan zho noguiitsd zho mine rnabey me, scagaa tibliladzse gbig zho lo me; ²² hor cosi ncuaane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuaane rdziladz me. ²³ Ni lëe min rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. ²⁴ Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacie ne.

4

¹ Bets, bzian, zha ne gnë zhiEspiritu Dios nacie zho, goon ye zho quianee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspiritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. ² Parne guien to dien pe nli zhiEspiritu Dios nacie zho, golwi dien zha rzac zho Jesús: Tel zha ne rliladz ne nli zig tib miech goc me baaad me lo guidzliu, ga rlu ne nli zhiEspiritu Dios nacie zho. ³ Laa tel rliladz zho ne nli sca baaad me, nliid dzigo

zhiEspíritu Dios nacie zho; sinque lëele espíritu ne rtsidił Jesús ga nacie zho. Laa to binle ganle ib laa espíritu co guiaad; ni lëele espíritu ntseeb co nacie grë zha ne squi quianzë lo guidzliu niina.

⁴ Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle espíritu ne nacie grë zha ne sca zienal grë wseed yozh ne no lo guidzliu. ⁵ Grë zha co, ncuaane rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleyne grë ncuaan co, zha co rliladz zhiwseed zho. ⁶ Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne ziaadquidie miech.

Rleyne Dios miech

⁷ Bets, bzian, golgotsaa gleyne ne samiech ne, sac gon, tel Dios grëse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpëed Dios nac zho, nli runbey zho me. ⁸ Laa grë zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleyne ne samiech ne. ⁹ Gotsaa gwi ne ganle, pa lotaa rleyne me ne: Tibpaa Xpëed me, ni pxeel me me biaadtizh me xtol ne, zeena ygaa ne tib guielmban ndzon ne gdziñd dze lozh. ¹⁰ Led guiabd ne togo glo miech bleynie Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleyne Dios ne.

¹¹ Bets, bzian, zigne scataa rleyne Dios ne, scaquegaa ne nagon none gleyne ne samiech ne. ¹² Gard tso tib zha ne gan Dios, per zha ne rleyne samiech, me ga nacie zho; ni zigsie zie dze dib zdooraa zho rleyne zho samiech zho.

¹³ Me nac men ne pxeel zhiEspíritu me nacie no, parne glu nacie me no, ni scagaa no nacie no me. ¹⁴ Ni stiba, grop lo no bdziñ no biaad Xpëed me biaadsilaa me miech lo dol; ni min co nonee no lo miech niina. ¹⁵ Grëse zha ne rliladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

¹⁶ Ndion ne ganle nli rleyniedox Dios ne, sac rienpaa ne rleyne me ne, ni rliladz ne zeene rnee me pa lotaa rleyne me ne. Ible niaa me par gleyne me, me rdeed guielbiini lo miech gleyne zho samiech zho, zigne rleyne me zho; gacxe waa, zha ne rleyne samiech, ga rlu nacie zho Dios, ni scagaa me nacie me zho. ¹⁷ Zig nac ne, niina ne laa ne naciele Jesús, zig zie dze laa ne lozh cseed gleyne ne me, ni gleyne ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñ dze ne laa me gun xquielwxtis me; sinque haxta gley ne dzian ne me gal dze co. ¹⁸ Nod pe nacie gdzieb ne me, sac gon ndion ne pa lotaa rleyne me ne. Led yedraa niina pe dzeb ne dzio ne, sac grëse dzeb rbiche zeene rien ne rleyne me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleyne me zho, ni gardgaa guien zho gleyne zho me.

¹⁹ Gotsaa guien sca ganle, nli laa ne rleyne Dios, laa ne rleyne samiech ne, per glo me blu ganle pa lotaa rleyne me ne. ²⁰ Tel zha ne rnee, rleyne zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleyne zho samiech zho, zha ne ranlopaa zho, ¿pe lel Dios dzigo gliladz ne nli rleyne zho, ni nac me men ne rand zho?

²¹ Sac gon, znu nac xtiidz Jesús: Zha ne rleyne Dios, zigne rleyne zho me, scaque none gleyne zho samiech zho. Ni min rii rnabey me dziuun ne.

5

Zac csaan ne ncuaane runctal xtol ne

¹⁻² Grëse zha ne dib zdoo rliladz ne ible lëe Men ne zëeble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleyne ne zho, none guien ne dien pe nli rleyne ne Dios, dien pe nli run ne mine rnabey me. Nac cuent rii, zig nac tib yu miech, zha ne

rleynie pxoz mëéd, scaquegaa rleynie zho mëéd. ³ Sac zeene rleynie ne Dios, zun ne grëse miñe rnabey me. Ni grë miñe rnabey Dios, nacda ncuaañe guiab ne grieelod gun ne; ⁴ sac grëse zha ne nacle xpëéd Dios, totsaque rnalo zho ne Jesús gun xyudar zho, gac-wetraade zho lo grë ncuaañe gunctal xtol zho. ⁵ Golgacnan sca: zha ne dib zdoe rililadz Xpëéd Dios nac Jesús, zrieelo zho csaan zho grëtaa ncuaañe runctal xtol zho.

⁶ Tel ne, ndion ne ni rililadz ne ganle nli Xpëéd Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espíritu Sant nolu ganle ne scaw, ni miñe rnee me diidzliw.

⁷⁻⁸ Gotsaa gwi sca ganle, tson mod rlu cho nac Jesús: Tiba por miñe nolu Espíritu Sant, stiba por miñe blu zeene norobnis me, ni stiba por miñe blu zeene nolozh me. Zigtaa miñe nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpëéd Dios nac me. ⁹ Miñe rnee Dios, none gliladz new. Xtiidz samiech ne name rililadz ne, ¿pe leñ miñe rnee Dios dzigo gliladz ne? ¹⁰ Zha ne gliladz miñe rnee Dios, rriequia rzoob zho me ga zig tib zha ne rquidie; sangue zha ne gliladz miñe rnee me, zien zho ganle nli Xpëéd me nac Jesús. ¹¹ Laa me bneele ganle: zha ne gnalo Xpëéd me, zgaa zho tib guielmban ndzon ne gdziñd dze lozh; sac Xpëédse me rdeed guielmban co. ¹² Gacxe waa, zha ne rnalo Xpëéd me, laa zho bgaale guielmban ndzon co; sangue zha ne rnalod Xpëéd me, gard yгаа zhow.

Bgaale to guielmban ne gdziñd dze lozh

¹³ To ne nac to zha ne rnalole Xpëéd Dios, laa naa rzet miñ rii lo to zeena gacnan to ganle laa to bgaale guielmban ne gdziñdraa dze lozh ga. ¹⁴ Ni scagaa, ndionpaa ne rquiaadiag Dios xtiidz ne, zeene ncuaañe rio zdoe me rnab ne lo me; ¹⁵ ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaañe rnab ne.

¹⁶ Zig nac zeene gan to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon. ¹⁷ Nli grëse guielntseeb dol naca, per no miñe rnitlod miech. ¹⁸ Ni ndion ne ganle, zha ne nacle xpëéd Dios rundraa zho ne lega gunctal zho xtol zho; sac Jesús men ne nac Xpëéd Dios, men co quianap zho, grieelodraa lega pe gun mendox zho.

¹⁹ Zig nac ne, ndionpaa ne xnëz Dios no ne. Nli ndalraa zha ne zianal ncuaañe rnabey mendox, ²⁰ sangue ne, laa Xpëéd Dios biaad bdixbiini me xquielrien ne bdziunbey ne men ne nacpaa Dios. Niinasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdziñd dze lozh.

²¹ Xin yeena, golguien Diosse nac men ne gleyne to; gunde to ne leñ grë ncuaañe no lo guidzliu rii gleyne to, laa ne gleyne to Dios.

Juan

BROP GUILTS NE PQUIAA JUAN

¡Diuzh to grëse to!

¹ Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleyne naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. ² Rleyne no to sacne tibaque nac diidzli ne riladz ne, ni tsod dze ne csaan new.

³ Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

⁴ Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoze ne.

⁵ Bets, bzian, laa naa rnab lo to, goltsoxaa gleyne ne samiech ne. Guiabd ne togo ncub mine rne naa lo to nu gun to; sac gon, lëequew ga bdzion ne zeene psilo bliladz ne Xtiidz Dios. ⁶ Telne nli rleyne ne Dios, dzigo none gban ne zigne rnabey me; gacxe waa, none niowse gban ne, ine gleyne ne samiech ne, sac gon min co rnabey me.

⁷ Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. ⁸ Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblque goltgac, zeena yгаа to grëtaa guienzaac ne no gneedz Dios lo to. ⁹ Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. ¹⁰ Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csannziuu to zho; ¹¹ sac telne sca gun to, rrieequia ye to rleyne grë zhiwseed yozh zho ga.

¹² Ndal grë ncuane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guiebley ne dzio ne grë ne.

¹³ Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

BION GUILTS NE PQUIAA JUAN

¡Diuzh bets!

¹ Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

² Bets, rnab naa lo Dios zigne squi wen mban luu nēz lo me, scaque zaacse grieequia grētaa ncuaañe guñ luu, ni gneedz me guieñdaan lo luu. ³ Ne nlipaa bley naa, zeñe baaad bla zha bets ne nu, bzodiidz zho lo naa squitaa ndzinli mban luu, tibaque noxco luu zianañ luu miñe nac diidzli. ⁴ Ne nligaa, nodraa pe stib conley zdoo naa zigne rleytaa naa zeñe ron naa iñe niowse mban grē zha ne biane naa xtiidz Dios lo, zianañ zho miñe nac diidzli.

⁵ Bets, ziyon naa squitaa tibaque noxco luu ruñ luu xyudar grē zha ne nacgrē ne, ni mazdraa zeñe nac zho zha ne ziaad stib guiedz. ¡Wen ga! ⁶ Squi ndxie grēraa zha ne rliladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeña griee lo gdziñ zho zaatne no tsie zho. Sca rdziladz Dios. ⁷ Sac gon, niapse porne rleynie zho Dios, laa zho brie ziegun zho xtsiñ Jesús, ni ib rziguiel zho ycaania zho ncuaañe rdeed grē miech ne rliladz Xtiidz Dios. ⁸ Miñ co nagon, ib none ne yquiambiaazlo zho, ne none gdeed ncuaañe yquiin zho, zeña dziuun ne xyudar zho ygaaz Xtiidz Dios.

⁹ Pxelle naa tib guits lo grēse zha ne no xnēz Dios i, per zig nac Diótrefes gon, men ne racladz so gnabey lo to i, rond me miñe rnee no. ¹⁰ Gacxe na, telne laa naa guiañ i, dzigo laa naa glisqui lo me dieñ pe nacne quianeenē me no.

Ni tebaa miñcose, na haxta ruñ me ib rbēzlod me grē zha bets, zha bzian ne rlanso i; niicle rdeetegaa me diidz cho gdeed zaatne cuēz zho. Zha ne ruñd miñe racladz me, rbee me zho lad grē zha ne nacgrē zho.

¹¹ Bets, sangue luu gon ib tsianañd luu miñe ruñ grē zha ne sca ruñ guieñtseeb, sinque bioxco güeynañ ncuaañe ndzinli. Sac gon, zha ne ruñ niapse ncuaañe ndzinli, xnēz Dios no zho; laa grē zha ne ruñ ncuaañe ntseeb, gard sēēb zho xnēz Dios.

¹² Zig nac Demetr, grēse miech rnee ganle zaacse mban Demetr. Ni rlugaa nliw, sac gon tibaque zianañ me miñe nac diidzli. Niicle nogaaw, miñcoque rnee no, ni nañ luu ganle led yed no rquidie.

¹³ Ndalraa ncuaañe no gne naa lo luu, per racladz naa gzodiidz naaw lo luu lo guits rii; ¹⁴ sac laa guic naa no guialgan niob naa luu i, dzigo hor co ziodiiz ne grop ne.

¹⁵ Guiaannie Dios luu sca; peet tsienied guic luu. Grēse xamigw luu zha ne ruñbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nēz qui.

Juan

GUILTS NE PQUIAA JUDAS

¹ Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

² Dios glu ganle pa lotaa rquia zdo me to, pa lotaa rleynie me to, ni pa lotaa noxco me to zeena peet tsienied guic to.

³ Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguie|raaw cso naa diidz lo to, ib gandzede to grë zha ne rtsidil mine rliladz ne. Dios bneedz diidz gocndion new, ne nac ne zha ne briece lo dol bziaab ne xnëz me. ⁴ Sac gon, blalaa zha ne rquiaalo rliladz Dios, ngeets zhlian laa zho bzëëb lad to i. Miech yozha, niapse lo dol no zho, rnee zho zac gun ne ncuaane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

⁵ Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielnë ne noded zho Egipt ga, zha ne briecequia ib bnëd niunbey me, ib gondzed me zho, bnitlo me zho. ⁶ Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdzin dze ne laa me gun guielwxtis. ⁷ Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdraa guieltsieel, tel chotaa pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquie|ntseeb, no tib lo guidox ne gdzind dze guiuu, ni ga nitlo zho. ⁸ Ni zha ne gon blanso lo to i, scadaa run zho; sac tel zha, niapse guelyozh zianal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. ⁹ Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: “iDios nac men ne gunquizh luu mine run luu i!” ¹⁰ Laa grë zha qui, haxta grë ncuaane run Dios, ncuaane ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuaane rdeedtaa guxt xcuerp zho; lëëque zha nonitlo zho ga. ¹¹ iProbsaxe zho! Sac gon, nëz ne zey Caín ga zianal zho. Lo guielblë dimi, laa zho briece xnëz Dios zigne briece Balam; ni zigne gut Coré zeene gocntseeb me lo Moisés, scaque nitlo zho.

¹² Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guiend lo zho. Nëzrii nëzrec quianzë zho, masaque nac zho zig nac xcow ne ziaadnie nisguie, loxaque nëzrii nëzrec rienie mew; zig nac tib yag bgoöl ne guiend nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliadzle dib lo; sac tel yag bidza, gdzindraa dze ne yguiaw. ¹³ Zigne nëzrii nëzrec rchoon nisdoo grë mtsiin beed ne ndziib low, scadaa nëzrii nëzrec nolu grë ncuaane mbeeguie|to ne quiayun zho. Laa zho ziele nëz lo guielcowdoo ne rieguial zho, zaatne gdzindraa dze griece zho; zig tib mel gbaa ne bnitnëzle, laa ma nonziaabse lo guielcow.

¹⁴ Lëële zha qui ga bzeet Enoc (men ne briecequia lo dii ne rac xoop xtii Adán), zeene psiaab Dios guic me, rëb me: “Golwi ganle laa Dios ziaad, pe zhidaa grë anjl ne ziaadnie me, ¹⁵ ziaadgun me guielwxtis. Grëse miech ntseeb, laa me gunquizh zho grëtaa dol ne been zho, grëtaa diidz dox ne briece ro zho bneenë zho me.” ¹⁶ Ni nligaa sca nac grë zha qui, ib nod ncuaane tso zho conform, tibaque wlisqui no zho; laa zho zianal grëtaa guelyozh, ncuaane racladztaa xcuerp zho. Rto zho guieldzin, rlozhd dieen pa rac zho,

rio zho pe diidz wen ne rnee zho lo miech, loxaque ne dien zha yquidie zho miech, gun zho miñe racladz zho.

Laa naa rso diidz lo to

¹⁷ Sangue to bets, bzian, gołsoladz miñe bnee grë zha ne pxeel Jesús bnee Xtiidz me, zeene biadseed zho to; ¹⁸ led znu rnee zho: “Zeeñe zhile gdziñ dze ne laa guidzliu rii nitlo, zrieequia grë miech ntseeb ne gzhidznie zhiwseed Jesús, laa zho gban zigne nactaa grë zhgab yozh ne guiab guic zho.” ¹⁹ Ni nligaa ran to niina ganle sca quiayaca, lëë grë zha co i squi nogodil grë zha ne no xnëz Jesús. Nacnied zho Espíritu Sant, gane niapse grë ncuaane dol ne racladz xcuerp zho, miñ co run zho.

²⁰ Bets, bzian, gołguien sca tibaque dziits gołso lo Xtiidz Dios miñe rliladz to. Gołzodiidznie Dios, zigne csiaab Espíritu Sant zdoo to. ²¹ Sozite to lo Dios, gołguien ganle zha rleynietaa me to; gołquiambëz dzian ne gal dze ne yгаа ne guielmban ne gdziñd dze lozh, miñe ndionpaa ne gneedz Jesús men ne rnabey ne, porne rquia zdoo me ne.

²² Tel cho zha ne racchop guic lo Xtiidz Dios, gołnee lo zho biire sodziits zho stib. ²³ Zha ne bii no lo dol, gołnee lo zho guien zho csaan zhow; gołcuee zho lo gui ne noxtseeb zho yгаа zho ga; scagaa grëraa miech, gołquia zdoo zho, per ib cxende to lo zho. Ni lalnu gdziguiende to grë dol ne run zho, gołsaca zig rzac to tib ncuaane rbixnë zdoo to ran to.

²⁴⁻²⁵ Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacniñ me to guiabde to lадznia dol stib; zeena ine mbe to, ine rley to laa me gdziñnie to zaatne nac lo guielndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guielrnabey. Tibaque nac me, niicle mazd glow, niicle niinaw, ni gdziñd dze ne gdzëë me.

Judas

MINE BDEED DIOS DIIDZ GON JUAN

¹ Nu raquiet grë ncuaañe ziaadyoble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanj l me bиаad bиаadluw lo ngundziin win ne nac naa nu, parne sca gacnañ zhow. ² Grëse mine gon naa, grëse mine bin naa ga, laaw gne naa zigne gonse naaw, zigne binse naaw. ¡Diidzliw! ³ Dichos grë zha ne glab lo guits rii, ni dichos grë zha ne yquiaadiag grë mine zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grë mine rzeeta nu, ziaadgaxle.

⁴ Naa nac Juan, laa naa rquia guits rii rxel naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios men ne no padzeela, men ne no niina, men ne nacle diidz guiaad, me gacniën to lo grë zhizhgab to, me cchoobladz zdoo to peet tsienied guic to; me ni Espíritu ne zo lo me zaatne nac lo xcan ndzon ne zob me; Espíritu ne rlu zha nac gadz guielbiini ne rap me; ⁵ ni Jesús men ne rnee niapse diidzli, men ne glopaa brieëban lo guielgut, men ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiee xchen me psanmbe me ne lo grëtaa xtol ne, ⁶ tibaque been me ne, psannon me ne; bzooblo me ne gac ne pxoz ne gun dziin lo Dios men ne nac Pxoze me. ¡Mese nac men ne rap guielndzon, mese rap grëtaa guielrnabey! ¡Tsod cho stib zig me, ni gdzind dze ne nitlo xquielrnabey me! Sca nac me.

⁷ ¡Bii zanaque to ganle zeene laa Jesús ziad-zëëb lo xcow! Grëse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, hor co mbanse gac miech, haxta zoon zho, haxta zdieb zho. Ible sca none gaca.

⁸ Znu rnee Dios, men nroob ne rap grëse guielrnabey: “Grëse ncuaañe notaa, naa psilow ni naa csiaala; naa nac zigne nac letr “a” ni letr “z” lo grëse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial stib.”

Gon Juan Jesús

⁹ Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guielnë ne noded to. Zigne rneedz me paciens lo to lëb to lo grëtaa guielnë ne no gan to, scaque racniën me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lëëtaaque no naa lo guidzliu win ne lë Patmos, ga ngoguiu zho naa loxaque ne noseed naa miech Xtiidz Dios, mine bиаadlu Jesús zeene bиаad me lo guidzliu. ¹⁰ Tib dze, lëëtaaque nacie Espíritu Sant naa nozodiidznie naa Dios, tibaque zeene nguiedz zëëb tib tsi men co, pale tsi tib trompet; ¹¹ në me lo naa:

—Grëtaa ncuaañe ran luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nëz Asia: Efés, Smirn, Pérgamo, Tiatir, Sardis, Filadelf, ni Laodicé.

¹² Ptsire lo naa ni naa gwi naa diën cho ga sca rnee lo naa. Zeene bui naa, gon naa gadz candeler niaa niapse guib or. ¹³ Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziña haxta yan ni me, ni ndxie tib cinch niaa niapse guib or ngali ro zdoo me. ¹⁴ Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me. ¹⁵ Ni mew, masaque rquiabniw zigne rquiabni guib brons zeene rlozh riaanmbew, zeene rrieenëzgaaw lo gui; tsi mew, masaque rio bi rnee me zig rio bi grë guibee nroob ne zhoob naal nis. ¹⁶ Nia me mine nëz derech, nzhen me gadz mel gbaa; ni zob tib spad ro me, zigtaa nëz zhits spad cow zigtaa nëz low, gropse nëza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

¹⁷ Zeene gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, në me lo naa:

—;Gdziebd luu! Naa psilo ni naa csiaal, naa psan grëtaa ncuaane no, ni naa gnitlow; ¹⁸ ni mban naa. Nli gut naa per briebaan naa, mban naa niina, ni gdzindraa dze ne guet naa; ladznia naa no guielgut. ;Gdziebd luu sca! ¹⁹ Grëse ncuaane noyan luu nu niina, pquiaaw lo guits grësew, niicle mine noyaclew, mine naragaa gaca. ²⁰ Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

2

Diidz ne bnee Jesús lo zha Efés

¹ Blozh ga në me lo naa:

—Mine gni naa lo luu nu niina, pquiaaw pxeela Efés, lo zha ne quianap grë zha ne ngab xnëz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuelt lo gza gadz candeler ne niaa niapse guiib or ga, rnee me:

² 'Nan naa zha mban to, nan naa pa lotaa noxco to run to xtsin naa, ni nacde to zha ne lega znuse guiaan zdo; stiba, ib randzede to grë zha ntseeb. Grë zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho. ³ Nan naa zha nactaa guielnë ne noded to loxaque ne rliladz to naa; per niicle scaw tibaque dziits zo to, ib riaand zdo to.

⁴ 'Loxaque naca no tib ncuaane glisqui naa lo to: ;Rleyniedraa to naa niina, zigne rleynietaa to naa glo, zeene glopaa bliladz to xtidz naa! ⁵ Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandeler to zaatne zow.

⁶ 'Nli rleyniedraa to naa scataa, per rley naa ran naa ib rdziguiende to grë ncuaane ndzinlid ne run zha Nicolaít, sac tel naa, ni lalnu ib rdziguiend naa ncuaane run zho.

⁷ 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Grëse zha ne gdeete diidz gac-wet zho lo ncuaane gunctal xtol zho, zha co yгаа gow xnex yag ne rdeed guielmban ga, mine zob len huert ndzon ne rap Dios ga.”

Diidz ne bnee Jesús lo zha Smirn

⁸ Blozh ga në me lo naa:

—Pquiaa mine gni naa lo luu nu, pxeela Smirn, lo zha ne quianap grë zha ne ngab xnëz naa ga, gudz lo zho: “Znu nac xtiidz men ne psilo grëtaa ncuaane no, men ne csiaala, men ne gut ga ni brieaban me, rnee me:

⁹ 'Ran naa zha nactaa grë guielnë ne noded to. Ran naa mban rac to guiend grë ncuaane yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grë zha ne rnee i xpëed Dios zho sac zhasi zha Israel nac zho, no zho rneenë zho to; per nlid gon xpëed Dios nac zho, sac zhiwseed mendox zienal zho.

¹⁰ 'Nroob grë guielnë ne ziaadyob gan to, per gdziebde to. Squiil mendox miech, gnab zho tso to ladzguiib; ga nagon glu to dien pe nli dib zdo to rliladz to naa. Nli nzianlaa to guiab ladzguiib, per tib tsiise ngbidz sca yquiaanal zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

¹¹ 'Zha ne rioguicle godiidz rii, yquiaadiag zho ganle zha rnee Espíritu Sant lo zha ne no xnëz naa, rnee me: Zha ne tiblrique tsoxco gun mine rnabey Dios, led yedraa zha co tsoxtseeb guey gabil.”

Diidz ne bnee Jesús lo zha Pérgamo

¹² Blozh ga, nëque me lo naa:

—Miñe gni naa lo luu nu, pquiaaw pxeela Pérgamo, lo zha ne quianap grë zha ne ngab xnëz naa ga, gudz lo zho: “Znu nac xtiidz men ne nzobro tib spad lots ne ndox gropse nëz, rnee me:

¹³’Nanpaa naa masaque mendox rnabey lad guiedz ne no to i, per ran naa tiblque dib zdoo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

¹⁴’Per no chop ncuaane gon glisqui naa lo to: Lëda i run to randze to grë zha ne squi run zigne been Balam, men ne pquiil Balac bloo Balac guic grë zha Israel beenctal zho xtol zho, dow zho xpëel grë ma ne biogon lo mdio, ni pquiangob zho zha ne led tsiæld zho. ¹⁵ Lëe tiba ga, laa stiba, randze to zha ne bii zienal zhiwseed yozh zha nicolaít; tel naa, ni lalnu rdziguiend naa wseed co.

¹⁶’Laa naa rso diidz lo to: golnab perdon, ni golnee lo grë zha co csaan zho grë ncuaane ndzinlid ne run zho; sac gon, telne gond zho diidz, ible zial naa zialtlnie naa zho con spad ne zob ro naa nu.

¹⁷’Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Zha ne gdeete diidz lo grë ncuaane gunctal xtol zho, zded naa guielwagw ne rap naa gbaa yquiin zho; ni zded naa tibga quie nquits lo zho, lo quie co quia lë cub zho, ni zhase gacnan zha nac lë co zho.”

Diidz ne bnee Jesús lo zha Tiatir

¹⁸ Blozh miñ co, në me:

—Ye lo zha ne quianap zha ne no xnëz naa guiedz Tiatir, pxeel diidz rii, gudz lo zho: “Znu nac xtiidz Xpëed Dios, men ne masaque riaazbel bziaalo, men ne masaque rquiabni ni zigne rquiabni guiib brons ne tibaque riar; rnee me:

¹⁹’Nan naa grëse zha mban to; ran naa pa lotaa rleyne to naa, dib zdoo to riladz to cho nac naa, noxco to quiayun to xtsin naa, tiblque rac to dziits zo to lo xtidz naa; ran naa noxcoraa to quiayun to xtsin naa niina.

²⁰’Per no tib ncuaane no glisqui naa lo to: lëda i gon run to randze to wnaa ne lë Jezabel i, rnee me Dios rsiaab guic me grë ncuaane rnee me, per nlida; sac gon, loxaque noquidie me grë zha ne no xnëz naa, noquiil me zho rquiangob zho grë zha ne led tsiæld zho, ni row zho xpëel grë ma ne riogon lo mdio. ²¹ Blactaale pquiambëz naa nab me perdon, ntsëe me lo xquielmban me; per nëd me csaan me grë guielyozh ne run me i.

²²’Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grëse zha ne zienal zhiwseed me, nroob guielnë ne gnabey naa ted zho, tel laa zho csaand grë guielyozh co. ²³ Ni haxta zut naa zho, zeena sca gan grëse miech ne no xnëz naa ganle, naasi nan naa pe rza guic miech, pe rza zdoo zho; gacxe waa, tel pe ncuaane run zho, zdedse naa miñe rieguial zho tib tib zho.

²⁴’Sangue to grë to zha ne zienald guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to. ²⁵ Per none gon tiblque golgac, zeena ine dib zdoo to rnalo to naa gal dze ne laa naa guial stib. ²⁶⁻²⁸ Sac gon, grëse zha ne gdeete diidz lo grë ncuaane gunctal xtol zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grë guiedz. Naa gded guielrnabey co lo zho, zigne bneedz Pxoza naaw lo naa; ni lalnu yquiad zdoo zho, grëse miech ntseeb, zunquizh zho zho grëtaa guielntseeb ne been zho.

²⁹’Grëse zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa!”

3

Diidz ne bnee Jesús lo zha Sardis

¹ Blozh ga, në me:

—Mīne gni naa lo luu nu, pquiaaw pxeela guiedz Sardis, lo zha ne quianap grē zha ne ngab xnēz naa, gudz lo zho: “Znu nac xtiidz men ne nzhen gadz mel gbaa, men ne nacie zhiEspíritu Dios, Espíritu ne rdeed gadz guielbiini, rnee me:

¹’Nan naa gon pe nac grē ncuane run to, niicle zēeb diidz mban to, per par naa miech gutle nac to. ²¡Golcuae zhimcaalo to sca! Golsodziits lo spalalse xtiidz naa mīne rsoladz to, sac gon zhile laa to lozh guiaanladza. Ne nligaa, ran naa quiayunde to xtsiin Dios zig none gaca. ³Golsoladz ganle zha nac grē wseed ne gocnan to, grē wseed ne bin to; dzigo golt sienala, ni golinab lo Dios gon me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzēeb ngbaan lidz.

⁴’Sca nac to, per lo to i gon no bla zha ne bii mbe zdo, sac zienald zho grē ncuane run to; rrieequia rdeete zho diidz guiacbeed xab nquits zho ga. Ni zha co nagon rieguial sēnal zhits naa, sac gop zho xab zho cuidad.

⁵’Golgona ganle, grēse zha ne gdeete diidz lo grē ncuane gunctal xtol zho, scaania zho tib lar nquitsbie gacw zho; lē zhow, lēe quialew lo guits ne quia lē grē zha ne ygaa tib guielmban ndzon ga; haxta zanie naa zho lo Pxoz naa ni lo grē xanj me, guiep naa: Lēe zha rii gon no xnēz naa.

⁶’Zha ne rioguicle grē godiidz rii, yquiaadiag zho ganle zha rnee Espíritu Sant lo grē zha ne ngab xnēz naa.”

Diidz ne bnee Jesús lo zha Filadelf

⁷Blozh ga nē me:

—Mīne gni naa niina, pquiaaw pxeela guiedz Filadelf, lo zha ne quianap grē zha ne ngab xnēz naa, gudz lo zho: “Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

⁸’Nan naa grēse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rliladz to naa. Gacxe waa, rrieequia laa naa rxal tib puert ted to, ni choot grielod csioog puert co. ⁹Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhib zho lo to, zha ne noquidie i rnee zho xnēz naa no zho. Ga gan zho ganle nli rleynie naa to. ¹⁰Ne squi tiblque rac to ron to xtidz naa, peet güeynied guic to niicle pquiana miech to, ible squianaap naa to, gande to guielndox ne gan grē miech ne ndxie lo guidzliu.

¹¹’Golsoladza ganle, merle guial naa. Golguien csaande to xtidz naa mīne nanle to, zeena tsod stib zha ne ctiche mīne rieguial to gnedz naa lo to. ¹²Grēse zha ne gdeete diidz lo grē ncuane gunctal xtol zho, so naa zho gac zho zig grē pilar nroob ne zo len xyadoo ro Dios, ni gdzindraa dze ne grie zho ga; cho pilar co, ga yquia naa lē Dios, ga yquia naa tib lē cub naa. Laa zho ngable guiedz ne rnabey Dios ga; lēe guiedz co nac Jerusalén cub ne gnabey me guiet gbaa.

¹³’Zha ne rioguicle godiidz rii, yquiaadiag zho ganle zha rnee Espíritu Sant lo grē zha ne no xnēz naa.”

Diidz ne bnee Jesús lo zha Laodicé

¹⁴Ni nē me:

—Mīne gni naa niina, pquiaaw pxeela guiedz Laodicé, lo zha ne quianap grē zha ne ngab xnēz naa ga, gudz lo zho: “Men ne rnee niapse diidzli, men ne run grēse mīne rnabey Dios, men ne bzo Dios psan grēse ncuane no, znu nac xtiidz me, rnee me lo to:

¹⁵’Nan naa grēse zha mban to. Ran naa noxcode to grē mīne rnabey naa to, ni niicle rsaandgaa tow; nac to zig nac tib ncuane loxaque ndzēyopse, niicle niagda ni niicle nlēedgaaw. ¡Tebaa nac to zig tib nis yag, zig tib nis lēegaa! ¹⁶Per na gon ne squi nac to zig tib nis ndzēyopse, ni lalnu rdziguiend naa ncuane run to. ¡Zhile gon laa to gunctsib naa!

¹⁷’Rnee to grēse ncuane rquiin to laaw quianiele to, ible peet liaadz racdraa lo to, jni riende to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guien, rrieequia haxta ni lo to roldraa. ¹⁸Laa naa rso diidz lo to: Telne

racladz to nlipaa gapchen to, goltë lo naa, naa cto guiib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo to, naa gnedza, zeena gbiire gan to stib.

¹⁹Grë zha ne rleynie naa, rlisqui naa grë ncuaaane nonguield ne run zho, rteed naa zho tib caxtigw parne cseed zho ndzinli gban zho; gacxe waa golgac ndzinli stib, goltsoxco mine rnabey naa. ²⁰Laa naa quiambëz to gon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sëeb naa, zdeed naa, ni haxta sobnie naa zho diowxtsee no grop no. ²¹Grëse zha ne gdeete diidz lo grë ncuaaane gunctal xtol zho, zded naa diidz sob zho cue naa, zaatne sob naa gnabey naa; zigne zoob naa cue Pxoz naa niina nonabey no; sac tel naa, bdetete naa diidz niun naa mine rnabey mendox.

²²'Zha ne rioguicle godiidz rii, yquiaadiag zho ganle zha rnee Espiritu Sant lo grë zha ne no xnëz naa."

4

Roolnie zho Dios gbaa

¹Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, në me: —Biep, dë nu ganle, zeena glu naa lo luu zha nac grë ncuaaane ziaadyob gac.

²Zigne sca në me, hor co blu Espiritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib men co, ³masaque rbebni me zigne rbebni quie ne rnee zho jasp, quie ne rneegaa zho cornalin. Igoxe xcan co quia tib guitye, rbebniw zigne rbebni quie ne rnee zho smerald; ⁴ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me. ⁵⁻⁶Masaque riab belye, ratsie rnee nguzi, ni zëeb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebela zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. ⁷Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe. ⁸Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëeb tsiw, rneew: jMen ndzondoo nac Dios!

jMen rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

⁹Gza tap bult mban co, roolniew men ne zob lo xcan co, (men ne gdzind dze guet) rsannona me, ni rdeeda xquizh lo me. Zigse sca run gza bult co, ¹⁰scasaque gza galptap mengol ne zob ga, rquiitgzhib me lo men ne zob lo xcan ro co, gzase me, rgob me xcoron me rguix mew nëz lo men ne zob lo xcan co, ni rnee me:

¹¹Luu nac xDios no, luu nac men ne rnabey no.

Luuse nac men ne rieguial dziuunnon no,
ni gnee no grë diidz ndzon lo luu.

Nroob poder ne rap luu, sac grëta ncuaaane no, luu bzaaw;

laaw biao sac ible sca gocladz luu, ni laaw niaagaa niina, sac ible sca racladz luu.

5

Tib guits ne nzhidoo gadz lë cint

¹Zeene bui naa stib, gonpaa naa men ne zob lo xcan ro co, nose tib guits nroob nia derech me. Gropse nëz guits co quia, ndibëdsew, nzhidoo gaw gadz lë cint. ²Ni gon naa tib anjl, tib men macis rlu me, nguiedz zëeb tsi me, bnabdiidz me rëb me:

—jCho rieguial cchug cint ne nzhidoo guits qui, cxal zho low?

³Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

⁴ Mban goc naa, psilo naa nguiedz roon naa, gon naa sca brieequiad tib zha ne rieguial nxaal lo guits co, nlab zho low. ⁵ Dzigoo bnee tib mengol ne zo gax lo xcan co, nē me lo naa:

—Goond luu. Lēz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguiala, sac gon psiaablo me grēse zha ne rlēē lo me; rrieequia nac me zig tib meedz.

⁶ Horco bui naa zaatne nac lo xcan ro co, gon naa glowtaa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspiritu Dios.

⁷ Dzigoo wbig men ne nac Carner yeen co, bnaaz me guits ne no nia derech men ne zob lo xcan ro co. ⁸ Zigne bnaaz me guits co, laa gza bult mban co, ni gza galptap mengol co pquitsgzhil lo me. Tib tib mengol co nzhenne me tib arp ni tib ptsigui or, rso tib gox ndzon len ptsigui co (rrieequia gox co nac grē diidz ndzon ne rnee grē zha ne no xnēz Dios zeene rzodiidznie zho me).

⁹ Dzigoo psilo gza mengol co biil me tib cant cub. Znu rnee lo cant co: ¡Ible luu rieguial ycaania guits qui, luu rieguial cchug gza cint ne nzhidoow i! Sac luu bded grētaa guielnē co psacsi zho luu, haxta bzhiee xchen luu; sca psilaa luu grēlose dii miech, tel pa guiedztaa nac zho, tel pa diidztaa rnee zho, tel pa naciontaa ngab zho.

¹⁰ Laa luu bzhii no grē no gac no tib guiedz cub, guiedz ne gnabey Dios;

no gac pxoz ne gun dziin lo me, masaque tipse gban no zeene gnabey me lo guidzliu.

¹¹ Zeene bui naa, gon naa anjl guizhiu ne ndxie zaatne zo xcan ro co, led zha ne grieelod glab new. ¹² Nguiedz zēēb tsi zho grē zho gza bult mban co, ni grē mengol co, rnee zho: ¡Men non nac men ne nac Carner yeen ne squi rlu beet zho! Me rieguial gnabey, men ro nac me, choot grieelod csiaablo me. Ladznia me no grēse guielnzaac, me rap grētaa guielrien, Men ndzon nac me, me none dziuunnon ne, me none dzioolnie ne.

¹³ Horco grēse miech, grēse ma, grēse ncuane bzaa Dios, zigtaa gbaaw, zigtagaa lo guidzliuw; zigtaa zhan guidzliuw, zigtagaa lo nisdoo; nguiedz zēēb tsi zho, rnee zho: ¡Nliw, men ne zob lo xcan ro qui, ni men ne nac Carner yeen qui, ible rieguial dziuunnon ne grop me! ¡Me rnabey, lo me none gnee ne grētaa diidz ndzon; nadzew, gzhew, ni grēragaa izdoo ne ziaadraaw!

¹⁴ Pquiab gza tap bult co, rēb zho:

—¡Scaw, sca no gaca!

Dzigoo gzase mengol co, laa zho pquitsgzhil lo men ne zob lo xcan ro co; psilo zho rnee zho grē diidz ndzon lo me.

6

Gza gadz sell co

¹ Blozh ga, gonpaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nēw lo naa:

—¡Dē ganle gwi luu!

² Dzigoo wbig naa, gon naa tib guay nquits. Zhits guay co zob tib men co nzen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me brie. Ine zob nzē me lad guay co, laa me zie ziegun me gan lo grē zha ne rlēē lo me.

³ Blozh ga, laa men ne nac Carner yeen co pchug stib cint ne nzhidoo guits co. Dzigoo bredz stib bult co naa.

⁴ Dzigo bia naa, gon naa laa stib guay nizhnie brie, zob stib men co lad ma. Blozhse pcaania me tib spad nroob, ni pcaa me diidzbey tsielodi me miech lo guidzliu, zeena gutlsa zho; laa me brie ga, laa me zie.

⁵ Zeene laa men ne nac Carner yeen co pchug bion cint ne nzhidoo guits co, dzigo bredz stib bult co naa, new lo naa:

—jDë ganle gwi luu!

Dzigo gon naa tib guay ngas, scasaque zob stib men co lad ma, nzhen me tib zhiguiib.

⁶ Ni groltaa zaatne zo gza bult mban co, zëeb tsi tib men co, rnee me:

—Tib kiltaa zhobxtil gon ycaa zha ne gon dziin tib dze; tel zhobgaaw, tsontaa kila ycaa zho; sangue nceit ni vin ib ygaald luuw.

⁷ Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

⁸ Horco, zeene bui naa, gon naa tib guay nguets; lad guay co zob tib zha co lë Guielgut; zhiits co nal stib zho lë Gabil. Lo tap lal ne nlë miech ne ndxie lo guidzliu, pcaa grop zha co diidzbey tsiegut zho tib lal grë miech co; zha ne guet lo dil, zha ne guet lo gbin, zha ne guet lo guielguidz, zha ne guetga lo grë ma ntseeb.

⁹ Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grëse zha ne psacsi miech, beet miech zho loxaque ne bnee zho Xtiidz Dios, ni dib zdoo zho bliladz zhow. ¹⁰ Nguiedz zëeb tsi zho rnee zho:

—Luu ne nac luu men nroob ne rnabey, luu ne nac luu men ne rnee niapse diidzli, ¿pa hor dzigo cuedz luu grë miech ne ndxie lo guidzliu, zha ne scataa psacsi no? ¿Pa hor gunquish luu zho grëtaa mine been zho ga?

¹¹ Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me gon guielwxtis.

¹² Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëe zig rludaa ren, sca nizhnie rlu lo mëe; ¹³ grë mel ne ndziib gbaa, masaque bliaal ma lo guidzliu zig rliaal grë guigw yeen zeene rriee medox. ¹⁴ Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaana.

¹⁵ Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguiib, grë zha nroob ne non xtiidz, ni grëragaa miech, niicle grë zha ne run xtsiin bea, niicle grëgaa zha ne run xtsiin zhala, grëse zho biolan, zha ne biolan len grë bliee, zha ne biolangaa len grëraa quie ne no dan; ¹⁶ nguiedz roptsie zho rnee zho lo grë gui co, lo grë quie co:

—jGolliaal lad no, golcolan no, zeena gandraa men ne zob lo xcan ro co no! jGolcolan no, zeena dzian no grëtaa guielnë ne cxeel men ne nac Carner yeen co! ¹⁷ jSac nasi laa dze ro co bdzin! jLaa guielnëdoox co nagon ziaadle! jNcuane lëëbd no low!

7

Zha ne pcuee lo grëse zha Israel

¹ Bded ga, gon naa tap anjl. Lo gza tap lad guidzliu, tibga anjl co zo tib lad nocuëz me me. Wdzeepaaw, per ni tib zhiblag yag rnidraa, niicle lo nisdoo dzese biaca; sac ni palal rriedraa me lo guidzliu.

² Tibaque zeene briequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjel ne pcaa diidzbey ga gon guielqui lo guidzliu ni lo nisdoo) rëb me:

³ —jGolcuëz zniip! Gunde to guielqui lo guidzliu niina, niicle lo nisdoo, niiclegaa grë yaga; sac naraa lozh guoquiaa no xsell xDios ne quia grë zha ne run xtsiin me.

⁴⁻⁸ Zeene blozh pquia sell co quia grë miech co, bin naa lo grë zha ne ziaad lo xti zha Israel, rgaa zho tib gayoo chooptap mil:

Tsiipchop mil zha xtii Judá,
 tsiipchop mil zha xtii Rubén,
 tsiipchop mil zha xtii Gad,
 tsiipchop mil zha xtii Aser,
 tsiipchop mil zha xtii Neftalí,
 tsiipchop mil zha xtii Manasés,
 tsiipchop mil zha xtii Simeón,
 tsiipchop mil zha xtii Leví,
 tsiipchop mil zha xtii Isacar,
 tsiipchop mil zha xtii José,
 stsiipchop mil zha xtii Benjamín.

⁹ Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho; ¹⁰ nguiedz zëeb tsi zho, rnee zho:

Dios, men ne rdziuunbey ne, men ne zob lo xcan ro qui,
 me nac men ne psilaa ne lo grëtaa xtol ne;
 me ni men ne nac Carner yeen qui.

¹¹ Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquitsgzhìb nëz lo xcan co, haxta bzooblo zho lo liu, rdeed zho xquizh lo Dios ¹² rnee zho:

¡Scaw! Luu none dzioolnie no,
 none tibaque gneedz no xquizh lo luu,
 luu rieguial dziuunnon no; sac luu nac xDios no.
 Luu nac nac men ne rienraa, men ne rap poder;
 gacxe waa luu none ycaania grëse diidz ndzon,
 gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

¹³ Dzigo bnabdiidz tib mengol co, në me lo naa:

—¿Pe nan luu sca cho nac grë zha ne nacw lar nquits qui? ¿Pe nan luu pa nëz ziaad zho?

¹⁴ Dzigo rep naa lo me:

—Nand naaw. Bzhiguiel bnëw lo naa.

Nëchaa me:

—Lëë grë zha qui gon bded grëtaa guielnëdox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol. ¹⁵ Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me. Me nac men ne quianap zho grëse zho; ¹⁶ led yedraa niina guet gbin zho, guet nisgaa zho; led yedraa niina ctsuu ngbidz zho, sonëëggaa zho. ¹⁷ Men ne nac Carner yeen ne zo delant lo xcan ro qui, me gdeed ncuane gow zho, ni zigne rienie baxtor xpëcwxiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

8

¹ Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

² Blozh ga, gon naa zeene pcaania gadz anjl ne rzo lo Dios, tibga trompet. ³ Ni brieequia stib anjl nzhen tib ptsigui niaa niapse guiib or. Zigne bdzin me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ctsieel mew grë diidz ne rnee grë miech ne no xnëz Dios zeene rzodiidznie zho Dios. ⁴ Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdzin lo Dios. ⁵ Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguizi, rio bi, riab belye ne, ni bni tib zhodox.

Pcuedz gadz anjl trompet

⁶ Horco laa gza gadz anjl ne pcaania gza gadz trompet co, laa zho nsinle nzheña, parne ycuedz zhow.

⁷ Zeene laa tib anjl co pcuedz zhitrompet zho, hor co psilo bliaal guiequie lo guidzliu ni bliaal guileë notsa ren. Gzoob ne telne glë guidzliu tson lal, dzigo masaque tib lala bnitlo, bnitlo grëse yag, grëse lo guizh nguia ne no low.

⁸ Blozh ga, zeene laa stib anjl co pcuedz xquiib, hor co biab tib ncuaan co nisdoo, masaque rluw zig rlu tib gui nroob ne quiayazbel. Gzoob ne tel glë nisdoo tson lal, bnitlo tib lala, bialow niapse ren zeene laa ncuaan co biab low. ⁹ Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

¹⁰ Loxaque blozh goc min co, laa stib anjl co pcuedzaque xquiib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guiubee, lo grë zhlian ne no lo guidzliu, lo tson lal ne gzoob ne naca, pxin ma tib lala.

¹¹ Grëse nis co goc nlayag, ndal miech ne gut low. Nacne bleelë zho mel co Nlayag.

¹² Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëew, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

¹³ Laa naa nowi, tibaque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiedz zëeb tsi me rnee me:

—jProbsaxe grë miech ne ndxie lo guidzliu! Sac ncuaane ntseebraa gac, zeene laa stson anjl qui ycuedz xquiib me.

9

¹⁻² Zeene laa anjl ne nac zho gaay ga pcuedz xquiib, hor co gon naa laa anjl ne briece gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhal, per nli goxdoo ne briece ga, tib psioogsew zhan gbaa, per ni palal rludraa lo ngbidz.

³ Lo gox co, ga briece tiblo metso bliaal, bioogse ma gdipse lo guidzliu, grëse ma zob xcots ma, zig zob xcots meegu. ⁴ Nacle diidz, peet gund ma grë guizh nguia, grë yag ne zëeb lo guidzliu, sinque laa ma tsie tsiesacsi ma grëse miech ne quiad xbey Dios quia. ⁵ Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csacsi ma zho dipse len gaay mëë. ⁶ Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdzin guielgut lo zho, per lel sozita.

⁷ Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; ⁸ zëeb guitsguic ma zig zëeb guitsguic men wnaa, ni zëeb lay ma zig zëeb lay grë meedz. ⁹ Dipse lad ma ntse tib ncuaan co, rluw zig rlu guib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

¹⁰ Lëëdaa meegu, sca zob xcots grë metso co lo xcol ma, mine yquiaaxcots ma miech dipse len gaay mëë co. ¹¹ Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

¹² Lëë tib guielnë ne gan miech ga, per bii ziaad schopa.

¹³ Gon naa zeene laa anjl ne nac zho xoop ga pcuedz xquiib, hor co bin naa zëeb tsi tib men co lo mezh or ne nac lo pcoog ne zo lo Dios ga. ¹⁴ Zëeb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

¹⁵ Ible bzole gza tap anjl dox co par gun ma guielqui zeene laa dze co, laa hor co gdzin; dzigo nac ne hor co laa ma blaa, parne tsiegun ma miech. Gzoob ne telne gac miech ne

ndxie lo guidzliu tson tant, masaque tib tant zho gnitlo ma. ¹⁶ Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

¹⁷ Gonpaa naa zha rlu grë zhaguiib co zob zho lad grë guay co. Grëse zho quiantse tib lë guiib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rree bel, rree gox, rree zufr ro ma; ¹⁸ lo gza ncuaan ne sca rree ro ma, min co beet lalga miech co.

¹⁹ Lala rap grë guay co xquieIntseeb ma ga nëz ro ma, ni rapaque maw nëz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

²⁰ Niicle scataa nzian miech ne gut, zha ne biaan ib bdiebd zho. Tibaque laa zho no ziegand zho mendox, ziegand zho grë zhindio zho, mdio ne niaa guiib or, mdio ne niaa guiib plat, mdio ne niaa guiib brons, mdio ne niaa quie, mdio ne niaagaa yag; ncuaane randa, ncuaane ronda, ncuaane rzëda, per laa zho no tibaque ziegand zhow. ²¹ Laa zho no quiaayut zho samiech zho, quianab zho pe sac samiech zho, quiangob zho zha ne led tsiield zho, tibaque quianab zho, jni palal zienied guic zho csaan zho grë quieIntseeb co gbig zho lo Dios!

10

Anjl ne nzhen tib libr win

¹ Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rree lo me, lëëdaa lo ngbidz; scasaque ni me, masaque riaazbela. ² Nzhen me tib libr win, nzhialse lo libr co.

Bdziñ me lo guidzliu, bzo me ni derech me lo nisdoo, laa min revés bzo me lo guidzliu. ³ Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

⁴ Laa naa zale yquia naa mine bnee gza nguzi co, tibaque bin naa tsi tib men co gbaa, në me lo naa:

—jCoo, yquiaad luu mine bnee gza nguzi qui! Sac nodne gacnan miecha.

⁵ Dzigo gon naa blis anjl co nia derech me nëz gbaa, ⁶ bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grëtaa ncuaane no low), rëb me:

—Dios zobwi ganle, nasi gon laa dze co bdziñ. ⁷ Grëse mine bnee me lo zha ne biadteed xtiidz me, laaw gac niina zeene laa stib anjl qui ycuedz xquib zho. Grëse mine no guic me gun me ni gocnand miecha, niina laa zho gana.

⁸ Dzigo wbiire bnee men ne zëëb tsi gbaa ga, në me lo naa:

—Güey, bnaaz libr win ne nzhen anjl ne squi zo i.

⁹ Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacnla.

¹⁰ Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennëw. ¹¹ Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuaane ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

11

¹ Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dieñ palal miech ne rie yadoo co riegand zho Dios. Pso me diidz lo naa, në me:

² —Lëëraasi ctiixd luu nëz ley, sac laa lugar co nole ladhnia zha zit; zha gnabeya, zha gnabey guiedz ndzon ne nacchen Dios i; dipse len tson iz grol ne ziaad nu, gun zhow zigne gacladztaa zho. ³ Gane len dze riique laa naa cxel chop zha ne runbeypaa cho nac

naa, tib lar beelze gacw zho, zig racwxab zha ne no guielnë; dipse len tson iz groļ co gnee zho ganle pe nac grë ncuaane ziaadyob gan miech.

⁴ Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu). ⁵ Zeene laa grop zha co bdzin, choot brieelod lega nsacsi zho, sac grëse zha ne wbig gocntseeb lo zho, tib bieese zha co lo bel ne brieer zho. ⁶ Bdeed Dios poder lo zho ycuëz zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grë guielzi ne gnabey zho gan miech.

⁷ Zeene bzase dze ne bnee zho lo miech ga, hor co laa tib madzabdoob brieer len guierdoo co; ntseeb rac ma lo zho. Mbe blëbd zho lo ma, beet ma zho. ⁸⁻⁹ Tson ngbidz groļ goot xcuerp zho groļ len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz ngueets zho, grëse miech ne no dib lo guidzliu gon sca nix zho ga; ¹⁰ dipse lo guidzliu, masaque tib guielbleydoo ne bio miech gza dze co, gon zho laa grop zha co gut, sac nroob benneed zho miech. Lo guielbley co, haxta bioxco miech pe ncuaane bgadlsa zho lo samiech zho.

¹¹ Zeene blozh tson ngbidz groļ co, tibaque zeene laa zhiEspíritu Dios bdeed guielmban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gun zho. ¹² Horco nguiedz zëeb tib tsi men co gbaa, bredz me grop zha co. Gonlo grë miech ne rlëë ran zho ga, masaque no zho tib lo xcow, laa zho bzoquia gbaa; ¹³ loxaque laa zho bzoquia gbaa, zeene laa tib zhodox bni. Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

¹⁴ Sca gan miech stib guielnë co. Lëë bropa ga, per znusaque guiaad stiba. ¹⁵ Sac loxaque blozh ga, zeene gon naa laa stib anjl ne nac zho gadz ga, pcuedzlaque xquuib; hor co nzian tsi men co zëeb gbaa, nguiedz rnee me:
Nasi nagon,

laa Dios gnabey grëse guiedz ne ndxie lo guidzliu, grop me Men ne pxeel me ga.
Mele gnabeya, grëtaa len izdoo ne ziaad.

¹⁶ Psiloque gza galptap mengol ne zob lo xcan ne zo lo Dios ga, pquiitsgzhib zho lo me, haxta bzooblo zho lo liu, rdeed zho xquizh lo me, ¹⁷ rnee zho:

Xquizh xquielnzaac luu,

sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

¹⁸ Grëse guiedz, brieequia zha ne gocntseeb lo luu;

per nasi laa dze bdzin, laa luu glugaa xquielblëë luu lo zho.

Grëse zha ne gutle,

niina laa luu gdeed mine rieguial zho tib tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guielntseeb been,

niinataa laa luu gnitlo zho.

¹⁹ Loxaque blozh sca bnee gza mengol co, zeene laa yadoo ne no Dios gbaa bzhal, nieenpaa guin ne notsow quie lag ne pquia diidz ne psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co nolial, zeene laa tib zhodox bnique.

12

¹ Horco gon naa blu tib ncuaane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëë. ² Rlupaa zoney me mëëd, rquiaadan me redz, laa me rquiale yoob ne gap me xpëed me.

³ Tibaque briequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma. ⁴ Znuse bzieecw ma xcol ma, blaal ma palal mel gbaa lo guidzliu; gzoob ne nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëed me, parne gow ma win.

⁵ Per zigne gol mëed co, znuse bdzin win nëz lo Dios, zaatne zob me rnabey me; tib mëedbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu. ⁶ Horcogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

⁷ Nacne bio tib dil gbaa. Psilo anjl Miguel, grë me grëraa anjl ne nacnie me, bdiñnie me ma ngol co grë ma xanjl dox ma; ⁸ per blëbd ma, benxoon zho ma gbaa. ⁹ Lëë ma ngol co ga nac meel dox ne notaque padzeela, lëë mendox ga, lëë Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanjl dox ma.

¹⁰ Dzigo bin naa, nguiedz zëeb tib tsi men co gbaa, rnee me:

¡Lëew nagon!

¡Nasi laa dze ne ycaaniapaa Dios zha ne ngab lo me, laa dze co bdzin!

Nasi laa me blu poder ne rap me,

nasi laa Men ne pxeel me lo guidzliu ga gnabey lo grëse zha ne ngab lo me.

¡Laa me benxoonle mendox!

Ma ne scataa dze guieel nolisqui dien pe run zho,

nac zho zha ne nacgrë ne.

¹¹ Peet brieelod ma niun ma zho,

sac niapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,

bleeladz zho xquielmban zho, no zho haxta beet miech zho.

¹² ¡Gacxe waa tib guielbley nroob ne rac gbaa niina!

¡Grëse to ne nac to zha ne no gbaa, golley!

¡Per probsaxe grë zha ne no lo guidzliu, sac laa mendox co tsiesacsi zho!

Ntseeb rac ma laa ma zie nëz co,

rien ma riaanndraa nroob dze ne sonlaa ma.

¹³ Zeene gon ma sca bzonëz zho ma lo guidzliu, dzigo ptsidil ma wnaa ne gop mëedbgui co. ¹⁴ Nacne bzoob zho chop xiil me, lëëdaa xiil msidoo; par grieelo xoon me lo ma, guey me dan zit ne nole diidz gan zho me dipse len tson iz grol co. ¹⁵ Gocladz ma nsiloow ma me, blee ma tib nis naal ro ma, pale tib guiubee ro, ¹⁶ per psaand guidzliu me, znuse bzhial low psi grëse nis naal co.

¹⁷ Horco mazdraa blëënie ma me, psilo ma noguib ma zha csacsi ma grëraa zha ne ziaad lo xtii me. Lëë grë zha co zienal mine rnabey Dios, ni rdziebd zho rlu zho xnëz Jesús no zho. ¹⁸ Nacne güey ma, bzo ma ro nisdoo.

13

Briequia chop ma ntseeb

¹ Tibaque zeene gon naa laa tib ma nroob briequia lo nisdoo co, ntseeb niaa ma. Ncuaaane gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. ² Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

³ No tib guic ma no tib mdel nroob, rlu mer niet ma zeene sca goc guic co ma. Min co gon miech, grëse zho psilo zho rleynie zho ma, mine rnabeytaa ma zho, run zhow.

⁴ Horco grëse zho rleynie zho ma nizhnie co, rquiitsgzhib zho lo ma, rdeed zho xquizh lo ma bzo ma ma ntseeb co; scasaque rquiitsgzhib zho lo ma ntseeb co, rnee zho:

—¡Tsodraa stib zha zig luu! ¿Cho dien grieelo tilnie luu?

⁵ Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey ma lo guidzliu dipse len̄ tson̄ iz grōl. ⁶ Nacne psilo ma rneenë ma Dios, rdzibdee ma me, rdzibdee ma grë zha no gbaa ne. ⁷ Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. ⁸ Laa grëraa miech, güey zho güeygan̄ zho ma, lëë grë zha co quiad lë lo xlibr men̄ ne nac Carner yeen̄ ne gut ga. Haxta zeene biao guidzliu no libr co, lo co quia lë grëse zha ne yгаа guielmban ne gdziñd dze lozh.

⁹ Lo grë to ne nac to zha ne rnalo Dios, zha ne no liaadz min̄e none naa nu, gol̄quiaadiag min̄e gne naa nu gan̄le: ¹⁰ Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel̄ zha gut zho to, scaque gut miech zho. Gacbande to sca, sac gon̄ ga glu to nli rnalo to Dios, nli zlëb to tel̄ pe nactaa guielnë ne gan̄ to.

¹¹ Blozh ga, gon̄ naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaane gdzieb ne zeene laa ma roptsie. ¹² Ye ma rap ma poder, squi zo ma ne no mdel nroob co guic rnabey ma tel̄ zha racladz ma; bnabey ma yquitsgzhib grëse miech lo ma co. ¹³ Ncuane gzee zdoo miech run̄ ma, haxta brieelo bnabey ma biet gui gbaa bliaala lo guidzliu. ¹⁴ Ne scataa grë ncuaan̄ ro ne rrieelo ma run̄ ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

¹⁵ Blozh ga, bdeed ma xquielmban mdio co, parne grieelo gneew. Bnabey ma guet grëse zha ne soliaadz yquitsgzhib low, ¹⁶ ni bnabey ma grëse miech güey zho tib bey, yase yquiaaw nia derech zho, yquiaagaaw quia zho; grëse zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run̄ xtsiin̄ beña, zigtagaa zha ne choot rnabeyda. ¹⁷ Zha ne tsod bey co, grieelod gon̄ zho wzi niicle grieelodgaa cto zho; sac bey co rlu cho nac zha ne ngab lo ma, lëë lë ma ga, lëë número co rlu zha lë ma. ¹⁸ Tib lë miech nac número co; xoop gayoo tsongal̄ xoop naca. Zha ne ligier, zha ne niini, zien̄ zho cho nac ma co.

14

Biīl tib gayoo chooptap mil zho

¹ Tibaque zeene gon̄ naa laa men̄ ne nac Xcarner yeen̄ Dios ga zo guic Gui Sión, miech guizhiu ne zonie me ga; lëë grë zha co nac tib gayoo chooptap mil zha ne quia lë me guic ga, grop me Pxoz me. ² Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grë nguzidox, ni bin naa ndal tsi zha co zëëb noyool̄ zho tib cant, rlu niapse arp noyool̄nie zho cant co. ³ Tib cant cuba, laa zho noyool̄a lo men̄ ne zob lo xcan ro co, zaatne zo gza tap bult mban co, zaatne zob grë mengol̄ co. Loxaque tib gayoo chooptap mil zha ne pcuee lad grë miech guidzliu ga, zha cose brieelo pquiab lo cant co. ⁴ Sac zha co ib beenctald xtol̄, rrieequia nac zho zig tib wnaa ne bgaald̄ mgui; tibaque zo zho lo Men̄ ne nac Carner yeen̄ co, zaatne zieetaa me. Masaque nac zho lo Dios, ni lo men̄ ne nac Carner co, zig tib nex ne glopaa riet riogon lo me. ⁵ Biod dze ne nquidie zho, mbe zdoo zho, mbe lo zho nëz lo me.

⁶ Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdziñd dze nitlo ga; laa me ziaad par gnee mew lo grëse miech ne ndxie dipse lo guidzliu. ⁷ Nguiedz zëëb tsi me, rnee me:

—jGol̄guien̄ gol̄gon min̄e rnabey Dios, in̄e gol̄leynie me, sac gon̄ laa dze ne gon̄ me guielwxtis bdzin̄le! In̄e gol̄quitsgzhib lo me, gol̄gan̄ gan̄le me bzaa gbaa, me bzaa guidzliu, me bzaa nisdoo, me psan̄ grëse zaatne rlan nis.

⁸ Zhits anjl co nal̄ stib anjl, nguiedz rnee me:

—jNasi laa guiedz Babiloin nitlo! jGuiedz nroob ne scataa pquiil grëraa guiedz, been̄ grë menguiedz co ncuaan̄ ndzab ne been̄a, pxina guic zho!

⁹ Zhiits co nalaque stib anjl, scaque nguiedz zëëb tsi me, rnee me:

—jGrëse zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw

quia zho, ¹⁰ ib tedsod ye zho ygaa lo grëtaa guie|nëdox ne csiaab Dios! Squi zobwi grë xanj| me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiayazbel tiblo ncuaa|ne rtsuu lë zufr. ¹¹ Dze guieel cso laan ne tsec guidox co, ni palal gapd zho descans ga; sac sca pquiitsgzh|ib zho lo ma ntseeb co, pquiitsgzh|ib zho lo mdio ne niaa zig niaa ma ga, ni pquia zho xbey ma. ¹² ;Ga nagan|le gan grë zha ne ngab lo Dios, zha ne mban zigne rnabey me, zha ne tibl|ique ziana| zhiwseed Jesús, zeena gacmband zho niicle tel pe nactaa grë guie|në ne noyan zho!

¹³ Dzigo bin naa zëeb tib tsi men co gbaa, në me:

—Pquiaa min|e gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Esp|iritu Sant, rnee me:

—Nligaa dichos zho, sac grë guie|në ne bded zho, nataa laaw blozh; nasi laa zho ygaa guie|nzaac nroob ne gdeed Dios lo zho, porne wban zho zigne rnabey me.

¹⁴ Zeene bui naa stib, dzigo laa naa gon|le tib xcow nquits; lo xcow co zob tib men co, rlu me zig rlu Men ne pxeel| Dios ga b|aad lo guidzliu. Zob tib coron or guic me, ni nzhen me tib yaguiits nroob.

¹⁵ Dzigo brie|e tib anjl len yadoo ro ne zob gbaa, nguiedz bnee me rëb me lo men ne zob lo xcow co:

—;Niinaga blooyaguiits grë zhob ne squitaa zëeb lo guidzliu! ;Sac gon| gol-lew, laa dze ne tsasa bdzin|le!

¹⁶ Dzigo pteed men co yaguiits dipse lo guidzliu, ptop me grëse zhob co.

¹⁷ Blozh ga, brie|e stib anjl len yadoo ro co nzhen me tib guiib hoz, rlupaa per nli ndox low.

¹⁸ Loxaque brie|e anjl co, laa anjl ne quianap gui ne ndziib lo pcoog brie|eque; nguiedz bnee me rëb me lo anjl ne nzhen hoz ga:

—;Niinaga pchug grëse mzhiig uv ne squitaa zëeb lo guidzliu, sac gon| laaw gule!

¹⁹⁻²⁰ Horco znuse pteed anjl co hoz lo guidzliu, pchug me grëse mzhiig uv co, güeycodzëe mew tib len pil nroob ne zob tib lad ro guiedz. Ga güeyzëeni zho grë uv co, ptaadz zhow; dzigo ren naaldox ne brie|e zhan pil co, masaque lal ne rzëni miech xoop ngbidz, lal ga wbiig lo ren co igo pil co; tel niaca min|e sëeb tib guay low, zdzi|na haxta zhan cho ro ma. Rrie|equia sca nagon| gac min|e gnabey Dios ted grë zha ntseeb.

15

¹ Tibaque zeene gon| naa, ncuaa|ne ro, ncuaa|ne gzee zdoo ne goc gbaa. Brie|equia gadz anjl, tib tib anjl co tibga guie|në guiaadnie me ted grë miech ne ndxie lo guidzliu; guie|në co lozh cueezhian Dios miech.

² Dzigo gax lo naa gon| naa tib dzoon miech, masaque rquiabni, masaque rna gui zaatne zo zho, nëzrii nëzrec rac lo co, pale lo nisdoo. Lëe grë zha co been| gan, pquiitsgzh|ibd zho lo ma ntseeb co, pquiitsgzh|ibd zho lo zhimdio ma, niicle biodgaa zho xbey ma. Grëse zho tibga xarp Dios nzhen zho, ³ quiayool| zho zig biil| grë zha ne psilaa Moisés Egipt. Rley zho, sac niina laa Xcarner yeen| Dios psilaa zho lo ma ntseeb co; rnee zho:

Dios, luu ne nac luu men ne grësew rrie|elo run|,

ncuaa|ne nroob, ncuaa|ne gzee zdoo miech, nac grë ncuaa|ne run| luu.

Luu nac men ne rnabey,

lo grëse zha ne ngab lo luu, niapse diidzli rnee luu, niapse min|e nonguiel| rnabey luu.

⁴ ;Zha rna zha ne dien| gdzieebd luu?

;Zha rna zha ne gleyd| gool|nie luu?

Sac luuse nac men mbe zdoo, men ne ni tib dol| rapd.

Grëse guiedz ne ndxie lo guidzliu,

zrie|e miech guiaad zho yquiitsgzh|ib zho lo luu;

sac nasi laa luu blu zha run| luu guie|wxtis.

Gadz anjl ne pxeel guielnë lo guidzliu

⁵ Horco gon naa bzhal zaatne nac Lugar Nda len xyadoo Dios gbaa, ⁶ ga brieë gza gadz anjl ne guiaadnie guielnë ne no guiaad lo guidzliu ga. Ine nquitsbie rna xab gza anjl co, haxta rzëëg lada, ndxiega tib cinch or haxta ncaan len zhicw me.

⁷ Dzigo wbig tib bult mban co, bdeeda tibga cop nroob niaa niapse guiib or lo tib tib anjl co; len cop co ga nodzë grëse guielnë ne nac xquielblëë Dios, men ne gdzind dze guet. ⁸ Horco grëse xquielndzon Dios, grëse poder ne rap me, biodzë len yadoo co, rluw zig rlu tib gox; choot brieelodraa nzëëb len yadoo co, haxta blozh gon miech gza gadz guielnë ne güeynie gza anjl co.

16

¹ Dzigo bin naa nguiedz zëëb tib tsi men co len yadoo ro co, bnee me lo gza gadz anjl co, rëb me:

—Goltsie, goltsiexieë gza guielnë ne nac xian Dios i lo guidzliu.

² Dzigo brieë tib anjl co, güey me, güeylaat me xcop me lo guidzliu, hor co grëse zha ne noquitsgzhil lo zhimdio ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

³ Güeyaque stib anjl co, bdzin me blaas me xcop me lo nisdoo, zeene laa ncuuan co bzheë lo nisdoo, grëse nis co biaalo ren ctou; ni stib ma ne no low biaandraa.

⁴ Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacte grëse nis co biaalo ren. ⁵ Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdzind dze gdzëë. Lëew i been luu, squi beenquizh luu grë miech qui mine zëëb zho, ⁶ sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxieë zho xchen grë zha co. Min qui rquiiin zho, guie zho grë ren qui na.

⁷ Zëëbaque tsi stib men co zaatne nac lo pcoog len yadoo co, rnee me:

—Dios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui mine been zho!

⁸ Blozh ga, brieë stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. ⁹ Niicle scale nodzu grë miech co, per ib biablod zho, laa ne nsaan zho xquielntseeb zho, nleynie zho Dios, lel psilo zho rneenë zho me, pe nacte noxeel me grë guielnë co.

¹⁰ Zeene brieë stib anjl co, güey me güeylaat me xcop me zaatne zobnabey ma ntseeb ne brieëquia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho; ¹¹ per niicle scaw, ib psaan zho xquielntseeb zho, lel psilo zho rneenë zho Dios, pe nacte scataa rquia zho yoob, pe nacte scataa quiayaal gdib lad zho.

¹² Zeene laa anjl ne rac zho xoop ga güey, güeylaat me xcop me len guiubee Eufates, hor cogazh wbidz nis naal ne zhoob guiubee ro co. Nacte bio nëz ted grë men ne zobnabey grë guiedz ne ndxie nëz ne rlan ngbidz.

¹³ Horco gon naa tson me yozh, niaaw zig niaa mbiich, tiba brieë ro ma ngol nizhnie co, tiba brieë ro ma ntseeb ne brieëquia lo nisdoo ga, laa stiba brieë ro zha ne noteed xtiidz ma ntseeb co. ¹⁴ Chen mendox nac gza me co, runa grë ncuane nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me mine rieguial tib tib miech.

¹⁵ Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëëb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa glanso, ni lala tib guieltdox ga grieëquia zho.

¹⁶ Dzigo pcaalsa grë zha rnabey co grë xmenguib zho, zaatne rnee zha Israel Armagedón.

¹⁷ Horco güey anjl ne nac zho gadz ga güeylaat me xcop me lo me ne rree lo guidzliu; dzigo bnee tib men co zaatne nac lo zhixcan Dios len yadoo gbaa ga, nguiedz zëeb tsi me rnee me:

—¡Nasi nagon ledaaw blozh bza!

¹⁸ Dzigo psilo nëzrii nëzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min co. ¹⁹ Grë guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson lë goca. Horco beenquish Dios zha Babiloin, grëtaa guieIntseeb ne zëeb zho; psiaabzi me zho por grëtaa zhian ne pquiaa zho me. ²⁰ Grëse guidzliu win ne no lo nisdoo, rludraa dien yow; grë gui glaa, loxaque nëzrii nëzrec bliaala. ²¹ Min co blozh, zeene psilo bliaal tib guiequiedox lad grë miech co, tib tib guieque co nëw maase choo kil. Gon zho scataa noyab guieque co, laa zho noque rdzibdee zho Dios.

17

Zob tib wnaa yozh lad tib ma ntseeb

¹ Lo gza gadz anjl ne sca blaas grë guieIne co lo guidzliu, lad co brie tib me biaad, në me lo naa:

—Dë ganle, zeena glu naa lo luu zha nactaa caxtigw ne yгаа wnaa yozh ne ran luu squi zob lo grëse nis ne no lo guidzliu. ² Lëe wnaa qui pxin guic grëse miech ne no lo guidzliu güeynal zho grëtaa guieyozh ne been me; haxta grë zha rnabey, güeynal min co.

³ Sca nolu Espiritu Sant grë ncuaan co lo naa, dzigo güeynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grë diidz ntseeb ne rneenë ma Dios.

⁴ Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grë guib or, grë quie rbebni, grë quie perl, ngalguiee lad lar co. No tib cop nroob niaa me, niaaw niapse guib or, rreequia leen co nodzë grëtaa guieIntseeb, grëtaa guieyozh ne run me. ⁵ Ni quia bla lan diidz quia me, rneew: “Lëe guiedz nroob ne nac Babiloin nu, guiedz ne nac xniaa grëse wnaa yozh, guiedz ne nac xniaa grëse zha ne run ncuane mbixladz.” Lëe lë me ga, hor coraa bzhoobnen zha nac lë me. ⁶ Dze rwi naa lo me, dzigo gon naa rac me zig rac zha ne rzudz. Nziadox zha ne no xnëz Jesús beet me, rreequia grëtaa ren ne pxiee me ga sca noyun me. Bzee zdoo naa, ni bdzieeb naa gon naa zha rac wnaa co. ⁷ Dzigo nëchaa anjl co lo naa:

—¿Pe nacte rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. ⁸ Padzeela no ma ntseeb co, guieIn ma niinapaa, per zhile laa ma grie leen guierdoo ne nioogyu ma, laa ma grie ga parne diunavez nitlo ma; grë zha ne quid lë lo libr ne zhobnee cho nac zha ne yгаа guieImban ga, seedox zdoo zho zeene gan zho laa ma griequia stib, sac tibaque nan zho gutle ma. ⁹ Wen wen pquiaadiaga ganle: gza gadz guic ma ga, rreequia lëew nac gza gadz gui win ne zob wnaa co zobnabey me. ¹⁰ Ni rreequiaque lëe gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. ¹¹ Lozhse gnabey zha co, laa ma gnabeyaque, ma gac zha rnabey co xon, niicle ne ye le ma ga goc zha co gadz; gataa laa ma nitlo.

¹² Zhoz ma, rreequia lëe stii zha ne gnabey ga, gzase zha co naraa gnabey zho, tipse ycaania zho guieInabey gza zho ma. Zhisaque dze sca gnabey zho, ¹³ dzigo laa gza tsii zha co guiaan diidz gzo zho ma, ma gac zha nroob lo zho. ¹⁴ Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëe grë zha co nac zha ne bzooblo Dios bredz me zho bgab zho xnëz me, ni ib psaand zho me.

¹⁵ Blozh ga, nëchaa anjl co lo naa:

—Lo grëtaa nis ne gon luu sca zob wnaa yozh co, rrieequia lëë nis co nac grëse guiedz, grëse dii miech ne ndxie lo guidzliu. ¹⁶ Per zdziñ dze lëëque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zläënedox zho wnaa co, sanwin zho me, haxta xab me cuee zho, znitlo zho me, sëëg zho me lo gui. ¹⁷ Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse mine bneele me no gac. ¹⁸ Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

18

¹ Blozh ga, gon naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me, ² nguiedz zëëb tsi me rnee me:

—jNasi laa guiedz nroob ne nac Babiloin ga nitlo! jLoxaque mendox yquianzë ga, loxaque grë ma guix, loxaque grë ma mbixladz cuew! ³ Laaw nitlo, sac noquiila grëse miech ne ndxie lo guidzliu, grëse zha ne rnabey, quiayun zho grëtaa guielyozh ne runa. Lo grëtaa guielyozh co quiayun ricwa grëse zha ne run wto; quiaxin grë ncuaan co zho, masaque quiayuna zho zig run nziu.

⁴ Dzigo zëëb stib tsi men co gbaa, rnee me:

—jGrëse to ne nac to miech ne ngab xnëz naa, golgon diidz, golriee guiedz qui! Ib gunde to dol ne quiayuna; zeena ygaade to grëtaa guielnë ne ygaaw, ⁵ sac nroobdox nac grë dol ne quiayuna, telne niaca ncuaane cue monton, rrieequia haxta gbaale rdzin guic monton co; gane ib tedsod zunquizh Diosa grëtaa guielntseeb co.

⁶ Gacxe na grëse mine beena miech, mincoque saca. Grëse tel zha psacsiw miech, chop lalga mine teda. ⁷ Zigne squitaa now lo grëtaa ncuaane racladza; scagaa na guielnedox ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdziñ dze ne tso naa guielnë.”

⁸ Nli squitaa niats raca, per zeene guiaba ladznia guielgut, ladznia gbin, ladznia grëraa guielnë ne gana, tib dzeque lozha. Ni lozh ga, haxta zeca lo gui; min co gnabey Dios teda. jMe nac men ro ne gunquizha grëtaa mine beena! ⁹ Grë zha ne rnabey grë guiedz, zha ne scataa bley been grë guielyozh ne runa; zeene gan zho goxdoo ne rso noyeca, mban gac zho, zoon zho zio zho xquielnëw. ¹⁰ Zdzieb zho gan zho grëtaa guielnë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: “jProbsaxe luu Babiloin, guiedz nroob, guiedz non nac luu! jPa brieë guielnë qui squi znuse nitlo luu!”

¹¹ Grë zha ne run wto dipse lo guidzliu, ye zho zio zho xquielnëw, mban gac zho guienndraa cho si lo zho. ¹² Sac masaque lëëw rzi:

guiib or,
 guiib plat,
 grë quie non,
 grë perl,
 grë lar niazh,
 grë lar sed,
 grë lar nizhnie nlaan,
 grë yag ne nex rlaa,
 grë ncuaane niaa marfil,
 grë ncuaane niaa grë yag wen,
 grë ncuaane niaa guiib,
 grë ncuaane niaa brons,
 grë ncuaane niaa quie mármol,
¹³ grë blad canel,
 grë guizh scuaan,
 grë yaal ne ndzon rlaa,
 grë guizh, grë nceit ne nex rlaa,

grë nziu,
grë nceit,
grë zhobxtil,
grë rin niazh,
grë ma ne rey yo,
grë mëcwxil,
grë carret,

haxta grë miech ne runzhoo dziin lo samiech.

¹⁴ 'Zriequia zha ne guiab lo guiedz co: "¡Bdzinaque dze ne blozh luu, pa sèraa scataa yquianie luu grë ncuane rdziladz luu! ¡Grëtaa ncuane niazh, grëtaa ncuane rap luu, gdziñdraa dze ne gbiire gan luuw!"

¹⁵ 'Grë zha ne run wto ga, zha ne scataa gocricw lo grë wto ne been zho guiedz co, zdieb zho, zit so zho gan zho grëtaa guieñe ne nodeda. Zio zho xquieñew, haxta zoon zho ¹⁶⁻¹⁷ guiab zho: "¡Probsaxe guiedz ro qui, squi znuse bnitlow! Biopaa dze goconna, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guieb or, grë quie non, grë quie perl, rio yan, rio yan nia."

'Grë zha ne rnabey barcw, grë zha ne rsëew, zha ne no leña, ni grëragaa zha ne run dziin lo nisdoo, zit so zho gan zho tsec guiedz co; ¹⁸ zeene gan zho goxdoo ne rso noyeca, ziaab zho: "¡Zha rnaraa dze ne dzian ne stib guiedz nroob zig guiedz qui?" ¹⁹ Mban gac zho, zio zho xquieñew, zoon zho, squiaadan zho redz, guiab zho: "¡Probsaxe guiedz ro qui squi znuse bnitlow! Lo grëtaa dimi ne pquianiew, blactaa beenricwa ne grë ne grëraa zha ne run dziin rii."

²⁰ 'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gon ga gunquizh Dios miech ne no ga grëtaa mine been zho to.

²¹ Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdziñdraa dze ne gbiire gan miecha.

²² Masaque nroobladzdoo ne raca niina, loxaque di noyac grë ro xnëza, zaatne noyool zho vihuel, zaatne noyool zho bzie, zaatne nocuedzga zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozoo zho zhob; per gal dze co grësew lozh. ²³ Squitaa biini ne rquiaw niina, squitaa tibaque quiayac guieñe sieela, per gal dze co ncowse gnaw, pa sèraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunicwa grë zha ne run wto por grë wseed co; ²⁴ pe zhidaa miech zëeba. Nzian zha ne ngab lo Dios, nzian zha ne riadteed xtiidz me, rnabeya ret zho.

19

¹ Zeene blozh ga, bin naa zëeb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder,

me nac men ne rieguial dziuunnon ne;

² sac gon mesi run me guieñwxtis zigne no gaca.

Gacxe waa, sca gunquizh me guiedz qui grëtaa guieyozh ne noyuna, grëtaa xchen zha ne ngab lo me, zha ne bnabeya gut;

rriequia naca zig tib wnaa yozh,

quiayungüeta miech quiayunctal zho xtol zho.

³ Blozh ga, biire bin naa tsi zho, rnee zho:

¡Zha ndzontaa Dios! ¡Min qui nagon rieguiala, gdziñd dze ne lozh csow gox!

⁴ Horco laa gza galptap mengol co, ni gza tap bult mban co pquitsgzhib lo Dios lo xcan ne zob me ga, haxta bzooblo zho lo liu, beennon zho me, rnee zho: “¡Nliw! ¡Luuse nac men ne ndzon!”

⁵ Zëëbaque stib tsi men co zaatne nac lo xcan co, rnee me:

¡Grëse to ne nac to zha ne quiayun dziin lo me,

zha ne rien men non nac me,

zigtaa zha wina, zigtagaa zha nona, golgoolnie me!

⁶ Dzigo wbiire bin naa tsi grë miech guizhiu co nëz gbaa, rio bi zëëb tsi zho, pale zeene rio bi nisdoo, zeene riogaa bi rnee grë nguzidox, rnee zho:

¡Golgotsaa dzioolnie ne me!

¡Me nac xDios ne, me nac men nroob ne rnabey!

⁷ Golgotsaa gley ne, golgotsaa dziuunnon ne me,

sac gon laa dze bdzin laa Carner yeen ne nac Xpëed me ga ctsieelnia;

grë zha ne ngab lo me,

zha ne rrieequia nac ndzooop ne ctsieelnia Carner yeen co, laa zho nacwxable.

⁸ Masaque rlu zho zig tib ndzooop ne ctsieelnia,

ine nquitsbie, ine rbebni lar niazh ne nacw zho;

me bdeed diidz got zho lar co,

ga rlu ganle mban zho zigne racladz me.

⁹ Dzigo rneecha anjl ne sca bron quie co lo nis:

—Wen zie grë zha ne bredz Dios tsie lo xquieltsieel men ne nac Carner yeen co.

Bnabey me naa pquia naa diidz co, blozhse ga, nëchaa me lo naa:

—Xtiidz Dios ga gon, me rneew.

¹⁰ Horco pquitsgzhib naa lo anjl co ni naa gunnon naa me, per bzhiguield me.

—¡Cool! —në me lo naa—. ¡Guso il! Gocnan ganle ye naa tib ngundziinse nac naa lo Dios, nac naa zigne nacaque luu grë luu grëraa zha ne squi noxco zienal mine nac zhiwseed Jesús. Dios none gunnon luu, sac gon tib ngundziinse nac naa bzet naa min co, lëe gdb bne naa ganle zha nac xtiidz Jesús.

¹¹ Dzigo hor co gon naa bzhial zhan gbaa, ga briequia tib men co zob me lad tib guay nquits, zëëb diidz niapse diidzli rnee me, sac run me guielwxtis zigne no gaca, ni rdilnie me zha ne rieguial tilnie me. ¹² Masaque rbebel bziaalo me, nzian xcuaa coron zob guic me, ni quia stib lë me quia me, loxaque mese nan dien zha nac lë co me. ¹³ Rnadraa xab me di ren, lëe me ga rnee zho: Xtiidz Dios. ¹⁴ Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co. ¹⁵ Rlu choot grieelod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quiitsd mine gnabey me; zeene laa me gunquizh miech grë xquielntseeb zho, cxeel me zhian ne csiaab Dios ygaa zho, zun me zho zigne run miech uv zeene rzëeni zhow. ¹⁶ Lad lar ne nacw me ga, ni tib cho cor me, ga quia cho nac me, rneew: “LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY.”

¹⁷ Blozh ga gon naa zo tib anjl lo ngbidz, nguiedz zëëb tsi me rbedz me grëse maxiil ne row grë magut, rnee me:

—¡Ligier golcaalsa! ¡Goltë zeena yquiin to guielwagw ne gneedz Dios lo to niina!

¹⁸ Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëëb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

¹⁹ Dzigo gon naa ma nroob ne briequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me. ²⁰ Lo dil co, ga bgaa ma nroob co, ni bgaa zha ne pteed xtiidz ma lo

miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr. ²¹ Laa grëraa zha ne scataa gocnie ma ga, grëse zho gut lo spad ne nzobro men ne zob lad guay nquits co, hor co bdziñbe grëse maxiil ne row magut, güeytow ma grëse ngutoo co haxta biel ma.

20

Bnabey Jesús tib mil iz

¹ Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden. ² Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; ³ con liow ne nzhen me ga pxal me tib ro guierdoo, psëeb me ma len guierdoo co. Blozh ga dziits dziits psioog mew, zeena grieelod griee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no griee ga, sonlaa ma zniip.

⁴ Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguield nquitsgzhil lo ma ngol ne briequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brieaban zho grëse zho, par gbannie zho Jesús, gnabey me grë me zho dipse len tib mil iz.

⁵ Lëe grë zha co nac miech ne glopaa grieeban, laa grëraa mengut, zha co grieeban zeene laa tib mil iz co gza. ⁶ Dichos grë zha ne glo grieeban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gon zho dziin, gac zho zig tib pxoz lo me; tipse gnabey me grë me zho len tib mil iz co.

⁷ Zeene blozh tib mil iz co, dzigo gon naa laa mendox brie zaatne niogyu ma ga, ⁸ güey ma güeyquidie ma zha Gog, güeyquidie ma zha Magog, grëse guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, gon ne cuent yuzh ne ndxie ro nisdoo, ⁹ ntseeb rac zho, grëse zho laa zho bdziñ zaatne ndxie guiedz ne rlynie Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëega zho grëse zho. ¹⁰ Laa mendox, bnabey me bga ma bey ma lo guidox ne nac gabil, zaatne nole ma ngol ne sca briequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze gueil, gdzindraa dze ne griee ma ga; caxtigwdox ne ted ma.

Beenquizh Dios miech mine been zho

¹¹ Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdzield pa niolana lo me. ¹² Grëse zha ne brieband glo ga, zigtaa zha nona, zigtaa zha wina, laa zho bdziñ lo me. Laa zho ndxie ga, zeene laa lo bla libr co bzhal, ni bzhalaque lo mine quia lë zha ne bga gueilmban cub ne rdeed Dios ga; hor co bgaase zho mine rieguial zho tib tib zho tel zha zhobnee lo libr co wban zho. ¹³ Grëse zha ne biaan len nisdoo, bliequia nisdoo zho, grë zha ne bioliu bliequia baa zho; grëse zho bliequia guielgut zho. ¹⁴⁻¹⁵ Blozh ga, zigtaa guielguta, zigtaa zha ne quiad lë len libr ne no lë zha ne bga gueilmban ga, laa zho biobe lo guidox ne nac gabil; lëe guielgut brop ga.

21

¹ Dzigo gon naa tib gbaa cub, ni tib guidzliu cub; sac zigtaa gbaa ne rdziunbey ne, zigtaa guidzliuw, zigtagaa nisdoo grësew bnitlo. ² Grop lo naa gon naa laa Jerusalén, guiedz ne nacchen Dios ga, ziad-zëeb zhan gbaa brieew zaatne zob me; tib guiedz cuba.

Tib guiedz nzhixcuaa naca, pale tib ndzooop nguieg dze ne rtsieelnia zho. ³ Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zanlo zho me, peet gunfaltraade lo zho. ⁴ Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuaan co, gdzindraa dze gan zhow.

⁵ Zëeb tsi men ne zob lo xcan co, rnee me:

—Grëse ncuaane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. ⁶ Lëew nagon, grëse mine no gac, laaw blozh ben naa! Naa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

’Zha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda! ⁷ Ni golgacnan ganle, grëse zha ne gdeete diidz lo grë ncuaane gunctal xtol zho, ible zгаа zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa. ⁸ Sangue grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

Guiedz ne gdzin zha ne ngab lo Dios

⁹ Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzooop nguieg ne gac tsieel men ne nac Xcarner yeen Dios i.

¹⁰ Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa. ¹¹ Masaque rbebela guielndzon ne rap me, lëedaa grë quie niazh ne lë jasp, ni rol rnaw lëedaa grë vidr. ¹² Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. ¹³ Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz. ¹⁴ Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

¹⁵⁻¹⁶ Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne zioola lalga nzhena, ni lalgaque glaaw; ¹⁷ laa xquielnaal biedz co nzhena lal ne rгаа tsiipchop docen dzit nia ne; ptiix mew zigne rtiixaque ne nac ne miech.

¹⁸ Niapse guiib or niaa guiedz co, zigne rne naa ga, rol rnaw lëedaa vidr. ¹⁹⁻²⁰ Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lë jasp,
tiba ngalguiee quie niazh ne lë zafir,
tiba ngalguiee quie niazh ne lë ágata,
tiba ngalguiee quie niazh ne lë smerald,
tiba ngalguiee quie niazh ne lë ónice,
tiba ngalguiee quie niazh ne lë cornalin,
tiba ngalguiee quie niazh ne lë crisólito,
tiba ngalguiee quie niazh ne lë beril,

tiba ngalguiee quie niazh ne lë topás,
 tiba ngalguiee quie niazh ne lë crisoprás,
 tiba ngalguiee quie niazh ne lë jacint,
 tiba ngalguiee quie niazh ne lë amatist.

²¹ Gza tsiipchop puert ne quiaw ga, tibga quie perl niaa tib tib puert co; nëzyu ne rded groļ guiedz co, niapse guiib or niaaw, masaque mbe roļ rnaw.

²² Ni tib yadoo gonđ naa, sac dipse lad guiedz co rleynie zho Dios, rleynie zho men ne nac Xcarner yeen me. ²³ Led yedraa ga rquiin xbiini ngbidz, rquiin xbiini mëë, sac masaque xquieļndzon me, ni xquieļndzon men ne nac Xcarner yeen me ga nac biini.

²⁴ Grëse miech ne ngab lo me, ine gziini biini co lo zho së zho lad guiedz co; zha ne bnabey grë guiedz ne bre lo guidzliu, bio dze zha goc zha non, per zeene gdziņ zho ga ye zho zunnon zho me. ²⁵ Led yedraa ga ycow liu, tibaque niini gnaw, tibaque gzhial gza xpuerta. ²⁶ Grëse ncuaane mbe ne gocnon lo grë guiedz ne bre lo guidzliu, laaw gdziņ ga; ²⁷ sangue grë ncuaane mbixladz gdziņda ga. Zig nac grë miech ne run grë guieļntseeb, grë zha ne tibaque noquidie, gdziņd zhow; loxaque zha ne zhoob lë leņ xlibr men ne nac Carner yeen co (libr ne no lë zha ne yгаа guieļmban cub ne gdeed Dios ga), zha cose gdziņa.

22

¹ Blozh ga, blu anjl co tib guiubee lo naa, në me zha ne quie nis co, zgaa zho guieļmban; mbe roļ rnaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co, ² rdeda groļtaa nëzyu ne rded leņ guiedz co. Gropse nëz ro guiubee co zëëb yag ne rdeed guieļmban, gzobse mëë rquia nex low, tsiipchop vuelt rdeeda nex tib leņ iz, haxta ye zhiblaga rquiin grë zha ne no ga, parne sacnëd zho. ³ Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grëse miech ne ngab lo me, rleynie zho me runnon zho me. ⁴ Raņlo zho me, grëse zho quia lë me quia zho. ⁵ Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziņdraa dze ne gree zho ga.

Ile ziaad Jesús

⁶ Dzigo nëchaa anjl co lo naa:

—Grëse ncuaane quiayan luu nu, ible ncuaane no gaca. Bui ganle Dios men ne rdeed guieļbiini lo grë zha ne rieteed xtiidz me lo miech, rnee zho ncuaane naraa gac, mezhal pxeel xanjl me ziadnee lo luu, zeena gacnan grëse zha ne ngab lo me ziaadyoble gac grë ncuaan rii. ⁷ Ible nacle xtiidz men ne rnabey ne, zhile laa me guiaad. ¡Dichos grë zha ne gliladz grë mine noxobnen Dios nu!

⁸ Grop lo naa gon naa grë ncuaan rii, naazhal bin znu bnee anjl co. Nacne pquuitsgzhib naa lo me ni naa gunnon naa me; ⁹ dzigo nëchaa me lo naa:

—Guso i, rieguiald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grë luu grë zha ne noteed xtiidz men ne rnabey ne lo miech, ni grëraa zha ne gliladz mine noxobnen me nu. Me none gunnon luu.

¹⁰ Blozh ga, nëchaa me:

—Bien, grëse mine quiayan luu nu, yqueetsd luuw, sac zhile gdziņ dze ne gaca. ¹¹ Lo spalalse dze ne riaaņ niina, grë zha ne noyun guieļntseeb, telne racladz zho mazdraa guieļntseeb ne gun zho, maase gun zhow; zha ne runгаа guieļyozh, telne mincotaa rleynie zho, maase gunraa zhow. Sangue grë zha ne noxco gun mine rnabey Dios, none tsoxcoraa zhow; zha ne ngablegaa lo me, none gunraa zho mine racladz me, gbiched zho lo me.

¹² Horco bin naa tsi men ne nac Carner yeen co, në me:

—Psoladza sca gon, ible ziaļniob naa; zeene laa naa guial, hor co gded naa mine rieguial tib tib miech, tel zha wban zho. ¹³ Notaque naa, zig nac grë ncuaan rii naa psilow ni naa csiaala; nac naa zig nac letr “a” ni letr “z” lo grë letr, “a” rsilow, “z” riala. ¹⁴ Dichos

grë zha ne noxco guiaanmbe zho nëz lo Dios, sac rreequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga. ¹⁵ Sanguë grë miech ne racntseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co. ¹⁶ Naa gon nac Jesús, naa pxel xanj naa ziaadlu grë ncuaan rii lo luu, zeena grëse zha ne no xnëz naa gacnana. Naa ga briequia lo xtii rey David, per naa psan grëse xmengol me. Rreequia naa nac mel ngol ne rziini ral sil.

¹⁷ Zigtaa Espíritu Sant, zigtaa grë zha ne no xnëz me, zha ne rreequia gac tsieel me ga, laa zho quiambëz me; niicle zha ne gacnanragaa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

¹⁸ Grëse zha ne gon grë mine pxobneñ Dios nu, laa naa rso diidz lo zho: Gneed zho ncuaane nacda, sac zha ne gdziibbraa diidz zeene gnee zhow, scagaa me, lo grë guielnë ne raquiet nu yгаа miech, zdziibbraa me mine yгаа zho; ¹⁹ zha ne ctichegaa palala zeene gnee zhow, scaque stiche me lë zho lo libr ne zhobnee cho nac zha ne yгаа guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

²⁰ Meñ ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

²¹ Me nac men ne gacnieñ to grëse to, me gunlay to.

Juan